

甘肃史地考述

GANSU SHIDI KAOSHU

(上)

主编 张军利

天津出版传媒集团

 天津古籍出版社

甘肃史地考述

GANSU

SHIDI

KAOSHU

(上)

主编 张军利

天津出版传媒集团



天津古籍出版社

图书在版编目(C I P)数据

甘肃史地考述 / 张军利主编. -- 天津 : 天津古籍出版社, 2018. 2

ISBN 978-7-5528-0610-6

I. ①甘… II. ①张… III. ①甘肃—地方史—研究
IV. ①K294. 2

中国版本图书馆CIP数据核字(2017)第321110号

甘肃史地考述

张军利 主编

出版人: 张 玮

责任编辑: 门 辉

装帧设计: 王小英

出版发行: 天津古籍出版社有限公司出版
全国新华书店发行

地 址: 天津市和平区西康路 35 号

邮 编: 300051

网 址: <http://www.tjabc.net>

印 刷: 兰州大众彩印包装有限公司

开 本: 710 毫米×1020 毫米 1/16

印 张: 63.5

插 页: 2

字 数: 836 千字

版 次: 2018 年 2 月第 1 版

印 次: 2018 年 2 月第 1 次印刷

印 数: 1~2000 册

书 号: ISBN 978-7-5528-0610-6

定 价: 162.00 元/套


本书所有内容经作者同意授权, 并许可使用。
未经同意, 不得以任何形式复制转载。

《甘肃史地考述》

主 编 张军利

副主编 钱 旭 郝宗维 李振宇

张占社 薛方昱



序 言

刘光华

文化是人类创造的精神财富，文化引领着人类走向文明。我们要继承中华民族优秀的传统文化，就必须在历史的大潮中追寻中华民族的文明记忆，传承其特有的精神基因，并站在新时代的起点上，创造出独具中国特色的社会主义新文化，中华文明才能生生不息、经久不衰，才能展示出自己独立的品格和独特的魅力。

甘肃是中华民族的发祥地之一。远在 20 万年前的旧石器时代，我们的先民们就在这里劳动生息。新石器时代的文化遗址遍布全省各地，是传说中伏羲氏和黄帝的故乡。夏商之际，周人曾在陇东地区发展农业。商周之际，秦人先祖迁居于甘肃东部，寻找发展机遇。两周之际，秦襄公平戎救周，建立秦国。到春秋时期秦穆公霸西戎，甘肃东部成为秦国向东拓展的大后方。秦商鞅变法，吸收东方各国变革的先进经验，改革秦国的落后制度，促使秦国强大起来。公元前 221 年，秦始皇帝终于灭亡六国，建立了统一的集权的大帝国。甘肃对中国历史的贡献可谓大矣！

汉武帝雄才大略，派霍去病攻打匈奴，又大力开发河西走廊地区，修筑边塞，设置四郡，徙民实边，发展农业经济，促进了河西走廊由畜牧业向农耕业的转变；张骞受命联络西域，确立了汉朝与西域各国的关系，开拓了著名的“丝绸之路”，甘肃成了中原与西域交往的黄金通道。魏晋南北朝时期，以河西走廊为中心，出现了前凉、后凉、南凉、北凉、西凉等“五凉”政权，汉族与匈奴、氐、羌、鲜卑之间的民族融合，进入到一个新阶段。汉族中融入了少数民族的新鲜血液。

隋唐时期，是陆上“丝绸之路”的鼎盛时期，也是甘肃历史发展的兴

盛时期。举世瑰宝敦煌莫高窟、天水麦积山石窟,历经十六国、北朝至隋唐发展至巅峰,全面地反映了甘肃社会发展的盛况。

唐代吐蕃兴起于青藏高原,还一度控制着西北的大部地区。接着党项在今宁夏、河西建立西夏,与宋、金对峙,陆上中西交通受到影响,加之海上中外交通的发展,陆上丝绸之路逐渐衰落。

元代统一中国,取甘州、肃州首字而设甘肃行省。藏族与蒙古统治者在凉州举行会谈,从而加入了中华民族的大家庭。明清甘肃的农业经济有所发展,陆上丝路贸易有所恢复。但阶级矛盾尖锐,民族矛盾复杂,统治阶级腐败,以及近代军阀割据,甘肃战乱频仍,社会遭到严重破坏,民生凋敝,广大民众处在水深火热之中。

中华人民共和国成立后,特别是中共十一届三中全会以来,甘肃各族人民在中国共产党的领导下,进行了深入的社会改革和大规模的社会主义建设,人民和睦相处,安居乐业,在改革、建设中艰苦奋斗,只争朝夕,甘肃面貌发生了巨大变化。

以史为鉴,可以知兴替。在中共十九大精神的鼓舞下,甘肃省地方史志办公室编辑了《甘肃史地考述》,对于提高甘肃地方史志工作者的业务水平,更好地适应社会主义新时代的要求,一定会起到积极的作用。《甘肃史地考述》重点编选了二十五史及历史地理著作中有关甘肃的最基本资料;同时,还将有关甘肃史地的一些比较重要的研究文章进行筛选,其内容主要包括政权更迭、郡县建置、民族迁徙、历史地理等诸多方面。这些文章从史料出发,论述公允,观点新颖,是对甘肃重大历史地理问题的深入阐述。《甘肃史地考述》的编辑出版,对提高地方史志工作者的业务水平,十分有必要。我们地方史志工作者一定要边干边学,汲取营养,提升自己,以适应新时代的要求。谱写时代新篇章。

是为序。

2018年1月10日

(作者:兰州大学教授、博士生导师、《甘肃通史》主编)

古代文献选

目 录

古代文献选

《史记·周本纪》·····	001
《史记·秦本纪》·····	039
《汉书·匈奴传》·····	069
《后汉书·西羌传》·····	117
《旧唐书·吐蕃传》·····	137
《汉书·地理志》·····	169
《后汉书·郡国志》·····	175
《晋书·地理志》·····	179
《魏书·地形志》·····	183
《隋书·地理志》·····	189
《旧唐书·地理志》·····	195
《新唐书·地理志》·····	199
《宋史·地理志》·····	205
《金史·地理志》·····	219
《元史·地理志》·····	223
《明史·地理志》·····	229
《清史稿·地理志》·····	237
《水经注》·····	251
《元和郡县图志》·····	265
《通典》·····	293

《太平寰宇记》·····	303
《元丰九域志》·····	359
《读史方輿纪要》·····	373

《史记·周本纪》

周后稷，名弃^①。其母有郤氏女，曰姜原^②。姜原为帝喾元妃^③。姜原出野，见巨人迹，心忻然说，欲践之，践之而身动如孕者。居期而生子，以为不祥，弃之隘巷^④，马牛过者皆辟不践；徙置之林中，适会山林多人，迁之；而弃渠中冰上，飞鸟以其翼覆荐之。姜原以为神，遂收养长之。初欲弃之，因名曰弃^⑤。

注：①《正义》因太王所居周原，因号曰周。《地理志》云右扶风美阳县岐山在西北中水乡，周太王所邑。《括地志》云：“故周城一名美阳城，在雍州武功县西北二十五里，即太王城也。”②《集解》《韩诗章句》曰：“姜，姓。原，字。”或曰姜原，谥号也。《正义》：郤，天来反，亦作“藜”，同。《说文》云：“郤，炎帝之后，姜姓，封郤，周弃外家。”③《索隐》譙周以为“弃，帝喾之胄，其父亦不着”，与此纪异也。④《索隐》《诗》《大雅》《生民篇》所云“诞置之隘巷，牛羊腓字之；诞置之寒冰，为覆翼之”，是其事也。⑤《正义》《古史考》云“弃，帝喾之胄，其父亦不着”，与此文稍异也。

弃为儿时，屹如人之志。其游戏，好种树麻、菽，麻、菽美。及为成人，遂好耕农，相地之宜，宜谷者稼穡焉^①，民皆法则之。帝尧闻之，举弃为农师，天下得其利，有功。帝舜曰：“弃，黎民始饥^②，尔后稷播时百谷。”封弃于郤^③，号曰后稷，别姓姬氏^④。后稷之兴，在陶唐、虞、夏之际，皆有令德。

注：①《正义》种曰稼，敛曰穡。②《集解》徐广曰：“《尚书》云‘祖饥’，故此作‘始饥’。祖，始也。”③《集解》徐广曰：“今藜乡在扶风。”《索隐》即《诗》生民曰“有郤家室”是也。“郤即藜”，古今字异耳。《正义》《括地志》云：“故藜城一名武功城，在雍州武功县西南二十二里，古郤国，后稷所封也。有后稷及姜嫄祠。”毛萇云：“郤，姜嫄国也，后稷所生。尧见天因郤

而生后稷，故因封于郃也。”④《集解》礼纬曰：“祖以履大迹而生。”

后稷卒^①，子不窋立^②。不窋末年，夏后氏政衰，去稷不务^③，不窋以失其官而奔戎狄之间。不窋卒，子鞠立。鞠卒，子公刘立。公刘虽在戎狄之间，复修后稷之业，务耕种，行地宜，自漆、沮度渭，取材用^④，行者有资，居者有畜积，民赖其庆。百姓怀之，多徙而保归焉。周道之兴自此始，故诗人歌乐思其德^⑤。公刘卒，子庆节立，国于豳^⑥。

注：①《集解》《山海经》《大荒经》曰：“黑水青水之间有广都之野，后稷葬焉。”皇甫谧曰：“冢去中国三万里也”。②《索隐》《帝王世纪》云“后稷纳媯氏，生不窋”，而譙周按《国语》云“世后稷，以服事虞、夏”，言世稷官，是失其代数也。若以不窋亲弃之子，至文王千余岁唯十四代，实亦不合事情。《正义》《括地志》云：“不窋故城在庆州弘化系南三里。即不窋在戎狄所居之城也。”《毛诗·疏》云：“虞及夏、殷共有千二百岁。每世在位皆八十年，乃可充其数耳。命之短长，古今一也，而使十五世君在位皆八十许载，子必将老始生，不近人情之甚。以理而推，实难据信也。”③《集解》韦昭曰：“夏太康失国，废稷之官，不复务农。”《索隐》《国语》云“弃稷不务”。此云“去稷”者，是太史公恐“弃”是后稷之名，故变文云“去”也。言夏政衰，不窋去稷官，不服务农者也。④《正义》公刘从漆县漆水南渡渭水，至南山取材木为用也。《括地志》云：“豳州新平县即汉漆县也。漆水出岐州普润县东南岐山漆溪漆，东入渭。”⑤《索隐》即《诗》《大雅篇》“笃公刘”是也。⑥《集解》徐广曰：“新平漆县之东北有豳亭。”《索隐》豳即邠也，古今字异耳。《正义》《括地志》云：“豳州新平县即汉漆县，诗豳国，公刘所邑之地也。”

庆节卒，子皇仆立。皇仆卒，子差弗立。差弗卒，子毁隃立^①。毁隃卒，子公非立^②。公非卒，子高圉立^③。高圉卒，子亚圉立^④。亚圉卒，子公叔祖类立^⑤。公叔祖类卒，子古公亶父立。古公亶父复修后稷、公刘之业，积德行义，国人皆戴之。熏育戎狄攻之，欲得财物，予之。已复攻，欲得地与民。民皆怒，欲战。古公曰：“有民立君，将以利之。今戎狄所为攻战，以吾地与民。民之在我，与其在彼，何异。民欲以我故战，杀人父子而君之，予不

忍为。”乃与私属遂去豳，度漆、沮^⑥，逾梁山^⑦，止于岐下^⑧。豳人举国扶老携弱，尽复归古公于岐下。及他旁国闻古公仁，亦多归之。于是古公乃贬戎狄之俗，而营筑城郭室屋，而邑别居之^⑨。作五官有司^⑩。民皆歌乐之，颂其德^⑪。

注：①《集解》音逾。《世本》作“榆”。《索隐》《系本》作“伪榆”。②《索隐》《系本》云：“公非辟方。”皇甫谧云：“公非字辟方也。”③《集解》宋衷曰：“高圉能率稷者也，周人报之。”《索隐》《系本》云：“高圉侯侔。”④《集解》《世本》云：“亚圉云都。”皇甫谧云：“云都，亚圉字。”《索隐》《汉书·古今表》曰：“云都，亚圉弟。”按：如此说，则辟方侯侔亦皆二人之名，实未能详。⑤《索隐》《系本》云：“太公组绀诸盩。”三代世表称叔类，凡四名。皇甫谧云“公祖一名组绀诸盩，字叔类，号曰太公”也。⑥《集解》徐广曰：“水在杜阳岐山。杜阳县在扶风。”⑦《正义》《括地志》云：“梁山在雍州好畤县西北十八里。”郑玄云：“岐山在梁山西南。”然则梁山横长，其东当夏阳，西北临河，其西当岐山东北，自豳适周，当逾之矣。⑧《集解》徐广曰：“山在扶美阳西北，其南有周原。”駉案：皇甫谧云“邑于周地，故始改国曰周”。⑨《集解》徐广曰：“分别而为邑落也。”⑩《集解》礼记曰：“天子之五官曰司徒、司马、司空、司士、司寇，典司五众。”郑玄曰：“此殷时制。”⑪《索隐》即诗颂云“后稷之孙，实维太王，居岐之阳，实始翦商”是也。

古公有长子曰太伯，次曰虞仲。太姜生少子季历^①，季历娶太任^②，皆贤妇人^③，生昌，有圣瑞^④。古公曰：“我世当有兴者，其在昌乎？”长子太伯、虞仲知古公欲立季历以传昌，乃二人亡如荆蛮^⑤，文身断发^⑥，以让季历。

注：①《正义》《国语注》云：“齐、许、申、吕四国，皆姜姓也，四岳之后，太姜之家。太姜，太王之妃，王季之母。”②《集解》列女传曰：“太姜，有邠氏之女。太任，挚任氏之中女。”《正义》《国语注》云：“挚、畴二国，任姓。奚仲，仲虺之后，太任之家。太任，王季之妃，文王母也。”③《正义》《列女传》云：“太姜，太王娶以为妃，生太伯、仲雍、王季。太姜有色而贞顺，率导诸子，至于成童，靡有过失。太王谋事必于太姜，迁徙必与。太任，王季娶以为妃。太任之性，端壹诚庄，维德之行。及其有身，目不视恶色，

耳不听淫声，口不出傲言，能以胎教子，而生文王。”此皆有贤行也。

④《正义》《南书帝命验》云：“季秋之月甲子，赤爵衔丹书入于郢，止于昌户。其书云：‘敬胜怠者吉，怠胜敬者灭，义胜欲者从，欲胜义者凶。凡事不强则枉，不敬则不正。枉者废灭，敬者万世。以仁得之，以仁守之，其量百世。以不仁得之，以仁守之，其量十世。以不仁得之，不仁守之，不及其世。’”此盖圣瑞。⑤《正义》太伯奔吴，所居城在苏州北五十里常州无锡县界梅里村，其城及冢见存。而云“亡荆蛮”者，楚灭越，其地属楚，秦灭楚，其地属秦，秦讳“楚”改曰“荆”，故通号吴越之地为荆。及北人书史加云“蛮”，势之然也。⑥《集解》应劭曰：“常在水中，故断其发，文其身，以象龙子，故不见伤害。”

古公卒，季历立，是为公季。公季修古公遗道，笃于行义，诸侯顺之。

公季卒^①，子昌立，是为西伯。西伯曰文王^②，遵后稷、公刘之业，则古公、公季之法，笃仁，敬老，慈少。礼下贤者，日中不暇食以待士，士以此多归之。伯夷、叔齐在孤竹^③，闻西伯善养老，盖往归之。太颠、闳夭、散宜生、鬻子、辛甲大夫之徒皆往归之^④。

注：①《集解》皇甫谧曰：“葬鄠县之南山。”②《正义》《帝王世纪》云：“文王龙颜虎肩，身长十尺，胸有四乳。”雒书灵准听云：“苍帝姬昌，曰角鸟鼻，高长八尺二寸，圣智慈理也。”③《集解》应劭曰：“在辽西令支。”《正义》《括地志》云：“孤竹故城在平州卢龙县南十二里，殷时诸侯孤竹国也，姓墨胎氏。”④《集解》刘向《别录》曰：“鬻子名熊，封于楚。辛甲，故殷之臣，事纣。盖七十五谏而不听，去至周，召公与语，贤之，告文王，文王亲自迎之，以为公卿，封长子。”长子，今上党所治县是也。

崇侯虎谮西伯于殷纣曰：“西伯积善累德，诸侯皆向之，将不利于帝。”帝纣乃囚西伯于羑里。闳夭之徒患之，乃求有莘氏美女^①，骊戎之文马^②，有熊九驷^③，他奇怪物，因殷嬖臣费仲而献之纣。纣大说，曰：“此一物足以释西伯^④，况其多乎！”乃赦西伯，赐之弓矢斧钺，使西伯得征伐。曰：“谮西伯者，崇侯虎也。”西伯乃献洛西之地，以请纣去炮烙之刑。纣许之。

注：①《正义》《括地志》云：“古莘国城在同州河西县南二十里。世本

云莘国，姒姓，夏禹之后，即散宜生等求有莘美女献纣者。”②《正义》《括地志》云：“骊戎故城在雍州新丰县东南十六里，殷、周时骊戎国城也。”按：骏马赤鬣编身，目如黄金，文王以献纣也。③《正义》《括地志》云：“郑州新郑县，本有熊氏之墟也。”按：九骊，三十六匹马也。④《索隐》一物，谓莘氏之美女也，以殷纣淫昏好色，故知然。

西伯阴行善，诸侯皆来决平。于是虞、芮之人^①有狱不能决，乃如周。入界，耕者皆让畔，民俗皆让长。虞、芮之人未见西伯，皆惭，相谓曰：“吾所争，周人所耻，何往为，只取辱耳。”遂还，俱让而去。诸侯闻之，曰：“西伯盖受命之君。”

注：①《集解》《地理志》虞在河东大阳县，芮在冯翊临晋县。《正义》《括地志》云：“故虞城在陕州河北县东北五十里虞山之上，古虞国也。故芮城在芮城县西二十里，古芮国也。晋太康地记云虞西百四十里有芮城。”《括地志》又云：“闲原在河北县西六十五里。”《诗云》“虞芮质阙成”。毛萇云“虞芮之君相与争田，久而不平。”乃相谓曰：“西伯仁人，盍往质焉。”乃相与朝周。入其境，则耕者让畔，行者让路。入其邑，男女异路，班白不提挈。入其朝，士让为大夫，大夫让为卿。二国君相谓曰：“我等小人，不可履君子之庭。”乃相让所争地以为闲原，至今尚在。注引《地理志》芮在临晋者，恐疏。然闲原在河东，复与虞、芮相接，临晋在河西同州，非临晋芮乡明矣。

明年，伐犬戎^①。明年，伐密须^②。明年，败耆国^③。殷之祖伊闻之，惧，以告帝纣。纣曰：“不有天命乎？是何能为！”明年，伐邶^④。明年，伐崇侯虎^⑤。而作丰邑^⑥，自岐下而徙都丰。明年，西伯崩^⑦，太子发立，是为武王。

注：①《集解》《山海经》曰：“有人，人面善身，名曰犬戎。”《正义》又云：“黄帝生苗龙，苗龙生融吾，融吾生并明，并明生白犬。白犬有二，是为犬戎。”说文云“赤狄本犬种”，故字从犬。又《后汉书》云“犬戎，盘瓠之后也”，今长沙武林之郡大半是也。又《毛诗·疏》云“犬戎昆夷”是也。②《集解》应劭曰：“密须氏，媯姓之国。”瓚曰：“安定阴密县是。”《正义》《括地志》云：“阴密故城在泾州鹑觚县西，其东接县城，即古密国。”杜预云媯

姓国，在安定阴密县也。③《集解》徐广曰：“一作‘阨’。”《正义》即黎国也。邹诞生云本或作“黎”。孔安国云黎在上党东北。《括地志》云：“故黎城，黎侯国也，在潞州黎城县东十八里。《尚书》云‘西伯既戡黎’是也。”④《集解》徐广曰：“邠城在野王县西北，音于。”《正义》《括地志》云：“故邠城在怀州河内县西北二十七里，古邠国城也。《左传》云：‘邠、晋、应、韩，武王之穆也。’”⑤《正义》皇甫谧云夏鯀封。虞、夏、商、周皆有崇国，崇国盖在丰镐之间。诗云“既伐于崇，作邑于丰”，是国之地也。⑥《集解》徐广曰：“丰在京兆鄠县东，有灵台。镐在上林昆明北，有镐池，去丰二十五里。皆在长安南数十里。”《正义》《括地志》云：“周丰宫，周文王宫也，在雍州鄠县东三十五里。镐在雍州西南三十二里。”⑦《集解》徐广曰：“文王九十七乃崩。”《正义》《括地志》云：“周文王墓在雍州万年县西南二十八里原上也。”

西伯盖即位五十年。其囚羑里，盖益易之八卦为六十四卦^①。诗人道西伯，盖受命之年称王而断虞芮之讼^②。后十年而崩^③，谥为文王^④。改法度，制正朔矣。追尊古公为太王，公季为王季^⑤；盖王瑞自太王兴^⑥。

注：①《正义》《乾凿度》云：“垂黄策者羲，盖卦演德者文，成命者孔也。”《易》《正义》云伏羲制卦，文王《卦辞》，周公《爻辞》，孔《十翼》也。按：太史公言“盖”者，万疑辞也。文王著演《易》之功，作《周纪》方赞其美，不敢专定重易，故称“盖”也。②《正义》二国相让后，诸侯归西伯者四十余国，咸尊西伯为王。盖此年受命之年称王也。《帝王世纪》云：“文王即位四十二年，岁在鹑火，文王更为受命之元年，始称王矣。”又《毛诗》《疏》云：“文王九十七而终，终时受命九年，则受命之元年年八十九也。”③《正义》十当为“九”，其说在后。④《正义》《谥》《法》：“经纬天地曰文。”⑤《正义》易纬云“文王受命，改正朔，布王号于天下”。郑玄信而用之，言文王称王，已改正朔布王号矣。按：天无二日，土无二王，岂殷纣尚存而周称王哉？若文王自称王改正朔，则是功业成矣，武王何复得云大勋未集，欲卒父业也？礼记大传云“牧之野武王成大事而退，追王太王亶父、王季历、文王昌”。据此文乃是追王为王，何得文王自称王改正朔也？⑥《正

义》古公在邠，被戎狄攻战夺民。太王曰“民之在我，与彼何异，杀人父子而君之，予不忍为”。遂远去邠，止于岐下。邠人举国尽归古公。他国闻古公仁，亦多归之。乃贬戎狄之俗，为室屋邑落，而分别居之。季历又生昌，有圣瑞。盖是王瑞自太王时而兴起也。然自“西伯盖即位五十年”以下至“太王兴”，在西伯崩后重述其事，为经传不同，不可全弃，乃略而书之，引次其下，事必可疑，故数言“盖”也。

武王即位^①，太公望为师，周公旦为辅，召公、毕公之徒左右王，师修文王绪业。

注：①《正义》溢法：“克定祸乱曰武。”春秋元命包云：“武王骍齿，是谓刚强也。”

九年，武王上祭于毕^①。东观兵，至于盟津^②。为文王木主，载以车，中军。武王自称太子发，言奉文王以伐，不敢自专。乃告司马、司徒、司空、诸节^③：“齐栗，信哉！予无知，以先祖有德臣，小子受先功^④，毕立赏罚，以定其功。”遂兴师。师尚父号曰^⑤：“总尔众庶，与尔舟楫，后至者斩。”武王渡河，中流，白鱼跃入王舟中^⑥，武王俯取以祭。既渡，有火自上复于下，至于王屋，流为乌，其色赤，其声魄云^⑦。是时，诸侯不期而会盟津者八百诸侯。诸侯皆曰：“纣可伐矣。”武王曰：“女未知天命，未可也。”乃还师归。

注：①《集解》马融曰：“毕，文王墓地名也。”《索隐》按：文云“上祭于毕”。则毕，天星之名。毕星主兵，故师出而祭毕星也。《正义》上音时掌反。《尚书·武成篇》云：“我文考文王，诞膺天命，以抚方夏，惟九年，大统未集。”《太誓篇·序》云：“惟十有一年，武王伐殷。”《太誓篇》云：“惟十有三年春，大会于孟津。”《大戴礼》云：“文王十五而生武王。”则武王少文王十四岁矣。《礼记》《文王世子》云：“文王九十七而终，武王九十三而终。”按：文王崩时武王已八十三矣，八十四即位，至九十三崩，武王即位适满十年。言十三年伐纣者，续文王受命年，欲明其卒父业故也。《金縢篇》云：“惟克商二年，王有疾，不豫。”按：文王受命九年而崩，十一年武王服阕，观兵孟津，十三年克纣，十五年有疾，周公请命，王有瘳，后四年而

崩，则武王年九十三矣。而太史公云九年王观兵，十一年伐纣，则以为武王即位年数，与《尚书》违，甚疏矣。②《集解》徐广曰：“谯周云史记武王十一年东观兵，十三年克纣。”③《集解》马融曰：“诸受符节有司也。”④《集解》徐广曰：“一云：‘予小子受先公功。’”⑤《集解》郑玄曰：“号令之军法重者。”⑥《集解》马融曰：“鱼者，介鳞之物，兵象也。白者，殷家之正色，言殷之兵众与周之象也。”《索隐》此已下至火复王屋为乌，皆见《周书》及《今文泰誓》。⑦《集解》马融曰：“王屋，王所居屋。流，行也。魄然，安定意也。”郑玄曰：“《书说》云乌有孝名。武王卒父大业，故乌瑞臻。赤者，周之正色也。”《索隐》按：《今文泰誓》“流为雕”。雕，鸷鸟也。马融云“明武王能伐纣”，郑玄云“乌是孝鸟，言武王能终父业”，亦各随文而解也。

居二年，闻纣昏乱暴虐滋甚，杀王子比干，囚箕子。太师疵、少师纒抱其乐器而奔周。于是武王遍告诸侯曰：“殷有重罪，不可以不毕伐①。”乃遵文王，遂率戎车三百乘，虎贲三千人②，甲士四万五千人，以东伐纣。十一年十二月戊午，师毕渡盟津③，诸侯咸会。曰：“孳孳无怠！”武王乃作太誓，告于众庶：“今殷王纣乃用其妇人之言，自绝于天，毁坏其三正④，离遏其王父母弟⑤，乃断弃其先祖之乐，乃为淫声，用变乱正声，怡说妇人⑥。故今予发维共行天罚。勉哉夫子⑦，不可再，不可三！”

注：①《集解》徐广曰：“一作‘灭’。”②《集解》孔安国曰：“虎贲，勇士称也。若虎贲兽，言其猛也。”③《正义》毕，尽也。尽从河南渡河北。④《集解》马融曰：“动逆天地人也。”《正义》按：三正，三统也。周以建子为天统，殷以建丑为地统，夏以建寅为人统也。⑤《集解》郑玄曰：“王父母弟，祖父母之族。必言‘母弟’，举亲者言之也。”⑥《集解》徐广曰：“怡，一作‘辞’。”⑦《集解》郑玄曰：“夫子，丈夫之称。”

二月①甲子昧爽②，武王朝至于商郊牧野，乃誓③。武王左杖黄钺，右秉白旄④，以麾。曰：“远矣西土之人⑤！”武王曰：“嗟！我有国家君⑥，司徒、司马、司空，亚旅、师氏⑦，千夫长、百夫长⑧，及庸、蜀、羌、鬻、微、纁、彭、濮人●，称尔戈⑩，比尔干，立尔矛，予其誓。”王曰：“古人有言‘牝鸡无晨。牝鸡之晨，惟家之索⑪’。今殷王纣维妇人言是用，自弃其先祖肆祀不答⑫，昏

弃其家国，遗其王父母弟不用，乃维四方之多罪逋逃是崇是长，是信是使^⑬，俾暴虐于百姓，以奸轨于商国。今予发维共行天之罚。今日之事，不过六步七步，乃止齐焉^⑭，夫子勉哉！不过于四伐五伐六伐七伐，乃止齐焉^⑮，勉哉夫子！尚桓桓^⑯，如虎如罴，如豺如离^⑰，于商郊，不御克奔，以役西土^⑱，勉哉夫子！尔所不勉，其于尔身有戮。”^⑲誓已，诸侯兵会者车四千乘，陈师牧野。

注：①《集解》徐广曰：“一作‘正’。此建丑之月，殷之正月，周之二月也。”②《集解》孔安国曰：“昧，冥也；爽，明；蚤旦也。”③《集解》孔安国曰：“癸亥夜陈，甲子朝誓之。”《正义》《括地志》云：“卫州城，故老云周武王伐纣至于商郊牧野，乃筑此城。酈道元《水经注》云自朝歌南至清水，土地平衍，据皋跨泽，悉牧野也。”《括地志》又云：“纣都朝歌在卫州东北七十三里朝歌故城是也。本妹邑，殷王武丁始都之。《帝王世纪》云帝乙复济河北，徙朝歌，其子纣仍都焉。”④《集解》孔安国曰：“钺，以黄金饰斧。左手杖钺，示无事于诛；右手把旄，示有事于教令。”⑤《集解》孔安国曰：“劳苦之。”⑥《集解》马融曰：“冢，大也。”⑦《集解》孔安国曰：“亚，次。旅，众大夫也，其位次卿。师氏，大夫官，以兵守门。”⑧《集解》孔安国曰：“师率，卒率。”⑨《集解》孔安国曰：“八国皆蛮夷戎狄。羌在西。蜀，叟。髳、微在巴蜀。笮、彭在西北。庸、濮在江汉之南。”马融曰：“武王所率，将来伐纣也。”《正义》“髳音矛”。《括地志》云：“房州竹山县及金州，古庸国。益州及巴、利等州，皆古蜀国。陇右岷、洮、丛等州以西，羌也。姚府以南，古髳国之地。戎府之南，古微、泸、彭三国之地。濮在楚西南。有髳州、微、濮州、泸府、彭州焉。武王率西南夷诸州伐纣也。”⑩《集解》孔安国曰：“称，举也。”⑪《集解》孔安国曰：“索，尽也。喻妇人知外事，雌代雄鸣，则家尽也。”⑫《集解》郑玄曰：“肆，祭名。答，问也。”⑬《集解》孔安国曰：“言纣弃其贤臣，而尊长逃亡，罪人信用之也。”⑭《集解》孔安国曰：“今日战事，不过六步七步，乃止相齐。言当旅进一心也。”⑮《集解》孔安国曰：“伐谓击刺也。少则四五，多则六七，以为例也。”⑯《集解》郑玄曰：“武威貌。”⑰《集解》徐广曰：“此训与‘螭’同。”⑱《集解》郑玄曰：“御，强

御，谓强暴也。克，杀也。不得暴杀纣师之奔走者，当以为周之役也。”⑩《集解》郑玄曰：“所言且也。”

帝纣闻武王来，亦发兵七十万人距武王。武王使师尚父与百夫致师^①，以大卒驰帝纣师^②。纣师虽众，皆无战之心，心欲武王亟入。纣师皆倒兵以战，以开武王。武王驰之，纣兵皆崩畔纣。纣走，反入登于鹿台之上，蒙衣其殊玉^③，自燔于火而死。武王持大白旗以麾诸侯，诸侯毕拜武王，武王乃揖诸侯^④，诸侯毕从。武王至商国^⑤，商国百姓咸待于郊。于是武王使群臣告语商百姓曰：“上天降休！”商人皆再拜稽首，武王亦答拜^⑥。遂入，至纣死所。武王自射之，三发而后下车，以轻剑击之^⑦，以黄钺斩纣头，县大白之旗。已而至纣之嬖妾二女，二女皆经自杀。武王又射三发，击以剑，斩以玄钺^⑧，县其头小白之旗。武王已乃出复军。

注：①《集解》周礼：“环人，掌致师。”郑玄曰：“致师者，致其必战之志也。古者将战，先使勇力之士犯敌焉。”《春秋传》曰：“楚许伯御乐伯，摄叔为右，以致晋师。许伯曰：‘吾闻致师者，御靡旌，摩垒而还。’乐伯曰：‘吾闻致师者，左射以菽，代御执轡，御下捫马，掉鞅而还。’摄叔曰：‘吾闻致师者，右入垒，折馘，执俘而还。’皆行其所闻而复。”②《集解》徐广曰：“帝，一作‘商’。”《正义》大卒，谓戎车三百五十乘，士卒二万六千二百五十人，有虎贲三千人。③《正义》衣音于既反。《周书》云：“甲子夕，纣取天智玉琰五，环身以自焚。”注：“天智，玉之善者，缝环其身自厚也。凡焚四千玉也，庶玉则销，天智玉不销，纣身不尽也。”④《正义》武王率诸侯伐天子，天子已死，诸侯毕贺，故武王揖诸侯，言先拊循其心也。⑤《正义》谓至朝歌。⑥《索隐》武王虽以臣伐君，颇有惭德，不应答商人之拜，太史公失辞耳。寻上文，诸侯毕拜贺武王，武王尚且报揖，无容遂下拜商人。⑦《正义》《周书》作“轻吕击之”。轻吕，剑名也。⑧《集解》《司马法》曰：“夏执玄钺。”宋均曰：“玄钺用铁，不磨砺。”

其明日，除道，修社及商纣宫。及期，百夫荷罕旗以先驱^①。武王弟叔振铎奉陈常车，周公旦把大钺，毕公把小钺，以夹武王。散宜生、太颠、闳夭皆执剑以卫武王。既入，立于社南大卒之左，左右毕从。毛叔郑奉明水^②，

卫康叔封布兹^③，召公奭赞采^④，师尚父牵牲。尹佚莢祝曰^⑤：“殷之末孙季纣^⑥，殄废先王明德，侮蔑神祇不祀，昏暴商邑百姓，其章显闻于天上帝。”于是武王再拜稽首，曰：“膺更大命，革殷，受天明命。”武王又再拜稽首，乃出。

注：①《集解》蔡邕《独断》曰：“前驱有九旒云罕。”《东京》赋曰：“云罕九旒。”薛综曰：“旒，旗名。”②《集解》《周礼》曰：“司烜氏以鉴取明水于月。”郑玄曰：“鉴，镜属也。取月之水，欲得阴阳之絜气。陈明水以为玄酒。”《索隐》明，明水也。旧本皆无“水”字，今本有“水”字者多，亦是也。若惟云“奉明”，其义未见，不知“奉明”何物也。“烜音毁”。③《集解》徐广曰：“兹者，籍席之名。诸侯病曰‘负兹’。”《索隐》兹，一作“苙”，公明草也。言“兹”，举成器；言“苙”，见絜草也。④《正义》赞，佐也。采，币也。⑤《正义》尹佚读莢书祝文以祭社也。⑥《正义》《周书》作“末孙受德”。受德，纣字也。

封商纣子禄父殷之余民。武王为殷初定未集，乃使其弟管叔鲜、蔡叔度相禄父治殷^①。已而命召公释箕子之囚^②。命毕公释百姓之囚，表商容之间。命南宫括散鹿台之财，发钜桥之粟，以振贫弱萌隶。命南宫括、史佚展九鼎保玉^③。命闳夭封比干之墓^④。命宗祝享祠于军。乃罢兵西归。行狩，记政事，《作武成》^⑤。封诸侯，班赐宗彝，作《分殷之器物》^⑥。武王追思先圣王，乃褒封神农之后于焦^⑦，黄帝之后于祝^⑧，帝尧之后于蓟^⑨，帝舜之后于陈^⑩，大禹之后于杞^⑪。于是封功臣谋士，而师尚父为首封。封尚父于营丘，曰齐^⑫。封弟周公旦于曲阜，曰鲁^⑬。封召公奭于燕^⑭。封弟叔鲜于管^⑮，弟叔度于蔡^⑯。余各以次受封。

注：①《正义》《地理志》云河内，殷之旧都。周既灭殷，分其畿内为三国，诗邶、鄘、卫是。邶以封纣子武庚；鄘，管叔尹之；卫，蔡叔尹之：以监殷民，谓之三监。《帝王世纪》云：“自殷都以东为卫，管叔监之；殷都以西为鄘，蔡叔监之；殷都以北为邶，霍叔监之；是为三监。”按：二说各异，未详也。②《集解》徐广曰：“释，一作‘原’。”③《集解》徐广曰：“保，一作‘宝’。”④《正义》封，谓益其土及画疆界。《括地志》云：“比干墓在卫州汲

县北十里二百五十步。”⑤《集解》孔安国曰：“武功成也。”⑥《集解》郑玄云：“宗彝，宗庙樽也。作《分器》，著王之命及受物。”⑦《集解》《地理志》弘农陕县有焦城，故焦国也。⑧《正义》《左传》云：“祝其，实夹谷。”杜预云：“夹谷即祝其也。”服虔云：“东海郡祝其县也。”⑨《集解》《地理志》燕国有蓟县。⑩《正义》《括地志》云：“陈州宛丘县在陈城中，即古陈国也。帝舜后遏父为周武王陶正，武王赖其器用，封其子妘满于陈，都宛丘之侧。”⑪《正义》《括地志》云：“汴州雍丘县，古杞国。《地理志》云古杞国理此城。周武王封禹后于杞，号东楼公，二十一代为楚所灭。”⑫《集解》《尔雅》曰：“水出其前而左曰营丘。”郭璞曰：“今齐之营丘，淄水过其南及东。”《正义》《水经注》今临淄城中有丘云。青州临淄县古营丘之地，品望所封查之都也。营丘在县北百步外城中。《輿地志》云秦立为县，城临淄水故曰临淄也。⑬《正义》应劭曰：“曲阜在鲁城中，委曲长七八里。”《正义》《帝王世纪》云：“炎帝自陈营都于鲁曲阜。黄帝自穷桑登帝位，后徙曲阜。少昊邑于穷桑，以登帝位，都曲阜。颛顼始都穷桑，徙商丘。”穷桑在鲁北，或云穷桑即曲阜也。又为大庭氏之故国，又是商奄之地。皇甫谧云：“黄帝生于寿丘，在鲁城东门之北。居轩辕之丘，《山海经》云‘此地穷桑之际，西射之南’是也。”《括地志》云：“兖州曲阜县外城即周公旦子伯禽所筑古鲁城也。”⑭《正义》封帝尧之后于蓟，封召公奭于燕，观其文稍似重也。《水经注》云蓟城内西北隅有蓟丘，因取名焉。《括地志》云：“燕山在幽州渔阳县东南六十里。徐才《宗国都城记》云周武王封召公奭于燕，地在燕山之野，故国取名焉。”按：周封以五等之爵，蓟、燕二国俱武王立，因燕山、蓟丘为名，其地足自立国。蓟微燕盛，乃并蓟居之，蓟名遂绝焉。今幽州蓟县，古燕国也。⑮《正义》《括地志》云：“郑州管城县外城，古管国城也，周武王弟叔鲜所封。”⑯《正义》《括地志》云：“豫州北七十里上蔡县，古蔡国，武王封弟叔度于蔡是也。县东十里有蔡冈，因名也。”

武王征九牧之君，登豳之阜，以望商邑^①。武王至于周，自夜不寐^②。周公旦即王所，曰：“曷为不寐？”王曰：“告女：维天不飨殷，自发未生于今六十年，麋鹿在牧^③，蜚鸿满野^④。天不享殷，乃今有成^⑤。维天建殷，其登名

民三百六十夫，不显亦不宾灭^⑥，以至今。我未定天保，何暇寐！”王曰：“定天保，依天室，悉求夫恶，贬从殷王受^⑦。日夜劳来^⑧定我西土^⑨，我维显服，及德方明^⑩。自洛汭延于伊汭，居易毋固，其有夏之居^⑪。我南望三涂，北望岳鄙，顾詹有河^⑫，粤詹雒、伊，毋远天室^⑬。”营周居于雒邑而后去^⑭。纵马于华山之阳^⑮，放牛于桃林之虚^⑯；偃干戈，振兵释旅^⑰：示天下不复用也。

注：①《正义》《括地志》云：“幽州三水县西十里有幽原，周先公刘所都之地也。幽城在此原上，因公为名。”按：盖武王登此城望商邑。②《正义》周，镐京也。武王伐纣，还至镐京，忧未定天之保安，故自夜不得寐也。③《集解》徐广曰：“此事出《周书》及《随巢子》，云‘夷羊在牧’。牧，郊也。夷羊，怪物也。”④《索隐》按：高诱曰“蜚鸿，螻蛄也”。言飞虫蔽田满野，故为灾，非是鸿雁也。《随巢子》作“飞拾”，飞拾，虫也。《正义》蜚音飞，古“飞”字也。于今犹当今。于今六十年，从帝乙十年至伐纣年也。麋鹿在牧，喻谗佞小人在朝位也。飞鸿满野，喻忠贤君子见放弃也。言纣父帝乙立后，殷国益衰，至伐纣六十年间，谄佞小人在于朝位，忠贤君子放迁于野。故诗云“鸿雁于飞，肃肃其羽。之子于征，劬劳于野”。毛萇云“之子，侯伯卿士也”。郑玄云“鸿雁知避阴阳寒暑，喻民知去无道就有道”。⑤《索隐》言上天不歆享殷家，故见灾异，我周今乃有成王业者也。⑥《集解》徐广曰：“一云‘不顾亦不宾成’，一又云‘不顾亦不恤’也。”《索隐》言天初建殷国，亦登进名贤之人三百六十夫，既无非大贤，未能兴化致理，故殷家不大光昭，亦不即摈灭，以至于今也。亦见《周书》及《随巢子》，颇复脱错。而刘氏音破六为古，其字义亦无所通。徐广云一本作“不顾亦不宾成”，盖是学者以《周书》及《随巢》不同，逐音改易耳。《随巢子》曰“天鬼不顾亦不宾灭”，天鬼即天神也。⑦《索隐》言今悉求取夫恶人不知天命不顺周家者，咸贬责之，与纣同罪，故曰“贬从殷王受”。⑧《集解》徐广曰：“一云‘肯来’。”⑨《索隐》八字连作一句读。⑩《正义》服，事也。武王答周公云，定知天之安保我位，得依天之宫室，退除殷纣之恶，日夜劳民，又安定我之西土。我维明于事，及我之德教施四方明行之，乃可至于寢寐

也。自此已上至“武王至于周，自夜不寐”，周公问之，故先书。^⑪《集解》徐广曰：“夏居河南，初在阳城，后居阳翟。”《索隐》言自洛汭及伊汭，其地平易无险固，是有夏之旧居。《正义》《括地志》云“自禹至太康与唐、虞皆不易都城”，然则居阳城为禹避商均时，非都之也。《帝王世纪》云：“禹封夏伯，今河南阳翟是。”《汲冢古文》云：“太康居斟寻，羿亦居之，桀又居之。”《括地志》云：“故郟城在洛州巩县西南五十八里也。”^⑫《集解》徐广曰：“《周书度邑》曰‘武王问太公曰，吾将因有夏之居也，南望过于三涂，北瞻望于有河’。”《索隐》杜预云：三涂在陆浑县南。岳，盖河北太行山。鄙，都鄙，谓近岳之邑。《度邑》，《周书》篇名。度音徒各反。《正义》《括地志》云：“太行、恒山连延，东北接碣石，西北接岳山。”言北望太行、恒山之边鄙都邑也。又“晋州霍山一名太岳，在洛西北，恒山在洛东北”。二说皆通。^⑬《正义》粤者，审慎之辞也。言审慎瞻雒、伊二水之阳，无远离此为天室也。^⑭《正义》《括地志》云：“故王城一名河南城，本邾鄆，周公新筑，在洛州河南县北九里苑内东北隅。自平王以下十二王皆都此城，至敬王乃迁都成周，至赧王又居王城也。《帝王世纪》云‘王城西有邾鄆陌’。左传云‘成王定鼎于邾鄆’。京相璠地名云‘邾，山名。鄆，邑名’。”^⑮《正义》华山在华阴县南八里，山南曰阳也。^⑯《集解》孔安国曰：“桃林在华山东。”《正义》《括地志》云：“桃林在陕州桃林县西。《山海经》云‘夸父之山，其北有林焉，名曰桃林，广员三百里，中多马，湖水出焉，北流入河也’。”^⑰《集解》《公羊传》曰：“入曰振旅。”

武王已克殷，后二年，问箕子殷所以亡。箕子不忍言殷恶，以存^①亡国宜告^②。武王亦丑，故问以天道。

注：①《集解》徐广曰：“一作‘前’。”②《索隐》六字连一句读。《正义》箕子殷人，不忍言殷恶，以周国之所宜言告武王，为洪范九类，武王以类问天道。

武王病。天下未集，群公惧，穆卜^①，周公乃祓斋^②，自为质^③，欲代武王，武王有瘳。后而崩^④，太子诵代立，是为成王。

注：①《集解》孔安国曰：“穆，敬也。”②《正义》“祓音废，又音拂”。斋

音札皆反。被谓除不祥求福也。③《正义》音至。周公祓斋，自以贄币告三王，请代武王，武王病乃瘳也。④《集解》徐广曰：“《封禅书》曰‘武王克殷二年，天下未宁而崩’。皇甫谧曰：“武王定位元年岁在乙酉，六年庚寅崩。” 駉按：《皇览》曰“文王、武王、周公冢皆在京兆长安镐聚东社中也”。《正义》《括地志》云：“武王墓在雍州万年县西南二十八里毕原上也。”

成王少，周初定天下，周公恐诸侯畔周，公乃摄行政当国。管叔、蔡叔群弟疑周公，与武庚作乱，畔周。周公奉成王命，伐诛武庚、管叔，放蔡叔。以微子开代殷后，国于宋^①。颇收殷余民，以封武王少弟封为卫康叔^②。晋唐叔得嘉谷^③，献之成王，成王以归周公于兵所^④。周公受禾东土，鲁天子之命^⑤。初，管、蔡畔周，周公讨之，三年而毕定，故初作《大诰》，次作《微子之命》^⑥，次《归禾》，次《嘉禾》，次《康诰》《酒诰》《梓材》^⑦，其事在周公之篇。周公行政七年，成王长，周公反政成王，北面就群臣之位。

注：①《正义》今宋州也。②《正义》《尚书·洛诰》云：“我卜瀍水东，亦惟洛食，以居邶、鄘、卫之众。”又多士篇序云：“成周既成，迁殷顽民。”按：是为东周，古洛阳城也。《括地志》云：“洛阳故城在洛州洛阳县东北二十六里，周公所筑，即成周城也。《輿地志》云‘以周地在王城东，故曰东周。敬王避子朝乱，自洛邑东居此。以其迫厄不受王都，故坏翟泉而广之’。”按：武王灭殷国为邶、鄘、卫，三监尹之。武庚作乱，周公灭之，徙三监之民于成周，颇收其众除余，以封康叔为卫侯，即今卫州是也。孔安国云“以三监之余民，国康叔为卫侯。周公惩其数叛，故使贤母弟主之”也。③《集解》郑玄曰：“二苗同为一穗。”④《集解》徐广曰：“归，一作‘馈’。”⑤《集解》徐广曰：“《尚书序》云‘旅天子之命’。”⑥《集解》孔安国曰：“封命之书。”⑦《集解》孔安国曰：“告康叔以为政之道，亦如梓人之治材也。”

成王在丰，使召公复营洛邑，如武王之意。周公复卜申视，卒营筑，居九鼎焉。曰：“此天下之中，四方入贡道里均。”作《召诰》《洛诰》。成王既迁殷遗民，周公以王命告，作《多士》《无佚》。召公为保，周公为师，东伐淮夷，残奄^①，迁其君薄姑^②。成王自奄归，在宗周^③，作《多方》^④。既绌殷命，袭淮夷，归在丰，作《周官》^⑤。兴正礼乐，度制于是改，而民和睦，颂声

兴^⑥。成王既伐东夷，息慎来贺，王赐荣伯作《贿息慎之命》^⑦。

注：①《集解》郑玄曰：“奄国在淮夷之北。”《正义》奄言于险反。《括地志》云：“泗(水)[州]徐城县北三十里古徐国，即淮夷也。兖州曲阜县奄里，即奄奄国之地也。”②《集解》马融曰：“齐地。”《正义》《括地志》云：“薄姑故城在青州博昌县东北六十里。薄姑氏，殷诸侯，封于此，周灭之也。”③《正义》伐奄归镐京也。④《集解》孔安国曰：“告众方天下诸侯。”⑤《集解》孔安国曰：“言周家设官分职用人之法。”《古文尚书序》，《周官》，《书》篇名。⑥《集解》何休曰：“颂声者，太平歌颂之声，帝王之高致也。”⑦《集解》孔安国曰：“贿，赐也。”马融曰：“荣伯，周同姓，畿内诸侯，为卿大夫也。”

成王将崩，惧太子钊之不任^①，乃命召公、毕公率诸侯以相太子而立之。成王既崩，二公率诸侯，以太子钊见于先王庙，申告以文王、武王之所以为王业之不易，务在节俭，毋多欲，以笃信临之，作《顾命》^②。太子钊遂立，是为康王。康王即位，遍告诸侯，宣告以文武之业以申之，作《康诰》。故成康之际，天下安宁，刑错四十余年不用^③。康王命作策毕公分居里，成周郊^④，作《毕命》。

注：①《正义》钊音招，又古尧反。任，而针反。②《集解》郑玄曰：“临终出命，故谓之顾。顾，将去之意也。”③《集解》应劭曰：“错，置也。民不犯法，无所置刑。”④《集解》孔安国曰：“分别民之居里，异其善恶也。成定东周郊境，使有保护也。”

康王卒，子昭王瑕立。昭王之时，王道微缺。昭王南巡狩不返，卒于江上。其卒不赴告，讳之也^①。立昭王子满，是为穆王。穆王即位，春秋已五十矣。王道衰微，穆王闵文武之道缺，乃命伯冏^②申诫^③太仆^④国之政，作《冏命》^⑤。复宁。

注：①《正义》《帝王世纪》云：“昭王德衰，南征，济于汉，船人恶之，以胶船进王，王御船至中流，胶液船解，王及祭公俱没于水中而崩。其右辛游靡长臂且多力，游振得王，周人讳之。”②《集解》孔安国曰：“伯同冏，臣名也。”③《集解》徐广曰：“一作‘部’。”④《集解》应劭曰：“太仆，周穆王所置。盖太御众仆之长，中大夫也。”⑤《正义》《尚书序》云：“穆王令伯

羿为太仆正。”应劭云：“太仆，周穆王所置。盖太御众仆之长，中大夫也。”

穆王将征犬戎^①，祭公谋父谏曰^②：“不可。先王耀德不观兵。夫兵戢而时动，动则威，观则玩，玩则无震^③。是故周文公之颂曰^④：‘载戢干戈，载櫜弓矢^⑤，我求懿德，肆于时夏，允王保之^⑥。’先王之于民也，茂正其德而厚其性，阜其财求而利其器用，明利害之乡^⑦，以文修之，使之务利而辟害，怀德而畏威，故能保世以滋大。昔我先王世后稷^⑧以服事虞、夏。及夏之衰也^⑨，弃稷不务^⑩，我先王不窋用失其官，而自窜于戎狄之间。不敢怠业，时序其德，遵修其绪^⑪，修其训典，朝夕恪勤，守以敦笃，奉以忠信。奕世载德，不忝前人^⑫。至于文王、武王，昭前之光明而加之以慈和，事神保民，无不欣喜。商王帝辛大恶于民，庶民不忍，诎载武王，以致戎于商牧^⑬。是故先王非务武也，勤恤民隐而除其害也。夫先王之制，邦内甸服，邦外侯服，侯卫宾服^⑭，夷蛮要服，戎翟荒服。甸服者祭^⑮，侯服者祀^⑯，宾服者享^⑰，要服者贡^⑱，荒服者王^⑲。日祭，月祀，时享，岁贡，终王。先王之顺祀也^⑳，有不祭则修意^㉑，有不祀则修言^㉒，有不享则修文^㉓，有不贡则修名^㉔，有不王则修德^㉕，序成而有不至则修刑^㉖。于是有刑不祭，伐不祀，征不享，让不贡，告不王。于是有刑罚之辟，有攻伐之兵，有征讨之备，有威让之命，有文告之辞。布令陈辞而有不至，则增修于德，无勤民于远。是以近无不听，远无不服。今自大毕、伯士之终也^㉗，犬戎氏以其职来王^㉘，天子曰^㉙‘予必以不享征之，且观之兵’，无乃废先王之训，而王几顿乎^㉚？吾闻犬戎树敦^㉛，率旧德而守终纯固，其有以御我矣。”王遂征之，得四白狼四白鹿以归。自是荒服者不至。

注：①《集解》徐广曰：“一作‘吠’。”②《集解》韦昭曰：“祭，畿内之国，周公之后，为王卿士。谋父，字也。”《正义》《括地志》云：“故祭城在郑州管城县东北十五里，郑大夫祭仲邑也。《释例》云‘祭城在河南，上有教仓，周公后所封也’。”③《集解》韦昭曰：“震，惧也。”④《集解》韦昭曰：“文公，周公旦之谥。”⑤《集解》唐固曰：“櫜，韬也。”⑥《集解》韦昭曰：“言武王常求美德，故陈其功于是夏而歌之。信哉武王能保此时夏之美。乐章大者曰夏。”⑦《集解》韦昭曰：“乡，方也。”⑧《集解》韦昭曰：“谓弃

与不窋也。”唐固曰：“父子相继曰世。”⑨《正义》谓太康也。⑩《正义》言太康弃废稷官。⑪《集解》徐广曰：“遵，一作‘选’。”⑫《正义》前人谓后稷也。言不窋亦世载德，不忝后稷。及文王、武王，无不务农事。⑬《正义》紂近郊地，名牧野。⑭《集解》韦昭曰：“此总言之也。”侯，侯圻；卫，卫圻也。⑮《集解》韦昭曰：“供曰祭。”⑯《集解》韦昭曰：“供月祀。”⑰《集解》韦昭曰：“供时享。”⑱《集解》韦昭曰：“供岁贡。”⑲《集解》韦昭曰：“王，王事天子也。诗曰‘莫敢不来王’。”⑳《集解》徐广曰：“外传云‘先王之训’。”㉑《集解》韦昭曰：“先修志意以自责也。畿内近，如王意也。”㉒《集解》韦昭曰：“言号令也。”㉓《集解》韦昭曰：“文，典法也。”㉔《集解》韦昭曰：“名谓尊卑职贡之名号也。”㉕《集解》韦昭曰：“远人不服，则修文德以来之。”㉖《集解》韦昭曰：“序成，谓上五者次序已成，有不至则有刑罚也。”㉗《集解》徐广曰：“犬戎之君。”㉘《正义》贾逵云：“大毕，伯士，犬戎氏之二君也。白狼，白鹿，犬戎之职贡也。”按：大毕、伯士终后，犬戎氏常以其职来王。㉙《正义》祭公申穆王之意，故云“天子曰”。㉚《正义》“几音祈”。㉛《集解》徐广曰：“树，一作‘楸’。”駉按：韦昭曰“树，立也。言犬戎立性敦笃也”。

诸侯有不睦者，甫侯言于王，作修刑辟^①。王曰：“吁，来！有国有土，告汝祥刑^②。在今尔安百姓，何择非其人^③，何敬非其刑，何居非其宜与^④？两造具备^⑤，师听五辞^⑥。五辞简信，正于五刑^⑦。五刑不简，正于五罚^⑧。五罚不服，正于五过^⑨。五过之疵，官狱内狱，阅实其罪^⑩，惟钧其过^⑪。五刑之疑有赦，五罚之疑有赦，其审克之^⑫。简信有众，惟讯有稽^⑬。无简不疑，共严天威^⑭。黜辟疑赦，其罚百率^⑮，阅实其罪。劓辟疑赦，其罚倍洒^⑯，阅实其罪。髡辟疑赦，其罚倍差^⑰，阅实其罪。宫辟疑赦，其罚五^⑱百率，阅实其罪。大辟疑赦，其罚千率，阅实其罪。墨罚之属千，劓罚之属千，髡罚之属五百，宫罚之属三百，大辟之罚其属二百：五刑之属三千。”命曰《甫刑》。

注：①《集解》郑玄曰：“《书说》云周穆王以甫侯为相。”②《集解》孔安国曰：“告汝善用刑之道也。”③《集解》王肃曰：“训以安百姓之道，当何所选择乎？非当选择贤人乎？”④《集解》孔安国曰：“当何所敬，非唯五

刑乎?当何所居,非唯及世轻重所宜乎?”⑤《集解》徐广曰:“造,一作‘遭’。”⑥《集解》孔安国曰:“两谓囚证。造,至也。两至具备,则众狱官听其入五刑辞。”《正义》《汉书》《刑法志》云:“五听,一曰辞听,二曰色听,三曰气听,四曰耳听,五曰目听。”《周礼》云“辞不直则言繁,目不直则视眊,耳不直则对答惑,色不直则貌赧,气不直则数喘”也。⑦《集解》孔安国曰:“五辞简核,信有罪验,则正之于五刑矣。”⑧《集解》孔安国曰:“不简核。谓不应五刑,当正五罚,出金赎罪也。”⑨《集解》孔安国曰:“不服,不应罚也。正于五过,从故赦免之。”⑩《集解》孔安国曰:“使与罚名相当。”《索隐》按:《吕刑》云“惟官,惟反,惟内,惟货,惟来”,今此似阙少,或从省文。⑪《集解》马融曰:“以此五过出入人罪,与犯法者等。”⑫《集解》孔安国曰:“刑疑故赦从罚,罚疑赦从免,其当清察,能得其理也。”⑬《集解》孔安国曰:“简核诚信,有合众心,惟察其貌,有所考合,重之至也。”《索隐》讯,依《尚书》音貌也。⑭《集解》孔安国曰:“无简核诚信,不听治其狱,当严敬天威,无轻用刑。”⑮《集解》徐广曰:“率即铤也,音刷。”孔安国曰:“六两曰铤。铤,黄铁也。”《索隐》铤,黄铁。铤亦六两,故马融曰“铤,量名,与吕刑铤同”。旧本“率”亦作“选”。⑯《集解》徐广曰:“一作‘莛’。五倍曰莛。”孔安国曰:“倍百为二百铤也。”《索隐》“洒音庠”。莛音所解反。⑰《案解》马融曰:“倍二百为四百铤也。差者,又加四百之三分之一,凡五百三十三三分之一也。”《正义》倍中之差,二百去三分之一,合三百三十三铤二两也。宫刑,其罚五百,膺刑既轻,其数岂加?故知孔、马之说非也。⑱《集解》徐广曰:“一作‘六’。”

穆王立五十五年,崩,子共王絜扈立^①。共王游于泾上,密康公从^②,有三女奔之。其母曰:“必致之王^③。夫兽三为群,人三为众,女三为粲。王田不取群^④,公行不下众^⑤,王御不参一族^⑥。夫粲,美之物也。众以美物归女,而何德以堪之?王犹不堪,况尔之小丑乎!小丑备物,终必亡。”康公不献,一年,共王灭密。共王崩,子懿王艰立^⑦。懿王之时,王室遂衰,诗人作刺^⑧。

注:①《索隐》系本作“伊扈”。②《集解》韦昭曰:“康公,密国之君,姬

姓也。”《正义》《括地志》云：“阴密故城在泾州鹑觚县西，东接县城，故密国也。”③《集解》《列女传》曰：“康公母，姓隗氏。”④《正义》曾大家云：“群，众，粲，皆多之名也。田猎得三兽，王不尽收，以其害深也。”⑤《正义》曹大家云：“公，诸侯也。公之所行与众人共议也。”⑥《集解》韦昭云：“御，妇官也。参，三也。一族，一父子也。故取侄娣以备三，不参一族之女也。”⑦《索隐》《系本》作“竖”。⑧《索隐》宋忠曰：“懿王自镐徙都犬丘，一曰废丘，今槐里是也。时王室衰，始作诗也。”

懿王崩，共王弟辟方立，是为孝王。孝王崩，诸侯复立懿王太子燹，是为夷王。^①

注：①《正义》《纪年》云：“三年，致诸侯，烹齐哀公于鼎。”《帝王世纪》云“十六年崩”也。

夷王崩，子厉王胡立。厉王即位三十年，好利，近荣夷公。大夫芮良夫^①谏厉王曰：“王室其将卑乎？夫荣公好专利而不知大难。夫利，百物之所生也，天地之所载也，而有专之，其害多矣。天地百物皆将取焉，何可专也？所怒甚多，而不备大难。以是教王，王其能久乎？夫王人者，将导利而布之上下者也。使神人百物无不得极^②，犹日怵惕惧怨之来也。故《颂》曰‘思文后稷，克配彼天，立我蒸民，莫匪尔极’。《大雅》曰‘陈锡载周^③’。是不布利而惧难乎，故能载周以至于今。今王学专利，其可乎？匹夫专利，犹谓之盗，王而行之，其归鲜矣。荣公若用，周必败也。”厉王不听，卒以荣公为卿士，用事。

注：①《正义》芮伯也。②《集解》韦昭曰：“极，中也。”③《集解》唐固曰：“言文王布锡施利，以载成周道也。”

王行暴虐侈傲，国人谤王。召公谏曰^①：“民不堪命矣。”王怒，得卫巫^②，使监谤者^③，以告则杀之。其谤鲜矣，诸侯不朝。三十四年，王益严，国人莫敢言，道路以目^④。厉王喜，告召公曰：“吾能弭谤矣，乃不敢言。”召公曰：“是鄣之也。防民之口，甚于防水。水壅而溃，伤人必多，民亦如之。是故为水者决之使导，为民者宣之使言。故天子听政，使公卿至于列士献诗^⑤，瞽献曲^⑥，史献书^⑦，师箴^⑧，瞽赋^⑨，矇诵^⑩，百工谏，庶人传语^⑪，近臣尽

规^②，亲戚补察^③，瞽史教诲^④，耆艾修之^⑤，而后王斟酌焉，是以事行而不悖。民之有口也，犹土之有山川也，财用是乎出；犹其有原隰衍沃也^⑥，衣食于是乎生。口之宣言也，善败于是乎兴。行善而备败，所以产财用衣食者也。夫民虑之于心而宣之于口，成而行之。若壅其口，其与能几何？”王不听。于是国莫敢出言，三年，乃相与畔，袭厉王。厉王出奔于彘^⑦。

注：①《集解》韦昭曰：“召康公之后穆公虎，为王卿士也。”②《集解》韦昭曰：“卫国之巫也。”③《正义》监音口衔反。监，察也。以巫人神灵，有谤毁必察也。④《集解》韦昭曰：“以目相盼而已。”⑤《正义》上诗风刺。⑥《集解》韦昭曰：“曲，乐曲。”⑦《正义》史，太史也。上书谏。⑧《正义》音针。师，乐太师也。上箴戒之文。⑨《集解》韦昭曰：“无眸子曰瞽。赋公卿列士所献诗也。”⑩《集解》韦昭曰：“有眸子而无见曰矇。周礼蒙主弦歌，讽诵箴谏之语也。”⑪《集解》韦昭曰：“庶人卑贱，见时得失，不得达，传以语王。”《正义》传音逐缘反。庶人微贱，见时得失，不得上言，乃在街巷相传语。⑫《集解》韦昭曰：“近臣，驂仆之属。”⑬《正义》言亲戚补王过失，及察是非也。⑭《集解》韦昭曰：“瞽，乐太师。史，太史也。”⑮《集解》韦昭曰：“耆艾，师傅也。修理瞽史之教，以闻于王。”⑯《集解》唐固曰：“下平曰衍，有溉曰沃。”⑰《集解》韦昭曰：“彘，晋地，汉为县，属河东，今曰永安。”《正义》《括地志》云：“晋州霍邑县本汉彘县，后改彘曰永安。从鄙奔晋也。”

厉王太子静匿召公之家，国人闻之，乃围之。召公曰：“昔吾骤谏王，王不从，以及此难也。今杀王太子，王其以我为仇而怱怒乎？夫事君者，险而不仇怱^①，怨而不怒，况事王乎！”乃以其子代王太子，太子竟得脱。

注：①《集解》韦昭曰：“在危险之中。”

召公、周公二相行政，号曰“共和”^①。共和十四年，厉王死于彘。太子静长于召公家，二相乃共立之为王，是为宣王。宣王即位，二相辅之，修政，法文、武、成、康之遗风，诸侯复宗周。十二年，鲁武公来朝。

注：①《索隐》共音如字。若《汲冢纪年》则云“共伯和干王位”。共音恭。共，国；伯，爵；和，其名，干，篡也。言共伯摄王政，故云“干王位”也。《正义》共音巨用反。韦昭云：“彘之乱，公卿相与和而修政事，号曰共和”

也。”《鲁连子》云：“卫州共城县本周共伯之国也。共伯名和，好行仁义，诸侯贤之。周厉王无道，国人作难，王奔于彘，诸侯奉和以行天子事，号曰‘共和’元年。十四年，厉王死于彘，共伯使诸侯奉王子靖为宣王，而共伯复归国于卫也。”按此文，共伯不得立，而和立为武公。武公之立在共伯卒后，年岁又不相当，年表亦同，明《纪年》及《鲁连子》非也。

宣王不修籍于千亩^①，虢文公谏曰^②不可^③，王弗听。三十九年，战于千亩^④，王师败绩于姜氏之戎^⑤。

注：①《正义》应劭云：“古者天子耕籍田千亩，为天下先。”瓚曰：“籍，蹈籍也。”按：宣王不修亲耕之礼也。②《集解》贾逵曰：“文公，文王母弟虢仲之后，为王卿士也。”韦昭曰：“文公，虢叔之后，西虢也。宣王都镐，在畿内也。”《正义》《括地志》云：“虢故城在岐州陈仓县东（西）[四]十里。”又云：“千亩原在晋州岳阳县北九十里也。”③《索隐》《国语》曰：“虢文公谏曰‘夫人之大事在农，上帝之粢盛于是乎出，人之繁庶于是乎生，事之共给于是乎在’。”事具载《国语》。④《索隐》地名也，在西河介休县。⑤《集解》韦昭曰：“西夷别种，四岳之后也。”

宣王既亡南国^①之师，乃料民于太原^②。仲山甫谏曰^③：“民不可料也。”宣王不听，卒料民。

注：①《集解》韦昭曰：“败于姜戎时所亡也。南国，江汉之间。料，数也。”唐固曰：“南国，南阳也。”②《正义》毛萇云：“仲山甫，樊穆仲也。”《括地志》云：“汉樊县城在兖州瑕丘县西南三十五里，古樊国，仲山甫所封也。”

四十六年，宣王崩^①，子幽王宫涅立^②。幽王二年，西周三川皆震^③。伯阳甫曰：“周将亡矣^④。夫天地之气，不失其序；若过其序，民乱之也^⑤。阳伏而不能出，阴迫而不能蒸^⑥，于是有地震。今三川实震，是阳失其所而填阴也^⑦。阳失而在阴^⑧，原必塞；原塞，国必亡。夫水土演而民用也^⑨。土无所演，民乏财用，不亡何待！昔伊、洛竭而夏亡^⑩，河竭而商亡^⑪。今周德若二代之季矣，其川原又塞，塞必竭。夫国必依山川，山崩川竭，亡国之征也。川竭必山崩^⑫。若国亡不过十年，数之纪也^⑬。天之所弃，不过其纪。”是岁

也，三川竭，岐山崩。

注：①《正义》《周春秋》云：“宣王杀杜伯而无辜，后三年，宣王会诸侯田于圃，日中，杜伯起于道左，衣朱衣冠，操朱弓矢，射宣王，中心折脊而死。”《国语》云：“杜伯射王于郕。”②《集解》徐广曰：“一作‘生’。”③《集解》徐广曰：“泾、渭、洛也。”駉按：韦昭云“西周镐京地震动，故三川亦动”。《正义》按：泾渭二水在雍州北。洛水一名漆沮，在雍州东北，南流入渭。此时以王城为东周，镐京为西周。④《集解》韦昭曰：“伯阳父，周大夫也。”唐固曰：“伯阳父，周柱下史老子也。”⑤《集解》韦昭曰：“过，失也。言民不敢斥王者也。”⑥《集解》韦昭曰：“蒸，升也。阳气在下，阴气迫之，使不能升也。”⑦《集解》韦昭曰：“为阴所镇筭也。”⑧《集解》韦昭曰：“在阴下也。”⑨《集解》韦昭曰：“水土气通为演。演犹润也。演则生物，民得用之。”⑩《集解》韦昭曰：“禹都阳城，伊、洛所近也。”⑪《集解》韦昭曰：“商人都卫，河水所经也。”⑫《集解》韦昭曰：“水泉不润，枯朽而崩也。”⑬《集解》韦昭曰：“数起于一，终于十，十则更，故曰纪也。”

三年，幽王嬖爱褒姒^①。褒姒生子伯服，幽王欲废太子。太子母申侯女，而为后。后幽王得褒姒，爱之，欲废申后，并去太子宜臼，以褒姒为后，以伯服为太子。周太史伯阳读史记曰^②：“周亡矣。”昔自夏后氏之衰也，有二神龙止于夏帝庭而言曰：“余，褒之二君^③。”夏帝卜杀之与去之与止之，莫吉。卜请其鬻而藏之，乃吉^④。于是布币而策告之^⑤，龙亡而鬻在，椟而去之^⑥。夏亡，传此器殷。殷亡，又传此器周。比三代，莫敢发之，至厉王之末^⑦，发而观之。鬻流于庭，不可除。厉王使妇人裸而噪之^⑧。鬻化为玄黿，以入王后宫^⑨。后宫之童妾既龀而遭之^⑩，既笄而孕^⑪，无夫而生子，惧而弃之。宣王之时童女谣曰：“妖狐箕服，实亡周国^⑫。”于是宣王闻之，有夫妇卖是器者，宣王使执而戮之。逃于道，而见乡者后宫童妾所弃妖子^⑬出于路者^⑭，闻其夜啼，哀而收之，夫妇遂亡，奔于褒。褒人有罪，请入童妾所弃女子者于王^⑮以赎罪。弃女子出于褒，是为褒姒。当幽王三年，王之后宫见而爱之，生子伯服，竟废申后及太子，以褒姒为后，伯服为太子^⑯。太史伯阳曰：“祸成矣，无可奈何！”

注：①《索隐》褒，国名，夏同姓，姓姁氏。礼妇人称国及姓。其女是龙羆妖子，为人所收，褒人纳之于王，故曰褒姒。《正义》《括地志》云：“褒国故城在梁州褒城县东二百步，古褒国也。”②《正义》诸国皆有史以记事，故曰史记。③《集解》虞翻曰：“龙自号褒之二先君也。”④《集解》韦昭曰：“羆，龙所吐沫。沫，龙之精气也。”⑤《集解》韦昭曰：“以简策之书告龙，而请其羆也。”⑥《集解》韦昭曰：“棣，匱也。”⑦《集解》虞翻曰：“末年，王流彘之岁。”⑧《集解》韦昭曰：“噪，欢呼也。”唐固曰：“群呼曰噪。”⑨《索隐》亦作“蚺”，音元。玄蚺，数妈蜚蜴也。⑩《集解》韦昭曰：“毁齿曰龀。女七岁而毁齿也。”⑪《正义》笄音鸡。礼记云：“女子许嫁而笄。”郑玄云：“笄，今簪。”⑫《集解》韦昭曰：“山桑曰廩。弧，弓也。箕，木名。服，矢房也。”⑬《集解》徐广曰：“妖，一作‘夭’。夭，幼少也。”⑭《正义》夫妇卖廩弧者，宣王欲执戮之，遂逃于路，遇此妖子，哀而收之。⑮《正义》《国语》云：“周幽王伐有褒，褒人以褒姒女焉，与虢石甫比也。”⑯《索隐》《左传》所谓“攜王奸命”是也。

褒姒不好笑，幽王欲其笑万方，故不笑。幽王为烽燧^①大鼓，有寇至则举烽火。诸侯悉至，至而无寇，褒姒乃大笑。幽王说之，为数举烽火。其后不信，诸侯益亦不至。

注：①《正义》烽燧二音。昼日燃烽以望火烟，夜举燧以望火光也。烽，土鲁也。燧，炬火也。皆山上安之，有寇举之。

幽王以虢石父为卿，用事，国人皆怨。石父为人佞巧^②善谀好利，王用之。又废申后，去太子也。申侯怒，与缙^③、西夷犬戎攻幽王。幽王举烽火征兵，兵莫至。遂杀幽王骊山下^④，虜褒姒，尽取周赂而去^⑤。于是诸侯乃即申侯而共立故幽王太子宜臼，是为平王，以奉周祀。

注：①《集解》徐广曰：“佞，一作‘谄’。”②《索隐》缙，国名，夏同姓。《正义》缙，自陵反。国语云：“缙，姁姓，夏禹后。”《括地志》云：“缙县在沂州承县，古侯国，禹后。”③《索隐》在新丰县南，故骊戎国也。旧音黎。徐广音力知反。《正义》《括地志》云：“骊山在雍州新丰县南十六里。《土地记》云频骊山即蓝田山。”按：骊山之阳即蓝田山。④《集解》《汲冢纪年》

曰：“自武王灭殷以至幽王，凡二百五十七年也。”《正义》按：《汲冢书》，晋咸和五年汲郡汲县发魏襄王冢，得古书册七十五卷。

平王立，东迁于雒邑^①，辟戎寇。平王之时，周室衰微，诸侯强并弱，齐、楚、秦、晋始大，政由方伯^②。

注：①《正义》即王城也。平王以前号东都，至敬王以后及战国为西周也。②《集解》《周礼》曰：“九命作伯。”郑众云：“长诸侯为方伯。”

四十九年，鲁隐公即位。

五十一年，平王崩，太子泄父早死，立其子林，是为桓王。桓王，平王孙也。

桓王三年，郑庄公朝，桓王不礼^①。五年，郑怨，与鲁易许田。许田，天子之用事太山田也^②。八年，鲁杀隐公^③，立桓公。十三年，伐郑^④，郑射伤桓王，桓王去归^⑤。

注：①《索隐》在鲁隐公六年。②《索隐》《左传》郑伯以璧假许田，卒易枋。枋是郑祀太山之田，许是鲁朝京师之汤沐邑，有周公庙，郑以其近，故易取之。此云“许田天子用事太山田”误。《正义》杜预云：“成王营王城，有迁都之志，故赐周公许田，以为鲁国朝宿之邑，后世因而立周公别庙焉。郑桓公友，周宣王之母弟，封郑，有助祭泰山汤沐邑在枋。郑以天子不能复巡狩，故欲以枋易许田，各从本国所近之宜也。恐鲁以周公别庙为疑，故云已废泰山之祀，而欲为鲁祀周公，逊辞以求也。”《括地志》云：“许田在许州许昌县南四十里，有鲁城，周公庙在城中。枋田在沂州费县东南。”按：宛，郑大夫。③《正义》子允令公子翬杀隐公也。④《索隐》在鲁桓五年。⑤《索隐》《左传》繻葛之役，祝聘射王中肩是也。

二十三年，桓王崩，子庄王佗立。庄王四年，周公黑肩欲杀庄王而立王子克^①。辛伯告王^②，王杀周公^③。王子克奔燕^④。

注：①《集解》贾逵曰：“庄王弟子仪也。”②《集解》贾逵曰：“辛伯，周大夫也。”③《索隐》《左传》曰：“初，子仪有宠于桓王，桓王属诸周公。辛伯谏曰：‘并后匹嫡，两政耦国，乱之本也。’周公不从，故及于难。”然周公阿先王旨，自取诛夷，辛伯正君臣之义，卒安王业，二卿优劣诚可识

也。④《正义》杜预云：“南燕，媯姓也。”

十五年，庄王崩，子厘王胡齐立。厘王三年，齐桓公始霸。

五年，厘王崩，子惠王阍立^①。惠王二年。初，庄王嬖姬姚^②，生子颓^③，颓有宠。及惠王即位，夺其大臣园以为囿^④，故大夫边伯等五人作乱，^⑤谋召燕、卫师^⑥，伐惠王。惠王奔温^⑦，已居郑之栎^⑧。立厘王弟颓为王。乐及遍舞^⑨，郑、虢君怒。四年，郑与虢君伐杀王颓^⑩，复入惠王。惠王十年，赐齐桓公为伯。

注：①《索隐》《系本》名毋凉。《正义》溢作“毋凉”也。②《正义》杜预云：“姚姓也。”③《索隐》庄王子，厘王弟，惠王之叔父也。④《集解》《左传》曰大臣，莒国也。⑤《集解》《左传》曰五人者，莒国、边伯、詹父、子禽、祝跪也。⑥《正义》南燕，滑州胙城。卫，澶州卫南也。⑦《正义》《左传》云苏忿生十二邑，桓王夺苏子十二邑与郑，故苏子同五大夫伐惠王。温，十二邑之一也。杜预云：河内温县也。⑧《集解》服虔曰：“栎，郑大都。”《正义》杜预云：“栎，今河南阳翟县也。”⑨《集解》贾逵曰：“遍舞，皆舞六代之乐也。”⑩《正义》贾逵云：“郑厉公突、虢公林父也。”

二十五年，惠王崩，子襄王郑立。襄王母早死，后母曰惠后^①。惠后生叔带^②，有宠于惠王，襄王畏之。三年，叔带与戎、翟谋伐襄王，襄王欲诛叔带，叔带奔齐。齐桓公使管仲平戎于周，使隰朋平戎于晋^③。王以上卿礼管仲。管仲辞曰：“臣贱有司也，有天子之二守国、高在^④。若节春秋来承王命，何以礼焉^⑤。陪臣敢辞^⑥。”王曰：“舅氏，余嘉乃勋^⑦，毋逆朕命。”管仲卒受下卿之礼而还^⑧。九年，齐桓公卒。十二年，叔带复归于周^⑨。

注：①《集解》《左传》曰：“陈妫归于京师，实惠后也。”《正义》按：陈国，舜后，妫姓也。②《索隐》惠王子，襄王弟，封于甘，故《左传》称甘昭公。《正义》惠王子，襄王弟，封之于世。《括地志》云：“故甘城在洛州河南县西南二十五里。《左传》云甘昭公，王子叔带也。洛阳记云河南县西南二十五里，甘水出焉，北流入洛。山上有甘城，即甘公采邑也。”③《集解》服虔曰：“戎伐周，晋伐戎救周，故和也。”④《集解》杜预曰：“国子，高子，天子所命为齐守臣，皆上卿也。”⑤《集解》贾逵曰：“节，时也。”王肃曰：“春

秋聘享之节也。”⑥《集解》服虔曰：“陪，重也。诸侯之臣于天子，故曰陪臣。”⑦《集解》贾逵曰：“舅氏，言伯舅之使也。”《正义》武王娶太公女为后，故呼舅氏，远言之。我善汝有平戎之功勋。⑧《正义》杜预云：“管仲不敢以职自高，卒受本位之礼也。”⑨《集解》《左传》曰：“王召之。”

十三年，郑伐滑^①，王使游孙、伯服请滑^②，郑人囚之。郑文公怨惠王之人不与厉公爵^③，又怨襄王之与卫滑^④，故囚伯服。王怒，将以翟伐郑。富辰谏曰^⑤：“凡我周之东徙，晋、郑焉依。子颓之乱，又郑之由定，今以小怨弃之！”王不听。十五年，王降翟师以伐郑。王德翟人，将以其女为后。富辰谏曰：“平、桓、庄、惠皆受郑劳，王弃亲亲翟，不可从。”王不听。十六年，王绌翟后，翟人来诛，杀谭伯^⑥。富辰曰：“吾数谏不从。如是不出，王以我为怗乎？”乃以其属死之。

注：①《集解》贾逵曰：“滑，姬姓之国。”駉按：《左传》曰“滑人叛郑而服于卫”也。②《正义》杜预云：滑国都费，河南缙氏县，为秦所灭，时属郑、晋，后属周。事在鲁釐公二十年。《括地志》云：“缙氏故城本费城也，在洛州缙氏县（南）东二十五里也。”③《集解》贾逵曰：“二子，周大夫。”④《集解》服虔曰：“惠王以后之鞶鉴与郑厉公，而独与虢公玉爵。”《正义》《左传》云：“庄公二十一年，王巡虢狩，虢公为王宫于蚌，王与之酒泉，郑伯之享王，王以后之鞶鉴与之。虢公请器，王与之爵。郑伯由是怨王也。”杜预云：“后鞶带而以镜为饰也。爵，饮酒器也。蚌，地。酒泉，周邑。”《集解》服虔曰：“滑，小国，近郑，世世服从，而更违叛，郑师伐之，听命，后自诉于王，王以与卫。”⑤《集解》服虔曰：“富辰，周大夫。”⑥《案解》唐固曰：“谭伯，周大夫原伯、毛伯也。”《索隐》按：《国语》亦云“杀谭伯”，而《左传》太叔之难，犹周公忌父、原伯、毛伯，唐固据传文读“谭”为“原”，然《春秋》有谭，何妨此时亦仕王朝，预获被杀？《国语》既云“杀谭伯”，故太史公依之，不从《左传》说也。

初，惠后欲立王子带，故以党开翟人，翟人遂入周。襄王出奔郑^①，郑居王于汜^②。子带立为王，取襄王所绌翟后与居温^③。十七年，襄王告急于晋，晋文公纳王而诛叔带。襄王乃赐晋文公珪鬯弓矢，为伯，以河内地与

晋^④。二十年，晋文公召襄王，襄王会之河阳、践土^⑤，诸侯毕朝，书讳曰“天王狩于河阳^⑥”。

注：①《正义》《公羊传》云：“王者无外，此其言出，何？不能事母也。”②《集解》杜预曰：“郑南汜在襄城县南。”《正义》汜音凡。《括地志》云：“故汜城在许州襄城县一里。《左传》云‘天王出居于郑，处于汜’是。”③《正义》《括地志》云：“故温城在怀州温县西三十里，汉、晋为县，本周司寇苏忿生之邑。《左传》云周与郑人苏忿生十二邑，温其一也。《地理志》云温县，故国，己姓，苏忿生所封也。”④《正义》贾逵云：“晋有功，赏之以地，杨樊、温、原、攢茅之田也。”⑤《集解》贾逵曰：“河阳，晋之温也。践土，郑地名，在河内。”《正义》《括地志》云：“故王宫在郑州荥泽县西北十五里王宫城中。《左传》云晋文公败楚于城濮，至于衡雍，作王宫于践土也。”按王城，则所作在践土，城内东北隅有践土台，东去衡雍三十余里也。⑥《集解》《左传》曰：“仲尼曰‘以臣召君，不可以训’，故书曰‘狩’。”

二十四年，晋文公卒。

三十一年，秦穆公卒。

三十二年，襄王崩，子顷王壬臣立。顷王六年，崩，子匡王班立。匡王六年，崩，弟瑜立，是为定王。

定王元年，楚庄王伐陆浑之戎^①，次洛，使人问九鼎。王使王孙满应设以辞^②，楚兵乃去。十年，楚庄王围郑，郑伯降，已而复之。十六年，楚庄王卒。

注：①《集解》《地理志》陆浑县属弘农郡。《正义》“浑音魂”。杜预云：“允姓之戎居陆浑，在秦、晋西北，二国诱而徙之伊川，遂从戎号，今洛州陆浑县，取其号也。”《后汉书》云陆浑戎自瓜州迁于伊川。《左传》云：“初，平王之东迁也，辛有适伊川，见被发而祭于野者，曰‘不及百年，此其戎乎？其礼先亡矣’。”按：至僖公二十二年秋，秦、晋迁陆浑之戎于伊川，计至辛有言，适百年也。《括地志》云：“故麻城谓之蛮中，在汝州梁县界。《左传》‘单浮餘围蛮氏’，杜预云‘城在河南新城东南，伊洛之戎陆浑蛮氏城也。俗以为麻蛮声相近故耳’。按：新城，今伊阙县是也。”②《集

解》贾逵曰：“王孙满，周大夫也。”

二十一年，定王崩，子简王夷立。简王十三年，晋杀其君厉公，迎子周于周，立为悼公。

十四年，简王崩，子灵王泄心立。灵王二十四年，齐崔杼弑其君庄公。

二十七年，灵王崩^①，子景王贵立^②。景王十八年，后太子圣而早卒。二十年，景王爱子朝^③，欲立之^④，会崩^⑤，子丐之党与争立，国人立长子猛为王，子朝攻杀猛。猛为悼王。晋人攻子朝而立丐，是为敬王^⑥。

注：①《集解》皇览曰：“灵王冢在河南城西南柏亭西周山上。盖以灵王生而有髭，而神，故谥灵王。其冢，民祀之不绝。”②《索隐》名贵。按《国语》景王二十一年铸大钱及无射，单穆公及泠州鸠各设辞以谏。今此不言，亦其疏略耳。③《集解》贾逵曰：“景王之长庶子。”④《正义》《左传》云：“子朝用成周之宝珪沈于河，津人得诸河上。”杜预云：“祷河求福也，珪自出水也。”按：河神不敢受故。⑤《集解》《皇览》曰：“景王冢在洛阳太仓中。秦封吕不韦洛阳十万户，故大其城并围景王冢也。”⑥《集解》贾逵曰：“敬王，猛母弟。”

敬王元年，晋人入敬王，子朝自立，敬王不得入，居泽^①。四年，晋率诸侯入敬王于周，子朝为臣^②，诸侯城周。十六年，子朝之徒复作乱，敬王奔于晋。十七年，晋定公遂入敬王于周。

注：①《集解》贾逵曰：“泽邑，周地也。”②《集解》《春秋》曰：“子朝奔楚。”《皇览》曰：“子朝冢在南阳西鄂县。今西鄂晁氏自谓子朝后也。”

三十九年，齐田常杀其君简公。

四十一年，楚灭陈。孔子卒。

四十二年，敬王崩^①，子元王仁立^②。元王八年，崩，子定王介立^③。

注：①《集解》徐广曰：“皇甫谧曰敬王四十四年，元己卯，崩壬戌也。”②《集解》徐广曰：“《世本》云贞王介也。”③《集解》徐广曰：“《世本》云元王赤也。”皇甫谧曰：“元王十一年癸未，三晋灭智伯，二十八年崩，三子争立，立应为贞定王。”《索隐》《系本》云元王赤，皇甫谧云贞定王。

考据二文，则是元有两名，一名仁，一名赤。如《史记》，则元王为定王父，定王即贞王也；依《系本》，则元王是贞王子。必有一乖误。然此“定”当为“贞”，字误耳。岂周家有两定王，代数又非远乎？皇甫谧见此，疑而不决，遂弥缝《史记》《系本》之错谬，因谓为贞定王，未为得也。

定王十六年，三晋灭智伯，分有其地。

二十八年，定王崩^①，长子去疾立，是为哀王。哀王立三月，弟叔袭杀哀王而自立，是为思王。思王立五月，少弟嵬攻杀思王而自立，是为考王。此三王皆定王之子。

注：①《集解》徐广曰：“皇甫谧曰贞定王十年，元癸亥，崩壬申。”

考王十五年，崩^①，子威烈王午立。

注：①《集解》徐广曰：“皇甫谧曰考哲王元辛丑，崩乙卯。”

考王封其弟于河南^①，是为桓公，以续周公之官职。桓公卒，子威公代立。威公卒，子惠公代立，乃封其少子于巩^②以奉王，号东周惠公^③。

注：①《正义》《帝王世纪》云：“考哲王封弟揭于河南，续周公之官，是为西周桓公。”按：自敬王迁都成周，号东周也。桓公都王城，号西周桓公。②《集解》徐广曰：“惠公之子也。”《正义》巩音拱。郭缘生《述征记》巩县，周地，巩伯邑。史记周显王二年西周惠公封少子班于巩，以奉王室，为东周惠公也。子武公，为秦所灭。③《索隐》考王封其弟于河南，为桓公。卒，子威公立。卒，子惠公立。长子曰西周公。又封少子于巩，仍袭父号曰东周惠公。于是有东西二周也。按：《系本》“西周桓公名揭，居河南，东周惠公名班，居洛阳”是也。

威烈王二十三年，九鼎震。命韩、魏、赵为诸侯。

二十四年，崩^①，子安王骄立。是岁盗杀楚声王。

注：①《集解》徐广曰：“皇甫谧曰元丙辰，崩己卯。” 駉案：宋衷曰“威烈王葬洛阳城中东北隅”也。

安王立二十六年，崩^①，子烈王喜立。烈王二年，周太史儋^②见秦献公曰^③：“始周与秦国合而别，别五百载复合^④，合十七岁而霸王者出焉^⑤。”

注：①《集解》皇甫谧曰：“安王元庚辰，崩乙巳。” ②《索隐》《老子列

传》曰“儋即老子”耳，又曰“非也”，验其年代是别人。《正义》幽王时有伯阳甫。唐固曰：“伯阳甫，老子也。”按：幽王元年至孔子卒三百余年，孔子卒后一百二十九年，儋见秦献公。然老子当孔子时，唐固说非也。③《正义》《秦本纪》云献公十一年见，见后十五年，周显王致文武胙于秦孝公，是复合时也。④《集解》应劭曰：“周孝王封伯翳之后为侯伯，与周别五百载。至昭王时，西周君臣自归受罪，献其邑三十六城，合也。”韦昭曰：“周封秦为始别，谓秦仲也。五百岁，谓从秦仲至孝公强大，显王致伯，与之亲合也。”《索隐》按：周封非子为附庸，邑之秦，号曰秦嬴，是始合也。及秦襄公始列为诸侯，是别之也。自秦列为诸侯，至昭王五十二年，西周君臣献邑三十六城以入于秦，凡五百一十六年，是合也。云“五百”，举其大数。⑤《集解》徐广曰：“从此后十七年而秦昭王立。”駉按：韦昭曰“武王、昭王皆伯，至始皇而王天下”。《索隐》霸王，谓始皇也。自周以邑入秦，至始皇初立，政由太后、嫪毐，至九年诛毐，正十七年。《正义》周始与秦国合者，谓周、秦俱黄帝之后，至非子未别封，是合也。而别者，谓非子末年，周封非子为附庸，邑之秦，后二十九君，至秦孝公二年五百载，周显王致文武胙于秦孝公，复与之亲，是复合也。合十七岁而霸王者出，谓从秦孝公三年至十九年周显王致胙于秦孝公，是霸也。孝公子惠王称王，是王者出也。然五百载者，非子生秦侯已下二十八君，至孝公二年，都合四百八十六年，兼非子邑秦之后十四年，则成五百。

十年，烈王崩，弟扁立^①，是为显王。显王五年，贺秦献公，献公称伯。九年，致文武胙于秦孝公^②。二十五年，秦会诸侯于周。二十六年，周致伯于秦孝公。三十三年，贺秦惠王。三十五年，致文武胙于秦惠王。四十四年，秦惠王称王^③。其后诸侯皆为王^④。

注：①《正义》扁，边典反。②《集解》胙，膾肉也。《左传》曰：“王使宰孔赐齐侯胙，曰天子有事于文武。”③《正义》《秦本纪》云惠王十三年，与韩、魏、赵并称王。④《索隐》谓韩、魏、齐、赵也。

四十八年，显王崩，子慎靓王定立。慎靓王立六年，崩，子赧王延立^①。王赧时东西周分治^②。王赧徙都西周^③。

注：①《索隐》皇甫谧云名诞。赧非谧，《谧法》无赧。正以微弱，窃铁逃债，赧然惭愧，故号曰“赧”耳。又按：《尚书·中侯》以“赧”为“然”，郑玄云“然读曰赧”。王劭按：古音人扇反，今音奴板反。《尔雅》曰面惭曰赧。②《索隐》西周，河南也。东周，巩也。王赧微弱，西周与东分主政理，各居一都，故曰东西周。按：高诱曰西周王城，今河南。东周成周，故洛阳之地。③《正义》敬王从王城东徙成周，十世至王赧，从成周西徙王城，西周武公居焉。

西周武公^①之共太子死，有五庶子，毋适立。司马翦^②谓楚王曰：“不如以地资公子咎，为请太子。”左成曰^③：“不可。周不听，是公之知困而交疏于周也^④。不如请周君孰欲立，以微告翦，翦请令楚〔贺〕〔资〕之以地。”果立公子咎为太子^⑤。

注：①《集解》徐广曰：“惠公之长子。”《索隐》按：《战国策》作东周武公。②《正义》翦音子践反，楚臣也。③《正义》楚臣也。④《正义》言以地资公子咎请为太子，周若不许，是楚于周交益疏。⑤《正义》楚命翦适周，讽周君欲立谁，以微言告于翦，翦令楚〔贺〕〔资〕之以地，周果立咎为太子也。此以上至“西周武公”，是楚令周立公子咎为太子也。

八年，秦攻宜阳^①，楚救之。而楚以周为秦故，将伐之^②。苏代为周说楚王曰：“何以周为秦之祸也^③？言周之为秦甚于楚者，欲令周入秦也，故谓‘周秦’也^④。周知其不可解，必入于秦，此为秦取周之精者也^⑤。为王计者，周于秦因善之，不于秦亦言善之，以疏之于秦^⑥。周绝于秦，必入于郢矣。”^⑦

注：①《正义》《括地志》云：“故韩城一名宜阳城，在洛州福昌县东十四里，即韩宜阳县城也。”②《索隐》宜阳，韩地，秦攻而楚救之，周为韩出兵，而楚疑周为秦，因加兵伐周。③《索隐》苏代为周说楚王，王何以道周为秦，周实不为秦也。今王责周道为秦，周惧楚，必入秦，是为祸也。④《索隐》周、秦相近，秦欲并周而外睦于周，故当时诸侯成谓“周秦”。⑤《正义》解音纪买反。代言周若知楚疑亲秦，其计定不可解免，周必亲于秦也。是为秦取周精妙之计。⑥《正义》代言为王计者，周亲秦，因而善之；周不亲，亦言善之。楚若善周，周必疏于秦也。⑦《正义》郢，楚都也。楚既亲

周，秦必绝周亲楚矣。以上至“八年”，苏代说楚合周。

秦借道两周之间^①，将以伐韩，周恐借之畏于韩，不借畏于秦。史厌^②谓周君曰^③：“何不令人谓韩^④公叔曰‘秦之敢绝周而伐韩者，信东周也。公何不与周地，发质使之楚^⑤’？秦必疑楚不信周，是韩不伐也。又谓秦曰‘韩强与周地，将以疑周于秦也，周不敢不受’。秦必无辞而令周不受^⑥，是受地于韩而听于秦^⑦。”

注：①《正义》上“借”音精夕反，下音子夜反。②《正义》乌减反，又于点反。③《索隐》周君，西周武公也。时王赧微弱，不主盟会，寄居西周耳。④《索隐》徐广曰：“一作‘何’。应劭（曰）《氏姓注》云以何姓为韩后。”⑤《正义》质音竹利反。使音所吏反。质使，令公子及重臣等往楚为质，使秦疑楚，又得不信周也。质平敌不相负也。⑥《正义》又谓秦曰：“韩强与周地，令秦疑周亲韩，则周不敢不受，秦必无巧辞而令周不敢（不）受韩地也。”⑦《索隐》此史厌说韩，令与周地，使质于楚，令秦疑楚不信周，得不假道伐韩，而犹听命于秦。

秦召西周君，西周君恶往，故令人谓韩王^①曰：“秦召西周君，将以使攻王之南阳也，王何不出兵于南阳？周君将以为辞于秦^②。周君不入秦，秦必不敢逾河而攻南阳矣^③。”

注：①《索隐》按：《战国策》云或人为周君谓魏王云者也。②《索隐》高诱注《战国策》曰：“以魏兵在河南为辞，周君不往朝秦也。”③《正义》南阳，今怀州也。杜预云在晋山南河北。以上至“秦召西周君”，是西周君说韩令出兵河南谋秦也。

东周与西周战，韩救西周。或为东周说韩王曰^①：“西周故天子之国，多名器重宝。王案兵毋出，可以德东周^②，而西周之宝必可以尽矣^③。”

注：①《正义》为音于伪反。乃或人为东周说韩王，令按兵无出，则周德韩矣。②《正义》韩按兵不出伐东周，而东周甚愧韩之恩德也。③《正义》韩出兵助西周，虽不攻东周，西周愧其佐助，宝器必尽归于韩。以上至“东周与西周战”，是或人说韩令无救西周也。

王赧谓成君。楚围雍氏^①，韩征甲与粟于东周，东周君恐，召苏代而

告之。代曰：“君何患于是。臣能使韩毋征甲与粟于周，又能为君得高都。”^②周君曰：“子苟能，请以国听子。”代见韩相国曰^③：“楚围雍氏，期三月也，今五月不能拔，是楚病也^④。今相国乃征甲与粟于周，是告楚病也。”韩相国曰：“善。使者已行矣。”^⑤代曰：“何不于周高都？”韩相国大怒曰：“吾毋征甲与粟于周亦已多矣^⑥，何故与周高都也？”代曰：“与周高都，是周折而入于韩也，秦闻之必大怒忿周，即不通周使，是以弊高都得完周也。曷为不与？”相国曰：“善。”果与周高都^⑦。

注：①《集解》徐广曰：“阳翟雍氏城也。《战国策》曰‘韩兵入西周，西周令成君辩说秦求救’，当是说此事而脱误也。”《索隐》如徐此说，自合当改而注结之，不合与“楚围雍氏”连注。《正义》雍音于恭反。《括地志》云：“故雍城在洛州阳翟县东北二十五里，故老云黄帝臣雍父作杵臼所封也。”按：其地时属韩也。②《集解》徐广曰：“今河南新城县高都城也。”《索隐》高诱云：“高都，韩邑，今属上党也。”《正义》《括地志》云：“高都故城一名郟都城，在洛州伊阙县北三十五里。”③《集解》《汉书》《百官表》曰：“相国，秦官。”驷谓韩亦有相国，然则诸国共放秦也。《索隐》相国，公仲侈也。④《正义》谓楚兵弊弱也。⑤《索隐》已，止也。⑥《正义》言幸甚也。⑦《正义》以上至“楚围雍氏”，是苏代为东周说韩，令不征甲而得高都。

三十四年，苏厉谓周君曰：“秦破韩、魏，扑师武^①，北取赵蔺、离石者^②，皆白起也。是善用兵，又有天命。今又将兵出塞攻梁^③，梁破则周危矣。君何不令人说白起乎？曰‘楚有养由基者，善射者也。去柳叶百步而射之，百发而百中之。左右观者数千人，皆曰善射。有一夫立其旁，曰“善，可教射矣”。养由基怒，释弓搯剑，曰“客安能教我射乎”？客曰“非吾能教子支左诎右也^④。夫去柳叶百步而射之，百发而百中之，不以善息^⑤，少焉气衰力倦，弓拨矢钩，一发不中者，百发尽息^⑥”。今破韩、魏，扑师武，北取赵蔺、离石者，公之功多矣。今又将兵出塞，过两周，倍韩，攻梁，一举不得，前功尽弃。公不如称病而无出^⑦’。”

注：①《集解》徐广曰：“扑，一作‘仆’。《战国策》曰秦败魏将犀武于伊阙。”②《集解》《地理志》曰西河都有蔺、离石二县。《正义》蔺音力刃反。

《括地志》云：“离石县，今石州所理县也。”离近离石，皆赵二邑。^③《正义》谓伊阙塞也，在洛州南十九里。伊阙山今名钟山。酈道元《水经注》云：“两山相对，望之若阙，伊水历其间，故谓之伊阙。”按：今谓之龙门，禹凿以通水也。^④《索隐》按：《列女传》云“左手如拒，右手如附枝，右手发之，左手不知，此射之道也”。又《越绝书》曰“左手如附泰山，右手如抱婴儿”。^⑤《索隐》言不以其善而且停息。息，止也。^⑥《索隐》息犹弃。言并弃前善。^⑦《正义》以上至“三十四年”，是苏厉为周说白起无伐梁也。

四十二年，秦破华阳约^①。马犯谓周君曰：“请令梁城周^②。”乃谓梁王曰：“周王病若死，则犯必死矣^③。犯请以九鼎自入于王，王受九鼎而图犯^④。”梁王曰：“善。”遂与之卒，言戍周^⑤。因谓秦王曰：“梁非戍周也，将伐周也。王试出兵境以观之^⑥。”秦果出兵。又谓梁王曰^⑦：“周王病甚矣，犯请后可而复之^⑧。今王使卒之周，诸侯皆生心，后举事且不信。不若令卒为周城，以匿事端^⑨。”梁王曰：“善。”遂使城周^⑩。

注：①《集解》徐广曰：“一作‘厄’。”《正义》司马彪云：“华阳，亭名，在密县。秦昭王三十三年，秦背魏约，使客卿胡伤击魏将芒卯华阳，破之。”《六国年表》云：“白起击魏华阳，芒卯走。”《括地志》云：“故华阳城在郑州管城县南四十里是。”按：马犯见秦破魏华阳约，惧周危，故谓“请梁城周”也。②《索隐》华阳，地名。司马彪曰：“华阳，亭名，在密县。秦昭王三十三年，秦背魏约，使客卿胡伤击魏将芒卯华阳，破之。”是马犯见秦破魏约，惧周危，故谓周君请梁城周，而设诡计也。③《正义》马犯，周臣也。乃说梁王曰，秦破魏华阳之军，去周甚近，周王忧惧国破，犹身之重病，若死，则犯必死也。④《索隐》图，谋也。犯谓梁王，我方入鼎于王，王当谋救援已也。⑤《正义》戍，守也。周虽未入九鼎于梁，而梁信马犯矫言，遂与之卒，令守周。⑥《正义》梁兵非戍周也，将渐伐周而取九鼎宝器，王若不信，试出师于境，以观梁王之变也。⑦《正义》马犯说秦，得秦出兵于境，又重归说梁王也。⑧《索隐》按：《战国策》“甚”作“瘡”。犯请后可而复之者，言王病愈，所图不遂，请得在后有可之时以鼎入梁也。《正义》复音扶富反。复，重也。秦既破华阳军，今又出兵境上，是周国病秦久

矣。犯前请卒戍周，诸侯皆心疑梁取周，后可更重请益卒守周乎？⑨《索隐》梁实图周九鼎，且外遣卒戍周和合。秦举兵欲侵周，梁不救周，是本无善周之事，止是欲周危而取九鼎，故诸侯皆心不信梁矣。故不如匿事端，使卒为周城。《正义》既诸侯生心，不如令卒便为筑城，以隐置疑伐周之事端，绝诸侯不信之心。梁王遂使城周，解诸侯之疑也。⑩《正义》以上至“四十二年”，是马犯说梁王为周筑城也。

四十五年，周君之秦客谓周[最]曰⑪：“公不若誉秦王之孝，因以应为太后养地⑫，秦王必喜，是公有秦交。交善，周君必以为公功。交恶，劝周君入秦者必有罪矣⑬。”秦攻周，而周最谓秦王曰：“为王计者不攻周。攻周，实不足以利，声畏天下。天下以声畏秦，必东合于齐。兵弊于周。合天下于齐，则秦不王矣。天下欲弊秦，劝王攻周。秦与天下弊，则令不行矣⑭。”

注：①《索隐》[最]音词喻反，周之公子也。②《集解》徐广曰：“《地理志》云：应，今颍川父城县应乡是也。”《索隐》《战国策》作“原”。原，周地。太后，秦昭王母宣太后半氏也。《正义》《括地志》云：“故应城，殷时应国，在(城)父[城]。”按：应城此时属周。太后，秦昭王母宣太后半氏。③《正义》客谓周最曰，周君与秦交善，是最之功也。与秦交悉，劝周君入秦者周最，今必得劝周君之罪也。以上至“四十五年”，是周客说周最，令周君以应入秦，得交善而归也。④《正义》令音力政反。秦欲攻周，周最说秦曰，周天子之国，虽有重器名宝，土地狭少，不足利秦国。王若攻之，乃有攻天子之声，而令天下以攻天子之声畏秦，使诸侯归于齐，秦兵空弊于周，则秦不王矣。是天下弊秦，故劝王攻周，令秦受天下弊，而令教命不行于诸侯矣。以上至“秦攻周”，是周最说秦也。

五十八年，三晋距秦。周令其相国之秦，以秦之轻也，还其行⑮。客谓相国曰：“秦之轻重未可知也⑯。秦欲知三国之情。公不如急见秦王曰‘请为王听东方之变’，秦王必重公。重公，是秦重周，周以取秦也；齐重，则固有周最⑰以收齐：是周常不失重国之交也⑱。”秦信周，发兵攻三晋⑲。

注：①《正义》以秦轻易周相，故相国于是反归周也。②《正义》言秦

之轻相国重相国，亦未可知。③《集解》徐广曰：“一作‘冢’，冢亦古之聚字。”④《正义》按：周聚事齐而和于齐周，故得弃重。今相国又得秦重，是相国收秦，周聚收齐，周常不失大国之交也。⑤《正义》三晋，韩、魏、赵也。以上至“五十八年”，是客说周相国，令报三国之情，得秦重也。

五十九年，秦取韩阳城负黍^①，西周恐，倍秦，与诸侯约从^②，将天下锐师出伊阙攻秦^③，令秦无得通阳城。秦昭王怒，使将军嫪^④攻西周。西周君奔秦^⑤，顿首受罪，尽献其邑三十六，口三万^⑥。秦受其献，归其君于周。

注：①《集解》徐广曰：“阳城有负黍聚。”《正义》《括地志》云：“阳城，洛州县也。负黍亭在阳城县西南三十五里。故周邑。《左传》云‘郑伐周负黍’是也。”今属韩国也。②《集解》文颖曰：“关东为从，关西为横。”孟康曰：“南北为从，东西为横。”瓚曰：“以利合曰从，以威势相协曰横。”《正义》按：诸说未允。关东地南北长，长为从，六国共居之。关西地东西广，广为横，秦独居之。③《正义》西周以秦取韩阳城、负黍，恐惧，倍秦之约，共诸侯连从，领天下锐师，从洛州南出伊阙攻秦军，令不得通阳城。④《集解》《汉书》《百官表》曰：“前、后、左、右将军，皆周末官也。”《正义》嫪音纪虬反。⑤《正义》谓西周武公。⑥《索隐》秦昭王之五十二年。

周君、王赧卒^①，周民遂东亡。秦取九鼎宝器，而迁西周公于憊狐^②。后七岁，秦庄襄王灭东(西)周^③。东西周皆入于秦，周既不祀^④。

注：①《集解》宋衷曰：“谥曰西周武公。”《索隐》非也。徐以西周武公是惠公之长子，此周君即西周武公也。盖此时武公与王赧皆卒，故连言也。《正义》刘伯庄云：“赧是渐耻之甚，轻微危弱，寄住东西，足为惭赧，故号之曰赧。”《帝王世纪》云：“名诞。虽居天子之位号，为诸侯之所役逼，与家人无异。名负责于民，无以得归，乃上台避之，故周人名其台曰逃责台。”②《集解》徐广曰：“憊音旦。憊狐聚与阳人聚相近，在洛阳南百五十里梁、新城之间。”《索隐》西周，盖武公之太子文公也。武公卒而立，为秦所迁。而东周亦不知其名号。《战国策》虽有周文君，亦不知灭时定当何主。盖周室衰微，略无纪录，故太史公虽考众书以卒其事，然二国代系甚不分明。《正义》《括地志》云：“汝州外古梁城即憊狐聚也。阳人故城

即阳人聚也，在汝州梁县西四十里，秦迁东周君地。梁亦古梁城也，在汝州梁县西南十五里。新城，今洛州伊阙县也。”按：豨狐、阳人傍在三城之间。③《集解》徐广曰：“周比亡之时，凡七县，河南、洛阳、穀城、平阴、偃师、巩、缙氏。”《正义》《括地志》云：“故穀城在洛州河南县西北十八里苑中。河阴县城本汉平阴县，在洛州洛阳县东北五十里。《十三州志》云在平津大河之南也。魏文帝改曰河阴。”④《集解》皇甫谧曰：“周凡三十七王，八百六十七年。”《索隐》既，尽也。日食尽曰既。言周祚尽灭，无主祭祀。《正义》按：王赧卒后，天下无主三十五年，七雄并争。至秦始皇立，天下一统，十五年，海内咸归于汉矣。

太史公曰：学者皆称周伐纣，居洛邑，综其实不然。武王营之，成王使召公卜居，居九鼎焉，而周复都丰、镐。至犬戎败幽王，周乃东徙于洛邑。所谓周公葬（我）[于]毕，毕在镐东南杜中^①。秦灭周。汉兴九十有余载，天子将封泰山，东巡狩至河南，求周苗裔，封其后嘉三十里地，号曰周子南君^②，比列侯，以奉其先祭祀^③。

注：①《集解》徐广曰：“一作‘社’。”②《集解》瓚曰：“《汲冢古文》谓卫将军文子为子南弥牟，其后有子南劲，朝于魏，后惠成王如卫，命子南为侯。秦并六国，卫最为后，疑嘉是卫后，故氏子南而称君也。”《正义》《括地志》云：“周承休城一名梁雀坞，在汝州梁县东北二十六里。《帝王世纪》云‘汉武帝元鼎四年，东巡河洛，思周德，乃封姬嘉三千户，地方三十里，为周子南君，以奉周祀。元帝初元五年，嘉孙延年进爵为承休侯’，在此城也。平帝元始四年，进为郑公。光武建武十三年，封于观，为卫公。”颜师古云：“子南，其封邑之号，为周后，故总言周子南君。”按：自嘉以下皆姓姬氏，著在史传。瓚言子南为氏，恐非。③《集解》徐广曰：“自周亡乙巳至元鼎四年戊辰，一百四十四年，汉之九十四年也。汉武元鼎四年封周后也。”

《史记·秦本纪》

秦之先，帝颛顼之苗裔^①孙曰女修。女修织，玄鸟陨卵，女修吞之，生子大业^②。大业取少典之子，曰女华。女华生大费^③，与禹平水土。已成，帝锡玄圭。禹受曰：“非予能成，亦大费为辅。”帝舜曰：“咨尔费，赞禹功，其赐尔皐游^④。尔后嗣将大出^⑤。”乃妻之姚姓之玉女^⑥。大费拜受，佐舜调驯鸟兽，鸟兽多驯服，是为柏翳。舜赐姓嬴氏。

注：①《正义》黄帝之孙，号高阳氏。②《索隐》女修，颛顼之裔女，吞卵子而生大业。其父不着。而秦、赵以母族而祖颛顼，非生人之义也。按《左传》郑国，少昊之后，而嬴姓盖其族也，则秦、赵宜祖少昊氏。《正义》《列女传》云：“陶子生五岁而佐禹。”曹大家注云：“陶子者，皋陶之子伯益也。”按此即知大业是皋陶。③《索隐》扶味反，一音秘。寻费后以为氏，则扶味反为得。此则秦、赵之祖，嬴姓之先，一名伯翳，《尚书》谓之“伯益”，《系本》《汉书》谓之“伯益”是也。寻检《史记》上下诸文，伯翳与伯益是一人不疑。而《陈杞系家》即叙伯翳与伯益为二，未知太史公疑而未决邪？抑亦谬误尔？④《索隐》“游音旒”。谓赐以皐色旌旆之旒，色与玄玉色副，言其大功成也。然其事亦当有所出。⑤《索隐》出犹生也。言尔后嗣繁昌，将大生出子孙也。故《左传》亦云“晋公子姬出也”。⑥《集解》徐广曰：“皇甫谧云赐之玄玉，妻以姚姓之女也。”

大费生子二人：一曰大廉，实鸟俗氏；二曰若木，实费氏^①。其玄孙曰费昌，子孙或在中国，或在夷狄^②。费昌当夏桀之时，去夏归商，为汤御，以败桀于鸣条。大廉玄孙曰孟戏、中衍^③，鸟身人言^④。帝太戊闻而卜之使御，吉，遂致使御而妻之。自太戊以下，中衍之后，遂世有功^⑤，以佐殷国，故嬴姓多显，遂为诸侯。

注：①《索隐》以仲衍鸟身人言，故为鸟俗氏。俗，一作“浴”。若木以

王父字为费氏也。②《索隐》殷纣时费仲，即昌之后也。③《索隐》旧解以孟戏仲衍是一人，今以孟仲分字，当是二人名也。④《正义》身体是鸟而能人言。又云口及手足似鸟也。⑤《正义》谓费昌及仲衍。

其玄孙曰中湣^①，在西戎，保西垂。生蜚廉。蜚廉生恶来。恶来有力^②，蜚廉善走，父子俱以材力事殷纣。周武王之伐纣，并杀恶来。是时蜚廉为纣石北方^③，还，无所报，为坛霍太山^④而报，得石棺^⑤，铭曰“帝令处父^⑥不与殷乱，赐尔石棺以华氏”。死，遂葬于霍太山^⑦。蜚廉复有子曰季胜^⑧。季胜生孟增。孟增幸于周成王，是为宅皋狼^⑨。皋狼生衡父，衡父生造父。造父以善御幸于周繆王，得骥、温骊^⑩、骅骝^⑪、騄耳之驹^⑫，西巡狩，乐而忘归^⑬。徐偃王作乱^⑭，造父为繆王御，长驱归周，一日千里以救乱^⑮。繆王以赵城封造父^⑯，造父族由此为赵氏。自蜚廉生季胜已下五世至造父，别居赵。赵衰其后也。恶来革者，蜚廉子也，蚤死。有子曰女防。女防生旁皋，旁皋生太几，太几生大骆，大骆生非子。以造父之宠，皆蒙赵城，姓赵氏。

注：①《集解》徐广曰：“一作‘滑’。”《正义》“中音仲”。“滴音决”。宋衷注《世本》云仲滑生飞廉。②《集解》《晏子春秋》曰：“手裂虎兕。”③《集解》徐广曰：“皇甫谧云作石椁于北方。”《索隐》“石”下无字，则不成文，意亦无所见，必是《史记》本脱。皇甫谧尚得其说。徐虽引之，而竟不云是脱何字，专质之甚也。刘伯庄云：“霍太山，纣都之北也。霍太山在晋州霍邑县。”按：在卫州朝歌之西方也。④《集解》《地理志》霍太山在河东彘县。⑤《正义》纣既崩，无所归报，故为坛就霍太山而祭纣，报云作得石椁。⑥《索隐》蜚廉别号。⑦《集解》皇甫谧云：“去彘县十五里有冢，常祠之。”《索隐》言处父至忠，国灭君死而不忘臣节，故天赐石棺，以光华其族。事盖非实，譙周深所不信。⑧《正义》音升。⑨《正义》《地理志》云西河郡皋狼县也。按：孟增居皋狼而生衡父。⑩《集解》徐广曰：“温，一作‘盗’”骊按：郭璞云“为马细颈。骊，黑色”。《索隐》温音盗。徐广亦作“盗”。邹诞生本作“骠”，音陶。刘氏音义云“盗骊，骊骊也。骊，浅黄色”。八骏既因色为名，骊骊为得之也。⑪《集解》郭璞曰：“色如华而赤。今名马骠赤者为枣骝。骝，马赤也。”⑫《集解》郭璞曰：“《纪年》云‘北唐之君来见以一骊马，是生騄耳’。

八骏皆因其毛色以为名号。”駟按：《穆天子传》穆王有八骏之乘，此纪不具者也。《索隐》按：《穆王传》曰赤骥、盗骊、白义、渠黄、骅骝、踰骠、騄耳、山子。《正义》“騄音录”。⑬《集解》郭璞曰：“《纪年》云穆王十七年，西征于昆仑丘，见西王母。”《正义》《括地志》云：“昆仑山在肃州酒泉县南八十里。《十六国春秋》云前凉张骏酒泉守马岌上言，酒泉南山即昆仑之丘也，周穆王见西王母，乐而忘归，即谓此山。有石室王母堂，珠玑镂饰，焕若神宫。”按：肃州在京西北二千九百六十里，即小昆仑也，非河源出处者。⑭《集解》《地理志》曰临淮有徐县，云故徐国。《尸子》曰：“徐偃王有筋而无骨。”駟谓号偃由此。《正义》《括地志》云：“大徐城在泗州徐城县北三十里，古徐国也。《博物志》云徐君宫人有娠而生卵，以为不祥，弃于水滨洲。孤独母有犬鹤苍，衔所弃卵以归，覆暖之，乃成小儿。生时正偃，故以为名。宫人闻之，更取养之。及长，袭为徐君。后鹤苍临死，生角而九尾，化为黄龙也。鹤苍或名后苍。”《括地志》又云：“徐城在越州鄞县东南入海二百里。夏侯志云翁洲上有徐偃王城。传云昔周穆王巡狩，诸侯共尊偃王，穆王闻之，令造父御，乘骖裹之马，日行千里，自还讨之。或云命楚王帅师伐之，偃王乃于此处立城以终。”⑮《正义》《古史考》云：“徐偃王与楚文王同时，去周穆王远矣。且王者行有周卫，岂得救乱而独长驱日行千里乎？”并言此事非实。按：《年表》穆王元年去楚文王元年三百一十八年矣。⑯《集解》徐广曰：“赵城在河东永安县。”《正义》《括地志》云：“赵城，今晋州赵城县是。本彘县地，后改曰永安，即造父之邑也。”

非子居犬丘^①，好马及畜^②，善养息之。犬丘人言之周孝王，孝王召使主马于汧渭之间^③，马大蕃息。孝王欲以为大骆适嗣。申侯之女为大骆妻，生子成为适。申侯乃言孝王曰：“昔我先郟山之女^④，为戎胥轩妻^⑤，生中湣，以亲故归周，保西垂，西垂以其故和睦。今我复与大骆妻，生适子成。申骆重婚，西戎皆服，所以为王^⑥。王其图之。”于是孝王曰：“昔伯翳为舜主畜，畜多息，故有土，赐姓嬴。今其后世亦为朕息马，朕其分土为附庸。”邑之秦^⑦，使复续嬴氏祀，号曰秦嬴。亦不废申侯之女子为骆适者，以和西戎。

注：①《集解》徐广曰：“今槐里也。”《正义》《括地志》云：“犬丘故城一

注：①《正义》《括地志》云：“故汧城在陇州汧源县东南三里。《帝王世纪》云秦襄公二年徙都汧，即此城。”②《正义》周平王徙居王城，即《维诰》云“我卜涧水东，漇水西”者也。③《集解》徐广曰：“赤马黑髦曰骝。”④《集解》徐广曰：“年表云立西畴，祠白帝。”《索隐》襄公始列为诸侯，自以居西(畴)，西(畴)，县名，故作西畴，祠白帝。畴，止也，言神灵之所依止也。亦音市，谓为坛以祭天也。

文公元年，居西垂宫^①。三年，文公以兵七百人东猎。四年，至汧渭之会。曰：“昔周邑我先秦嬴于此，后卒获为诸侯。”乃卜居之，占曰吉^②，即营邑之。十年，初为郿畴^③，用三牢。十三年，初有史以纪事，民多化者。十六年，文公以兵伐戎，戎败走。于是文公遂收周余民有之，地至岐，岐以东献之周。十九年，得陈宝^④。二十年，法初有三族之罪^⑤。二十七年，伐南山大梓，丰大特^⑥。四十八年，文公太子卒，赐谥为靖公^⑦。靖公之长子为太子，是文公孙也。五十年，文公卒，葬西山^⑧。靖公子立，是为宁公^⑨。

注：①《正义》即上西县是也。②《正义》《括地志》云：“郿县故城在岐州郿县东北十五里。毛萇云：郿，地名也。秦文公东猎汧渭之会，卜居之，乃营邑焉，即此城也。”③《集解》徐广曰：“郿县属冯翊。”《索隐》音敷，亦县名。于郿地作畴，曰郿畴。故《封禅书》曰“秦文公梦黄蛇自天下属地，其口止于郿衍”，史敦以为神，故立畴也。《正义》《括地志》云：“三畴原在岐州雍县南二十里。《封禅书》云秦文公作郿畴，襄公作西畴，灵公作吴阳上畴，并此原上，因名也。”④《索隐》按：《汉书》《郊祀志》云“文公获若石云，于陈仓北阪城祠之，其神来，若雄雉，其声殷殷云，野鸡夜鸣，以一牢祠之，号曰陈宝”。又臣瓚云“陈仓县有宝夫人祠，岁与叶君神会，祭于此者也”。苏林云“质如石，似肝”。云，语辞。《正义》《括地志》云：“宝鸡(神)[祠]在岐州陈仓县东二十里故陈仓城中。《晋太康地志》云‘秦文公时，陈仓人猎得兽，若彘，不知名，牵以献之。逢二童子，童子曰：“此名为媚，常在地中，食死人脑。”即欲杀之，拍捶其首。媚亦语曰：“二童子名陈宝，得雄者王，得雌者霸。”陈仓人乃逐二童子，化为雉，雌上陈仓北阪，为石，秦祠之’。《搜神记》云其雄者飞至南阳，其后光武起于南阳，皆如

其言也。”⑤《集解》张晏曰：“父母、兄弟、妻子也。”如淳曰：“父族、母族、妻族也。”⑥《集解》徐广曰：“今武都故道有怒特祠，图大牛，上生树本，有牛从木中出，后见丰水之中。”《正义》《括地志》云：“大梓树在岐州陈仓县南十里仓山上。《录异传》云‘秦文公时，雍南山有大梓树，文公伐之，辄有大风雨，树生合不断。时有一人病，夜往山中，闻有鬼语树神曰：‘秦若使人被发，以朱丝绕树伐汝，汝得不因耶？’树神无言。明日，病人语闻，公如其言伐树，断，中有一青牛出，走入丰水中。其后牛出丰水中，使骑击之，不胜。有骑堕地复上，发解，牛畏之，入不出，故置髦头。汉、魏、晋因之。武都郡立怒特祠，是大梓牛神也’。”按：今俗画青牛障是。⑦《集解》徐广曰：“文公之四十四年，鲁隐之元年。”⑧《集解》徐广曰：“皇甫谧云葬于西山，在今陇西之西县。”⑨《集解》徐广曰：“一作‘曼’。”

宁公二年，公徙居平阳^①。遣兵伐荡社^②。三年，与亳战，亳王奔戎，遂灭荡社^③。四年，鲁公子翬^④弑其君隐公。十二年，伐荡氏，取之。宁公生十岁立，立十二年卒，葬西山^⑤。生子三人，长男武公为太子。武公弟德公，同母鲁姬子^⑥。生出子。宁公卒，大庶长弗忌、威垒^⑦、三父废太子而立出子为君。出子六年，三父等复共令人贼杀出子。出子生五岁立，立六年卒。三父等乃复立故太子武公。

注：①《集解》徐广曰：“郟之平阳亭。”《正义》《帝王世纪》云秦宁公都平阳。按：岐山县有阳平乡，乡内有平阳聚。《括地志》云：“平阳故城在岐州岐山县西四十六里，秦宁公徙都之处。”②《集解》徐广曰：“荡音汤。社，一作‘杜’。”《索隐》西戎之君号曰亳王，盖成汤之胤。其邑曰荡社。徐广云一作“汤杜”，言汤邑在杜县之界，故曰汤杜也。《正义》《括地志》云：“雍州三原县有汤陵。又有汤台，在始平县西北八里。”按：其国盖在三原始平之界矣。③《集解》皇甫谧云：“亳王号汤，西夷之国也。”④《正义》音暉，即羽父也。⑤《正义》《括地志》云：“秦宁公墓在岐州陈仓县西北三十七里秦陵山。《帝王世纪》云秦宁公葬西山大麓，故号秦陵山也。”按：文公亦葬西山，盖秦陵山也。⑥《正义》德公母号鲁姬子。⑦《正义》音力追反。

武公元年，伐彭戏氏^①，至于华山下^②，居平阳封宫^③。三年，诛三父等

而夷三族，以其杀出子也。郑高渠昧杀其君昭公^④。十年，伐邾、冀戎，初县之^⑤。十一年，初县杜、郑^⑥。灭小虢^⑦。

注：①《正义》戏音许宜反，戎号也。盖同州彭衙故城是也。②《正义》即华岳之下也。③《正义》官名，在岐州平阳城内也。④《索隐》《春秋》鲁桓公十七年《左传》作“高渠弥”也。⑤《集解》《地理志》陇西有上邽县。应劭曰：“即邾戎邑也。”冀县属天水郡。⑥《集解》《地理志》京兆有郑县、杜县也。《正义》《括地志》云：“下杜故城在雍州长安县东南九里，古杜伯国。华州郑县也。《毛诗谱》云郑国者，周畿内之地。宣王封其弟于咸林之地，是为郑桓公。”按：秦得皆县之。⑦《集解》班固曰西虢在雍州。《正义》虢音古伯反。《括地志》云：“故虢城在岐州陈仓县东四十里。次西十余里又有城，亦名虢城。《舆地志》云此虢文王母弟虢叔所封，是曰西虢。”按：此虢灭时，陕州之虢犹谓之小虢。又云，小虢，羌之别种。

十三年，齐人管至父、连称等杀其君襄公而立公孙无知。晋灭霍、魏、耿^①。齐雍廩^②杀无知、管至父等而立齐桓公。齐、晋为强国。

注：①《索隐》《春秋》鲁闵公元年《左传》云“晋灭耿，灭魏，灭霍”，此不言魏，史阙文耳。又《传》曰：“赐毕万魏，赐赵夙耿。”杜预注曰：“平阳皮氏县东南有耿乡，永安县东北有霍太山。三国皆姬姓。”《正义》《括地志》云：“霍，晋州霍邑县，又春秋时霍伯国。韦昭云霍，姬姓也。”《括地志》云：“故耿城今名耿仓城，在绛州龙门县东南十二里，故耿国也。《都城记》云耿，嬴姓国也。”②《正义》雍，于宫反。廩，力甚反。是雍林邑人姓名也。

十九年，晋曲沃始为晋侯^①。齐桓公伯于鄆^②。

注：①《索隐》晋穆侯少子成师居曲沃，号曲沃桓叔，至武公称灭晋侯缙，始为晋君也。②《正义》“伯音霸”。

二十年，武公卒，葬雍平阳。初以人从死，从死者六十六人。有子一人，名曰白，白不立，封平阳^①。立其弟德公。

注：①《正义》即雍平阳也。平阳时属雍，并在岐州。解在上也。

德公元年，初居雍城^①大郑宫^②。以牺三百牢祠鄜畤。卜居雍。后子孙饮马于河^③。梁伯、芮伯来朝^④。二年，初伏^⑤，以狗御蛊^⑥。德公生三十三岁

而立，立二年卒。生子三人：长子宣公，中子成公，少子穆公。长子宣公立。

注：①《集解》徐广曰：“今县在扶风。”②《正义》《括地志》云：“岐州雍县南七里故雍城，秦德公大郑宫城也。”③《正义》卜居雍之后，国益广大，后代子孙得东饮马于龙门之河。④《索隐》梁，嬴姓。芮，姬姓。梁国在冯翊夏阳。芮国在冯翊临晋。《正义》《括地志》云：“南芮乡故城在同州朝邑县南三十里，又有北芮城，皆古芮伯国。郑玄云：周同姓之国，在畿内，为王卿士者。《左传》云：桓公三年，芮伯万之母芮姜恶芮伯之多宠人，故逐之，出居魏。”今按：[陕]州芮城县界有芮国城，盖是殷末虞芮争田之芮国是也。⑤《集解》孟康曰：“六月伏日初也。周时无，至此乃有之。”《正义》六月三伏之节起秦德公为之，故云初伏。伏者，隐伏避盛暑也。历忌释云：“伏者何？以金气伏藏之日也。四时代谢，皆以相生：立春，木代水，水生木；立夏，火代木，木生火；立冬，水代金，金生水；立秋，以金代火，故至庚日必伏。庚者金，故曰伏也。”⑥《集解》徐广曰：“年表云初作伏，祠社，磔狗邑四门也。”《正义》蛊者，热毒恶气为伤害人，故磔狗以御之。年表云“初作伏，祠社，磔狗邑四门”。按：磔，禳也。狗，阳畜也。以狗张磔于郭四门，禳却热毒气也。《左传》云皿虫为蛊。顾野王云谷久积变为飞蛊也。

宣公元年，卫、燕伐周^①，出惠王，立王子颓。三年，郑伯、虢叔^②杀子颓而入惠王。四年，作密畤^③与晋战河阳，胜之。十二年，宣公卒。生子九人，莫立，立其弟成公。

注：①《正义》卫惠公都即今卫州也。燕，南燕也。周，天王也。《括地志》云：“滑州故城古南燕国。应劭云南燕，媯姓之国，黄帝之后。”②正义《括地志》云：“洛州汜水县，古东虢国，亦郑之制邑，汉之城皋，即周穆王虎牢城。《左传》云宫之奇曰‘虢仲虢叔，王季之穆也’。”③《正义》《括地志》云：“汉有五畤，在岐州雍县南，则廊畤、吴阳上畤、下畤、密畤、北畤。秦文公梦黄蛇自天而下，属地，其口止于廊衍，作畤，郊祭白帝，曰廊畤。秦宣公作密畤于渭南，祭青帝。秦灵公作吴阳上畤，祭黄帝；作下畤，祠炎帝。汉高帝曰‘天有五帝，今四，何也？待我而具五’。遂立黑帝，曰北畤

是也。”

成公元年，梁伯^①、芮伯来朝。齐桓公伐山戎，次于孤竹^②。成公立四年卒。子七人，莫立，立其弟繆公^③。繆公任好元年，自将伐茅津^④，胜之。四年，迎妇于晋，晋太子申生姊也。其岁，齐桓公伐楚，至邵陵。

注：①《正义》《括地志》云：“同州韩城县南二十二里少梁故城，古少梁国。《都城记》云梁伯国，嬴姓之后，与秦同祖。秦穆公二十二年灭之。”②《正义》《括地志》云：“孤竹故城在平州卢龙县十二里，殷时诸侯竹国也。”③《索隐》秦自宣公已上皆史失其名。今按《系本》《古史考》，得繆公名任好。④《正义》刘伯庄云：“戎号也。”《括地志》云：“茅津及茅城在陕州河北县西二十里。《注水经》云茅亭，茅戎号。”

五年，晋献公灭虞、虢，虢虞君与其大夫百里奚，以璧马赂于虞故也。既虢百里奚，以为秦繆公夫人媵于秦。百里奚亡秦走宛^①，楚鄙人执之。繆公闻百里奚贤，欲重赎之，恐楚人不与，乃使人谓楚曰：“吾媵臣百里奚在焉，请以五羖羊皮赎之。”楚人遂许与之。当是时，百里奚年已七十。繆公释其囚，与语国事。谢曰：“臣亡国之臣，何足问！”繆公曰：“虞君不用子，故亡，非子罪也。”固问，语三日，繆公大说，授之国政，号曰五羖大夫。百里奚让曰：“臣不及臣友蹇叔，蹇叔贤而世莫知。臣常游困于齐而乞食（食至）人^②，蹇叔收臣。臣因而欲事齐君无知，蹇叔止臣，臣得脱齐难，遂之周。周王子颓好牛，臣以养牛干之。及颓欲用臣，蹇叔止臣，臣去，得不诛。事虞君，蹇叔止臣。臣知虞君不用臣，臣诚私利禄爵，且留。再用其言，得脱；一不用，及虞君难：是以知其贤。”于是繆公使人厚币迎蹇叔，以为上大夫。

注：①《集解》《地理志》南阳有宛县。《正义》宛，于元反，今邓州县。②《集解》徐广曰：“（食至），一作‘铨’”《正义》铨音珍栗反。铨，地名，在沛县。

秋，繆公自将伐晋，战于河曲^①。晋骊姬作乱，太子申生死新城^②，重耳、夷吾出奔^③。九年，齐桓公会诸侯于葵丘^④。

注：①《集解》徐广曰：“一作‘西’”《公羊传》曰“河千里而一曲也”。

服虔曰“河曲，晋地”。杜预曰“河曲在蒲阪南”。《正义》按：河曲在华阴县界也。②《正义》韦昭云：“曲沃新为太子城。”《括地志》云：“绛州曲沃县有曲沃故城，土人以为晋曲沃新城。”③《正义》重耳奔翟，夷吾奔少梁也。④《正义》《括地志》云：“葵丘在曹州考城县东南一里一百五十步郭内，即桓公会处。又青州临淄县有葵丘。即《传》连称、管至父所戍处。”

晋献公卒。立骊姬子奚齐，其臣里克杀奚齐。荀息立卓子^①，克又杀卓子及荀息。夷吾使人请秦，求入晋。于是繆公许之，使百里奚将兵送夷吾。夷吾谓曰：“诚得立，请割晋之河西八城^②与秦。”及至，已立，而使丕郑谢秦，背约不与河西城，而杀里克。丕郑闻之，恐，因与繆公谋曰：“晋人不欲夷吾，实欲重耳。今背秦约而杀里克，皆吕甥、郤芮之计也。愿君以利急召吕、郤，吕、郤至，则更入重耳便。”繆公许之，使人与丕郑归，召吕、郤。吕、郤等疑丕郑有间，乃言夷吾杀丕郑。丕郑子丕豹奔秦，说繆公曰：“晋君无道，百姓不亲，可伐也。”繆公曰：“百姓苟不便，何故能诛其大臣？能诛其大臣，此其调也^③。”不听，而阴用豹。

注：①《集解》徐广曰：“一作‘倬’。”②《正义》谓同、华等州地。③《正义》调音徒聊反。言能诛大臣丕郑，云是夷吾于百姓调和也。刘伯庄音徒吊反。按：调，选也。邪臣诛，忠臣用，是夷吾能调选。两通也。

十二年，齐管仲、隰朋死。

晋旱，来请粟。丕豹说繆公勿与，因其饥而伐之。繆公问公孙支^①，支曰：“饥穰更事耳，不可不与。”问百里奚，奚曰：“夷吾得罪于君，其百姓何罪？”于是用百里奚、公孙支言，卒与之粟。以船漕车转，自雍相望至绛^②。

注：①《集解》服虔曰：“秦大夫公孙子桑。”②《集解》贾逵曰：“雍，秦国都；绛，晋国都也。”

十四年，秦饥，请粟于晋。晋君谋之群臣。虢射曰^①：“因其饥伐之，可有大功。”晋君从之。十五年，兴兵将攻秦。繆公发兵，使丕豹将，自往击之。九月壬戌，与晋惠公夷吾合战于韩地^②。晋君弃其军，与秦争利，还而马鬣^③。繆公与麾下驰追之，不能得晋君，反为晋军所围。晋击繆公，繆公伤。于是岐下食善马者三百人驰冒晋军，晋军解围，遂脱繆公而反生得

晋君。初，繆公亡善马，岐下野人共得而食之者三百余人^④，吏逐得，欲法之。繆公曰：“君子不以畜产害人。吾闻食善马肉不饮酒，伤人。”乃皆赐酒而赦之。三百人者闻秦击晋，皆求从，从而见繆公窘，亦皆推锋争死，以报食马之德。于是繆公虏晋君以归，令于国，齐宿，吾将以晋君祠上帝。周天子闻之，曰“晋我同姓”，为请晋君。夷吾姊亦为繆公夫人，夫人闻之，乃衰经跣，曰：“妾兄弟不能相救，以辱君命。”繆公曰：“我得晋君以为功，今天子为请，夫人是忧。”乃与晋君盟，许归之，更舍上舍，而馈之七牢^⑤。十一月，归晋君夷吾，夷吾献其河西地，使太子圉为质于秦。秦妻子圉以宗女。是时秦地东至河^⑥。十八年，齐桓公卒。二十年，秦灭梁、芮^⑦。

注：①《正义》射音石也。②《正义》《左传》云僖公十五年，秦晋战于韩原，秦获晋侯以归。《括地志》云：“韩原在同州韩城县西南十八里。《十六国春秋》云魏颗梦父结草抗秦将杜回，亦在韩原。”③《正义》鸛音致，又敕利反。《国语》云：“晋师溃，戎马还泞而止。”韦昭云：“泞，深泥也。”④《正义》《括地志》云：“野人坞在岐州雍县东北二十里。”按：野人盗马食处，因名焉。⑤《集解》贾逵曰：“诸侯雍饩七牢。牛一羊一豕一为一牢也。”⑥《正义》晋河西八城入秦，秦东境至河，即龙门河也。⑦《正义》梁、芮国皆在同州。秦得其地，故灭二国之君。

二十二年，晋公子圉闻晋君病，曰：“梁，我母家也^①，而秦灭之。我兄弟多，即君百岁后，秦必留我，而晋轻，亦更立他子。”子圉乃亡归晋。二十三年，晋惠公卒，子圉立为君。秦怨圉亡去，乃迎晋公子重耳于楚，而妻以故子圉妻。重耳初谢，后乃受。繆公益礼厚遇之。二十四年春，秦使人告晋大臣，欲入重耳。晋许之，于是使人送重耳。二月，重耳立为晋君，是为文公。文公使人杀子圉。子圉是为怀公。其秋，周襄王弟带以翟伐王，王出居郑^②。二十五年，周王使人告难于晋、秦。秦繆公将兵助晋文公入襄王，杀王弟带。二十八年，晋文公败楚于城濮^③。三十年，繆公助晋文公围郑^④。郑使人言繆公曰：“亡郑厚晋，于晋而得矣，而秦未有利。晋之强，秦之忧也。”繆公乃罢兵归。晋亦罢。三十二年冬，晋文公卒。

注：①《正义》子圉母，梁伯之女也。②《正义》王居于汜邑也。③《正义》卫地也，今濮州。④《正义》《左传》云僖公三十年，晋侯、秦伯围郑。杜预云：“文公过郑，郑不礼之。”

郑人有卖郑于秦曰：“我主其城门，郑可袭也。”繆公问蹇叔、百里奚，对曰：“径数国千里而袭人，希有得利者。且人卖郑，庸知我国人不有以我情告郑者乎？不可。”繆公曰：“子不知也，吾已决矣。”遂发兵，使百里奚子孟明视，蹇叔子西乞术及白乙丙将兵。行日，百里奚、蹇叔二人哭之。繆公闻，怒曰：“孤发兵而子沮哭吾军，何也^①？”二老曰：“臣非敢沮君军。军行，臣子与往^②；臣老，迟还恐不相见，故哭耳。”二老退，谓其子曰：“汝军即败，必于殽阨矣^③。”三十三年春，秦兵遂东，更晋地，过周北门。周王孙满曰：“秦师无礼^④，不败何待！”兵至滑^⑤，郑贩卖贾人^⑥弦高^⑦，持十二牛将卖之周，见秦兵，恐死虏，因献其牛，曰：“闻大国将诛郑，郑君谨修守御备，使臣以牛十二劳军士。”秦三将军相谓曰：“将袭郑，郑今已觉之，往无及已。”灭滑。滑，晋之边邑也。

注：①《正义》沮，自吕反。沮，毁也。《左传》云蹇叔哭之曰：“孟子，吾见师之出，不见其入也。”②《正义》与音预。③《正义》殽音喜交反。“阨音厄。”《春秋》云鲁僖公三十三年，晋人及姜戎败秦师于殽。《括地志》云：“三殽山又名嵒岑山，在洛州永宁县西北二十里，即古之殽道也。”④《正义》《左传》云：“秦师过周北门，左右免胄而下，超乘者三百乘。王孙满尚幼，观之，言于王曰：‘秦师轻而无礼，必败。’”杜预云：“王城北门也。谓过天子门不卷甲束兵。超乘，示勇也。”⑤《正义》为八反。《括地志》云：“缙氏故城在洛州缙氏县东二十五里，滑伯国也。韦昭云，姬姓小国也。”⑥《正义》卖麦卦反。“贾音古”。《左传》作“商人”也。⑦《集解》人姓名。

当是时，晋文公丧尚未葬。太子襄公怒曰：“秦侮我孤，因丧破我滑。”遂墨衰经，发兵遮秦兵于殽，击之，大破秦军，无一人得脱者。虏秦三将以归。文公夫人，秦女也^①，为秦三囚将请曰：“繆公之怨此三人入于骨髓，愿令此三人归，令我君得自快烹之。”晋君许之，归秦三将。三将至，繆公素服郊迎，向三人哭曰：“孤以不用百里奚、蹇叔言以辱三子，三子

何罪乎？子其悉心雪耻，毋怠。”遂复三人官秩如故，愈益厚之。三十四年，楚太子商臣弑其父成王代立。繆公于是复使孟明视等将兵伐晋，战于彭衙^②。秦不利，引兵归。

注：①《集解》服虔曰：“繆公女。”②《集解》杜预曰：“冯翊合阳县西北有衙城。”《正义》《括地志》云：“彭衙故城在同州白水县东北六十里。”

戎王使由余^①于秦。由余，其先晋人也，亡入戎，能晋言。闻繆公贤，故使由余观秦。秦繆公示以宫室、积聚。由余曰：“使鬼为之，则劳神矣。使人为之，亦苦民矣。”繆公怪之，问曰：“中国以诗书礼乐法度为政，然尚时乱，今戎夷无此，何以为治，不亦难乎？”由余笑曰：“此乃中国所以乱也。夫自上圣黄帝作为礼乐法度，身以先之，仅以小治。及其后世，日以骄淫。阻法度之威，以责督于下，下罢极^②则以仁义怨望于上，上下交争怨而相篡弑，至于灭宗，皆以此类也。夫戎夷不然。上含淳德以遇其下，下怀忠信以事其上，一国之政犹一身之治，不知所以治，此真圣人之治也。”于是繆公退而问内史廖^③曰：“孤闻邻国有圣人，敌国之忧也。今由余贤，寡人之害，将奈之何？”内史廖曰：“戎王处辟匿，未闻中国之声。君试遗其女乐，以夺其志^④；为由余请，以疏其闲；留而莫遣，以失其期。戎王怪之，必疑由余。君臣有闲，乃可虏也。且戎王好乐，必怠于政。”繆公曰：“善。”因与由余曲席而坐^⑤，传器而食，问其地形与其兵势尽觞，而后令内史廖以女乐二八遗戎王。戎王受而说之，终年不还。于是秦乃归由余。由余数谏不听，繆公又数使人闲要由余，由余遂去降秦。繆公以客礼礼之，问伐戎之形。

注：①《正义》戎人姓名。②《正义》罢音皮。③《集解》《汉书》《百官表》曰：“内史，周官也。”④《集解》徐广曰：“夺，一作‘徇’。”⑤《正义》按：床在穆公左右，相连而坐，谓之曲席也。

三十六年，繆公复益厚孟明等，使将兵伐晋，渡河焚船，大败晋人，取王官及鄙^①，以报殽之役。晋人皆城守不敢出。于是繆公乃自茅津^②渡河^③，封殽中尸^④，为发丧，哭之三日。乃誓于军曰：“嗟士卒！听无哗，余誓告汝。古之人谋黄发番番^⑤，则无所过。”以申思不用蹇叔、百里奚之谋，

故作此誓，令后世以记余过。君子闻之，皆为垂涕，曰：“嗟乎！秦缪公之与人周也^⑤，卒得孟明之庆。”

注：①《集解》徐广曰：“《左传》作‘郊’”駉按：服虔曰“皆晋地，不能有”。《正义》“鄙音郊”。《左传》作“郊”。杜预云：“书取，言易也。”《括地志》云：“王官故城在同州澄城县西北九十里。又云南郊故城在县北十七里。又有北郊故城，又有西郊古城。《左传》云文公三年，秦伯伐晋，济河焚舟，取王官及郊也。”《括地志》云：“蒲州猗氏县南二里又有王官故城，亦秦伯取者。”上文云“秦地东至河”，盖猗氏王官是也。②《集解》徐广曰：“在大阳。”《正义》《括地志》云：“茅津在陕州河北县、大阳县也。”③《正义》自茅津南渡河也。④《集解》贾逵曰：“封识之。”《正义》《左传》云：“秦伯伐晋，济河焚舟，晋人不出，遂自茅津济，封殽尸而还。”杜预云：“封，埋藏也。”⑤《正义》“番音婆”。字当做“皤”。皤，白头貌。言发白而更黄，故云黄发番番，（以申思）谓蹇叔、百里奚也。⑥《集解》服虔曰：“周，备也。”

三十七年，秦用由余谋伐戎王，益国十二，开地千里^①，遂霸西戎。天子使召公过贺缪公以金鼓。三十九年，缪公卒，葬雍^②。从死者百七十七人，秦之良臣子舆氏三人^③名曰奄息、仲行、鍼虎，亦在从死之中^④。秦人哀之，为作歌《黄鸟》之诗。君子曰：“秦缪公广地益国，东服强晋，西霸戎夷，然不为诸侯盟主，亦宜哉。死而弃民，收其良臣而从死。且先王崩，尚犹遗德垂法，况夺之善人良臣百姓所哀者乎？是以知秦不能复东征也。”缪公子四十人，其太子罃代立，是为康公。

注：①《正义》韩安国云“秦穆公都地方三百里，并国十四，辟地千里”，陇西、北地郡是也。②《集解》《皇览》曰：“秦缪公冢在橐泉宫祈年观下。”《正义》《庙记》云：“橐泉宫，秦孝公造。祈年观，德公起。盖在雍州城内。”《括地志》云：“秦穆公冢在岐州雍县东南二里。”③《正义》毛萇云：“良，善也，三善臣也。”《左传》云：“子车氏之三子。”杜预云：“子车，秦大夫也。”④《正义》行音胡郎反。鍼音其廉反。应劭云：“秦穆公与群臣饮酒酣，公曰‘生共此乐，死共此哀’。于是奄息、仲行、鍼虎许诺。及公薨，皆从死。《黄鸟》诗所为作也。”杜预云：“以人葬为殉也。”《括地志》云：“三良冢

在岐州雍县一里故城内。”

康公元年。往岁繆公之卒，晋襄公亦卒；襄公之弟名雍，秦出也^①，在秦。晋赵盾欲立之，使随会^②来迎雍，秦以兵送至令狐^③。晋立襄公子而反击秦师，秦师败，随会来奔。二年，秦伐晋，取武城^④，报令狐之役。四年，晋伐秦，取少梁^⑤。六年，秦伐晋，取鞏马^⑥。战于河曲，大败晋军。晋人患随会在秦为乱，乃使魏雒余^⑦详反^⑧，合谋会，诈而得会，会遂归晋。康公立十二年卒，子共公立^⑨。共公二年，晋赵穿弑其君灵公。三年，楚庄王强，北兵至雒，问周鼎。共公立五年卒，子桓公立。桓公三年，晋败我一将。十年，楚庄王服郑，北败晋兵于河上。当是之时，楚霸，为会盟合诸侯。二十四年，晋厉公初立，与秦桓公夹河而盟。归而秦倍盟，与翟合谋击晋。二十六年，晋率诸侯伐秦，秦军败走，追至泾而还。桓公立二十七年卒，子景公立^⑩。

注：①《正义》雍母秦女，故言秦出也。②《正义》韦昭云：“晋正卿士蒍之孙，成伯之子季武子也。食采于随范，故曰随会，或曰范会。季，范子字也。”③《集解》杜预曰：“在河东。”《正义》令音零。《括地志》云：“令狐故城在蒲州猗氏县界十五里也。”④《正义》《括地志》云：“故武城一名武平城，在华州郑县东北十三里也。”⑤《正义》前入秦，后归晋，今秦又取之。⑥《集解》服虔曰：“晋邑也。”⑦《集解》服虔曰：“晋之魏邑大夫。”《正义》雒音受。又作“犂”，音同。⑧《正义》详音羊。⑨《索隐》名毅。十代至灵公，又并失名。⑩《集解》徐广曰：“《世本》云景公名后伯车也。”《索隐》景公已下，名又错乱，《始皇本纪》作(哀)[僖]公。

景公四年，晋栾书弑其君厉公。十五年，救郑，败晋兵于栌^①。是时晋悼公为盟主。十八年，晋悼公强，数会诸侯，率以伐秦，败秦军。秦军走，晋兵追之，遂渡泾，至械林而还^②。二十七年，景公如晋，与平公盟，已而背之。三十六年，楚公子围弑其君而自立，是为灵王。景公母弟后子鍼^③有宠，景公母弟富，或谮之，恐诛，乃奔晋，车重千乘。晋平公曰：“后子富如此，何以自亡？”对曰：“秦公无道，畏诛，欲待其后世乃归。”三十九年，楚灵王强，会诸侯于申^④，为盟主，杀齐庆封。景公立四十年卒，子哀公立^⑤。

后子复来归秦。

注：①《集解》杜预曰：“晋地也。”《正义》栎音历。《括地志》云：“洛州阳翟县，古栎邑也。”②《集解》徐广曰：“械音域。”驷按：杜预曰“秦地也”。③《正义》械音钳。④《正义》在邓州南阳县[北]三十里。⑤《索隐》《始皇本纪》作“〈秘〉公”。

哀公八年，楚公子弃疾弑灵王而自立，是为平王。十一年，楚平王来求秦女为太子建妻。至国，女好而自娶之。十五年，楚平王欲诛建，建亡^①；伍子胥奔吴。晋公室卑而六卿强，欲内相攻，是以久秦晋不相攻。三十一年，吴王阖闾与伍子胥伐楚，楚王亡奔随，吴遂入郢。楚大夫申包胥来告急^②，七日不食，日夜哭泣^③。于是秦乃发五百乘救楚^④，败吴师。吴师归，楚昭王乃得复入郢。哀公立三十六年卒。太子夷公，夷公蚤死，不得立，立夷公子，是为惠公。

注：①《正义》太子建亡之郑，郑杀之。②《正义》包胥姓公孙，封于申，故号申包胥。《左传》云：“申包胥如秦乞师，曰：‘吴为封豕长蛇，以荐食上国，虐始于楚。寡君失守社稷，越在草莽，使下臣告急曰，夷德无厌，若邻于君，疆场之患也。逮吴之未定，君其取分焉。若楚之遂亡，君之土也。若以君灵抚之，世以事君。’”③《正义》《左传》云：“申包胥对秦伯曰‘寡君越在草莽，未获所伏，下臣何敢即安’。立依于庭墙而哭，日夜不绝声，勺饮不入口，七日。秦哀公为赋无衣，九顿首而坐。秦师乃出。”④《正义》《左传》鲁定公五年，秦子蒲、子虎帅车五百乘以救楚，败吴师于军祥。

惠公元年，孔子行鲁相事。五年，晋卿中行、范氏反晋，晋使智氏、赵简子攻之，范、中行氏亡奔齐。惠公立十年卒，子悼公立。

悼公二年，齐臣田乞弑其君孺子，立其兄阳生，是为悼公。六年，吴败齐师。齐人弑悼公，立其子简公。九年，晋定公与吴王夫差盟，争长于黄池，卒先吴。吴强，陵中国。十二年，齐田常弑简公，立其弟平公，常相之。十三年，楚灭陈。秦悼公立十四年卒，子厉共公立。孔子以悼公十二年卒。

厉共公二年，蜀人来赂。十六年，涇河旁。以兵二万伐大荔，取其王

城^①。二十一年，初县频阳^②。晋取武成。二十四年，晋乱，杀智伯，分其国与赵、韩、魏。二十五年，智开与邑人来奔^③。三十三年，伐义渠，虏其王^④。三十四年，日食。厉共公卒，子躁公立。

注：①《集解》徐广曰：“今之临晋也。临晋有王城。”《正义》荔音戾。《括地志》云：“同州东三十里朝邑县东三十步故王城。大荔近王城邑。”②《集解》《地理志》冯翊有频阳县。《正义》《括地志》云：“频阳故城在雍州同官县界，古频阳县城也。”③《集解》徐广曰：“一本二十六年城南郑也。”《正义》开，智伯子。伯被赵襄子等灭其国，其子与从属来奔秦。④《集解》应劭曰：“义渠，北地也。”《正义》《括地志》云：“宁、庆二州，春秋及战国时为义渠戎国之地也。”

躁公二年，南郑反^①。十三年，义渠来伐，至渭南。十四年，躁公卒，立其弟怀公^②。

注：①《正义》南郑，今梁州所理县也。春秋及战国时，其地属于楚也。②《索隐》厉共公子也。生昭太子，未立而卒。太子之子，是为灵公。

怀公四年，庶长晁^①与大臣围怀公，怀公自杀。怀公太子曰昭子，早死，大臣乃立太子昭子之子，是为灵公^②。灵公，怀公孙也。

注：①《正义》长，丁丈反。晁，竹遥反。晁，人名也。刘伯庄音潮。②《索隐》生献公也。

灵公六年，晋城少梁，秦击之。十三年，城籍姑^①。灵公卒，子献公^②不得立，立灵公季父悼子，是为简公。简公，昭子之弟而怀公子也^③。

注：①《正义》《括地志》云：“籍姑故城在同州韩城县北三十五里。”②《索隐》名师隰。③《索隐》简公，昭之弟而怀公子。简公，怀公弟，灵公季父也。《始皇本纪》云灵公生简公，误也。又《纪年》云简公九年卒，次敬公立，十二年卒，乃立惠公。《正义》刘伯庄云简公是昭子之弟，怀公之子，厉公之孙。

简公六年，令吏初带剑^①。塹洛。城重泉^②。十六年卒^③，子惠公立。

注：①《正义》春秋官吏各得带剑。②《集解》《地理志》重泉县属冯翊。《正义》重，直龙反。《括地志》云：“重泉故城在同州蒲城县东南四十五里

也。”③《集解》徐广曰：“表云十五年也。”

惠公十二年，子出子生。十三年，伐蜀，取南郑。惠公卒，出子立。

出子二年，庶长改迎灵公之子献公于河西而立之^①。杀出子及其母，沈之渊旁。秦以往者数易君，君臣乖乱，故晋复强，夺秦河西地^②。

注：①《正义》西者，秦州西县，秦之旧地，时献公在西县，故迎立之。

②《正义》夺前所上八城也。

献公元年^①，止从死。二年，城栎阳^②。四年正月庚寅，孝公生。十一年，周太史儋见献公曰：“周故与秦国合而别，别五百岁复合，合(七)十七岁而霸王出。”十六年，桃冬花。十八年，雨金栎阳^③。二十一年，与晋战于石门^④，斩首六万，天子贺以黼黻^⑤。二十三年，与魏晋战少梁，虏其将公孙痤^⑥。二十四年，献公卒^⑦，子孝公立，^⑧年已二十一岁矣。

注：①《集解》徐广曰：“丁酉。”②《集解》徐广曰：“徙都之，今万年是也。”《正义》《括地志》云：“栎阳故城一名万年城，在雍州东北百二十里。(栎阳)汉七年，分栎阳城内为万年县，隋文帝开皇三年，迁都于龙首川，今京城也。改万年为大兴县。至唐武德元年，又改曰万年，置在州东七里。”③《正义》言雨金于秦国都，明金瑞见也。④《正义》《括地志》云：“尧门山俗名石门，在雍州三原县西北三十三里。上有路，其状若门。故老云尧凿山为门，因名之。武德年中于此山南置石门县，贞观年中改为云阳县。”⑤《集解》《周礼》曰：“白与黑谓之黼，黑与青谓之黻。”⑥《正义》在戈反。⑦《集解》徐广曰：“表云二十三年。”⑧《索隐》名渠梁。

孝公元年^①，河山以东强国六，与齐威、楚宣、魏惠、燕悼、韩哀、赵成侯并。淮泗之间^②小国十余。楚、魏与秦接界^③。魏筑长城，自郑滨洛以北，有上郡。楚自汉中，南有巴、黔中。周室微，诸侯力政，争相并。秦僻在雍州，不与中国诸侯之会盟，夷翟遇之。孝公于是布惠，振孤寡，招战士，明功赏。下令国中曰：“昔我繆公自岐雍之闲，修德行武，东平晋乱，以河为界^④，西霸戎翟，广地千里，天子致伯，诸侯毕贺，为后世开业，甚光美。会往者厉、躁、简公、出子之不宁，国家内忧，未遑外事，三晋攻夺我先君河西地，诸侯卑秦、丑莫大焉。献公即位，镇抚边境，徙治栎阳，且欲东伐，

复繆公之故地，修繆公之政令。寡人思念先君之意，常痛于心。宾客群臣有能出奇计强秦者，吾且尊官，与之分土。”于是乃出兵东围陕城，西斩戎之獠王^⑤。

注：①《集解》徐广曰：“庚申也。”②《正义》并，白浪反。谓淮泗二水。③《正义》楚北及魏西与秦相接，北自梁州汉中郡，南有巴、渝，过江南有黔中、巫郡也。魏西界与秦相接，南自华州郑县，西北过渭水，滨洛水东岸，向北有上郡鄜州之地，皆筑长城以界秦境。洛即漆沮水也。④《正义》即龙门河也。⑤《集解》《地理志》天水有獠道县。应劭曰：“獠，戎邑，音桓。”

卫鞅闻是令下，西入秦，因景监求见孝公。

二年，天子致胙。

三年，卫鞅说孝公变法修刑，内务耕稼，外劝战死之赏罚，孝公善之。甘龙、杜挚等弗然，相与争之。卒用鞅法，百姓苦之；居三年，百姓便之。乃拜鞅为左庶长。其事在《商君》语中。

七年，与魏惠王会杜平^①。八年，与魏战元里^②，有功。十年，卫鞅为大良造，将兵围魏安邑，降之^③。十二年，作为咸阳^④，筑冀阙^⑤，秦徙都之。并诸小乡聚^⑥，集为大县，县一令^⑦，四十一县。为田开阡陌^⑧。东地渡洛。十四年，初为赋^⑨。十九年，天子致伯^⑩。二十年，诸侯毕贺。秦使公子少官率师会诸侯逢泽^⑪，朝天子。二十一年，齐败魏马陵^⑫。二十二年，卫鞅击魏，虏魏公子卬。封鞅为列侯，号商君^⑬。

注：①《正义》在同州澄城县界也。②《正义》祁城在同州澄城县界。③《集解》《地理志》曰河东有安邑县。《正义》《括地志》云：“安邑故城在绛州夏县东北十五里，本夏之都。”④《正义》《括地志》云：“咸阳故城亦名渭城，在雍州咸阳县东十五里，京城北四十五里，即秦孝公徙都之者。今咸阳县，古之杜邮，白起死处。”⑤《正义》刘伯庄云：“冀犹记事，阙即象魏也。”⑥《正义》万二千五百家为乡。聚犹村落之类也。⑦《集解》《汉书》《百官表》曰：“县令长皆秦官。万户以上为令，秩千石至六百石；减万户为长，秩五百石至三百石。皆有丞尉。”⑧《索隐》《风俗通》曰：“南北曰阡，东

西曰陌。河东以东西为阡，南北为陌。”⑨《集解》徐广曰：“制贡赋之法也。”《索隐》樵周云：“初为军赋也。”⑩《正义》伯音霸，又如字。孝公十九年，天子始封爵为霸，即太史儋云“合（七）十七岁而霸王出”之年，故天子致伯。桓谭《新论》云：“夫上古称三皇、五帝，而次有三王、五伯，此天下君之冠首也。故言三皇以道理，而五帝用德化；三王由仁义，五伯以权智。其说之曰，无制令刑罚谓之皇；有制令而无刑罚谓之帝；赏善诛恶，诸侯朝事谓之王；兴兵约盟，以信义矫世谓之伯。”⑪《集解》徐广曰：“开封东北有逢泽。”《正义》《括地志》云：“逢泽亦名逢池，在汴州浚仪县东南十四里。”⑫《正义》虞喜《志林》云：“濮州甄城县东北六十余里有马陵，涧谷深峻，可以置伏。”按：庞涓败即此也。⑬《正义》商州商洛县在州东八十九里，鞅所封也。契所封地。

二十四年，与晋战雁门^①，虏其将魏错^②。

注：①《索隐》《纪年》云“与魏战岸门”，此云“雁门”，恐声误也。又下云“败韩岸门”，盖一地也。寻秦与韩、魏战，不当远至雁门也。《正义》《括地志》云：“岸门在许州长社县西北二十八里，今名西武亭。”②《正义》七故反。

孝公卒，子惠文君立^①。是岁，诛卫鞅。鞅之初为秦施法^②，法不行，太子犯禁。鞅曰：“法之不行，自于贵戚。君必欲行法，先于太子。太子不可黥，黥其傅师。”于是法大用，秦人治。及孝公卒，太子立，宗室多怨鞅，鞅亡，因以为反，而卒车裂以徇秦国^③。

注：①《索隐》名驷。②《正义》为，于伪反。③《集解》《汉书》曰：“商君为法于秦，战斩一首赐爵一级，欲为官者五十石。其爵名：一为公士，二上造，三簪裹，四不更，五大夫，六官大夫，七公大夫，八公乘，九五大夫，十左庶长，十一右庶长，十二左更，十三中更，十四右更，十五少上造，十六大上造，十七驷车庶长，十八大庶长，十九关内侯，二十彻侯。”

惠文君元年，楚、韩、赵、蜀人来朝。二年，天子贺。三年，王冠^①。四年，天子致文武胙。齐、魏为王^②。

注：①《正义》冠音馆。《礼记》云年二十行冠礼也。②《索隐》齐威王、

魏惠王。

五年，阴晋人犀首^①为大良造。六年，魏纳阴晋，阴晋更名宁秦^②。七年，公子卬与魏战，虏其将龙贾，斩首八万。八年，魏纳河西地。九年，渡河，取汾阴、皮氏^③。与魏王会应^④。围焦，降之^⑤。十年，张仪相秦。魏纳上郡十五县^⑥。十一年，县义渠^⑦。归魏焦、曲沃^⑧。义渠君为臣。更名少梁曰夏阳。十二年，初腊^⑨。十三年四月戊午，魏君为王，韩亦为王^⑩。使张仪伐取陕，出其人与魏。

注：①《集解》犀首，官名。姓公孙，名衍。《索隐》官名，若虎牙之类。姓公孙，名衍，魏人也。《正义》“犀音西”。《地理志》云华阴县，故阴晋，秦惠王五年，更名宁秦，高祖八年更名华阴。②《集解》徐广曰：“今之华阴也。”③《集解》《地理志》二县属河东。《正义》渡河东取之。《括地志》云：“汾阴故城俗名殷汤城，在蒲州汾阴县北也。皮氏在绛州龙门县西一里八十步，即古皮氏城也。”④《正义》应，乙陵反。《括地志》云：“故应城因应山为名，古之应国，在汝州鲁山县东三十里。《左传》云‘邶、晋、应、韩，武之穆也’”⑤《正义》《括地志》云：“焦城在陕州城内东北百步，因焦水为名。周同姓所封，《左传》云虞、虢、焦、滑、霍、阳、韩、魏皆姬姓也。”杜预云八国皆为晋所灭。按：武王克商，封神农之后于焦，而后封姬姓也。⑥《正义》今郿、绛等州也。魏前纳阴晋，次纳同、丹二州，今纳上郡，而尽河西滨洛之地矣。⑦《正义》《地理志》云北地郡义渠道，秦县也。《括地志》云：“宁、原、庆三州，秦北地郡，战国及春秋时为义渠戎国之地，周先公刘、不窋居之，古西戎也。”⑧《正义》《括地志》云：“曲沃在陕州[陕]县西南三十二里，因曲沃水为名。”按：焦、曲沃二城相近，本魏地，适属秦，今还魏，故言归也。⑨《正义》腊，卢盍反，十二月腊日也。秦惠文王始效中国为之，故云初腊。猎禽兽以岁终祭先祖，因立此日也。《风俗通》云：“《礼传》云‘夏曰嘉平，殷曰清祀，周曰蜡，汉改曰腊’。《礼》曰‘天子大蜡八，伊耆氏始为蜡’。蜡者，索也。岁十二月合聚万物而索飧之。”⑩《正义》魏襄王、韩宣惠王也。

十四年，更为元年。二年，张仪与齐、楚大臣会啗桑。三年，韩、魏太

子来朝。张仪相魏。五年，王游至北河^①。七年，乐池^②相秦。韩、赵、魏、燕、齐帅匈奴共攻秦。秦使庶长疾与战修鱼，虏其将申差^③，败赵公子渴、韩太子奂，斩首八万二千。八年，张仪复相秦。九年，司马错伐蜀，灭之^④。伐取赵中都、西阳^⑤。十年，韩太子苍来质。伐取韩石章^⑥。伐败赵将泥^⑦。伐取义渠二十五城。十一年，樗里疾攻魏焦，降之。败韩岸门，斩首万，其将犀首走。公子通封于蜀^⑧。燕君让其臣子之。十二年，王与梁王会临晋。庶长疾攻赵，虏赵将庄。张仪相楚。十三年，庶长章击楚于丹阳，虏其将屈匄，斩首八万；又攻楚汉中，取地六百里，置汉中郡。楚围雍氏，秦使庶长疾助韩而东攻齐，到满^⑨助魏攻燕。十四年，伐楚，取召陵。丹、犁臣，蜀^⑩相壮^⑪杀蜀侯来降。

注：①《集解》徐广曰：“戎地，在河上。”《正义》按：王游观北河，至灵、夏州之黄河也。②《正义》“乐音岳”。池，徒何反。裴氏音池也。③《正义》修鱼，韩邑也。“年表”云秦败我修鱼，得韩将军申差。④《索隐》蜀西南夷旧有君长，故昌意娶蜀山氏女也。其后有杜宇，自立为王，号曰望帝。《蜀王本纪》曰：“张仪伐蜀，蜀王开战不胜，为仪所灭也。”⑤《集解》《地理志》太原有中都县。《正义》《括地志》云：“中都故县在汾州平遥县西十二里，即西都也。西阳即中阳也，在汾州隰城县东十里。《地理志》云西都、中阳属西河郡。”此云“伐取赵中都西阳”。《赵世家》云“秦即取我西都及中阳”。《年表》云“秦惠文王后元九年，取赵中都、西阳、安邑。赵武灵王十年，秦取中都安阳”。《本纪》、《世家》、《年表》其县名异，年岁实同，所伐唯一处，故具录之，以示后学。⑥《正义》韩地名也。⑦《集解》徐广曰：“将，一作‘庄’”《正义》赵将名也。⑧《集解》徐广曰：“是岁王赧元年。”《索隐》《华阳国志》曰：“赧王元年，秦惠王封子通国为蜀侯，以陈庄为相。”徐广所云，亦据《国志》而言之。⑨《正义》满，或作“蒲”。秦将姓名也。⑩《正义》二戎号也，臣伏于蜀。蜀相杀蜀侯，并丹、犁二国降秦。在蜀西南姚府管内，本西南夷，战国时蜀、滇国，唐初置犁州、丹州也。⑪《集解》徐广曰：“一作‘状’”

惠王卒，子武王立^①。韩、魏、齐、楚、越^②皆宾从。

注：①《索隐》名荡。②《集解》徐广曰：“一作‘赵’”

武王元年，与魏惠王会临晋^①。诛蜀相壮。张仪、魏章皆东出之魏。伐义渠、丹、犁。二年，初置丞相^②，樗里疾、甘茂为左右丞相。张仪死于魏。三年，与韩襄王会临晋外^③。南公揭卒，樗里疾相韩。武王谓甘茂曰：“寡人欲容车通三川，窥周室，死不恨矣。”其秋，使甘茂、庶长封伐宜阳^④。四年，拔宜阳，斩首六万。涉河，城武遂^⑤。魏太子来朝。武王有力好戏，力士任鄙、乌获、孟说皆至大官。王与孟说举鼎，绝脰^⑥。八月，武王死^⑦。族孟说。武王取魏女为后，无子。立异母弟，是为昭襄王^⑧。昭襄母楚人，姓聃氏，号宣太后。武王死时，昭襄王为质于燕，燕人送归，得立。

注：①《集解》徐广曰：“表云哀王。”《正义》按：魏惠王卒已二十五年矣。②《集解》应劭曰：“丞者，承也。相，助也。”③《正义》外谓临晋城外。“外”字一作“水”。④《正义》在河南府福昌县东十四里，故韩城是也。此韩之大郡，伐取之，三川路乃通也。⑤《集解》徐广曰：“韩邑也。”《正义》按：此邑本属韩，近平阳。《韩世家》云“贞子居平阳，九世至哀侯，徙郑”。楚世家云“而韩犹服事秦者，以先王墓在平阳”。而秦之武遂去之七十里，故知近平阳。⑥《集解》徐广曰：“一作‘脉’”《正义》脰音频忍反。绝，断也。脰，胫骨也。⑦《集解》皇览曰：“秦武王冢在扶风安陵县西北，毕陌中大冢是也。人以为周文王冢，非也。周文王冢在杜中。”《正义》《括地志》云：“秦悼武王陵在雍州咸阳县西北十五里也。”⑧《索隐》名则，一名稷。

昭襄王元年，严君疾为相^①。甘茂出之魏。二年，彗星见^②。庶长壮与大臣、诸侯、公子为逆，皆诛，及惠文后皆不得良死^③。悼武王后出归魏。三年，王冠。与楚王会黄棘^④，与楚上庸^⑤。四年，取蒲阪^⑥。彗星见。五年，魏王来朝应亭^⑦，复与魏蒲阪。六年，蜀侯辉反^⑧，司马错定蜀。庶长免伐楚，斩首二万。涇阳君^⑨质于齐。日食，昼晦。七年，拔新城^⑩。樗里子卒。八年，使将军聃戎攻楚，取新市^⑪。齐使章子，魏使公孙喜，韩使暴鸢^⑫共攻楚方城，取唐昧。赵破中山，其君亡，竟死齐。魏公子劬、韩公子长为诸侯^⑬。九年，孟尝君薛文来相秦。免攻楚，取八城，杀其将景快。十年，楚怀王入朝秦，秦留之。薛文以金受免^⑭。楼缓为丞相。十一年，齐、韩、魏、赵、宋、中山五国共攻秦^⑮，至盐氏而还^⑯。秦与韩、魏河北及封陵以和^⑰。彗星见。

楚怀王走之赵，赵不受，还之秦，即死，归葬。十二年，楼缓免，穰侯^⑭魏冉为相。予楚粟五万石。

注：①《正义》盖封蜀郡严道县，因号严君。疾，名也。②《正义》彗，似岁反，又先到反。③《集解》徐广曰：“迎妇于楚者。”④《正义》棘，纪力反。盖在房、襄二州也。⑤《集解》《地理志》汉中有上庸县。《正义》《括地志》云：“上庸，今房州竹山县及金州是也。”⑥《正义》《括地志》云：“蒲阪故城在蒲州河东县南二里，即尧舜所都也。”⑦《集解》徐广曰：“《魏世家》云会临晋。”《正义》应音乙陵反。⑧《索隐》“辉音暉”。《华阳国志》曰：“秦封王子辉为蜀侯。蜀侯祭，归胙于王，后母疾之，加毒以进，王大怒，使司马错赐辉剑。”此辉不同也。⑨《索隐》名市。⑩《正义》《楚世家》云：“怀王二十九年，秦复伐楚，大破楚军，楚军死二万，杀我将军景缺。”《年表》云：“秦败我襄城，杀景缺。”《括地志》云：“许州襄城县即古新城县也。”按《世家》、《年表》，则“新”字误作“襄”字。⑪《集解》《晋地记》曰：“江夏有新市县。”⑫《索隐》韩将姓名。⑬《索隐》别封之邑，比之诸侯，犹商君、赵长安君然。⑭《正义》金受，秦丞相姓名。免，夺其丞相。⑮《正义》盖中山此时属赵，故云五国也。⑯《集解》徐广曰：“盐，一作‘监’”《正义》《括地志》云：“盐故城一名司盐城，在蒲州安邑县。”按：掌盐池之官，因称氏。⑰《正义》《年表》云：“秦与魏封陵，与韩武遂以和。”按：河外陕、虢、曲沃等地。封陵在古蒲阪县西南河曲之中。武遂，近平阳地也。⑱《正义》《括地志》云：“穰，邓州所理县，即古穰侯国。”

十三年，向寿伐韩，取武始^①。左更白起攻新城^②。五大夫礼出亡奔魏。任鄙为汉中守^③。十四年，左更白起攻韩、魏于伊阙^④，斩首二十四万，虏公孙喜，拔五城。十五年，大良造白起攻魏，取垣^⑤，复予之。攻楚，取宛。十六年，左更错取轹及邓^⑥。冉免。封公子市宛，公子悝邓^⑦，魏冉陶，为诸侯。十七年，城阳君^⑧入朝，及东周君来朝。秦以垣为蒲阪、皮氏^⑨。王之宜阳。十八年，错攻垣^⑩、河雍，决桥取之^⑪。十九年，王为西帝，齐为东帝，皆复去之。吕礼来自归。齐破宋，宋王在魏，死温。任鄙卒。二十年^⑫，王之汉中，又之上郡、北河。二十一年^⑬，错攻魏河内。魏献安邑，秦出其

人，募徙河东赐爵，赦罪人迁之。泾阳君封宛。二十二年，蒙武伐齐。河东为九县。与楚王会宛。与赵王会中阳^④。二十三年，尉斯离^⑤与三晋、燕伐齐，破之济西。王与魏王会宜阳，与韩王会新城。二十四年，与楚王会鄢^⑥，又会穰。秦取魏安城^⑦，至大梁，燕、赵救之，秦军去。魏冉免相。二十五年，拔赵二城。与韩王会新城，与魏王会新明邑。二十六年，赦罪人迁之穰。侯冉复相。二十七年，错攻楚。赦罪人迁之南阳^⑧。白起攻赵，取代光狼城^⑨。又使司马错发陇西，因蜀攻楚黔中^⑩，拔之。二十八年，大良造白起攻楚，取鄢、邓^⑪，赦罪人迁之。二十九年，大良造白起攻楚，取郢为南郡^⑫，楚王走。周君来。王与楚王会襄陵^⑬。白起为武安君^⑭。三十年，蜀守若伐楚，取巫郡^⑮，及江南为黔中郡^⑯。三十一年，白起伐魏，取两城。楚人反我江南^⑰。三十二年，相穰侯攻魏，至大梁，破暴鸢，斩首四万，鸢走，魏人三县请和。三十三年，客卿胡(伤)[阳]攻魏卷^⑱、蔡阳、长社，取之^⑲。击芒卯华阳，破之^⑳，斩首十五万。魏入南阳以和^㉑。三十四年，秦与魏、韩上庸地为一郡，南阳免臣迁居之。三十五年，佐韩、魏、楚伐燕。初置南阳郡^㉒。三十六年，客卿灶攻齐，取刚、寿^㉓，予穰侯。三十八年，中更胡(伤)[阳]攻赵闾与^㉔，不能取。四十年，悼太子死魏，归葬芷阳^㉕。四十一年夏，攻魏，取邢丘、怀^㉖。四十二年，安国君为太子。十月，宣太后薨^㉗，葬芷阳郾山^㉘。九月，穰侯出之陶。四十三年，武安君白起攻韩，拔九城，斩首五万。四十四年，攻韩南(郡)[阳]，取之。四十五年，五大夫贲^㉙攻韩，取十城。叶阳君^㉚悝出之国，未至而死。四十七年，秦攻韩上党，上党降赵，秦因攻赵，赵发兵击秦，相距。秦使武安君白起击，大破赵于长平，四十余万尽杀之。四十八年十月，韩献垣雍^㉛。秦军分为三军。武安君归。王齮将伐赵武安皮牢，拔之。司马梗北定太原，尽有韩上党。正月，兵罢，复守上党。其十月，五大夫陵攻赵邯郸。四十九年正月，益发卒佐陵。陵战不善，免，王齮代将。其十月，将军张唐攻魏，为蔡尉^㉜捐弗守，还斩之。五十年十月，武安君白起有罪，为士伍，迁阴密^㉝。张唐攻郑，拔之。十二月，益发卒军汾城旁^㉞。武安君白起有罪，死。齮攻邯郸，不拔，去，还奔汾军二月余。攻晋军，斩首六千，晋楚流死河二万人^㉟。攻汾城，即从唐拔宁^㊱新中^㊲，宁新中更名

安阳^④。初作河桥^⑤。

注：①《集解》《地理志》魏郡有武始县。《正义》《括地志》云：“武始故城在洛州武始县西南十里。”②《正义》《白起传》云：“白起为左庶长，将而击韩之新城。”《括地志》云：“洛州伊阙县本是汉新城县，隋文帝改为伊阙，在洛州南七十里。”③《集解》《汉书》《百官表》曰：“郡守，秦官。”④《正义》《括地志》云：“伊阙在洛州南十九里。《注水经》云‘昔大禹疏龙门以通水，两山相对，望之若阙，伊水历其闲，故谓之伊阙’”按：今洛南犹谓之龙门也。⑤《正义》垣音袁。前秦取蒲阪，复以蒲阪与魏，魏以为垣。今又取魏垣，复与之，后秦以为蒲阪皮氏。⑥《集解》《地理志》河内有轵县，南阳有邓县。《正义》《括地志》云：“故轵城在怀州济源县东南十三里，故邓城在怀州河阳县西三十一里，并六国时魏邑也。”按：二城相连，故云及也。⑦《索隐》悝号高陵君，初封于彭，昭襄王弟也。⑧《正义》《括地志》云：“濮州雷泽县本汉鄆阳县，古鄆伯姬姓之国，周武王封弟季载于鄆，其后迁城之阳也。”⑨《索隐》“为”当为“易”，盖字讹也。《正义》蒲阪，今河东县也。皮氏故城在绛州龙门县西一里八十步。⑩《正义》盖蒲阪、皮氏又归魏，魏复以为垣，今重攻取之也。⑪《集解》徐广曰：“《汲冢纪年》云：魏哀王二十四年，改宜阳曰河雍，改向曰高平。向在轵之西。”⑫《集解》徐广曰：“秦地有父马生驹。”⑬《集解》徐广曰：“有牡马生牛而死。”⑭《集解》《地理志》西河有中阳县。⑮《索隐》尉，秦官。斯离，其姓名。《正义》尉，都尉。斯离，名也。⑯《正义》鄆，于建反，又音“偃”。《括地志》云：“故偃城在襄州瞻养县北三里，古鄆子之国也。”⑰《集解》《地理志》汝南有安城县。《正义》《括地志》云：“安城在豫州汝阳县东南十七里。”⑱《正义》南阳及上迁之穰，皆今邓州也。⑲《正义》《括地志》云：“光狼故城在今泽州高平县西二十里。”⑳《正义》今黔府也。㉑《正义》鄆邓二城并在襄州。㉒《正义》《括地志》云：“郢城在荆州江陵县东北六里，楚平王筑都之地也。”㉓《集解》《地理志》河东有襄陵县。《正义》《括地志》云：“襄陵在晋州临汾县东南三十五里。阙驷《十三州》志云襄陵，晋大夫犇邑也。”㉔《正义》言能抚养军士，战必克，得百姓安集，故号武安。故城在(潞)[洛]州武安县西南五十

里。七国时赵邑，即赵奢救阏与处也。^{②⑤}《正义》《华阳国》志张若为蜀中郡守。《括地志》云：“巫郡在夔州东百里。”^{②⑥}《正义》《括地志》云：“黔中故城在辰州沅陵县西二十里。江南，今黔府亦其地也。”^{②⑦}《正义》黔中郡反归楚。^{②⑧}《集解》《地理志》河南有卷县。《正义》卷音丘袁反。《括地志》云：“故卷城在郑州原武县西北七里，即衡雍也。”^{②⑨}《集解》《地理志》颍川有长社县。《正义》《括地志》云：“蔡阳，今豫州上蔡水之阳，古城在豫州北七十里。长社故城在许州长社县西一里。皆魏邑也。”^{③①}《集解》司马彪曰：“华阳，亭名，在密县。”《索隐》芒卯，魏将。譙周云孟卯也。《正义》《括地志》云：“故华城在郑州管城县南三十里。《国语》云史伯对郑桓公，虢、郟十邑，华其一也。华阳即此城也。”按：是时韩、赵聚兵于华阳攻秦，即此矣。^{③①}《集解》徐广曰：“河内修武，古曰南阳，秦始皇更名河内，属魏地。荆州之南阳郡，本属韩地。”《正义》《括地志》云：“怀获嘉县即古之南阳。杜预云在晋州山南河北，故曰南阳。秦破芒卯军，斩首十五万，魏入南阳以和。”^{③②}《正义》今邓州也。前已属秦，秦置南阳郡，在汉水之北。《释名》云：“在中国之南而居阳地，故以为名焉。”张衡《南都赋》云：“陪京之南，居汉之阳。”^{③③}《正义》《括地志》云：“故刚城在兖州龚丘县界。寿，郟州之县。”^{③④}《集解》孟康曰：“音焉与，邑名，在上党涅县西。”《正义》阏，于达反。“与音预”。阏与聚城一名乌苏城，在潞州铜鞮县西北二十里，赵奢破秦军处。又仪州和顺县即古阏与城，亦云赵奢破秦军处。然仪州与潞州相近，二所未详。又阏与山在洺州武安县西南五十里，赵奢拒秦军于阏与，即山北也。按：阏与山在武安故城西南，又近武安故城，盖仪州是所封故地。^{③⑤}《集解》徐广曰：“今霸陵”《正义》《括地志》云：“芷阳在雍州蓝田县西六里。《三秦记》云[白]鹿原东有霸川之西阪，故芷阳也。”^{③⑥}《集解》徐广曰：“邢丘在平皋。”駉按：《韩诗外传》武王伐纣，到于邢丘，勒兵于宁，更名邢丘曰怀，宁曰修武。《正义》《括地志》云：“平皋故城本邢丘邑，汉置平皋县，在怀州武德县东南二十里。故怀城，周之怀邑，在怀州武陟县西十一里。”^{③⑦}《集解》徐广曰：“牟氏。”^{③⑧}《正义》郟，力知反，在雍州新丰县南十四里也。^{③⑨}《正义》“贲音奔”。五大夫，官。疑贲，名也。^{④①}《集

解》一云“华阳”。《正义》叶，书涉反。④《集解》司马彪曰：“河南卷县有垣雍城。”⑤《正义》为，于伪反。蔡，姓；尉，名。⑥《集解》如淳曰：“尝有爵而以罪夺爵，皆称士伍。”《正义》《括地志》云：“阴密故城在泾州鹑觚县西，即古密须国也。”⑦《正义》《括地志》云：“临汾故城在绛州正平县东北二十五里，即古临汾县城也。”按：汾城即此城是也。⑧《集解》徐广曰：“楚，一作‘走’”《正义》按：此时无楚军，“走”字是也。⑨《集解》徐广曰：“一作‘曼’。此赵邑也。”⑩《正义》唐，今晋州平阳，尧都也。《括地志》云：“宁新中，七国时魏邑，秦昭襄王拔魏宁新中，更名安阳城，即今相州外城是也。”⑪《集解》徐广曰：“魏郡有安阳县。”《正义》今相州外城古安阳城。⑫《正义》此桥在同州临晋县东，渡河至蒲州，今蒲津桥也。

五十一年，将军嫪攻韩，取阳城、负黍^①，斩首四万。攻赵，取二十余县，首虏九万。西周君^②背秦，与诸侯约从，将天下锐兵出伊阙攻秦，令秦毋得通阳城。于是秦使将军嫪攻西周。西周君走来自归，顿首受罪，尽献其邑三十六城，口三万。秦王受献，归其君于周。五十二年，周民东亡，其器九鼎入秦^③。周初亡。

注：①《正义》今河南府县也。负黍亭在阳城县西南三十五里，本周邑，亦时属韩也。②《正义》武公。③《正义》器谓宝器也。禹贡金九牧，铸鼎于荆山下，各象九州岛之物，故言九鼎。历殷至周赧王十九年，秦昭王取九鼎，其一飞入泗水，余八入于秦中。

五十三年，天下来宾。魏后，秦使嫪伐魏，取吴城^①。韩王入朝，魏委国听令。五十四年，王郊见上帝于雍。五十六年秋，昭襄王卒，子孝文王立^②。尊唐八子为唐太后^③，而合其葬于先王^④。韩王衰经入吊祠，诸侯皆使其将相来吊祠，视丧事。孝文王元年，赦罪人，修先王功臣，褒厚亲戚，弛苑囿。孝文王除丧，十月己亥即位，三日辛丑卒，子庄襄王立^⑤。

注：①《集解》徐广曰：“在大阳。”《正义》《括地志》云：“虞城故城在陕州河北县东北五十里虞山之上，亦名吴山，周武王封弟虞仲于周之北故夏墟吴城，即此城也。”②《索隐》名柱，五十三而立，立一年卒，葬寿陵。子庄襄王。③《集解》徐广曰：“八子者，妾媵之号，姓唐。”《正义》孝文王之

母也。先死，故尊之。晋灼云：“除皇后，自昭仪以下，秩至百石，凡十四等。”《汉书》外戚传云：“八子视千石，比中更。”④《正义》以其母唐太后与昭王合葬。⑤《索隐》名子楚。三十二而立，立三年卒，葬阳陵。纪作“四年”。

庄襄王元年，大赦罪人，修先王功臣，施德厚骨肉而布惠于民。东周君与诸侯谋秦，秦使相国吕不韦诛之，尽入其国。秦不绝其祀，以阳人地①赐周君，奉其祭祀。使蒙骜伐韩，韩献成皋、巩②。秦界至大梁，初置三川郡③。二年，使蒙骜攻赵，定太原。三年，蒙骜攻魏高都、汲④，拔之。攻赵榆次、新城、狼孟⑤，取三十七城⑥。四月日食。（四年）王齮攻上党⑦。初置太原郡⑧。魏将无忌率五国兵击秦⑨，秦却于河外⑩。蒙骜败，解而去。五月丙午，庄襄王卒，子政立，是为秦始皇帝。

注：①《集解》《地理志》河南梁县有阳人聚。②《正义》《括地志》云：“洛州汜水县古（之）[东]虢国，亦郑之制邑，又名虎牢，汉之成皋。”巩，恭勇反，今洛州巩县。尔时秦灭东周，韩亦得其地，又献于秦。③《集解》韦昭曰：“有河、洛、伊，故曰三川。”《地理志》汉高祖更名河南郡。④《集解》徐广曰：“一作‘波’。波县亦在河内。”《正义》“汲音急”。《括地志》云：“高都故城今泽州是。汲故城在卫州所理汲县西南二十五里。孟康云汉波县，今郟城是也。”《括地志》云：“故郟城在怀州河内县西三十二里。《左传》云苏忿生十二邑，郟其一也。”⑤《正义》《括地志》云：“榆次，并州县，即古榆次地也。新城一名小平城，在朔州善阳县西南四十七里。狼孟故城在并州阳曲县东北二十六里。”⑥《正义》按：取三十七城，并、代、朔三州之地矣。⑦《正义》上党又反秦，故攻之。⑧《正义》上党以北皆太原地，即上三十七城也。⑨《正义》信陵君也。率燕、赵、韩、楚、魏之兵击秦也。⑩《正义》蒙骜被五国兵败，遂解而却至于河外。河外，陕、华二州也。

秦王政立二十六年，初并天下为三十六郡，号为始皇帝①。始皇帝五十一年而崩，子胡亥立，是为二世皇帝②。三年，诸侯并起叛秦，赵高杀二世，立子婴。子婴立月余，诸侯诛之，遂灭秦。

注：①《索隐》十三而立，立三十七年崩，葬郟山。②《索隐》十二年立。纪云二十一。立三年，葬宜春。秦自襄公至二世，凡六百一十七岁。此

实本纪而注别举之，以非本文耳。

太史公曰：秦之先为嬴姓。其后分封，以国为姓，有徐氏、邾氏、莒氏、终黎氏^①、运奄氏、菟裘氏、将梁氏、黄氏、江氏、修鱼氏、白冥氏、蜚廉氏、秦氏。然秦以其先造父封赵城，为赵氏。

注：①《集解》徐广曰：“《世本》作‘钟离’。”应劭曰：“《氏姓注》云有姓终黎者是。”

《汉书·匈奴传》

匈奴，其先夏后氏之苗裔，曰淳维^①。唐虞以上有山戎、狫允、熏粥^②，居于北边，随草畜牧而转移。其畜之所多则马、牛、羊，其奇畜则橐佗、驴、骡、馱馱、駒駮、驎奚^③。逐水草迁徙，无城郭常居耕田之业，然亦各有分地^④。无文书，以言语为约束。儿能骑羊，引弓射鸟鼠^⑤，少长则射狐菟^⑥，肉食^⑦。土力能弯弓，尽为甲骑。其俗，宽则随畜田猎禽兽为生业，急则人习战攻以侵伐^⑧，其天性也。其长兵则弓矢，短兵则刀铍^⑨。利则进，不利则退，不羞遁走。苟利所在，不知礼义。自君王以下咸食畜肉，衣其皮革，被旃裘。壮者食肥美，老者饮食其余。贵壮健，贱老弱。父死，妻其后母；兄弟死，皆取其妻妻之。其俗有名不讳而无字。

注：①师古曰：“以殷时始奔北边。”②师古曰：“皆匈奴别号。狫音险。粥音弋六反。”③师古曰：“橐佗，言能负橐囊而馱物也。骡，驴种而马生也。馱馱，俊马也，生七日而超其母。駒駮，马类也，生北海。驎奚，馱駮类也。佗音徒何反。馱音决。馱音提。駒音桃。駮音涂。驎音颠。”④师古曰：“分音扶问反。其下亦同。”⑤师古曰：“言其幼小则能射。”⑥师古曰：“少长言渐大。”⑦师古曰：“言无米粟，唯食肉。”⑧师古曰：“人人皆习之。”⑨师古曰：“铍，铁把小矛也，音蝉。”

夏道衰，而公刘失其稷官，变于西戎^①，邑于豳^②。其后三百有余岁，戎狄攻太王亶父^③，亶父亡走于岐下^④，豳人悉从亶父而邑焉，作周^⑤。其后百有余岁，周西伯昌伐畎夷^⑥。后十有余年，武王伐纣而营雒邑，复居于酆镐，放逐戎夷泾、洛之北^⑦，以时入贡，名曰荒服。其后二百有余年，周道衰，而周穆王伐畎戎^⑧，得四白狼四白鹿以归。自是之后，荒服不至。于是作《吕刑》之辟^⑨。至穆王之孙懿王时，王室遂衰，戎狄交侵，暴虐中国。中国被其苦，诗人始作，疾而歌之，曰：“靡室靡家，狫允之故；”“岂不

日戒，狫允孔棘。”^⑩至懿王曾孙宣王，兴师命将以征伐之，诗人美大其功，曰“薄伐狫狫，至于太原^⑪”，“出车彭彭”，“城彼朔方^⑫”。是时四夷宾服，称为中兴。

注：①师古曰：“公刘，后稷之曾孙也。变，化也，谓行化于其俗。”②师古曰：“即今之豳州是其地也。”③师古曰：“自公刘至亶父凡九君也。父读曰甫。”④师古曰：“岐山之下。”⑤师古曰：“始作周国也。”⑥师古曰：“西伯昌即文王也。吠音工犬反。吠夷即吠戎也，又曰昆夷。昆字或作混，又作缙，二字并音工本反。昆、缙、吠声相近耳。亦曰犬戎也。《山海经》云：‘黄帝生苗龙，苗龙生融吾，融吾生弄明，弄明生白犬。白犬有二，牝牡，是为犬戎。’许氏《说文解字》曰‘赤狄本犬种也’，故字从犬。”⑦师古曰：“此洛即漆沮水也，本出上郡雕阴泰冒山，而东南入于渭。”⑧师古曰：“穆王，成王孙，康王子也。”⑨师古曰：“即《尚书》《吕刑》篇是也。鬪，法也，音辟。”⑩师古曰：“《小雅》《采芣》之诗也。孔，甚也。棘，急也。言征役逾时，靡有室家夫妇之道者，以有狫允之难故也。岂不日日相警戒乎？狫允之难甚急。”⑪师古曰：“《小雅》《六月》之诗也。薄伐，言逐出也。”⑫师古曰：“《小雅》《出车》之诗也。彭彭，盛也。朔方，北方也。言狫允既去，北方安静，乃筑城以守。”

至于幽王，用宠姬褒姒之故，与申(后)[侯]有隙^①。申侯怒而与吠戎共攻杀幽王于丽山之下^②，遂取周之地，卤获而居于泾渭之间，侵暴中国。秦襄公救周，于是周平王去酆镐而东徙于雒邑^③。当时秦襄公伐戎至阝^④，始列为诸侯。后六十有五年，而山戎越燕而伐齐，齐釐公与战于齐郊^⑤。后四十四年，而山戎伐燕。燕告急齐，齐桓公北伐山戎，山戎走。后二十余年，而戎翟至雒邑，伐周襄王^⑥，襄王出奔于郑之汜邑^⑦。初，襄王欲伐郑，故取翟女为后，与翟共伐郑。已而黜翟后，翟后怨，而襄王继母曰惠后，有子带，欲立之，于是惠后与翟后、子带为内应，开戎翟，戎翟以故得人，破逐襄王，而立子带为王。于是戎翟或居于陆浑^⑧，东至于卫，侵盗尤甚。周襄王既居外四年，乃使使告急于晋。晋文公初立，欲修霸业，乃兴师伐戎翟，诛子带，迎内襄王于洛邑。

注：①师古曰：“幽王，宣王之子。”②师古曰：“丽读曰骊”③师古曰：“平王，幽王之子。”④师古曰：“厖，古岐字”⑤师古曰：“釐读曰僖。”⑥师古曰：“襄王，惠王之子。”⑦苏林曰：“汜音凡，今潁川襄城是也。”师古曰：“以襄王尝处之，因号襄城。”⑧师古曰：“今伊阙南陆浑山川是其地。”

当是时，秦晋为强国。晋文公攘戎翟，居于西河圜、洛之间^①，号曰赤翟、白翟^②。而秦穆公得由余，西戎八国服于秦。故陇以西有绵诸、畎戎、狄獮之戎^③，在岐、梁、泾、漆之北有义渠、大荔、乌氏、朐衍之戎^④，而晋北有林胡、楼烦之戎，燕北有东胡、山戎^⑤。各分散溪谷，自有君长，往往而聚者百有余戎，然莫能相壹。

注：①晋灼曰：“圜音囿。《三仓》作圉。《地理志》‘圉水出上郡白土县西，东流入河。’师古曰：“圉水即今银州银水是也。书本作圉，晋说是也。后转写者误为圉耳。洛水亦谓漆沮。”②师古曰：“《春秋》所书晋师灭赤狄潞氏，郟缺获白狄子者。”③师古曰：“皆在天水界，即绵诸道及獮道是也。獮音桓。”④师古曰：“此漆水在新平。荔音隶。氏音支。朐音许于反。”⑤服虔曰：“乌桓之先也，后为鲜卑。”

自是之后百有余年，晋悼公使魏绛和戎翟，戎翟朝晋。后百有余年，赵襄子逾句注而破之，并代以临胡貉^①。后与韩魏共灭知伯，分晋地而有之，则赵有代、句注以北，而魏有西河、上郡，以与戎界边。其后，义渠之戎筑城郭以自守，而秦稍蚕食之，至于惠王，遂拔义渠二十五城。惠王伐魏，魏尽入西河及上郡于秦。秦昭王时，义渠戎王与宣太后乱，有二子^②。宣太后诈而杀义渠戎王于甘泉，遂起兵伐灭义渠。于是秦有陇西、北地、上郡，筑长城以距胡。而赵武灵王亦变俗胡服，习骑射，北破林胡、楼烦，自代并阴山下至高阙为塞^③，而置云中、雁门、代郡。其后燕有贤将秦开，为质于胡，胡甚信之。归而袭破东胡，[东胡]却千余里^④。与荆轲刺秦王秦舞阳者，开之孙也。燕亦筑长城，自造阳至襄平^⑤，置上谷、渔阳、右北平、辽西、辽东郡以距胡。当是时，冠带战国七，而三国边于匈奴^⑥。其后赵将李牧时，匈奴不敢入赵边。后秦灭六国，而始皇帝使蒙恬将数十万之(物)[众]北击胡，悉收河南地，因河为塞，筑四十四县城临河，徙适戍以充之^⑦。而

通直道，自九原至云阳，因边山险，塹溪谷，可缮者缮之^⑧，起临洮至辽东万余里。又渡河据阳山北假中^⑨。

注：①师古曰：“谿音莫伯反。”②师古曰：“即昭王母也。”③师古曰：“并音步浪反。高阙，解在《卫青霍去病传》。”④师古曰：“却，退也，音丘略反。”⑤师古曰：“造阳，地名，在上谷界。襄平即辽东所治也。”⑥如淳曰：“燕、赵、秦。”⑦师古曰：“适读曰谪。有罪谪合徙戍者，令徙居之。”⑧师古曰：“缮，补也。”⑨师古曰：“北假，地名。”

当是时，东胡强而月氏盛^①。匈奴单于曰头曼^②，头曼不胜秦，北徙。十有余年而蒙恬死，诸侯畔秦，中国扰乱，诸秦所徙适边者皆复去^③，于是匈奴得宽，复稍度河南与中国界于故塞。

注：①师古曰：“氏音支。”②师古曰：“曼音莫安反。”③师古曰：“适音谪。”

单于有太子，名曰冒顿。后有爱阏氏，生小子^①，头曼欲废冒顿而立小子，乃使冒顿质于月氏。冒顿既质，而头曼急击月氏。月氏欲杀冒顿，冒顿盗其善马，骑亡归。头曼以为壮，令将万骑。冒顿乃作鸣镝^②，习勒其骑射^③，令曰：“鸣镝所射而不悉射者斩。”行猎兽，有不射鸣镝所射辄斩之。已而，冒顿以鸣镝自射善马，左右或莫敢射，冒顿立斩之。居顷之，复以鸣镝自射其爱妻，左右或颇恐，不敢射，复斩之。顷之，冒顿出猎，以鸣镝射单于善马，左右皆射之。于是冒顿知其左右可用，从其父单于头曼猎，以鸣镝射头曼，其左右皆随鸣镝而射杀头曼，尽诛其后母与弟及大臣不听从者。于是冒顿自立为单于。

注：①师古曰：“阏氏，匈奴皇后号也。阏音于连反。氏音支。”②应劭曰：“髡箭也。”师古曰：“镝音嫡。髡音呼交反。”③师古曰：“勒其所部骑，皆习射也。”

冒顿既立，时东胡强，闻冒顿杀父自立，乃使使谓冒顿曰：“欲得头曼时号千里马。”冒顿问群臣，群臣皆曰：“此匈奴宝马也，勿予。”冒顿曰：“奈何与人邻国爱一马乎？”遂与之。顷之，东胡以为冒顿畏之，使使谓冒顿曰：“欲得单于一阏氏。”冒顿复问左右，左右皆怒曰：“东胡无道，

乃求阏氏!请击之。”冒顿曰:“奈何与人邻国爱一女子乎?”遂取所爱阏氏予东胡。东胡王愈骄,西侵。与匈奴中间有弃地莫居千余里,各居其边为瓠脱^①。东胡使使谓冒顿曰:“匈奴所与我界瓠脱外弃地,匈奴不能至也,吾欲有之。”冒顿问群臣,或曰:“此弃地,予之。”于是冒顿大怒,曰:“地者,国之本也,奈何予人!”诸言与者,皆斩之。冒顿上马,令国中有后者斩,遂东袭击东胡。东胡初轻冒顿,不为备。及冒顿以兵至,大破灭东胡王,虏其民众畜产。既归,西击走月氏,南并楼烦、白羊河南王^②,悉复收秦所使蒙恬所夺匈奴地者,与汉关故河南塞,至朝那、肤施^③,遂侵燕、代。是时汉方与项羽相距,中国罢于兵革^④,以故冒顿得自强,控弦之士三十余万^⑤。自淳维以至头曼千有余岁,时大时小,别散分离,尚矣^⑥,其世传不可得而次。然至冒顿,而匈奴最强大,尽服从北夷,而南与诸夏为敌国,其世(信)[姓]官号可得而记云。

注:①服虔曰:“瓠脱,作土室以伺也。”师古曰:“境上候望之处,若今之伏宿(处)[舍]也。瓠音一侯反。脱音土活反。”②师古曰:“二王之居在河南。”③师古曰:“朝那属安定。肤施属上郡。”④师古曰:“罢读曰疲。”⑤师古曰:“控,引也。控弦,言能引弓者。”⑥师古曰:“尚,久远。”

单于姓挛鞮氏^①,其国称之为“撑犁孤涂单于^②”。匈奴谓天为“撑犁”,谓子为“孤涂”,单于者,广大之貌也,言其像天单于然也。置左右贤王,左右谷蠡^③,左右大将,左右大都尉,左右大当户,左右骨都侯。匈奴谓贤曰“屠耆”,故常以太子为左屠耆王。自左右贤王以下至当户,大者万余骑,小者数千,凡二十四长,立号曰“万骑”。其大臣皆世官。呼衍氏,兰氏^④,其后有须卜氏,此三姓,其贵种也。诸左王将居东方,直上谷以东^⑤,接秽貉、朝鲜;右王将居西方,直上郡以西,接氐、羌;而单于庭直代、云中。各有分地,逐水草移徙。而左右贤王、左右谷蠡最大国,左右骨都侯辅政。诸二十四长,亦各自置千长、百长、什长、裨小王^⑥、相、都尉、当户、且渠之属^⑦。

注:①师古曰:“挛音力全反。鞮音丁奚反。”②苏林曰:“撑音掌距之掌。”师古曰:“音丈庚反。”③师古曰:“谷音鹿。蠡音卢奚反。”④师古曰:

“呼衍，即今鲜卑姓呼延者是也。兰姓今亦有之。”⑤师古曰：“直，当也。其下亦同也。”⑥师古曰：“禕音频移反。”⑦师古曰：“且音子余反。今之沮渠姓，盖本因此官。”

岁正月，诸长小会单于庭，祠。五月，大会龙城，祭其先、天地、鬼神。秋，马肥，大会蹏林，课校人畜计^①。其法，拔刃尺者死，坐盗者没入其家；有罪，小者轧^②，大者死。狱久者不满十日，一国之囚不过数人。而单于朝出营，拜日之始生，夕拜月。其坐，长左而北向^③。日上戊己。其送死，有棺椁金银衣裳，而无封树丧服；近幸臣妾从死者，多至数十百人^④。举事常随月，盛壮以攻战，月亏则退兵。其攻战，斩首虏赐一卮酒，而所得虏获因以予之，得人以为奴婢。故其战，人人自为趋利^⑤，善为诱兵以包敌^⑥。故其逐利，如鸟之集；其困败，瓦解云散矣。战而扶舆死者，尽得死者家财。后北服浑窳、屈射、丁零、隔昆、(龙)新羗之国^⑦。于是匈奴贵人大臣皆服，以冒顿为贤。

注：①服虔曰：“蹏音带，匈奴秋社八月中皆会祭处也。”师古曰：“蹏者，绕林木而祭也。鲜卑之俗，自古相传，秋天之祭，无林木者尚竖柳枝，众骑驰绕三周乃止。此其遗法。计者，人畜之数。”②服虔曰：“刃刻其面也。”如淳曰：“轧，槌杖也。”师古曰：“二说皆非也。轧谓辄其骨节，若今之仄踝者也。轧音于黠反。辄音女展反。”③师古曰：“左者，以左为尊。”④师古曰：“或数十人，或百人。”⑤师古曰：“趋读曰趣。趣，向也。”⑥师古曰：“包裹取之。”⑦师古曰：“五小国也。浑音胡昆反。窳音(戈)[弋]主反。羗音犁。”

是时，汉初定，徙韩王信于代，都马邑。匈奴大攻围马邑，韩信降匈奴。匈奴得信，因引兵南逾句注，攻太原，至晋阳下。高帝自将兵往击之。会冬大寒雨雪^①，卒之堕指者十二三，于是冒顿阳败走，诱汉兵。汉兵逐击冒顿，冒顿匿其精兵，见其羸弱，于是汉悉兵，多步兵，三十二万，北逐之。高帝先至平城，步兵未尽到，冒顿纵精兵三十余万骑围高帝于白登，七日^②，汉兵中外不得相救饷。匈奴骑，其西方尽白，东方尽骠，北方尽骊，南方尽驎马^③。高帝乃使使间厚遗阏氏^④，阏氏乃谓冒顿曰：“两主不

相困。今得汉地，单于终非能居之。且汉主有神，单于察之。”冒顿与韩信将王黄、赵利期，而兵久不来，疑其与汉有谋，亦取阏氏之言，乃开围一角。于是高皇帝令士皆持满傅矢外乡，从解角直出^⑤，得与大军合，而冒顿遂引兵去。汉亦引兵罢，使刘敬结和亲之约。

注：①师古曰：“雨音于具反。”②师古曰：“白登在平城东南，去平城十余里。”③师古曰：“駉，青马也。骠，深黑；驛，赤马也。駉音龙。驛音先营反。”④师古曰：“求间隙而私遗之。”⑤师古曰：“傅读曰附。乡读曰向。言满引弓弩注矢外捍，从解围之隅以出去。”

是后韩信为匈奴将，及赵利、王黄等数背约，侵盗代、雁门、云中。居无几何，陈豨反^①，与韩信合谋击代。汉使樊噲往击之，复收代、雁门、云中郡县，不出塞。是时匈奴以汉将数率众往降^②，故冒顿常往来侵盗代地。于是高祖患之，乃使刘敬奉宗室女翁主为单于阏氏^③，岁奉匈奴絮缯酒食物各有数，约为兄弟以和亲，冒顿乃少止。后燕王卢绾复反，率其党且万人降匈奴，往来苦上谷以东，终高祖世。

注：①师古曰：“无几何，言无多时也。几音居岂反。”②师古曰：“即谓韩信、陈豨之属耳。”③师古曰：“诸王女曰翁主者，言其父自主婚。”

孝惠、高后时，冒顿寝骄^①，乃为书，使使遗高后曰：“孤僂之君^②，生于沮泽之中^③，长于平野牛马之域，数至边境，愿游中国。陛下独立，孤僂独居。两主不乐，无以自虞^④，愿以所有，易其所无。”高后大怒，召丞相平及樊噲、季布等，议斩其使者，发兵而击之。樊噲曰：“臣愿得十万众，横行匈奴中。”问季布，布曰：“噲可斩也！前陈豨反于代，汉兵三十二万，噲为上将军，时匈奴围高帝于平城，噲不能解围。天下歌之曰：‘平城之下亦诚苦！七日不食，不能彀弩^⑤。’今歌噲之声未绝，伤痍者甫起^⑥，而噲欲摇动天下，妄言以十万众横行，是面谩也^⑦。且夷狄譬如禽兽，得其善言不足喜，恶言不足怒也。”高后曰：“善。”令大谒者张泽报书曰：“单于不忘弊邑，赐之以书，弊邑恐惧。退日自图^⑧，年老气衰，发齿堕落，行步失度，单于过听，不足以自污^⑨。弊邑无罪，宜在见赦。窃有御车二乘，马二驷，以奉常驾。”冒顿得书，复使使来谢曰：“未尝闻中国礼义，陛下幸而

赦之。”因献马，遂和亲。

注：①师古曰：“寢，渐也。”②如淳曰：“儆，仆也。犹言不能自立也。”师古曰：“儆音方问反。”③师古曰：“沮，浸湿之地，音子豫反。”④师古曰：“虞与娱同。”⑤师古曰：“穀，张也，音工豆反。”⑥师古曰：“唵，古吟字。瘵，创也。甫，始也。瘵音夷。”⑦师古曰：“漫，欺诳也，音慢，又音莫连反。”⑧师古曰：“图，谋也。”⑨师古曰：“过，误也。”

至孝文即位，复修和亲。其三年夏，匈奴右贤王入居河南地为寇，于是文帝下诏曰：“汉与匈奴约为昆弟，无侵害边境，所以输遗匈奴甚厚。今右贤王离其国，将众居河南地，非常故^①。往来入塞，捕杀吏卒，驱侵上郡保塞蛮夷，令不得居其故^②。凌轹边吏，入盗，甚惊无道^③，非约也。其发边吏车骑八万诣高奴^④，遣丞相灌婴将击右贤王。”右贤王走出塞，文帝幸太原。是时，济北王反，文帝归，罢丞相击胡之兵。

注：①师古曰：“言异于常，非旧事。”②师古曰：“驱与驱同。保塞蛮夷，谓本来属汉而居边塞自保守。”③师古曰：“轹音来各反。惊与傲同。”④师古曰：“上郡之县也。”

其明年，单于遗汉书曰：“天所立匈奴大单于敬问皇帝无恙。前时皇帝言和亲事，称书意合欢^①。汉边吏侵侮右贤王，右贤王不请^②，听后义卢侯难支等计，与汉吏相恨，绝二主之约，离昆弟之亲。皇帝让书再至，发使以书报，不来，汉使不至^③。汉以其故不和，邻国不附。今以少吏之败约^④，故罚右贤王，使至西方求月氏击之。以天之福，吏卒良，马力强，以灭夷月氏^⑤，尽斩杀降下定之。楼兰、乌孙、呼揭及其旁二十六国皆已为匈奴^⑥。诸引弓之民并为一家，北州以定。愿寝兵休士养马，除前事，复故约^⑦，以安边民，以应古始，使少者得成其长，老者得安其处，世世平乐。未得皇帝之志，故使郎中系虏浅奉书请^⑧，献橐佗一，骑马二，驾二驷^⑨。皇帝即不欲匈奴近塞，则且诏吏民远舍。^⑩使者至，即遣之。”六月中，来至新望之地^⑪。书至，汉议击与和亲孰便，公卿皆曰：“单于新破月氏，乘胜，不可击也。且得匈奴地，泽卤非可居也，和亲甚便。”汉许之。

注：①师古曰：“称，副也。言与所遗书意相副，而共结欢亲。”②师古

曰：“不告单于也。”③师古曰：“让书，有责让之言也。谓匈奴再得汉书，而发使将书以报汉。汉留其使不得来还，而汉又更不发使至匈奴也。”④师古曰：“少吏犹言小吏。”⑤师古曰：“夷，平也。”⑥师古曰：“皆入匈奴国也。揭音丘列反。”⑦师古曰：“复音扶目反。”⑧师古曰：“虏音火姑反。”⑨师古曰：“骑马，堪为骑也。驾，可驾车也。二驷，八匹。”⑩师古曰：“舍，居止也。”⑪师古曰：“汉界上塞下之地。”

孝文前六年，遗匈奴书曰：“皇帝敬问匈奴大单于无恙。使系虏浅遗朕书，云‘愿寝兵休(事)[士]，除前事，复故约，以安边民，世世平乐’，朕甚嘉之。此古圣王之志也。汉与匈奴约为兄弟，所以遗单于甚厚。背约离兄弟之亲者，常在匈奴。然右贤王事已在赦前，勿深诛。单于若称书意，明告诸吏，使无负约，有信，敬如单于书。使者言单于自将并国有功，甚苦兵事。服绣袷绮衣、长襦、锦袍各一^①，比疏一^②，黄金飴具带一，黄金犀毗一^③，绣十匹，锦二十匹，赤绋、绿缿各四十匹^④，使中大夫意、谒者令肩遗单于。”后顷之，冒顿死，子稽粥立^⑤，号曰老上单于。

注：①师古曰：“服者，言天子自所服也。袷者，衣无絮也。绣袷绮衣，以绣为表，绮为里也。袷音工洽反。”②师古曰：“辫发之飴也，以金为之。比音频寐反。疏字或作余。”③孟康曰：“要中大带也。”张晏曰：“鲜卑郭洛带，瑞兽名也，东胡好服之。”师古曰：“犀毗，胡带之钩也。亦曰鲜卑，亦谓师比，总一物也，语有轻重耳。”④师古曰：“缿者，帛之总称。绋，厚缿也，音徒奚反。”⑤师古曰：“稽音鸡。粥音育。”

老上稽粥单于初立，文帝复遣宗人女翁主为单于阏氏^①，使宦者燕人中行说傅翁主^②。说不欲行，汉强使之。说曰：“必我也，为汉患者^③。”中行说既至，因降单于，单于爱幸之。

注：①师古曰：“宗人女，亦诸侯王之女。”②师古曰：“姓中行，名说也。行音胡郎反。说读曰悦。”③师古曰：“言我必于汉生患。”

初，单于好汉缿絮食物，中行说曰：“匈奴人众不能当汉之一郡，然所以强之者，以衣食异，无印于汉^①。今单于变俗好汉物，汉物不过什二，则匈奴尽归于汉矣^②。其得汉絮缿，以驰草棘中，衣裤皆裂弊，以视不如旃裘

竖善也^③；得汉食物皆去之^④，以视不如重酪之便美也^⑤。”于是说教单于左右疏记，以计识其人众畜牧^⑥。汉遗单于书，以尺一牍，辞曰“皇帝敬问匈奴大单于无恙”，所以遗物及言语云云。中行说令单于以尺二寸牍，及印封皆令广长大，倨骜其辞^⑦曰“天地所生日月所置匈奴大单于敬问汉皇帝无恙”，所以遗物言语亦云云。

注：①师古曰：“印音牛向反。”②师古曰：“言汉费物十分之二，则尽得匈奴之众也。”③师古曰：“视读曰示。下皆类此。”④师古曰：“去，弃也，音丘吕反。”⑤师古曰：“重，乳汁也。重音竹用反，字本作潼，其音则同。”⑥师古曰：“说者，举中行说之名也。疏，分条之也。识亦记，音式志反。”⑦师古曰：“倨，慢也。骜与傲同。”

汉使或言匈奴俗贱老，中行说穷汉使曰：“而汉俗屯戍从军当发者，其亲岂不自夺温厚肥美赍送饮食行者乎^①？”汉使曰：“然。”说曰：“匈奴明以攻战为事，老弱不能斗，故以其肥美饮食壮健以自卫，如此父子各得相保，何以言匈奴轻老也？”汉使曰：“匈奴父子同穹庐卧^②。父死，妻其后母；兄弟死，尽妻其妻。无冠带之节，阙庭之礼。”中行说曰：“匈奴之俗，食畜肉，饮其汁，衣其皮；畜食草饮水，随时转移。故其急则人习骑射，宽则人乐无事。约束径，易行；君臣简，可久^③。一国之政犹一体也。父兄死，则妻其妻，恶种姓之失也。故匈奴虽乱，必立宗种。今中国虽阳不取其父兄之妻，亲属益疏则相杀，至到易姓，皆从此类也。且礼义之敝，上下交怨，而室屋之极，生力屈焉^④。夫力耕桑以求衣食^⑤，筑城郭以自备，故其民急则不习战攻，缓则罢于作业^⑥。嗟土室之人，顾无喋喋佔佔，冠固何当^⑦！”自是之后，汉使欲辩论者，中行说辄曰：“汉使毋多言，顾汉所输匈奴缯絮米粟，令其量中，必善美而已^⑧，何以言为乎？且所给备善则已，不备善而苦恶，则候秋孰，以骑驰蹂乃稼穡也^⑨。”日夜教单于候利害处。

注：①师古曰：“而，汝也。饮音于禁反。食音似。其下亦同。”②师古曰：“穹庐，旃帐也。其形穹隆，故曰穹庐。”③师古曰：“径，直也。简，率也。”④师古曰：“言忠信衰薄，强为礼义，故其末流，怨恨弥起。栋宇之

作，土木竞胜，劳役既重，所以力屈。屈，尽也，音其勿反。”⑤师古曰：“力谓竭力也。”⑥师古曰：“罢读曰疲。”⑦师古曰：“嗟者，叹愍之言也。喋喋，利口也。估估，衣裳貌也。言汉人且当思念，无为喋喋估估耳。虽自谓着冠，何所当益也。喋音牒。估音昌占反。”⑧师古曰：“顾，念也。中犹满也。量中者，满其数也。中音竹仲反。”⑨师古曰：“苦犹粗也。蹂，践也。乃，汝也。蹂音人九反。”

孝文十四年，匈奴单于十四万骑入朝那萧关，杀北地都尉卬，虏人民畜产甚多，遂至彭阳^①。使骑兵入烧回中宫^②，候骑至雍甘泉。于是文帝以中尉周舍、郎中令张武为将军，发车千乘，十万骑，军长安旁以备胡寇。而拜昌侯卢卿为上郡将军，宁侯魏邀为北地将军^③，隆虑侯周灶为陇西将军^④，东阳侯张相如为大将军，成侯董赤为将军^⑤，大发车骑往击胡。单于留塞内月余，汉逐出塞即还，不能有所杀。匈奴日以骄，岁入边，杀掠人民甚众，云中、辽东最甚，郡万余人。汉甚患之，乃使使遗匈奴书，单于亦使当户报谢，复言和亲事。

注：①服虔曰：“安定县也。”师古曰：“即今彭原县是。”②师古曰：“回中，地在安定，其中有宫也。”屈③师古曰：“邀，古速字。”④师古曰：“虑音庐。”⑤师古曰：“《文纪》言建成侯，此言成侯，纪传不同，当有误。”

孝文后二年，使使(遣)[遗]匈奴书曰：“皇帝敬问匈奴大单于无恙。使当户且渠雕渠难、郎中韩辽遗朕马二匹，已至，敬受^①。先帝制，长城以北引弓之国受令单于，长城以内冠带之室朕亦制之，使万民耕织，射猎衣食，父子毋离，臣主相安，(居)[俱]无暴虐。今闻渫恶民贪降其趋^②，背义绝约，忘万民之命，离两主之欢，然其事已在前矣。书云‘二国已和亲，两主欢说^③，寝兵休卒养马^④，世世昌乐，翕然更始’，朕甚嘉之。圣者日新，改作更始，使老者得息，幼者得长，各保其首领，而终其天年。朕与单于俱由此道^⑤，顺天恤民，世世相传，施之无穷，天下莫不咸嘉。(使)汉与匈奴邻敌之国，匈奴处北地，寒，杀气早降，故诏吏遗单于林檎金帛絮絮它物岁有数。今天下大安，万民熙熙^⑥，独朕与单于为之父母。朕追念前事，薄物细故，谋臣计失，皆不足以离昆弟之欢^⑦。朕闻天不颇覆，地不偏

载^⑧。朕与单于皆捐细故，俱蹈大道(也)^⑨，堕坏前恶，以图长久^⑩，使两国之民若一家子。元元万民，下及鱼鳖，上及飞鸟，跛行喙息蠕动之类^⑪，莫不就安利，避危殆。故来者不止，天之道也。俱去前事^⑫，朕释逃虏民^⑬，单于毋言章尼等^⑭。朕闻古之帝王，约分明而不食言^⑮。单于留志，天下大安^⑯，和亲之后，汉过不先^⑰。单于其察之。”

注：①师古曰：“当户且渠者，一人为二官。雕渠难者，其姓名。”②晋灼曰：“渫音渫水之渫。邪恶不正之民。”师古曰：“渫音先列反。降，下也，谓下意于利也。趋读曰趣。”③师古曰：“‘说’读曰‘悦’。”④师古曰：“寝，息也。”⑤师古曰：“由，从也，用也。”⑥师古曰：“和乐貌。”⑦师古曰：“细故，小事也。”⑧师古曰：“颇亦偏也，音普何反。”⑨师古曰：“捐，弃也。”⑩师古曰：“堕，毁也。图，谋也。堕音火规反。”⑪师古曰：“跛行，凡有足而行者也。喙息，凡以口出气者也。蠕蠕，动貌。跛音岐。喙音许秽反。蠕音人充反。”⑫师古曰：“去，除也，音丘吕反。”⑬师古曰：“谓汉人逃入匈奴者，(今)[令]不追。”⑭师古曰：“背单于降汉者。”⑮师古曰：“凡云食言者，终为不信，弃其前言，如食而尽。”⑯师古曰：“留志谓计念和亲。”⑰师古曰：“言更不负约。”

单于既约和亲，于是制诏御史：“匈奴大单于遗朕书，和亲已定，亡人不足以益众广地，匈奴无人塞，汉无出塞，犯今约者杀之，可以久亲，后无咎，俱便。朕已许。其布告天下，使明知之。”

后四年，老上单于死，子军臣单于立，而中行说复事之。汉复与匈奴和亲。

军臣单于立岁余，匈奴复绝和亲，大人上郡、云中各三万骑，所杀略甚众。于是汉使三将军军屯北地，代屯句注，赵屯飞狐口^①，缘边亦各坚守以备胡寇。又置三将军，军长安西细柳、渭北棘门、霸上以备胡。胡骑入代句注边，烽火通于甘泉、长安。数月，汉兵至边，匈奴亦远塞^②，汉兵亦罢。后岁余，文帝崩，景帝立，而赵王遂乃阴使于匈奴。吴楚反，欲与赵合谋入边。汉围破赵，匈奴亦止。自是后，景帝复与匈奴和亲，通关市，给遗单于，遣翁主如故约。终景帝世，时时小人盗边，无大寇。

注：①师古曰：“险隘之处，在代郡之南，南冲燕赵之中。”②师古曰：“远，离也，音于万反。”

武帝即位，明和亲约束，厚遇关市，饶给之。匈奴自单于以下皆亲汉，往来长城下。

汉使马邑人聂翁壹^①间阑出物与匈奴交易^②，阳为卖马邑城以诱单于。单于信之，而贪马邑财物，乃以十万骑入武州塞。汉伏兵三十余万马邑旁，御史大夫韩安国为护军将军，护四将军以伏单于^③。单于既入汉塞，未至马邑百余里，见畜布野而无人牧者，怪之，乃攻亭。时雁门尉史行微，见寇，保此亭^④，单于得，欲刺之。尉史知汉谋，乃下^⑤，具告单于。单于大惊，曰：“吾固疑之。”乃引兵还。出曰：“吾得尉史，天也。”以尉史为天王。汉兵约单于入马邑而纵（兵）^⑥，单于不至，以故无所得。将军王恢部出代击胡辎重^⑦，闻单于还，兵多，不敢出。汉以恢本建造兵谋而不进，诛恢。自是后，匈奴绝和亲，攻当路塞^⑧，往往入盗于边，不可胜数。然匈奴贪，尚乐关市，耆汉财物^⑨，汉亦通关市不绝以中之^⑩。

注：①师古曰：“姓聂名壹。翁者，老人之称也。”②孟康曰：“私出塞交易。”③师古曰：“伏兵而待单于也。”④师古曰：“汉律，近塞郡皆置尉，百里一人，士史、尉史各二人巡行徼塞也。行音下孟反。”⑤师古曰：“尉史在亭楼上，虏欲以矛戟刺之，惧，乃自下以谋告。”⑥师古曰：“放兵以击单于。”⑦师古曰：“重音直用反。”⑧师古曰：“塞之当行道处者。”⑨师古曰：“耆读曰嗜。”⑩师古曰：“以关市中其意。中音竹仲反。”

自马邑军后五岁之秋，汉使四将各万骑击胡关市下。将军卫青出上谷，至龙城，得胡首虏七百人。公孙贺出云中，无所得。公孙敖出代郡，为胡所败七千。李广出雁门，为胡所败，匈奴生得广，广道亡归^①。汉囚敖、广，敖、广赎为庶人。其冬，匈奴数千人盗边，渔阳尤甚。汉使将军韩安国屯渔阳备胡。其明年秋，匈奴二万骑入汉，杀辽西太守，略二千余人。又败渔阳太守军千余人，围将军安国^②。安国时千余骑亦且尽，会燕救之，至，匈奴乃去，又入雁门杀掠千余人。于是汉使将军卫青将三万骑出雁门，李息出代郡，击胡，得首虏数千。其明年，卫青复出云中以西至陇西，

击胡之楼烦、白羊王于河南，得胡首虏数千，羊百余万。于是汉遂取河南地，筑朔方，复缮故秦时蒙恬所为塞，因河而为固。汉亦弃上谷之斗辟县造阳地以予胡^③。是岁，元朔二年也。

注：①师古曰：“于道上亡还。”②师古曰：“即韩安国也。”③孟康曰：“县斗辟曲近胡。”师古曰：“斗，绝也。县之斗曲入匈奴界者，其中造阳地也。辟读曰僻。”

其后冬，军臣单于死，其弟左谷蠡王伊稚斜自立为单于，攻败军臣单于太子于单。于单亡降汉，汉封于单为陟安侯，数月死。

伊稚斜单于既立，其夏，匈奴数万骑入代郡，杀太守共友，掠千余人。秋，又入雁门，杀掠千余人。其明年，又入代郡、定襄、上郡，各三万骑，杀略数千人。匈奴右贤王怨汉夺之河南地而筑朔方，数寇盗边，及入河南，侵扰朔方，杀掠吏民甚众。

其明年春，汉遣卫青将六将军十余万人出朔方高阙。右贤王以为汉兵不能至，饮酒醉。汉兵出塞六七百里，夜围右贤王。右贤王大惊，脱身逃走，精骑往往随后去。汉将军得右贤王人众男女万五千人，裨小王十余人。其秋，匈奴万骑入代郡，杀都尉朱央，略千人。

其明年春，汉复遣大将军卫青将六将军，十余万骑，仍再出定襄数百里^①击匈奴，得首虏前后万九千余级，而汉亦亡两将军，三千余骑。右将军建得以身脱，而前将军翕侯赵信兵不利，降匈奴。赵信者，故胡小王，降汉，汉封为翕侯，以前将军与右将军并军，介独遇单于兵，故尽没^②。单于既得翕侯，以为自次王^③，用其姊妻之，与谋汉。信教单于益北绝幕^④，以诱罢汉兵，徼极而取之^⑤，毋近塞^⑥。单于从之。其明年，胡数万骑入上谷，杀数百人。

注：①师古曰：“仍，频也。”②晋灼曰：“介音夏。”师古曰：“介，特也。本虽并军，至遇单于时特也。介读如本字。”③师古曰：“自次者，尊重次于单于。”④师古曰：“直度曰绝。”⑤师古曰：“罢读曰疲。徼，要也。诱令疲，要其困极，然后取之。徼音工尧反。”⑥师古曰：“不近塞居，所以疲劳汉兵也。”

明年春，汉使票骑将军去病将万骑出陇西，过焉耆山千余里，得胡首虏八千余级，得休屠王祭天金人。^①其夏，骠骑将军复与合骑侯数万骑出陇西、北地二千里，过居延，攻祁连山，得胡首虏三万余级，裨小王以下十余人。是时，匈奴亦来入代郡、雁门，杀掠数百人。汉使博望侯及李将军广出右北平，击匈奴左贤王。左贤王围李广，广军四千人死者过半，杀虏亦过当。会博望侯军救至，李将军得脱，尽亡其军。合骑侯后骠骑将军期，及博望侯皆当死，赎为庶人。

注：①孟康曰：“匈奴祭天处本在云阳甘泉山下，秦击夺其地，后徙之休屠王右地，故休屠有祭天金人象也。”师古曰：“作金人以为天神之主而祭之，即今佛像是其遗法。”

其秋，单于怒昆邪王、休屠王居西方为汉所杀虏数万人，欲召诛之。昆邪、休屠王恐，谋降汉，汉使骠骑将军迎之。昆邪王杀休屠王，并将其众降汉，凡四万余人，号十万。于是汉已得昆邪，则陇西、北地、河西益少胡寇，徙关东贫民处所夺匈奴河南地新秦中以实之，（西）[而]减北地以西戍卒半。明年春，匈奴入右北平、定襄各数万骑，杀掠千余人。

其[明]年春，汉谋以为“翁侯信为单于计，居幕北，以为汉兵不能至”。乃粟马^①，发十万骑，私负从马凡十四万匹^②，粮重不与焉^③。令大将军青、骠骑将军去病中分军，大将军出定襄，骠骑将军出代，咸约绝幕击匈奴^④。单于闻之，远甚辎重^⑤，以精兵待于幕北。与汉大将军接战一日，会暮，大风起，汉兵纵左右翼围单于。单于自度战不能与汉兵^⑥，遂独与壮骑数百溃汉围西北遁走。汉兵夜追之不得，行捕斩首虏凡万九千级^⑦，北至寘颜山赵信城而还^⑧。

注：①师古曰：“以粟秣马也。”②师古曰：“私负衣装者及私将马从者，皆非公家发与之限。”③师古曰：“负戴粮食者。重音直用反。与读曰豫。”④师古曰：“约谓为其要。”⑤师古曰：“徙其辎重令远去。”⑥师古曰：“与犹如也。度音徒各反。”⑦师古曰：“且行且捕斩之。”⑧孟康曰：“赵信所作，因以名城。”师古曰：“寘音徒千反。”

单于之走，其兵往往与汉军相乱而随单于。单于久不与其大众相得，

右谷蠡王以为单于死，乃自立为单于。真单于复得其众，右谷蠡乃去号，复其故位。

骠骑之出代二千余里，与左王接战，汉兵得胡首虏凡七万余人，左王将皆遁走。骠骑封于狼居胥山，禅姑衍，临瀚海而还。

是后匈奴远遁，而幕南无王庭。汉渡河自朔方以西至令居^①，往往通渠置田官，吏卒五六万人，稍蚕食，地接匈奴以北[●]。

注：①师古曰：“令音零。下亦类此。”②师古曰：“其地相接不绝。”

初，汉两将大出围单于，所杀虏八九万，而汉士物故者亦万数^①，汉马死者十余万匹。匈奴虽病，远去，而汉马亦少，无以复往。单于用赵信计，遣使好辞请和亲。天子下其议，或言和亲，或言遂臣之。丞相长史任敞曰：“匈奴新困，宜使为外臣，朝请于边[●]。”汉使敞使于单于。单于闻敞计，大怒，留之不遣。先是汉亦有所降匈奴使者，单于亦辄留汉使相当。汉方复收士马，会骠骑将军去病死，于是汉久不北击胡。

注：①师古曰：“物故谓死也。”②师古曰：“请音材性反。”

数岁，伊稚斜单于立十三年死，子乌维立为单于。是岁，元鼎三年也。乌维单于立，而汉武帝始出巡狩郡县。其后汉方南诛两越，不击匈奴，匈奴亦不入边。

乌维立三年，汉已灭两越，遣故太仆公孙贺将万五千骑出九原二千余里，至浮苴井^①，从票侯赵破奴万余骑出令居数千里，至匈奴河水^②，皆不见匈奴一人而还。

注：①师古曰：“苴音子余反。《武纪》苴字作沮，其音同。”②臣瓚曰：“水名也。去令居千里。”

是时，天子巡边，亲至朔方，勒兵十八万骑以见武节^①，而使郭吉风告单于^②。既至匈奴，匈奴主客问所使^③，郭吉卑体好言曰：“吾见单于而口言。”单于见吉，吉曰：“南越王头已县于汉北阙下。今单于即能前与汉战，天子自将兵待边；即不能，亟南面而臣于汉^④。何但远走，亡匿于幕北寒苦无水草之地为^⑤？”语卒，单于大怒，立斩主客见者，而留郭吉不归，迁辱之北海上。而单于终不肯为寇于汉边，休养士马，习射猎，数使使好辞

甘言求和亲。

注：①师古曰：“见，示也。”②师古曰：“风读曰讽。”③师古曰：“主客，主接诸客者也。问以何事而来。”④师古曰：“亟，急也，音居力反。”⑤师古曰：“但，空也。”

汉使王乌等窥匈奴。匈奴法，汉使不去节，不以墨黥其面，不得入穹庐。王乌，北地人，习胡俗，去其节，黥面入庐。单于爱之，阳许曰：“吾为遣其太子入质于汉，以求和亲。”

注：①师古曰：“以墨黥面也。”②师古曰：“言为王乌故遣太子入质。”

汉使杨信使于匈奴。是时汉东拔濊貉、朝鲜以为郡^①，而西置酒泉郡以隔绝胡与羌通之路。又西通月氏、大夏，以翁主妻乌孙王，以分匈奴西方之援国。又北益广田至眩雷为塞^②，而匈奴终不敢以为言。是岁，翁侯信死，汉用事者以匈奴已弱，可臣从也。杨信为人刚直倔犟，素非贵臣也^③，单于不亲。欲召入，不肯去节，乃坐穹庐外见杨信。杨信说单于曰：“即欲和亲，以单于太子为质于汉。”单于曰：“非故约。故约，汉常遣翁主，给缿絮食物有品，以和亲^④，而匈奴亦不复扰边。今乃欲反古^⑤，令吾太子为质，无几矣^⑥。”匈奴俗，见汉使非中贵人，其儒生，以为欲说，折其辞辩；少年，以为欲刺，折其气。每汉兵入匈奴，匈奴辄报偿。汉留匈奴使，匈奴亦留汉使，必得当乃止。

注：①师古曰：“为，涉与移同，亦或作移。”②服虔曰：“眩雷，地在乌孙北也。眩音州县之县。”③师古曰：“屈音其勿反。强音其两反。”④师古曰：“品谓等差也。”⑤师古曰：“反，违也。”⑥师古曰：“言遣太子为质，则匈奴国中所余者无几，皆当尽也。几音居岂反。”

杨信既归，汉使王乌等如匈奴。匈奴复谄以甘言^①，欲多得汉财物，给王乌曰：“吾欲入汉^②见天子，面相结为兄弟。”王乌归报汉，汉为单于筑邸于长安。匈奴曰：“非得汉贵人使，吾不与诚语^③。”匈奴使其贵人至汉，病，服药欲愈之，不幸而死。汉使路充国佩二千石印绶，使送其丧，厚币直数千金。单于以为汉杀吾贵使者，乃留路充国不归。诸所言者，单于特空给王乌^④，殊无意入汉，遣太子来质。于是匈奴数使奇兵侵犯汉边。

汉乃拜郭昌为拔胡将军，及浞野侯屯朔方以东，备胡^⑤。

注：①师古曰：“调，古谄字。”②师古曰：“给，诈也。”③师古曰：“诚，实也。”④师古曰：“特，但也。”⑤师古曰：“浞野侯，赵破奴也。浞音仕角反。”

乌维单于立十岁死，子詹师庐立，年少，号为儿单于。是岁，元封六年也。自是后，单于益西北。左方兵直云中，右方兵直酒泉、敦煌。

儿单于立，汉使两使，一人吊单于，一人吊右贤王，欲以乖其国。使者入匈奴，匈奴悉将致单于。单于怒而悉留汉使。汉使留匈奴者前后十余辈，而匈奴使来汉，亦辄留之相当。

是岁，汉使贰师将军西伐大宛，而令因杆将军筑受降城^①。其冬，匈奴大雨雪^②，畜多饥寒死，而单于年少，好杀伐，国中多不安。左大都尉欲杀单于，使人间告汉^③曰：“我欲杀单于降汉，汉远，汉即来兵近我，我即发^④。”初汉闻此言，故筑受降城，犹以为远。

注：①师古曰：“杆音于。”②师古曰：“雨音于具反。”③师古曰：“私来报。”④师古曰：“来兵，言以兵来也。”

其明年春，汉使浞野侯破奴将二万骑出朔方北二千余里^①，期至浚稽山而还^②。浞野侯既至期，左大都尉欲发而觉，单于诛之，发兵击浞野侯。浞野侯行捕首擄数千人。还，未至受降城四百里，匈奴八万骑围之。浞野侯夜出自求水，匈奴生得浞野侯，因急击其军。军吏畏亡将而诛，莫相劝而归，军遂没于匈奴。单于大喜，遂遣兵攻受降城，不能下，乃侵入边而去。明年，单于欲自攻受降城，未到，病死。

注：①师古曰：“以迎左大都尉。”②师古曰：“浚音俊。稽音鸡。在武威北。”

儿单于立三岁而死。子少，匈奴乃立其季父乌维单于弟右贤王句黎湖为单于。是岁，太初三年也。

句黎湖单于立，汉使光禄徐自为出五原塞数百里，远者千里，筑城障列亭至卢朐^①，而使游击将军韩说、长平侯卫伉屯其旁^②，使强弩都尉路博德筑居延泽上。

注：①师古曰：“卢胸，山名也。胸音劬。”②师古曰：“说读曰悦。伉音抗，即卫青子。”

其秋，匈奴大人云中、定襄、五原、朔方，杀略数千人，败数二千石而去，行坏光禄所筑亭障。又使右贤王入酒泉、张掖，略数千人。会任文击救^①，尽复失其所得而去。闻贰师将军破大宛，斩其王还，单于欲遮之，不敢，其冬病死。句黎湖单于立一岁死，其弟左大都尉且鞮侯立为单于^②。

注：①服虔曰：“任文，汉将也。”师古曰：“击救者，击匈奴而自救汉人。”②师古曰：“且音子余反。鞮音丁奚反。”

汉既诛大宛，威震外国，天子意欲遂困胡，乃下诏曰：“高皇帝遗朕平城之忧^①，高后时单于书绝悖逆。昔齐襄公复九世之仇，春秋大之^②。”是岁，太初四年也。

注：①师古曰：“遗，留也。”②师古曰：“公羊传庄四年春，齐襄公灭纪，复仇也。襄公之九世祖昔为纪侯所谮，而亨杀于周，故襄公灭纪也。九世犹可以复仇乎？曰：虽百世可也。”

且鞮侯单于初立，恐汉袭之，尽归汉使之不降者路充国等于汉。单于乃自谓：“我儿子，安敢望汉天子！汉天子，我丈人行^①。”汉遣中郎将苏武厚币赂遗单于，单于益骄，礼甚倨，非汉所望也。明年，浞野侯破奴得亡归汉。其明年，汉使贰师将军将三万骑出酒泉，击右贤王于天山，得首虏万余级而还。匈奴大围贰师，几不得脱^②。汉兵物故什六七^③。汉又使因杆将军出西河，与强弩都尉会涿邪山，亡所得。使骑都尉李陵将步兵五千人出居延北千余里，与单于会，合战，陵所杀伤万余人，兵食尽，欲归，单于围陵，陵降匈奴，其兵得脱归汉者四百人。单于乃贵陵，以其女妻之。

注：①师古曰：“丈人，尊老之称也。行音胡浪反。”②师古曰：“几音钜依反。”③师古曰：“物故谓死也。”

后二岁，汉使贰师将军六万骑，步兵七万，出朔方；强弩都尉路博德将万余人，与贰师会；游击将军说步兵三万人，出五原^①；因杆将军敖将骑万，步兵三万人，出雁门。匈奴闻，悉远其累重于余吾水北^②，而单于以十万待水南，与贰师接战。贰师解而引归，与单于连斗十余日。游击亡所

得。因杆与左贤王战，不利，引归。

注：①师古曰：“即上韩说也。”②师古曰：“累重谓妻子资产也。累音力瑞反。重音直用反。”

明年，且鞮侯单于死，立五年，长子左贤王立为狐鹿姑单于。是岁，太始元年也。

初，且鞮侯两子，长为左贤王，次为左大将，病且死，言立左贤王。左贤王未至，贵人以为有病，更立左大将为单于。左贤王闻之，不敢进。左大将使人召左贤王而让位焉。左贤王辞以病，左大将不听，谓曰：“即不幸死，传之于我。”左贤王许之，遂立为狐鹿姑单于。

狐鹿姑单于立，以左大将为左贤王，数年病死，其子先贤掸不得代^①，更以为日逐王。日逐王者，贱于左贤王。单于自以其子为左贤王。

单于既立六年，而匈奴入上谷、五原，杀掠吏民。其年，匈奴复入五原、酒泉，杀两部都尉。于是汉遣贰师将军七万人出五原，御史大夫商丘成将三万余人出西河，重合侯莽通将四万骑出酒泉千余里。单于闻汉兵大出，悉遣其辎重，徙赵信城北邸郅居水^①。左贤王驱其人民度余吾水六七百里，居兜衔山。单于自将精兵左安侯度姑且水^②。御史大夫军至追（斜）[邪]径，无所见，还^③。匈奴使大将与李陵将三万余骑追汉军，至浚稽山合，转战九日，汉兵陷陈却敌，杀伤虏甚众。至蒲奴水，虏不利，还去。

注：①师古曰：“邸，至也，音丁礼反。郅音之日反。”②师古曰：“且音子余反。”③师古曰：“从疾道而追之，不见虏而还也。邪音似嗟反。”

重合侯军至天山，匈奴使大将偃渠与左右呼知王将二万余骑要汉兵，见汉兵强，引去。重合侯无所得失。是时，汉恐车师兵遮重合侯，乃遣閼陵侯将兵别围车师，尽得其王民众而还。

贰师将军将出塞，匈奴使右大都尉与卫律将五千骑要击汉军于夫羊句山狭^①。贰师遣属国胡骑二千与战，虏兵坏散，死伤者数百人。汉军乘胜追北，至范夫人城^②，匈奴奔走，莫敢距敌。会贰师妻子坐巫蛊收，闻之忧惧。其掾胡亚夫亦避罪从军，说贰师曰：“夫人室家皆在吏，若还不称意，适与狱会，郅居以北可复得见乎^③？”贰师由是狐疑，欲深入要功，

遂北至郅居水上。虏已去，贰师遣护军将二万骑度郅居之水。一日，逢左贤王左大将，将二万骑与汉军合战一日，汉军杀左大将，虏死伤甚众。军长史与决眭都尉辉渠侯谋^④曰：“将军怀异心，欲危众求功，恐必败。”谋共执贰师。贰师闻之，斩长史，引兵还至速邪乌燕然山^⑤。单于知汉军劳倦，自将五万骑遮击贰师，相杀伤甚众。夜缒汉军前，深数尺，从后急击之，军大乱败，贰师降。单于素知其汉大将贵臣，以女妻之，尊宠在卫律上。

注：①服虔曰：“夫羊，地名也。”师古曰：“句山，西山也。句音钩。”②应劭曰：“本汉将筑此城。将亡，其妻率余众完保之，因以为名也。”张晏曰：“范氏能胡诅者。”③如淳曰：“以就诛后，虽复欲降匈奴，不可得。”④晋灼曰：“本匈奴官也。辉渠，鲁（阆）[阳]县也。”师古曰：“眭音息随反。辉音辉。”⑤师古曰：“速邪乌，地名也，燕然山在其中。”

其明年，单于遣使遗汉书云：“南有大汉，北有强胡。胡者，天之骄子也，不为小礼以自烦。今欲与汉闾大关，取汉女为妻^①，岁给遗我麩酒万石，稷米五千斛^②，杂缯万匹，它如故约，则边不相盗矣。”汉遣使者报送其使，单于使左右难汉使者，曰：“汉，礼义国也。贰师道前太子发兵反，何也？”使者曰：“然。乃丞相私与太子争斗，太子发兵欲诛丞相，丞相诬之，故诛丞相。此子弄父兵，罪当笞，小过耳。孰与冒顿单于身杀其父代立，常妻后母，禽兽行也！”单于留使者，三岁乃得还。

注：①师古曰：“闾读与开同。”②师古曰：“以麩为酒，味尤甜，稷米，稷粟米也。”

贰师在匈奴岁余，卫律害其宠，会母阏氏病^①，律饬胡巫^②言先单于怒，曰：“胡攻时祠兵，常言得贰师以社^③，今何故不用？”于是收贰师，贰师（怒）[骂]曰：“我死必灭匈奴！”遂屠贰师以祠。会连雨雪数月，畜产死，人民疫病，谷稼不孰^④，单于恐，为贰师立祠室。自贰师没后，汉新失大将军士卒数万人，不复出兵。三岁，武帝崩。前此者，汉兵深入穷追二十余年，匈奴孕重愴殍，罢极苦之^⑤。自单于以下常有欲和亲计。

注：①师古曰：“单于之母也。”②师古曰：“饬与敕同。”③师古曰：“以祠社。”④师古曰：“北方早寒，虽不宜（黍）[禾]稷，匈奴中亦种黍

稼。”⑤师古曰：“孕重，怀任者也。墮，落也。殯，败也，音‘读’。罢读曰疲。极，困也。苦之，心厌苦也。”

后三年，单于欲求和亲，会病死。初，单于有异母弟为左大都尉，贤，国人乡之^①，母阏氏恐单于不立子而立左大都尉也，乃私使杀之。左大都尉同母兄怨，遂不肯复会单于庭。又单于病且死，谓诸贵人：“我子少，不能治国，立弟右谷蠡王。”及单于死，卫律等与颛渠阏氏谋，匿单于死，诈矫单于令^②，与贵人饮盟，更立子左谷蠡王为壶衍鞬单于。是岁，始元二年也。

注：①师古曰：“乡读曰向。谓悉皆附之。”②师古曰：“矫与矫同，其字从手。矫，托也。”

壶衍鞬单于既立，风谓汉使者，言欲和亲^①。左贤王、右谷蠡王以不得立怨望，率其众欲南归汉。恐不能自致，即胁卢屠王，欲与西降乌孙，谋击匈奴。卢屠王告之，单于使人验问，右谷蠡王不服，反以其罪罪卢屠王，国人皆冤之。于是二王去居其所，未尝肯会龙城^②。

注：①师古曰：“风读曰讽，谓不正言也。”②师古曰：“各自居其本处，不复会龙城祭。”

后二年秋，匈奴入代，杀都尉。单于年少初立，母阏氏不正，国内乖离，常恐汉兵袭之。于是卫律为单于谋“穿井筑城，治楼以藏谷，与秦人守之^①。汉兵至，无奈我何。”即穿井数百，伐材数千。或曰胡人不能守城，是遗汉粮也^②，卫律于是止，乃更谋归汉使不降者苏武、马宏等。马宏者，前副光禄大夫王忠使西国，为匈奴所遮，忠战死，马宏生得，亦不肯降。故匈奴归此二人，欲以通善意。是时，单于立三岁矣。

注：①师古曰：“秦时有人亡入匈奴者，今其子孙尚号秦人。”②师古曰：“遗音弋季反。”

明年，匈奴发左右部二万骑，为四队^①，并入边为寇。汉兵追之，斩首获虏九千人，生得甌脱王，汉无所失亡。匈奴见甌脱王在汉，恐以为道击之^②，即西北远去，不敢南逐水草，发人民屯甌脱。明年，复遣九千骑屯受降城以备汉，北桥余吾，令可度^③，以备奔走^④。是时，卫律已死。卫律在

时，常言和亲之利，匈奴不信，及死后，兵数困，国益贫。单于弟左谷蠡王思卫律言，欲和亲而恐汉不听，故不肯先言，常使左右风汉使者^⑤。然其侵盗益希，遇汉使愈厚，欲以渐致和亲，汉亦羁縻之。其后，左谷蠡王死。明年，单于使犁污王窥边，言酒泉、张掖兵益弱，出兵试击，冀可复得其地。时汉先得降者，闻其计，天子诏边警备。后无几，右贤王、犁污王四千骑^⑥分三队，入日勒、屋兰、番和^⑦。张掖太守、属国都尉发兵击，大破之，得脱者数百人。属国千长义渠王骑士射杀犁污王^⑧，赐黄金二百斤，马二百匹，因封为犁污王。属国都尉郭忠封成安侯。自是后，匈奴不敢入张掖。

注：①师古曰：“队，部也，音徒内反。”②师古曰：“道读曰导。”③师古曰：“于余吾水上作桥。”④师古曰：“拟有迫急，北走避汉，从此桥度也。”⑤师古曰：“风读曰讽。”⑥师古曰：“无几谓不多时也。几音居岂反。”⑦师古曰：“皆张掖县也。番音盘。”⑧师古曰：“千长者，千人之长。”

其明年，匈奴三千余骑入五原，略杀数千人，后数万骑南旁塞猎^①，行攻塞外亭(长)[障]，略取吏民去。是时汉边郡烽火候望精明，匈奴为边寇者少利，希复犯塞。汉复得匈奴降者，言乌桓尝发先单于冢，匈奴怨之，方发二万骑击乌桓。大将军霍光欲发兵(要)[邀]击之^②，以问护军都尉赵充国。充国以为“乌桓间数犯塞^③，今匈奴击之，于汉便。又匈奴希寇盗，北边幸无事。蛮夷自相攻击，而发兵要之，招寇生事，非计也。”光更问中郎将范明友，明友言可击。于是拜明友为度辽将军，将二万骑出辽东。匈奴闻汉兵至，引去。初，光诫明友：“兵不空出，即后匈奴，遂击乌桓^④。”乌桓时新中匈奴兵^⑤，明友既后匈奴，因乘乌桓敝，击之，斩首六千余级，获三王首，还，封为平陵侯。

注：①师古曰：“旁音步浪反。”②师古曰：“邀迎而击之。邀音工尧反。”③师古曰：“间即中间也，犹言比日也。”④师古曰：“后匈奴者，言兵迟后，邀匈奴不及。”⑤师古曰：“为匈奴所中伤。”

匈奴繇是恐^①，不能出兵。即使使之乌孙，求欲得汉公主。击乌孙，取车延、恶师地。乌孙公主上书，下公卿议救，未决。昭帝崩，宣帝即位，乌孙昆弥复上书，言：“连为匈奴所侵削，昆弥愿发国半精兵人马五万匹，尽力

击匈奴，唯天子出兵，哀救公主！”本始二年，汉大发关东轻锐士，选郡国吏三百石伉健习骑射者，皆从军^②。遣御史大夫田广明为祁连将军，四万余骑，出西河；度辽将军范明友三万余骑，出张掖；前将军韩增三万余骑，出云中；后将军赵充国为蒲类将军，三万余骑，出酒泉；云中太守田顺为虎牙将军，三万余骑，出五原；凡五将军，兵十余万骑，出塞各二千余里。及校尉常惠使护发兵乌孙西域，昆弥自将翁侯以下五万余骑从西方入，与五将军兵凡二十余万众。匈奴闻汉兵大出，老弱犇走，驱畜产远遁逃^③，是以五将少所得。

注：①师古曰：“繇读与由同。”②师古曰：“伉音古浪反。”③师古曰：“犇，古奔字。驱与驱同。”

度辽将军出塞千二百余里，至蒲离候水，斩首虏七百余级，掳获马牛羊万余。前将军出塞千二百余里，至乌员^①，斩首虏，至候山百余级^②，卤马牛羊二千余。蒲类将军兵当与乌孙合击匈奴蒲类泽，乌孙先期至而去，汉兵不与相及。蒲类将军出塞千八百余里，西去候山，斩首虏，得单于使者蒲阴王以下三百余级，卤马牛羊七千余。闻虏已引去，皆不至期还。天子薄其过，宽而不罪。祁连将军出塞千六百里，至鸡秩山，斩首虏十九级，获牛马羊百余。逢汉使匈奴还者冉弘等，言鸡秩山西有虏众，祁连即戒弘，使言无虏，欲还兵。御史属公孙益寿谏，以为不可，祁连不听，遂引兵还。虎牙将军出塞八百余里，至丹余吾水上，即止兵不进，斩首虏千九百余级，卤马牛羊七万余，引兵还。上以虎牙将军不至期，诈增卤获，而祁连知虏在前，逗留不进^③，皆下吏自杀。擢公孙益寿为侍御史。校尉常惠与乌孙兵至右谷蠡庭，获单于父行^④及嫂、居次、名王、犁污都尉、千长、将以下三万九千万余级，虏马牛羊驴骡橐驼七十余万。汉封惠为长罗侯。然匈奴民众死伤而去者，及畜产远移死(于)[亡]不可数胜。于是匈奴遂衰耗^⑤，怨乌孙。

注：①师古曰：“乌员，地名也，音云。”②师古曰：“候山，山名也。于此山斩捕得人。”③孟康曰：“律语也，谓军行顿止，稽留不进也。”师古曰：“逗读与住同，又音豆。”④师古曰：“行音胡浪反。”⑤师古曰：“耗，减也，

音呼到反。”

其冬，单于自将万骑击乌孙，颇得老弱，欲还。会天大雨雪^①，一日深丈余，人民畜产冻死，还者不能什一。于是丁令乘弱攻其北^②，乌桓入其东，乌孙击其西。凡三国所杀数万级，马数万匹，牛羊甚众。又重以饿死^③，人民死者什三，畜产什五，匈奴大虚弱，诸国羈属者皆瓦解，攻盗不能理。其后汉出三千余骑，为三道，并入匈奴，捕虏得数千人还。匈奴终不敢取当^④，兹欲乡和亲^⑤，而边境少事矣。

注：①师古曰：“雨音于具反。”②师古曰：“令音零。”③师古曰：“重音直用反。”④师古曰：“当者，报其直。”⑤师古曰：“兹，益也。乡读曰向。”

壶衍鞬单于立十七年死，弟左贤王立，为虚闾权渠单于。是岁，地节二年也。

虚闾权渠单于立，以右大将女为大阏氏，而黜前单于所幸颯渠阏氏。颯渠阏氏父左大且渠怨望。是时匈奴不能为边寇，于是汉罢外城，以休百姓^①。单于闻之喜，召贵人谋，欲与汉和亲。左大且渠心害其事，曰：“前汉使来，兵随其后，今亦效汉发兵，先使使者入。”乃自请与呼卢訾王各将万骑南旁塞猎，相逢俱入^②。行未到，会三骑亡降汉，言匈奴欲为寇。于是天子诏发边骑屯要害处，使大将军军监治众等四人^③将五千骑，分三队^④，出塞各数百里，捕得虏各数十人而还。时匈奴亡其三骑，不敢入，即引去。是岁也，匈奴饥，人民畜产死十六七。又发两屯各万骑以备汉。其秋，匈奴前所得西噶居左地者^⑤，其君长以下数千人皆驱畜产行，与瓠脱战，所战杀伤甚众，遂南降汉。

注：①师古曰：“外城，塞外诸城。”②师古曰：“訾音子移反。旁音步浪反。”③师古曰：“治众者，军监之名。”④师古曰：“队音徒内反。”⑤孟康曰：“噶音辱，匈奴种也。”师古曰：“噶音奴独反。”

其明年，西域城郭共击匈奴，取车师国^①，得其王及人众而去。单于复以车师王昆弟兜莫为车师王，收其余民东徙，不敢居故地。而汉益遣屯士分田车师地以实之。其明年，匈奴怨诸国共击车师，遣左右大将各万余骑屯田右地，欲以侵迫乌孙西域。后二岁，匈奴遣左右奥鞬各六千

骑^②，与左大将再击汉之田车师城者，不能下。其明年，丁令比三岁入盗匈奴^③，杀掠人民数千，驱马畜去。匈奴遣万余骑往击之，无所得。其明年，单于将十万余骑旁塞猎^④，欲入边寇。未至，会其民题除渠堂亡降汉言状，汉以为言兵鹿奚卢侯，而遣后将军赵充国将兵四万余骑屯缘边九郡备虏。月余，单于病呕血，因不敢入，还去，即罢兵。乃使题王都犁胡次等入汉，请和亲，未报，会单于死。是岁，神爵二年也。

注：①师古曰：“城郭谓诸国为城居者。”②师古曰：“奥音郁。鞬音居言反。”③师古曰：“比，频也。”④师古曰：“旁音步浪反。”

虚闾权渠单于立九年死。自始立而黜颯渠闾氏，颯渠闾氏即与右贤王私通。右贤王会龙城而去，颯渠闾氏语以单于病甚，且勿远。后数日，单于死。郝宿王刑未央使人召诸王，未至^①，颯渠闾氏与其弟左大且渠都隆奇谋，立右贤王屠耆堂为握衍胸鞬单于。握衍胸鞬单于者，代父为右贤王^②，乌维单于耳孙也。

注：①师古曰：“郝音呼各反。”②师古曰：“胸音幼。”

握衍胸鞬单于立，复修和亲，遣弟伊酋若王胜之入汉献见[●]。单于初立，凶恶，尽杀虚闾权渠时用事贵人刑未央等，而任用颯渠闾氏弟都隆奇，又尽免虚闾权渠子弟近亲，而自以其子弟代之。虚闾权渠单于子稽侯獬既不得立^②，亡归妻父乌禅幕^③。乌禅幕者，本乌孙、康居间小国，数见侵暴，率其众数千人降匈奴，狐鹿姑单于以其弟子日逐王姊妻之，使长其众，居右地^④。日逐王先贤掸，其父左贤王当为单于，让狐鹿姑单于，狐鹿姑单于许立之。国人以故颇言日逐王当为单于。日逐王素与握衍胸鞬单于有隙，即率其众数万骑归汉。汉封日逐王为归德侯。单于更立其从兄薄胥堂为日逐王^⑤。

注：①师古曰：“酋音材由反。”②师古曰：“子獬音先安反，又音所奸反。”③师古曰：“禅音蝉。”④师古曰：“长，众为之长帅。”⑤师古曰：“胥音先余反。”

明年，单于又杀先贤掸两弟。乌禅幕请之，不听，心恚。其后左奥鞬王死，单于自立其小子为奥鞬王，留庭。奥鞬贵人共立故奥鞬王子为王，

与俱东徙。单于遣右丞相将万骑往击之，失利数千人，不胜。时单于已立二岁，暴虐杀伐，国中不附。及太子、左贤王数谗左地贵人，左地贵人皆怨。其明年，乌桓击匈奴东边姑夕王，颇得人民，单于怒。姑夕王恐，即与乌禅幕及左地贵人共立稽侯罽为呼韩邪单于，发左地兵四五万人，西击握衍胸鞬单于，至姑且水北^①。未战，握衍胸鞬单于兵败走，使人报其弟右贤王曰：“匈奴共攻我，若肯发兵助我乎^②？”右贤王曰：“若不爱人，杀昆弟诸贵人。各自死若处，无来污我^③。”握衍胸鞬单于恚，自杀。左大且渠都隆奇亡之右贤王所，其民众尽降呼韩邪单于。是岁，神爵四年也。握衍胸鞬单于立三年而败。

注：①师古曰：“且音子余反。”②师古曰：“若，汝也。其下亦同。”③师古曰：“言于汝所居处自死。”

呼韩邪单于归庭数月，罢兵使各归故地，乃收其兄呼屠吾斯在民间者立为左谷蠡王，使人告右贤贵人，欲令杀右贤王。其冬，都隆奇与右贤王共立日逐王薄胥堂为屠耆单于，发兵数万人东袭呼韩邪单于。呼韩邪单于兵败走，屠耆单于还，以其长子都涂吾西为左谷蠡王，少子姑耆楼头为右谷蠡王，留居单于庭。

明年秋，屠耆单于使日逐王先贤掸兄右奥鞬王为乌藉都尉^①各二万骑，屯东方以备呼韩邪单于。是时，西方呼揭王来与唯犁当户谋^②，共谗右贤王，言欲自立为乌藉单于。屠耆单于杀右贤王父子，后知其冤，复杀唯犁当户。于是呼揭王恐，遂畔去，自立为呼揭单于。右奥鞬王闻之，即自立为车犁单于。乌藉都尉亦自立为乌藉单于。凡五单于。屠耆单于自将兵东击车犁单于，使都隆奇击乌藉。乌藉、车犁皆败，西北走，与呼揭单于兵合为四万人。乌藉、呼揭皆去单于号，共并力尊辅车犁单于。屠耆单于闻之，使左大将、都尉将四万骑屯东方，以备呼韩邪单于，自将四万骑西击车犁单于。车犁单于败，西北走，屠耆单于即引西南，留阹敦地^③。

注：①师古曰：“掸音缠。奥音郁。鞬音居言反。”②师古曰：“揭音丘例反。唯音弋癸反。”③师古曰：“阹音蹋。敦音顿，又音对。”

其明年，呼韩邪单于遣其弟右谷蠡王等西袭屠耆单于屯兵，杀略万

余人。屠耆单于闻之，即自将六万骑击呼韩邪单于，行千里，未至罽姑地^①，逢呼韩邪单于兵可四万人，合战。屠耆单于兵败，自杀。都隆奇乃与屠耆少子右谷蠡王姑瞀楼头亡归汉，车犁单于东降呼韩邪单于。呼韩邪单于左大将乌厉屈与父呼遼累乌厉温敦^②皆见匈奴乱，率其众数万人南降汉。封乌厉屈为新城侯，乌厉温敦为义阳侯。是时李陵子复立乌借都尉为单于，呼韩邪单于捕斩之，遂复都单于庭，然众裁数万人。屠耆单于从弟休旬王将所主五六百骑，击杀左大且渠，并其兵，至右地，自立为闰振单于，在西边。其后，呼韩邪单于兄左贤王呼屠吾斯亦自立为郅支骨都侯单于，在东边。其后二年，闰振单于率其众东击郅支单于。郅支单于与战，杀之，并其兵，遂进攻呼韩邪。呼韩邪破，其兵走，郅支都单于庭。

注：①师古曰：“罽音乃谷反。”②师古曰：“呼遼累者，其官号也。遼，古速字也。累音力追反。”

呼韩邪之败也，左伊秩訾王为呼韩邪计，劝令称臣入朝事汉，从汉求助，如此匈奴乃定。呼韩邪议问诸大臣，皆曰：“不可。匈奴之俗，本上气力而下服役^①，以马上战斗为国，故有威名于百蛮。战死，壮士所有也^②。今兄弟争国，不在兄则在弟，虽死犹有威名，子孙常长诸国^③。汉虽强，犹不能兼并匈奴，奈何乱先古之制，臣事于汉，卑辱先单于^④，为诸国所笑！虽如是而安，何以复长百蛮！”左伊秩訾曰：“不然。强弱有时，今汉方盛，乌孙城郭诸国皆为臣妾^⑤。自且鞮侯单于以来，匈奴日削，不能取复^⑥，虽屈强于此，未尝一日安也^⑦。今事汉则安存，不事则危亡，计何以过此！”诸大人相难久之。呼韩邪从其计，引众南近塞，遣子右贤王铄娄渠堂入侍^⑧。郅支单于亦遣子右大将驹于利受人侍。是岁，甘露元年也。

注：①师古曰：“以服役于人为下。”②师古曰：“言人皆有此事耳。”③师古曰：“为诸国之长帅也。”④师古曰：“言忝辱之更令卑下也。”⑤师古曰：“谓西域诸国为城郭而居也。”⑥师古曰：“且音子余反。复音扶目反。”⑦师古曰：“屈音其勿反。”⑧师古曰：“娄音力于反。”

明年，呼韩邪单于款五原塞^①，愿朝三年正月^②。汉遣车骑都尉韩昌迎，发过所七郡二千骑，为陈道上^③。单于正月朝天子于甘泉宫，汉宠

以殊礼，位在诸侯王上，赞谒称臣而不名。赐以冠带衣裳，黄金玺盃绶^④，玉具剑^⑤，佩刀，弓一张，矢四发^⑥，櫜戟十^⑦，安车一乘，鞍勒一具^⑧，马十五匹，黄金二十斤，钱二十万，衣被七十七袭^⑨，锦绣绮縠杂帛八千匹，絮六千斤。礼毕，使使者道单于先行，宿长平^⑩。上自甘泉宿池阳宫。上登长平，诏单于毋谒^⑪，其左右当户之群臣皆得列观，及诸蛮夷君长王侯数万，咸迎于渭桥下，夹道陈。上登渭桥，咸称万岁。单于就邸，留月余，遣归国。单于自请愿留居光禄塞下^⑫，有急保汉受降城^⑬。汉遣长乐卫尉高昌侯董忠、车骑都尉韩昌将骑万六千，又发边郡士马以千数，送单于出朔方鸡鹿塞^⑭。诏忠等留卫单于，助诛不服，又转边谷米糒^⑮，前后三万四千斛，给贍其食。是岁，郅支单于亦遣使奉献，汉遇之甚厚。明年，两单于俱遣使朝献，汉待呼韩邪使有加。明年，呼韩邪单于复入朝，礼赐如初，加衣百一十袭，锦帛九千匹，絮八千斤。以有屯兵，故不复发骑为送。

注：①师古曰：“款，叩也。”②师古曰：“会正旦之朝贺也。”③师古曰：“所过之郡，每为发兵陈列于道，以为宠卫也。”④师古曰：“盃，古戾字。戾，草名也。以戾染绶，亦诸侯王之制也。”⑤孟康曰：“操首鐔卫尽用玉为之也。”师古曰：“鐔，剑口旁横出者也。卫，剑鼻也。鐔音淫。卫字本作彘，其音同耳。”⑥服虔曰：“发，十二矢也。”韦昭曰：“射礼三而止，每射四矢，故以十二为一发也。”师古曰：“发犹今言箭一放两放也。今则以一矢为一放也。”⑦师古曰：“櫜戟，有衣之戟也。櫜音启。”⑧师古曰：“勒，马辔也。”⑨师古曰：“一称为一袭，犹今人之言一副衣服也。”⑩师古曰：“道读曰导。长平，泾水上坂也，解在宣纪。”⑪师古曰：“不令拜也。”⑫师古曰：“徐自为所筑者也。”⑬师古曰：“保，守也。于此自守。”⑭师古曰：“在朔方窳浑县西北。”⑮师古曰：“糒，干饭也，音备。”

始郅支单于以为呼韩邪降汉，兵弱不能复自还，即引其众西，欲攻定右地。又屠耆单于小弟本侍呼韩邪，亦亡之右地，收两兄余兵得数千人，自立为伊利目单于，道逢郅支，合战，郅支杀之，并其兵五万余人。闻汉出兵谷助呼韩邪，即遂留居右地。自度力不能定匈奴^①，乃益西近乌孙，欲与并力，遣使见小昆弥乌就屠。乌就屠见呼韩邪为汉所拥，郅支亡

虜，欲攻之以称汉^②，乃杀郅支使，持头送都护在所，发八千骑迎郅支。郅支见乌孙兵多，其使又不反，勒兵逢击乌孙，破之^③。因北击乌揭^④，乌揭降。发其兵西破坚昆，北降丁令^⑤，并三国。数遣兵击乌孙，常胜之。坚昆东去单于庭七千里，南去车师五千里，郅支留都之。

注：①师古曰：“度音徒各反。”②师古曰：“称汉朝之意也。称音尺孕反。”③师古曰：“以兵逆之，相逢即击，故云逢击。”④师古曰：“揭音丘例反。”⑤师古曰：“令音零。”

元帝初即位，呼韩邪单于复上书，言民众困乏。汉诏云中、五原郡转谷二万斛以给焉。郅支单于自以道远，又怨汉拥护呼韩邪，遣使上书求侍子。汉遣谷吉送之，郅支杀吉。汉不知吉音问，而匈奴降者言闻瓠脱皆杀之^①。呼韩邪单于使来，汉辄簿责之甚急^②。明年，汉遣车骑都尉韩昌、光禄大夫张猛送呼韩邪单于侍子，求问吉等，因赦其罪，勿令自疑^③。昌、猛见单于民众益盛，塞下禽兽尽，单于足以自卫，不畏郅支。闻其大臣多劝单于北归者^④，恐北去后难约束^⑤，昌、猛即与为盟约曰：“自今以来，汉与匈奴合为一家，世世毋得相诈相攻。有窃盗者，相报，行其诛，偿其物^⑥；有寇，发兵相助。汉与匈奴敢先背约者，受天不祥。令其世世子孙尽如盟。”昌、猛与单于及大臣俱登匈奴诺水东山^⑦，刑白马，单于以径路刀金留犁挠酒^⑧，以老上单于所破月氏王头为饮器者共饮血盟。昌、猛还奏事，公卿议者以为“单于保塞为藩，虽欲北去，犹不能为危害。昌、猛擅以汉国世世子孙与夷狄诅盟，令单于得以恶言上告于天，羞国家，伤威重^⑨，不可得行。宜遣使往告祠天，与解盟。昌、猛奉使无状，罪至不道^⑩。”上薄其过^⑪，有诏昌、猛以赎论，勿解盟。其后呼韩邪竟北归庭，人众稍稍归之，国中遂定。

注：①师古曰：“于瓠脱得声问，云杀之。”②师古曰：“簿责，以文簿一一责之也。簿音步户反。”③师古曰：“疑者，疑汉欲讨伐也。”④师古曰：“塞下无禽兽，则射猎无所得，又不畏郅支，故欲北归旧处。”⑤师古曰：“不可更共为言要。”⑥师古曰：“汉人为盗于匈奴，匈奴人为盗于汉，皆相告报而诛偿。”⑦师古曰：“诺水即今突厥地诺真水也。”⑧应劭曰：

“径路，匈奴宝刀也。金，契金也。留犁，饭匕也。挠，和也。契金著酒中，挠搅饮之。”师古曰：“契，刻；挠，搅也，音呼高反。”⑨师古曰：“羞，辱也。”⑩师古曰：“无状，盖无善状。”⑪师古曰：“以其罪过为轻薄。”

郅支既杀使者，自知负汉，又闻呼韩邪益强，恐见袭击，欲远去。会康居王数为乌孙所困，与诸翕侯计，以为匈奴大国，乌孙素服属之，今郅支单于困厄在外，可迎置东边，使合兵取乌孙以立之●，长无匈奴忧矣。即使使至坚昆通语郅支。郅支素恐，又怨乌孙，闻康居计，大说②，遂与相结，引兵而西。康居亦遣贵人，橐它驴马数千匹，迎郅支。郅支人众中寒道死③，余财三千人到康居④。其后，都护甘延寿与副陈汤发兵即康居诛斩郅支⑤，语在延寿、汤传。

注：①师古曰：“言与郅支并力共灭乌孙，以其地立郅支，令居之也。”②师古曰：“说读曰悦。”③师古曰：“中寒，伤于寒也。道死，死于道上也。”④师古曰：“财与才同。”⑤师古曰：“即，就也。”

郅支既诛，呼韩邪单于且喜且惧，上书言曰：“常愿谒见天子，诚以郅支在西方，恐其与乌孙俱来击臣，以故未得至汉。今郅支已伏诛，愿入朝见。”竟宁元年，单于复入朝，礼赐如初，加衣服锦帛絮，皆倍于黄龙时。单于自言愿婿汉氏以自亲①。元帝以后宫良家子王墙字昭君赐单于。单于欢喜，上书愿保塞上谷以西至敦煌②，传之无穷，请罢边备塞吏卒，以休天子人民。天子令下有司议，议者皆以为便。郎中侯应习边事，以为不可许。上问状，应曰：“周秦以来，匈奴暴桀，寇侵边境，汉兴，尤被其害。臣闻北边塞至辽东，外有阴山，东西千余里，草木茂盛，多禽兽，本冒顿单于依阻其中，治作弓矢，来出为寇，是其苑囿也。至孝武世，出师征伐，斥夺此地，攘之于幕北③。建塞饶，起亭隧④，筑外城，设屯戍，以守之，然后边境得用少安。幕北地平，少草木，多大沙，匈奴来寇，少所蔽隐，从塞以南，径深山谷，往来差难。边长老言匈奴失阴山之后，过之未尝不哭也。如罢备塞戍卒，示夷狄之大利，不可一也。今圣德广被，天覆匈奴⑤，匈奴得蒙全活之恩，稽首来臣。夫夷狄之情，困则卑顺，强则骄逆，天性然也。前以罢外城，省亭隧，今裁足以候望通烽火而已。古者安不忘危，

不可复罢，二也。中国有礼义之教，刑罚之诛，愚民犹尚犯禁，又况单于，能必其众不犯约哉！三也^⑥。自中国尚建关梁以制诸侯，所以绝臣下之覬欲也^⑦。设塞饶，置屯戍，非独为匈奴而已，亦为诸属国降民，本故匈奴之人，恐其思旧逃亡，四也。近西羌保塞，与汉人交通，吏民贪利，侵盗其畜产妻子，以此怨恨，起而背畔，世世不绝。今罢乘塞，则生嫚易分争之渐，五也^⑧。往者从军多没不还者，子孙贫困，一旦亡出，从其亲戚，六也。又边人奴婢愁苦，欲亡者多，曰‘闻匈奴中乐，无奈候望急何！’然时有七出塞者，七也。盗贼桀黠，群辈犯法，如其窘急，亡走北出，则不可制，八也。起塞以来百有余年，非皆以土垣也，或因山岩石，木柴僵落，溪谷水门^⑨，稍稍平之，卒徒筑治，功费久远，不可胜计。臣恐议者不深虑其终始，欲以一切省繇戍^⑩，十年之外，百岁之内，卒有它变，障塞破坏，亭隧灭绝，当更发屯缮治，累世之功不可卒复，九也^⑪。如罢戍卒，省候望，单于自以保塞守御，必深德汉^⑫，请求无已。小失其意，则不可测。开夷狄之隙，亏中国之固，十也。非所以永持至安，威制百蛮之长策也。”

注：①师古曰：“言欲取汉女而身为汉家婿。”②师古曰：“保，守也。自请保守之，令无寇盗。”③师古曰：“斥，开也。攘，却也，音人羊反。”④师古曰：“隧谓深开小道而行，避敌钞寇也。隧音遂。”⑤师古曰：“如天之覆也。”⑥师古曰：“必，极也，极保之也。”⑦师古曰：“覬音冀。”⑧师古曰：“乘塞，登之而守也。嫚易犹相欺侮也。易音弋鼓反。”⑨师古曰：“僵落，谓山上树木摧折或立死枯僵堕落者。僵音姜。”⑩师古曰：“一切谓权时也，解在平纪。繇读曰徭。”⑪师古曰：“卒读皆曰猝。”⑫师古曰：“于汉自称恩德也。”

对奏，天子有诏：“勿议罢边塞事。”使车骑将军口谕单于^①曰：“单于上书愿罢北边吏士屯戍，子孙世世保塞。单于乡慕礼义^②，所以为民计者甚厚，此长久之策也，朕甚嘉之。中国四方皆有关梁障塞，非独以备塞外也，亦以防中国奸邪放纵，出为寇害，故明法度以专众心也。敬谕单于之意^③，朕无疑焉。为单于怪其不罢，故使大司马车骑将军嘉晓单于。”单于谢曰：“愚不知大计，天子幸使大臣告语，甚厚！”

注：①师古曰：“将军许嘉也。谕谓晓告。”②师古曰：“乡读曰向。”③师古曰：“言已晓知其意也。”

初，左伊秩訾为呼韩邪画计归汉，竟以安定。其后或谗伊秩訾自伐其功，常鞅鞅^①，呼韩邪疑之。左伊秩訾惧诛，将其众千余人降汉，汉以为关内侯，食邑三百户，令佩其王印绶^②。及竟宁中，呼韩邪来朝，与伊秩訾相见，谢曰：“王为我计甚厚，令匈奴至今安宁，王之力也，德岂可忘！我失王意，使王去不复顾留^③，皆我过也。今欲白天子，请王归庭。”伊秩訾曰：“单于赖天命，自归于汉，得以安宁，单于神灵，天子之祐也，我安得力！既已降汉，又复归匈奴，是两心也。愿为单于侍(史)[使]于汉，不敢听命^④。”单于固请不能得而归。

注：①师古曰：“伐谓矜其功力。”②师古曰：“虽于汉为关内侯，而依匈奴王号与印绶。”③师古曰：“言不复顾念而留住匈奴中。”④师古曰：“言为单于充使，留侍于汉，不能还匈奴。”

王昭君号宁胡阏氏^①，生一男伊屠智牙师，为右日逐王。呼韩邪立二十八年，建始二年死。始呼韩邪嬖左伊秩訾兄呼衍王女二人。长女颛渠阏氏，生二子，长曰且莫车^②，次曰囊知牙斯。少女为大阏氏，生四子，长曰雕陶莫皋，次曰且麋胥^③，皆长于且莫车，少子咸、乐二人，皆小于囊知牙斯。又它阏氏子十余人。颛渠阏氏贵，且莫车爱。呼韩邪病且死，欲立且莫车，其母颛渠阏氏曰：“匈奴乱十余年，不绝如发，赖蒙汉力，故得复安。今平定未久，人民创艾战斗^④，且莫车年少，百姓未附，恐复危国。我与大阏氏一家共子^⑤，不如立雕陶莫皋。”大阏氏曰：“且莫车虽少，大臣共持国事，今舍贵立贱，后世必乱^⑥。”单于卒从颛渠阏氏计，立雕陶莫皋，约令传国与弟。呼韩邪死，雕陶莫皋立，为复株累若鞮单于^⑦。

注：①师古曰：“言胡得之，国以安宁也。”②师古曰：“且音子余反。”③师古曰：“且音子余反。胥音先于反。”④师古曰：“创音初亮反。艾读曰义。”⑤师古曰：“一家，言亲姊妹也。共子，两人所生恩慈无别也。”⑥师古曰：“舍谓弃置也。”⑦师古曰：“复音服。累音力追反。”

复株累若鞮单于立，遣子右致卢儿王醯谐屠奴侯入侍，以且麋胥为

左贤王,且莫车为左谷蠡王,囊知牙斯为右贤王。复株鞮单于复妻王昭君,生二女,长女云为须卜居次^①,小女为当于居次^②。

注:①李奇曰:“居次者,女之号,若汉言公主也。”文颖曰:“须卜氏,匈奴贵族也。”②文颖曰:“当于亦匈奴大族也。”师古曰:“须卜、当于,皆其夫家氏族。”

河平元年,单于遣右皋林王伊邪莫演等奉献朝正月^①。既罢,遣使者送至菑反^②。伊邪莫演言“欲降。即不受我,我自杀,终不敢还归。”使者以闻,下公卿议。议者或言宜如故事,受其降。光禄大夫谷永、议郎杜钦以为“汉兴,匈奴数为边害,故设金爵之赏以待降者。今单于拙体称臣,列为北藩,遣使朝贺,无有二心,汉家接之,宜异于往时。今既享单于聘贡之质^③,而更受其逋逃之臣,是贪一夫之得而失一国之心,拥有罪之臣而绝慕义之君也。假令单于初立,欲委身中国,未知利害^④,私使伊邪莫演诈降以卜吉凶,受之亏德沮善^⑤,今单于自疏,不亲边吏;或者设为反间,欲因而生隙^⑥,受之适合其策,使得归曲而直责^⑦。此诚边竟安危之原,师旅动静之首^⑧,不可不详也。不如勿受,以昭日月之信,抑诈谖之谋,怀附亲之心,便^⑨”。对奏,天子从之。遣中郎将王舜往问降状。伊邪莫演曰:“我病狂妄言耳。”遣去。归到,官位如故,不肯令见汉使。明年,单于上书愿朝河平四年正月,遂入朝,加赐锦绣缯帛二万匹,絮二万斤,它如竟宁时。

注:①师古曰:“演音衍。”②师古曰:“河东之县也。”③师古曰:“享,当也。质,诚也。”④师古曰:“假令犹言或当也。”⑤师古曰:“沮,坏也,音材汝反。”⑥师古曰:“间音居菟反。”⑦师古曰:“归曲于汉,而以直义来责也。”⑧师古曰:“竟读曰境。”⑨师古曰:“谖,诈辞也,音许远反。”

复株鞮单于立十岁,鸿嘉元年死。弟且麋胥立,为搜谐若鞮单于。

搜谐单于立,遣子左祝都韩王胸留斯侯入侍^①,以且莫车为左贤王。搜谐单于立八岁,元延元年,为朝二年发行^②,未入塞,病死。弟且莫车立,为车牙若鞮单于。

注:①师古曰:“胸音许于反。”②师古曰:“欲会二年岁首之朝(会)

[礼],故豫发其国而行。”

搜谐单于立,遣子左祝都韩王胸留斯侯入侍,以且莫车为左贤王。搜谐单于立八车牙单于立,遣子右于涂仇掸王乌夷当入侍,以囊知牙斯为左贤王。车牙单于立四岁,绥和元年死。弟囊知牙斯立,为乌珠留若鞮单于。

乌珠留单于立,以第二阏氏子乐为左贤王,以第五阏氏子舆为右贤王^①,遣子右股奴王乌鞮牙斯入侍。汉遣中郎将夏侯藩、副校尉韩容使匈奴。时帝舅大司马骠骑将军王根领尚书事,或说根曰:“匈奴有斗入汉地,直张掖郡^②,生奇材木,箭竿就羽^③,如得之,于边甚饶,国家有广地之实,将军显功,垂于无穷。”根为上言其利,上直欲从单于求之^④,为有不得,伤命损威^⑤。根即但以上指晓藩,令从藩所说而求之^⑥。藩至匈奴,以语次说单于曰:“窃见匈奴斗入汉地,直张掖郡。汉三都尉居塞上,士卒数百人寒苦,候望久劳。单于宜上书献此地,直断阏之,省两都尉士卒数百人,以复天子厚恩^⑦,其报必大^⑧。”单于曰:“此天子诏语邪,将从使者所求也?”藩曰:“诏指也,然藩亦为单于画善计耳。”单于曰:“孝宣、孝元皇帝哀怜父呼韩邪单于,从长城以北匈奴有之。此温偶馱王所居地也^⑨,未晓其形状所生,请遣使问之^⑩。”藩、容归汉。从复使匈奴,至则求地。单于曰:“父兄传五世,汉不求此地,至知独求,何也?已问温偶馱王,匈奴西边诸侯作穹庐及车,皆仰此山材木^⑪,且先父地,不敢失也。”藩还,迁为太原太守。单于遣使上书,以藩求地状闻。诏报单于曰:“藩擅称诏从单于求地,法当死,更大赦二^⑫,今徙藩为济南太守,不令当匈奴。”明年,侍子死,归葬。复遣子左于騃仇掸王稽留昆入侍^⑬。

注:①师古曰:“此二人皆乌珠留之弟也。第二阏氏,即上所谓大阏氏也。第五阏氏,亦呼韩邪单于之阏氏。”②师古曰:“斗,绝也。直,当也。”③师古曰:“就,大雕也,黄头赤目,其羽可为箭。竿音工旱反。”④师古曰:“直犹正耳。”⑤师古曰:“诏命不行,故云伤命也。”⑥师古曰:“自以藩意说单于而求之。”⑦师古曰:“复亦报。”⑧师古曰:“汉得此地,必厚报赏单于。”⑨师古曰:“偶音五口反。馱音涂。次下亦同。”⑩师古曰:“所

生，谓山之所出草木、鸟兽为用者。”⑪师古曰：“谓诸小王为诸侯者，效中国之言耳。仰音牛向反。”⑫师古曰：“更，经也，音功衡反。”⑬师古曰：“擘音缠。稽音鸡。”

至哀帝建平二年，乌孙庶子卑援寔^①翕侯人众入匈奴西界，寇盗牛畜，颇杀其民。单于闻之，遣左大当户乌夷泠^②将五千骑击乌孙，杀数百人，略千余人，驱牛畜去^③。卑援寔恐，遣子趋逐为质匈奴^④。单于受，以状闻。汉遣中郎将丁野林、副校尉公乘音使匈奴，责让单于，告令还归卑援寔质子。单于受诏，遣归。

注：①师古曰：“援音爰。寔音竹二反。”②师古曰：“泠音零。”③师古曰：“驱与驱同。”④师古曰：“逐音录。”

建平四年，单于上书愿朝五年。时哀帝被疾，或言匈奴从上游来厌人^①，自黄龙、竟宁时，单于朝中国辄有大故^②。上由是难之，以问公卿，亦以为虚费府帑^③，可且勿许。单于使辞去，未发，黄门郎扬雄上书谏曰：

注：①服虔曰：“游犹流也。河水从西北来，故曰上游也。”师古曰：“上游，亦总谓地形耳，不必系于河水也。厌音一涉反。”②师古曰：“大故谓国之丧。”③师古曰：“府，物所聚也。帑，藏金帛之所也，音它莽反，又音奴。”

臣闻六经之治，贵于未乱；兵家之胜，贵于未战^①。二者皆微^②，然而大事之本，不可不察也。今单于上书求朝，国家不许而辞之，臣愚以为汉与匈奴从此隙矣。本北地之狄，五帝所不能臣，三王所不能制，其不可使隙甚明。臣不敢远称，请引秦以来明之。

注：①师古曰：“已乱而后治之，战斗而后获胜，则不足贵。”②师古曰：“微谓精妙也。”

以秦始皇之强，蒙恬之威，带甲四十余万，然不敢窥西河，乃筑长城以界之。会汉初兴，以高祖之威灵，三十万众困于平城，士或七日不食。时奇谲之士石画之臣甚众^①，卒其所以脱者，世莫得而言也^②。又高皇后尝忿匈奴，群臣庭议，樊噲请以十万众横行匈奴中，季布曰：“噲可斩也，妄阿顺指！”于是大臣权书遗之^③，然后匈奴之结解，中国之忧平。及孝文

时，匈奴侵暴北边，候骑至雍甘泉，京师大骇，发三将军屯细柳、棘门、霸上以备之，数月乃罢。孝武即位，设马邑之权，欲诱匈奴，使韩安国将三十万众饶于便墜^④，匈奴觉之而去，徒费财劳师，一虏不可得见，况单于之面乎！其后深惟社稷之计，规恢万载之策^⑤，乃大兴师数十万，使卫青、霍去病操兵，前后十余年^⑥。于是浮西河，绝大幕，破寘颜，袭王庭，穷极其地，追奔逐北，封狼居胥山，禅于姑衍，以临瀚海^⑦，虏名王贵人以百数。自是之后，匈奴震怖，益求和亲，然而未肯称臣也。

注：①邓展曰：“石，大也。”师古曰：“石言坚固如石也。画，计策也，音荻。”②师古曰：“卒，终也。莫得而言，谓自免之计，其事丑恶，故不传。”③师古曰：“以权道为书，顺辞以答之。”④师古曰：“饶，要也，音工尧反。墜，古地字。”⑤师古曰：“恢，大也。”●师古曰：“操，持也，音千高反。”⑦师古曰：“积土为封，而又禅祭也。”

且夫前世岂乐倾无量之费，役无罪之人，快心于狼望之北哉^①？以为不壹劳者不久佚，不斲费者不永宁^②，是以忍百万之师以摧饿虎之喙，运府库之财填卢山之壑而不悔也^③。至本始之初，匈奴有桀心^④，欲掠乌孙，侵公主，乃发五将之师十五万骑猎其南，而长罗侯以乌孙五万骑震其西，皆至质而还^⑤。时鲜有所获^⑥，徒奋扬威武，明汉兵若雷风耳。虽空行空反，尚诛两将军。故北狄不服，中国未得高枕安寝也。逮至元康、神爵之间，大化神明，鸿恩溥洽，而匈奴内乱，五单于争立，日逐、呼韩邪携国归（死）[化]，扶伏称臣^⑦，然尚羈縻之，计不颛制^⑧。自此之后，欲朝者不距，不欲者不强^⑨。何者？外国天性忿鸷^⑩，形容魁健^⑪，负力怙气^⑫，难化以善，易隶以恶^⑬，其强难诘，其和难得。故未服之时，劳师远攻，倾国殫货，伏尸流血，破坚拔敌，如彼之难也；既服之后，慰荐抚循，交接赂遗，威仪俯仰，如此之备也。往时尝屠大宛之城，蹈乌桓之垒，探姑缯之壁^⑭，籍荡姐之场^⑮，艾朝鲜之旃，拔两越之旗^⑯，近不过旬月之役，远不离二时之劳^⑰，固已犁其庭，扫其闾^⑱，郡县而置之，云彻席卷，后无余蓄^⑲。唯北狄为不然，真中国之坚敌也，三垂比之悬矣，前世重之兹甚^⑳，未易可轻也。

注：①师古曰：“匈奴中地名也。”②师古曰：“佚与逸同。”③师古曰：

“喙，口也，摧百万之师于兽口也。卢山，匈奴中山也。喙音许秽反。”④师古曰：“桀，竖也。言其起立不顺。”⑤师古曰：“质，信也，谓所期处。”⑥师古曰：“鲜，少也，音先践反。”⑦师古曰：“伏音蒲北反。”⑧师古曰：“颛与专同。专制谓以为臣妾也。”⑨师古曰：“强音其两反。”⑩师古曰：“鸷，佞也，音竹二反。”⑪师古曰：“魁，大也。”⑫师古曰：“负，恃也。”⑬师古曰：“隶谓附属之也。恶谓威也。”⑭师古曰：“姑绘，谓西南夷种也，在益州，见昭纪也。”⑮刘德曰：“羌属也。”师古曰：“籍犹蹈也。姐音紫。”⑯师古曰：“艾读曰刈。刈，绝也。”⑰师古曰：“离，历也。三月为一时。”⑱师古曰：“犁，耕也。”⑲师古曰：“蓄，古灾字也。”⑳师古曰：“兹，益也。”

今单于归义，怀款诚之心，欲离其庭，陈见于前，此乃上世之遗策，神灵之所想望，国家虽费，不得已者也^①。奈何距以来厌之辞，疏以无日之期，消往昔之恩，开将来之隙！夫款而隙之，使有恨心，负前言，缘往辞^②，归怨于汉，因以自绝，终无北面之心，威之不可，谕之不能，焉得不为大忧乎！夫明者视于无形，聪者听于无声，诚先于未然，即蒙恬、樊哙不复施，棘门、细柳不复备，马邑之策安所设，卫、霍之功何得用，五将之威安所震^③？不然，壹有隙之后，虽智者劳心于内，辩者毂击于外^④，犹不若未然之时也。且往者图西域，制车师^⑤，置城郭都护三十六国，费岁以大万计者^⑥，岂为康居、乌孙能逾白龙堆而寇西边哉^⑦？乃以制匈奴也。夫百年劳之，一日失之，费十而爱一，臣窃为国不安也。唯陛下少留意于未乱未战，以遏边萌之祸。

注：①师古曰：“已，止也。”②师古曰：“言单于因缘往昔和好之辞以怨汉也。”③师古曰：“先于未然，谓计策素定，御难折冲。”④师古曰：“毂击，言使车交驰，其毂相击也。”⑤师古曰：“图，谋也。”⑥师古曰：“财用之费，一岁数百万也。”⑦孟康曰：“龙堆形如土龙身，无头有尾，高大者二三丈，埤者丈余，皆东北向，相似也，在西域中。”

书奏，天子寤焉，召还匈奴使者，更报单于书而许之。赐雄帛五十匹，黄金十斤。单于未发，会病，复遣使愿朝明年。故事，单于朝，从名王以下及从者二百余人。单于又上书言：“蒙天子神灵，人民盛壮，愿从五

百人入朝，以明天子盛德。”上皆许之。

元寿二年，单于来朝，上以太岁厌胜所在^①，舍之上林苑蒲陶宫^②。告之以加敬于单于^③，单于知之。加赐衣三百七十袭，锦绣缯帛三万匹，絮三万斤，它如河平时。既罢，遣中郎将韩况送单于。单于出塞，到休屯井，北度车田卢水，道里回远^④。况等乏食，单于乃给其粮，失期不还五十余日。

注：①师古曰：“厌音一涉反。”②师古曰：“舍，止宿。”③师古曰：“云以敬于单于，故令止上林。”④师古曰：“回音胡内反。”

初，上遣稽留昆随单于去，到国，复遣稽留昆同母兄右大且方与妇人侍^①。还归，复遣且方同母兄左日逐王都与妇人侍。是时，汉平帝幼，太皇太后称制，新都侯王莽秉政，欲说太后以威德至盛异于前^②，乃风单于^③令遣王昭君女须卜居次云入侍^④太后，所以赏赐之甚厚。

注：①师古曰：“且音子闾反。”②师古曰：“说读曰悦。以此事取悦于太后。”③师古曰：“风读曰讽。”④师古曰：“云者，其女名。”

会西域车师后王句姑^①、去胡来王唐兜^②皆怨恨都护校尉，将妻子人民亡降匈奴，语在西域传。单于受置左谷蠡地，遣使上书言状曰：“臣谨已受。”诏书中郎将韩隆、王昌、副校尉甄阜、侍中谒者帛敞、长水校尉王歙使匈奴^③，告单于曰：“西域内属，不当得受^④，今遣之^⑤。”单于曰：“孝宣、孝元皇帝哀怜，为作约束，自长城以南天子有之，长城以北单于有之。有犯塞，辄以状闻；有降者，不得受。臣知父呼韩邪单于蒙无量之恩，死遗言曰：‘有从中国来降者，勿受，辄送至塞，以报天子厚恩。’此外国也，得受之。”使者曰：“匈奴骨肉相攻，国几绝^⑥，蒙中国大恩，危亡复续，妻子完安，累世相继，宜有以报厚恩。”单于叩头谢罪，执二虏还付使者。诏使中郎将王萌待西域恶都奴界上逆受^⑦。单于遣使送到国，因请其罪。使者以闻，有诏不听^⑧，会西域诸国王斩以示之。乃造设四条^⑨：中国人亡入匈奴者，乌孙亡降匈奴者，西域诸国佩中国印绶降匈奴者，乌桓降匈奴者，皆不得受。遣中郎将王骏、王昌、副校尉甄阜、王寻使匈奴，班四条与单于，杂函封^⑩，付单于，令奉行，因收故宣帝所为约束封函还。时，莽奏令中国不得有二名，因使使者以风单于^⑪，宜上书慕化，为一名，汉必加厚

赏。单于从之，上书言：“幸得备藩臣，窃乐太平圣制，臣故名囊知牙斯，今谨更名曰知。”莽大说^①，白太后，遣使者答谕，厚赏赐焉。

注：①师古曰：“句音钩。”②师古曰：“为其去胡而来降汉，故以为王号。”③师古曰：“歛音翁。”④师古曰：“既属汉家，不得复臣匈奴。”⑤师古曰：“今既遣还。”⑥师古曰：“几音矩依反。”⑦服虔曰：“恶都奴，西域之谷名也。”师古曰：“逆受，迎而受之。”⑧师古曰：“不免其罪。”⑨师古曰：“更新为此制也。”⑩师古曰：“与玺书同一函而封之。”⑪师古曰：“风读曰讽。”⑫师古曰：“说读曰悦。”

汉既班四条，后护乌桓使者告乌桓民，毋得复与匈奴皮布税。匈奴以故事遣使者责乌桓税^①，匈奴人民妇女欲贾贩者皆随往焉。乌桓距曰：“奉天子诏条，(之)[不]当予匈奴税。”匈奴使怒，收乌桓酋豪，缚到悬之。酋豪昆弟怒，共(入)[杀]匈奴使及其官属，收略妇女马牛。单于闻之，遣使发左贤王兵入乌桓责杀使者，因攻击之。乌桓分散，或走上山，或东保塞。匈奴颇杀人民，驱妇女弱小且千人去^②，置左地，告乌桓曰：“持马畜皮布来赎之。”乌桓见略者亲属二千余人持财畜往赎，匈奴受，留不遣^③。

注：①师古曰：“故时常税，是以求之。”②师古曰：“驱与驱同。”③师古曰：“受其皮布而留人不遣。”

王莽之篡位也，建国元年，遣五威将王骏率甄阜、王飒、陈饶、帛敞、丁业六人^①，多赍金帛，重遗单于，谕晓以受命代汉状，因易单于故印。故印文曰“匈奴单于玺”，莽更曰“新匈奴单于章”^②。将率既至，授单于印绶^③，诏令上故印绶。单于再拜受诏。译前，欲解取故印绶，单于举掖授之。左姑夕侯苏从旁谓单于曰：“未见新印文，宜且勿与。”单于止，不肯与。请使者坐穹庐，单于欲前为寿。五威将曰：“故印绶当以时上。”单于曰：“诺。”复举掖授译。苏复曰：“未见印文，且勿与。”单于曰：“印文何由变更！”遂解故印绶奉上，将率受。著新绶，不解视印，饮食至夜乃罢。右率陈饶谓诸将率曰：“乡者姑夕侯疑印文，几令单于不与人^④。如令视印，见其变改，必求故印，此非辞说所能距也。既得而复失之，辱命莫大焉。不如椎破故印，以绝祸根。”将率犹与，莫有应者^⑤。饶，燕士，果悍，^⑥即引斧椎坏之。明日，单

于果遣右骨都侯当白将率曰：“汉赐单于印，言‘玺’不言‘章’，又无‘汉’字，诸王已下乃有‘汉’言‘章’。今（印）[即]去‘玺’加‘新’，与臣下无别。愿得故印。”将率示以故印，谓曰：“新室顺天制作，故印随将率所自为破坏。单于宜奉天命，奉新室之制。”当还白，单于知己无可奈何，又多得赂遗，即遣弟右贤王舆奉马牛随将率入谢，因上书求故印。

注：①师古曰：“珮音立。”②师古曰：“新者，莽自系其国号。”③师古曰：“绂者，印之组也，音弗。”④师古曰：“乡读曰向。几音钜音依反。”⑤师古曰：“与读曰豫。”⑥师古曰：“果，决也。悍，勇也，音胡干反。”

将率还到左犁汗王咸所居地，见乌桓民多，以问咸。咸具言状^①，将率曰：“前封四条，不得受乌桓降者，亟还之^②。”咸曰：“请密与单于相闻，得语，归之。”单于使咸报曰：“当从塞内还之邪，从塞外还之邪？”将率不敢颞决，以闻。诏报，从塞外还之。

注：①师古曰：“谓前驱略得妇女弱小，赎之不还者。”②师古曰：“亟，急也，音居力反。”

单于始用夏侯藩求地有距汉语，后以求税乌桓不得，因寇略其人民，衅由是生，重以印文改易^①，故怨恨。乃遣右大且渠蒲呼卢訾等十余人将兵众万骑，以护送乌桓为名^②，勒兵朔方塞下。朔方太守以闻。

注：①师古曰：“重音直用反。”②师古曰：“阳言云护送乌桓人众，实来为寇。”

明年，西域车师后王须置离谋降匈奴，都护但钦诛斩之。置离兄狐兰支将人众二千余人，驱畜产，举国亡降匈奴^①，单于受之。狐兰支与匈奴共入寇，击车师，杀后成长^②，伤都护司马，复还入匈奴。

注：①师古曰：“驱与驱同。举其一国人皆亡降也。”②师古曰：“后成，车师小国名也。长，其长帅也。”

时戊己校尉史陈良、终带、司马丞韩玄、右曲候任商等见西域颇背叛，闻匈奴欲大侵，恐并死，即谋劫略吏卒数百人，共杀戊己校尉刀护^①，遣人与匈奴南犁汗王南将军相闻。匈奴南将军二千骑入西域迎良等，良等尽胁略戊己校尉吏士男女二千余人入匈奴。玄、商留南将军所，良、带

径至单于庭，人众别置零吾水上田居。单于号良、带曰乌桓都将军，留居单于所，数呼与饮食。西域都护但钦上书言匈奴南将军右伊秩訾将人众寇击诸国。莽于是大分匈奴为十五单于，遣中郎将蔺苞、副校尉戴级将兵万骑，多赍珍宝至云中塞下，招诱呼韩邪单于诸子，欲以次拜之。使译出塞诱呼右犁汗王咸、咸子登、助三人，至则胁拜咸为孝单于，赐安车鼓车各一，黄金千斤，杂缯千匹，戏戟十^②；拜助为顺单于，赐黄金五百斤；传送助、登长安。莽封苞为宣威公，拜为虎牙将军；封级为扬威公，拜为虎贲将军。单于闻之，怒曰：“先单于受汉宣帝恩，不可负也。今天子非宣帝子孙，何以得立？”遣左骨都侯、右伊秩訾王呼卢訾及左贤王乐将兵入云中益寿塞，大杀吏民。是岁，建国三年也。是后，单于历告左右部都尉、诸边王，入塞寇盗，大辈万余，中辈数千，少者数百，杀雁门、朔方太守、都尉，略吏民畜产不可胜数，缘边虚耗。莽新即位，怙府库之富欲立威，乃拜十二部将率，发郡国勇士，武库精兵，各有所屯守，转委输于边。议满三十万众，赍三百日粮，同时十道并出，穷追匈奴，内之于丁令^③，因分其地，立呼韩邪十五子。

注：①师古曰：“刀音貂。”②师古曰：“戏戟，有旗之戟也。戏音许宜反，又音麾。”③师古曰：“逐之遣入丁令地。令音零。”

莽将严尤谏曰：“臣闻匈奴为害，所从来久矣，未闻上世有必征之者也。后世三家周、秦、汉征之，然皆未有得上策者也。周得中策，汉得下策，秦无策焉。当周宣王时，狁允内侵，至于泾阳，命将征之，尽境而还。其视戎狄之侵，譬犹蝨虻之螫，驱之而已^①。故天下称明，是为中策。汉武帝选将练兵，约赍轻粮，深入远戍^②，虽有克获之功，胡辄报之，兵连祸结三十余年，中国罢耗，匈奴亦创艾^③，而天下称武，是为下策。秦始皇不忍小耻而轻民力，筑长城之固，延袤万里^④，转输之行，起于负海，疆境既完，中国内竭，以丧社稷，是为无策。今天下遭阳九之厄，比年饥馑，西北边尤甚。发三十万众，具三百日粮，东援海代，南取江淮，然后乃备^⑤。计其道里，一年尚未集合，兵先至者聚居暴露，师老械弊，势不可用，此一难也。边既空虚，不能奉军粮，内调郡国，不相及属，此二难也^⑥。计一人

三百日食，用糒十八斛，非牛力不能胜；牛又当自齎食，加二十斛，重矣。胡地沙卤，多乏水草，以往事揆之，军出未满百日，牛必物故且尽^⑦，余粮尚多，人不能负，此三难也。胡地秋冬甚寒，春夏甚风，多赍鍤薪炭，重不可胜^⑧，食糒饮水，以历四时，师有疾疫之忧，是故前世伐胡，不过百日，非不欲久，势力不能，此四难也。辘重自随，则轻锐者少^⑨，不得疾行，虏徐遁逃，势不能及，幸而逢虏，又累辘重^⑩，如遇险阻，衔尾相随^⑪，虏要遮前后，危殆不测，此五难也。大用民力，功不可必立，臣伏忧之。今既发兵，宜纵先至者，令臣尤等深入霆蠹击，且以创艾胡虏^⑫。”莽不听尤言，转兵谷如故，天下骚动。

注：①师古曰：“蠹，古蚊字也。虻音盲。螫音式亦反。驱与驱同。”②师古曰：“约，少也。少赍衣装。”③师古曰：“罢读曰疲。耗，损也。创音初向反。艾读曰义。次下亦同。”④师古曰：“袞，长也，音茂。”⑤师古曰：“援，引也，音爰。”⑥师古曰：“调，发也，音徒钓反。属音之欲反。”⑦师古曰：“物故谓死也。”⑧师古曰：“鍤，古釜字也。鍤，釜之大口者也。鍤音富。”⑨师古曰：“重音直用反。其下亦同。”⑩师古曰：“累音力瑞反。”⑪师古曰：“衔，马衔也。尾，马尾也。言前后单行，不得并驱。”⑫师古曰：“请率见到之兵，且以击虏。”

咸既受莽孝单于之号，驰出塞归庭，具以见胁状白单于。单于更以为于粟置支侯，匈奴贱官也。后助病死，莽以登代助为顺单于。

厌难将军陈钦^①、震狄将军王巡屯云中葛邪塞。是时，匈奴数为边寇，杀将率吏士，略人民，驱畜产去甚众^②。捕得虏生口验问，皆曰孝单于咸子角数为寇。两将以闻。四年，莽会诸蛮夷，斩咸子登于长安市。

注：①师古曰：“厌音一涉反。”②师古曰：“驱与驱同。”

初，北边自宣帝以来，数世不见烟火之警，人民炽盛，牛马布野。及莽挠乱匈奴，与之构难^①，边民死亡系获，又十二部兵久屯而不出，吏士罢弊^②，数年之间，北边虚空，野有暴骨矣。

注：①师古曰：“挠，搅也，音火高反。”②师古曰：“罢读曰疲。”

乌珠留单于立二十一岁，建国五年死。匈奴用事大臣右骨都侯须卜

当,即王昭君女伊墨居次云之婿也。云常欲与中国和亲,又素与咸厚善,见咸前后为莽所拜,故遂越輿而立咸为乌累若鞮单于。

乌累单于咸立,以弟輿为左谷蠡王。乌珠留单于子苏屠胡本为左贤王,以弟屠耆闾氏子卢浑为右贤王。乌珠留单于在时,左贤王数死,以为其号不祥,更易命左贤王曰“护于”。护于之尊最贵,次当为单于,故乌珠留单于授其长子以为护于,欲传以国。咸怨乌珠留单于贬贱己号,不欲传国,及立,贬护于为左屠耆王。云、当遂劝咸和亲。

天凤元年,云、当遣人之西河虎猛制虏塞下^①,告塞吏曰欲见和亲侯。和亲侯王歙者,王昭君兄子也^②。中部都尉以闻。莽遣歙、歙弟骑都尉展德侯飒使匈奴^③,贺单于初立,赐黄金衣被缯帛,给言侍子登在,因购求陈良、终带等。单于尽收四人及手杀校尉刀护贼芝音妻子以下二十七人,皆械槛付使者,遣厨唯姑夕王富等四十人送歙、飒。莽作焚如之刑,烧杀陈良等^④,罢诸将率屯兵,但置游击都尉。单于贪莽赂遗,故外不失汉故事,然内利寇掠。又使还,知子登前死,怨恨,寇虏从左地入,不绝^⑤。使者问单于,辄曰:“乌桓与匈奴无状黠民共为寇入塞,譬如中国有盗贼耳!咸初立持国,威信尚浅,尽力禁止,不敢有二心。”

注:①师古曰:“虎猛,县名,制虏塞在其界。”②师古曰:“歙音翁。”③师古曰:“飒音立。”④应劭曰:“易有焚如、死如、弃如之言,莽依此作刑名也。”如淳曰:“焚如、死如、弃如者,谓不孝子也。不畜于父母,不容于朋友,故烧杀弃之,莽依此作刑名也。”师古曰:“《易离卦》九四爻辞也。”⑤师古曰:“入为寇而掳掠。”

天凤二年五月,莽复遣歙与五威将王咸率伏黯、丁业等六人,使送右厨唯姑夕王,因奉归前所斩侍子登及诸贵人从者丧,皆载以常车^①。至塞下,单于遣云、当子男大且渠奢等至塞迎。咸等至,多遗单于金珍,因谕说改其号,号匈奴曰“恭奴”,单于曰“善于”,赐印绶。封骨都侯当为后安公,当子男奢为后安侯。单于贪莽金币,故曲听之,然寇盗如故。咸、歙又以陈良等购金付云、当,令自差与之^②。十二月,还入塞,莽大喜,赐歙钱二百万,悉封黯等。

注：①刘德曰：“县易车也。旧司农出钱市车，县次易牛也。”②师古曰：“差其次第多少。”

单于咸立五岁，天凤五年死，弟左贤王舆立，为呼都而尸道皋若鞮单于。匈奴谓孝曰“若鞮”。自呼韩邪后，与汉亲密，见汉溢帝为“孝”，慕之，故皆为“若鞮”。

呼都而尸单于舆既立，贪利赏赐，遣大且渠奢与云女弟当(户)[于]居次子醯椳王^①俱奉献至长安。莽遣和亲侯歙与奢等俱至制虏塞下，与云、当会，因以兵迫胁，将至长安。云、当小男从塞下得脱，归匈奴。当至长安，莽拜为须卜单于，欲出大兵以辅立之。兵调度亦不合，而匈奴愈怒，并入北边，北边由是坏败。会当病死，莽以其庶女陆遂任妻后安公奢^②，所以尊宠之甚厚，终为欲出兵立之者^③。会汉兵诛莽，云、奢亦死。

注：①师古曰：“椳音读。”②师古曰：“陆遂，邑也。莽改公主曰任。奢本为侯，莽以女妻之，故进爵为公。”师古曰：“遂音录。任音壬。”③师古曰：“言为此计意不止。”

更始二年冬，汉遣中郎将归德侯飒、大司马护军陈遵使匈奴，授单于汉旧制玺绶，王侯以下印绶，因送云、当余亲属贵人从者。单于舆骄，谓遵、飒曰：“匈奴本与汉为兄弟，匈奴中乱^①，孝宣皇帝辅立呼韩邪单于，故称臣以尊汉。今汉亦大乱，为王莽所篡，匈奴亦出兵击莽，空其边境，令天下骚动思汉，莽卒以败而汉复兴，亦我力也，当复尊我！”遵与相掌距^②，单于终持此言。其明年夏，还。会赤眉入长安，更始败。

注：①师古曰：“言中间之时也，读如本字，又音竹仲反。”②师古曰：“掌谓支柱也。音丈庚反，又丑庚反。”

赞曰：书戒“蛮夷猾夏”^①，诗称“戎狄是膺”^②，春秋“有道守在四夷”^③，久矣夷狄之为患也。故自汉兴，忠言嘉谋之臣曷尝不运筹策相与争于庙堂之上乎？高祖时则刘敬，吕后时樊噲、季布，孝文时贾谊、朝错，孝武时王恢、韩安国、朱买臣、公孙弘、董仲舒，人持所见，各有同异，然总其要，归两科而已。缙绅之儒则守和亲，介胄之士则言征伐，皆偏见一时之利害，而未究匈奴之终始也。自汉兴以至于今，旷世历年，多于春秋，其与

匈奴，有修文而和亲之矣，有用武而克伐之矣，有卑下而承事之矣^④，有威服而臣畜之矣，拙伸异变，强弱相反，是故其详可得而言也。昔和亲之论，发于刘敬。是时天下初定，新遭平城之难，故从其言，约结和亲，赂遗单于，冀以救安边境。孝惠、高后时遵而不违，匈奴寇盗不为衰止，而单于反以加骄倨。逮至孝文，与通关市，妻以汉女，增厚其赂，岁以千金，而匈奴数背约束，边境屡被其害。是以文帝中年，赫然发愤，遂躬戎服，亲御鞍马，从六郡良家材力之士^⑤，驰射上林，讲习战陈，聚天下精兵，军于广武，顾问冯唐，与论将帅，喟然叹息，思古名臣，此则和亲无益，已然之明效也。

注：①师古曰：“《虞书舜》典载舜命皋陶作士之言也。猾，乱也。夏谓中夏诸国也。”②师古曰：“《鲁颂閟》宫之诗，美僖公兴师与齐桓讨难。膺，当也。”③师古曰：“《春秋左氏传》昭(三十二)[二十三]年楚囊瓦为令尹，城郢。沈尹戌曰：‘古者天子，守在四夷，’言德及远。”④师古曰：“下音胡亚反。”⑤师古曰：“六郡，谓陇西、天水、安定、北地、上郡、西河也。其安定、天水、西河，武帝所置耳，史本其土地，而追言也。”

仲舒亲见四世之事，犹复欲守旧文，颇增其约。以为“义动君子，利动贪人，如匈奴者，非可以仁义说也^①。独可说以厚利，结之于天耳^②。故与之厚利以没其意^③，与盟于天以坚其约，质其爱子以累其心^④，匈奴虽欲展转，奈失重利何，奈欺上天何，奈杀爱子何^⑤。夫赋敛行赂不足以当三军之费，城郭之固无以异于贞士之约^⑥，而使边城守境之民父兄缓带，稚子咽哺^⑦，胡马不窥于长城，而羽檄不行于中国，不亦便于天下乎！”察仲舒之论，考诸行事，乃知其未合于当时，而有阙于后世也。当孝武时，虽征伐克获，而士马物故亦略相当；虽开河南之野，建朔方之郡，亦弃造阳之北九百余里。匈奴人民每来降汉，单于亦辄拘留汉使以相报复^⑧，其桀骜尚如斯^⑨，安肯以爱子而为质乎？此不合当时之言也。若不置质，空约和亲，是袭孝文既往之悔，而长匈奴无已之诈也^⑩。夫边城不选守境武略之臣，修障隧备塞之具，厉长戟劲弩之械，恃吾所以待边寇。而务赋敛于民，远行货赂，割剥百姓，以奉寇讎。信甘言，守空约，而几胡马之不窥，不已过乎^⑪！

注：①师古曰：“此说谓劝谕。”②师古曰：“此说读曰悦。”③师古曰：“没，溺也。”④师古曰：“累音力瑞反。”⑤师古曰：“辗转，为移动其心。”⑥晋灼曰：“坚城固守，不胜遣贞士为和亲之约也。”⑦师古曰：“咽，吞也。哺谓所食在口者也。咽音宴。哺音捕。”⑧师古曰：“复音扶目反。”⑨师古曰：“鹜与傲同。”⑩师古曰：“袭，重也，重迭为其事。”⑪师古曰：“几读曰冀。”

至孝宣之世，承武帝奋击之威，直匈奴百年之运^①，因其坏乱几亡之厄^②，权时施宜，覆以威德，然后单于稽首臣服，遣子入侍，(二)[三]世称藩，宾于汉庭。是时边城晏闭。牛马布野^③，三世无犬吠之警，苜蓿亡干戈之役^④。

注：①师古曰：“直，当也。”②师古曰：“几，近也，音钜依反。”③师古曰：“晏，晚也。”④师古曰：“苜，古黎字。”

后六十余载之间，遭王莽篡位，始开边隙，单于由是归怨自绝，莽遂斩其侍子，边境之祸构矣。故呼韩邪始朝于汉，汉议其仪，而萧望之曰：“戎狄荒服，言其来服荒忽无常，时至时去，宜待以客礼，让而不臣。如其后嗣遁逃窜伏^①，使于中国不为叛臣。”及孝元时，议罢守塞之备，侯应以为不可，可谓盛不忘衰，安必思危，远见识微之明矣。至单于咸弃其爱子，昧利不顾^②，侵掠所获，岁巨万计，而和亲赂遗，不过千金，安在其不弃质而失重利也？仲舒之言，漏于是矣。

注：①师古曰：“遂，古遁字。”②师古曰：“昧，贪也，音妹。”

夫规事建议，不图万世之固，而媮恃一时之事者，未(必)[可]以经远也^①。若乃征伐之功，秦汉行事，严尤论之当矣。故先王度土，中立封畿^②，分九州，列五服^③，物土贡，制外内^④，或修刑政，或昭文德，远近之势异也。是以春秋内诸夏而外夷狄^⑤。夷狄之人贪而好利，被发左衽，人面兽心。其与中国殊章服，异习俗，饮食不同，言语不通，辟居北垂寒露之野^⑥，逐草随畜，射猎为生，隔以山谷，雍以沙幕^⑦，天地所以绝外内也。是故圣王禽兽畜之，不与约誓，不就攻伐；约之则费赂而见欺，攻之则劳师而诏寇。其地不可耕而食也，其民不可臣而畜也，是以外而不内，疏而不戚^⑧，

政教不及其人，正朔不加其国；来则惩而御之，去则备而守之^⑨。其慕义而贡献，则接之以礼让，羈靡不绝，使曲在彼，盖圣王制御蛮夷之常道也。

注：①师古曰：“媮音偷同。”②师古曰：“度音大各反。中音竹仲反。”③师古曰：“九州、五服，解并在前。”④师古曰：“物土贡者，各因其土所生之物而贡之也。制外内，谓五服之差，远近异制。”⑤师古曰：“《春秋》成十五年‘诸侯会吴于钟离’。公羊传曰：‘曷为殊会？吴外也。曷为外？《春秋》内中国而外诸夏，内诸夏而外夷狄也。’”⑥师古曰：“辟读曰僻。”⑦师古曰：“雍读曰壅。”⑧师古曰：“戚，近也。”⑨师古曰：“惩谓使其创义。”

《后汉书·西羌传》

西羌之本，出自三苗，姜姓之别也。其国近南岳^①。及舜流四凶，徙之三危^②，河关之西南羌地是也^③。滨于赐支，至乎河首，绵地千里。赐支者，《禹贡》所谓析支者也。南接蜀、汉徼外蛮夷，西北[接]鄯善、车师诸国。所居无常，依随水草。地少五谷，以产牧为业。其俗氏族无定，或以父名母姓为种号。十二世后，相与婚姻，父没则妻后母，兄亡则纳螯嫂^④，故国无鳏寡，种类繁炽。不立君臣，无相长一，强则分种为酋豪，弱则为人附落，更相抄暴，以力为雄。杀人偿死，无它禁令。其兵长在山谷，短于平地，不能持久，而果于触突，以战死为吉利，病终为不祥。堪耐寒苦，同之禽兽。虽妇人产子，亦不避风雪。性坚刚勇猛，得西方金行之气焉^⑤。

注：①衡山也。②三危，山，在今沙州敦煌县东南，山有三峰，故曰三危也。③河关，县，属金城郡。已上并《续汉书》文。④寡妇曰螯，力之反。⑤《黄帝素问》曰：“西方者，金(玉)[王]之城，沙石之处，其人山居而多风，水土刚强。”

王政修则宾服，德教失则寇乱。昔夏后氏太康失国^①，西夷背叛。及后相即位，乃征吠夷^②，七年然后来宾。至于后泄，始加爵命，由是服从^③。后桀之乱，吠夷人居邠岐之间^④，成汤既兴，伐而攘之。及殷室中衰，诸夷皆叛。至于武丁，征西戎、鬼方，三年乃克^⑤。故其诗曰：“自彼氏羌，莫敢不来王^⑥。”

注：①太康，夏启之子，盘于游田，不恤人事，为羿所逐，不得反国也。②后相即太康孙，仲康之子。③泄，启八代孙，帝芒之子也。④邠，今幽州也。岐即岐州也。⑤武丁，殷王也。易曰：“高宗伐鬼方。”《前书音义》曰：“鬼方，远方也。”⑥《殷颂》之文。

及武乙暴虐，犬戎寇边^①，周古公逾梁山而避于岐下^②。及子季历，遂

伐西落鬼戎^③。太丁之时，季历复伐燕京之戎，戎人大败周师^④。后二年，周人克余无之戎，于是太丁命季历为牧师^⑤。自是之后，更伐始呼、翳徒之戎，皆克之^⑥。乃文王为西伯，西有昆夷之患，北有玃狁之难，遂攘戎狄而戍之，莫不宾服^⑦。乃率西戎，征殷之叛国以事纣^⑧。

注：①帝武乙即武丁(五)[三]代孙。无道，为偶人像，谓之天神，与之博，令人代之行，天神不胜，而僇辱之。又为革囊盛血，仰而射之，命曰：“射天。”遂被雷震而死。②梁山在今雍州好畤县西北。古公，文王之祖也。岐山在扶风郡也。③《竹书纪年》“武乙三十五年，周王季伐西落鬼戎，俘二十翟王”也。④太丁，武(丁)[乙]子也。《竹书纪年》曰：“太丁二年，周人伐燕京之戎，周师大败”也。⑤季历，文王之父也，《竹书纪年》曰：“太丁四年，周人伐余无之戎，克之，周王季命为殷牧师也。”⑥《竹书纪年》曰“太丁七年，周人伐始呼之戎，克之。十一年，周人伐翳徒之戎，捷其三大夫”也。⑦见《诗》《小雅采薇》篇。⑧《左传》晋韩献子曰：“文王率殷之叛国以事纣，惟知时。”

及武王伐商，羌、髳率师会于牧野^①。至穆王时，戎狄不贡，王乃西征犬戎，获其五王，又得四白鹿，四白狼^②，王遂迁戎于太原。夷王衰弱^③，荒服不朝，乃命虢公率六师伐太原之戎，至于俞泉，获马千匹^④。厉王无道，戎狄寇掠，乃入犬丘，杀秦仲之族^⑤。王命伐戎，不克。及宣王立四年，使秦仲伐戎，为戎所杀。王乃召秦仲子庄公，与兵七千人伐戎破之，由是少却。后二十七年，王遣兵伐太原戎，不克。后五年，王伐条戎、奔戎，王师败绩。后二年，晋人败北戎于汾隰^⑥，戎人灭姜侯之邑。明年，王征申戎，破之。后十年，幽王命伯士伐六济之戎，军败，伯士死焉^⑦。其年，戎围犬丘，虜秦襄公之兄伯父。时幽王昏虐，四夷交侵，遂废申后而立褒姒。申侯怒，与戎寇周，杀幽王于郟山，周乃东迁洛邑，秦襄公攻戎救周。后二年，邢侯大破北戎。

注：①《尚书》曰：“庸、蜀、羌、髳、微、卢、彭、濮人。”孔安国注曰：“皆蛮夷戎狄也。”②见《史记》。③夷王，穆王孙，名燮也。④见《竹书纪年》。⑤犬丘，县名，秦曰废丘，汉曰槐里也。⑥二水名。⑦并见《竹书纪年》。

及平王之末，周遂凌迟，戎逼诸夏，自陇山以东，及乎伊、洛，往往有戎。于是渭首有狄、邽、冀之戎^①，泾北有义渠之戎^②，洛川有大荔之戎^③，渭南有骊戎，伊、洛间有杨拒、泉皋之戎^④，颍首以西有蛮氏之戎^⑤。当春秋时，间在中国，与诸夏盟会。鲁庄公伐秦，取邽、冀之戎。后十余岁，晋灭骊戎。是时，伊、洛戎强，东侵曹、鲁^⑥。后十九年，遂入王城。于是秦、晋伐戎以救周^⑦。后二年，又寇京师，齐桓公征诸侯戎周。后九年，陆浑戎自瓜州迁于伊川^⑧，允姓戎迁于渭南^⑨，东及轘辕。在河南山北者号曰阴戎，阴戎之种遂以滋广^⑩。晋文公欲修霸业，乃赂戎狄通道，以匡王室。秦穆公得戎人由余，遂霸西戎，开地千里^⑪。及晋悼公，又使魏绛和诸戎，复修霸业^⑫。是时，楚、晋强盛，威服诸戎，陆浑、伊、洛、阴戎事晋，而蛮氏从楚。后陆浑叛晋，晋令荀吴灭之^⑬。后四十四年，楚执蛮氏而尽囚其人。是时义渠、大荔最强，筑城数十，皆自称王。

注：●狄即狄道，獬即獬道，邽即上邽县，冀即冀县也。②义渠，县，属北地郡也。③洛川即洛水。大荔，古戎国，秦获之，改曰临晋，今同州城是也。④杜预注《左传》云：“杨拒，戎邑也。”⑤《左传》曰：“单浮馀(国)[围]蛮氏。”杜预注云：“梁南有霍阳山，皆蛮子之邑。”⑥《左传》庄公十八年，公追戎于济西。杜预注，戎侵鲁，鲁人不知，去乃追之。二十四年戎侵曹也。⑦事并见《左传》僖公十(二)[一]年。⑧瓜州，今瓜州也。事见僖[公]二十二年。⑨允姓，阴戎之祖，兴三苗俱放三危。见《左传》。⑩《左传》哀公四年：“蛮子赤奔晋阴地。”杜预注曰：“阴地，河南山北，自上雒以东至陆浑。”⑪由余，其先晋人也，亡入戎。戎王闻穆公贤，使由余观秦，秦穆公以客礼待之。秦遗戎王以女乐，由余谏，不聽，由余乃降秦，为谋伐戎。⑫魏绛，晋大夫。见《左传》襄公十一年。⑬荀吴，晋大夫中行穆子也。见《左传》昭公元年。

至周贞王八年，秦厉公分灭大荔，取其地。赵亦灭代戎，即北戎也。韩、魏复共稍并伊、洛、阴戎，灭之。其遗脱者皆逃走，西逾汧、陇^①。自是中国无戎寇，唯余义渠种焉。至贞王二十五年，秦伐义渠，虏其王^②。后十四年，义渠侵秦至渭南。后百许年，义渠败秦师于洛。后四年，义渠国乱，

秦惠王遣庶长操将兵定之^③，义渠遂臣于秦。后八年，秦伐义渠，取郁郅^④。后二年，义渠败秦师于李伯^⑤。明年，秦伐义渠，取徒泾二十五城^⑥。及昭王立，义渠王朝秦，遂与昭王母宣太后通，生二子。至王赧四十三年，宣太后诱杀义渠王于甘泉宫，因起兵灭之，始置陇西、北地、上郡焉。

注：①沂山、陇山之开也，在今陇州沂源县。②即厉公二十三年伐也。③操，名也。庶长，秦爵也。事见《史记》。④县名，属北地郡。⑤李伯，地名，未详。⑥徒泾，县名，属西河郡。

戎本无君长，夏后氏末及商周之际，或从侯伯征伐有功，天子爵之，以为藩服。春秋时，陆浑、蛮氏戎称子。战国世，大荔、义渠称王。及其衰亡，余种皆反旧为酋豪云。

羌无弋爰剑者，秦厉公时为秦所拘执，以为奴隶。不知爰剑何戎之别也。后得亡归，而秦人追之急，藏于岩穴中得免。羌人云爰剑初藏穴中，秦人焚之，有景象如虎，为其蔽火，得以不死。既出，又与劓女遇于野^①，遂成夫妇。女耻其状，被发覆面，羌人因以为俗，遂俱亡入三河间^②。诸羌见爰剑被焚不死，怪其神，共畏事之，推以为豪，河湟间少五谷，多禽兽，以射猎为事^③，爰剑教之田畜，遂见敬信，庐落种人依之者日益众。羌人谓奴为无弋，以爰剑尝为奴隶，故因名之。其后世世为豪。

注：①劓，截鼻也。②《续汉书》曰：“遂俱亡入河湟间。”今此言三河，即黄河、赐支河、湟河也。③湟水出金城郡临羌县。

至爰剑曾孙忍时，秦献公初立，欲复穆公之迹^①，兵临渭首，灭狄戎^②。忍季父印畏秦之威，将其种人附落而南，出赐支河曲西数千里，与众羌绝远，不复交通。其后子孙分别，各自为种，任随所之。或为牦牛种，越嶲羌是也；或为白马种，广汉羌是也；或为参狼种，武都羌是也。忍及弟舞独留湟中，并多娶妻妇。忍生九子为九种，舞生十七子为十七种，羌之兴盛，从此起矣。

注：①穆公霸有西戎，公今欲复之。②獠音丸。

及忍子研立，时秦孝公雄强，威服羌戎。孝公使太子驷率戎狄九十二国朝周显王。研至豪健，故羌中号其后为研种。及秦始皇时，务并六

国，以诸侯为事，兵不西行，故种人得以繁息。秦既兼天下，使蒙恬将兵略地，西逐诸戎，北却众狄，筑长城以界之，众羌不服南度。

至于汉兴，匈奴冒顿兵强，破东胡，走月氏，威震百蛮，臣服诸羌。景帝时，研种留何率种人求守陇西塞，于是徙留何等于狄道、安故，至临洮、氐道、羌道县^①。及武帝征伐四夷，开地广境，北却匈奴，西逐诸羌，乃渡河、湟，筑令居塞^②；初开河西，列置四郡^③，通道玉门，隔绝羌胡，使南北不得交关。于是障塞亭燧出长城外数千里。时先零羌与封养牢姐种解仇结盟^④，与匈奴通，合兵十余万，共攻令居、安故，遂围枹罕^⑤。汉遣将军李息、郎中令徐自为将兵十万人击平之。始置护羌校尉，持节统领焉。羌乃去湟中，依西海、盐池左右^⑥。汉遂因山为塞，河西地空，稍徙人以实之。

注：①氐音丁兮反。五县并属陇西郡。②令居，县，属金城郡。令音零。③酒泉、武威、张掖、敦煌也。④姐音紫。⑤安故，县，属陇西郡。枹罕，县，属金城郡。枹音铁。⑥金城郡临羌县有盐池也。

至宣帝时，遣光禄大夫义渠安国^①觐行诸羌，其先零种豪言：“愿得度湟水，逐人所不田处以为畜牧。”安国以事奏闻，后将军赵充国以为不可听。后因缘前言，遂度湟水，郡县不能禁。至元康三年，先零乃与诸羌大共盟誓，将欲寇边。帝闻，复使安国将兵观之。安国至，召先零豪四十余人斩之，因放兵击其种，斩首千余级。于是诸羌怨怒，遂寇金城。乃遣赵充国与诸将将兵六万人击破平之。至研十三世孙烧当立。元帝时，乡姐等七种羌寇陇西^②，遣右将军冯奉世击破降之。从爰剑种五世至研，研最豪健，自后以研为种号。十三世至烧当，复豪健，其子孙更以烧当为种号。自乡姐羌降之后数十年，四夷宾服，边塞无事。至王莽辅政，欲耀威德，以怀远为名，乃令译讽旨诸羌，使共献西海之地，初开以为郡，筑五县，边海亭燧相望焉^③。

注：①义渠，姓也。②乡音先廉反，有所廉反。姐音紫。③燧，烽也。

滇良者，烧当之玄孙也。时王莽末，四夷内侵，及莽败，众羌遂还据[西海]为寇。更始、赤眉之际，羌遂放纵，寇金城、陇西。隗嚣虽拥兵而不能讨之，乃就慰纳，因发其众与汉相拒。建武九年，隗嚣死，司徒掾班彪

上言：“今凉州部皆有降羌，羌胡被发左衽，而与汉人杂处，习俗既异，言语不通。数为小吏黠人所见侵夺，穷恚无聊，故致反叛。夫蛮夷寇乱，皆为此也。旧制：益州部署蛮夷骑都尉，幽州部署领乌桓校尉，凉州部署护羌校尉，皆持节领护，理其怨结，岁时循行，问所疾苦。又数遣使驿通动静，使塞外羌夷为吏耳目，州郡因此可得儆备。今宜复如旧，以明威防。”光武从之，即以牛邯为护羌校尉，持节如旧。及邯卒而职省。十年，先零豪与诸种相结，复寇金城、陇西，遣中郎将来歙等击之，大破。十一年夏，先零种复寇临洮，陇西太守马援破降之。后悉归服，徙置天水、陇西、扶风三郡。明年，武都参狼羌反，援又破降之。

自烧当至滇良，世居河北大允谷，种小人贫。而先零、卑湍并皆强富，数侵犯之。滇良父子积见陵易，愤怒，而素有恩信于种中，于是集会附落及诸杂种，乃从大榆入，掩击先零、卑湍，大破之，杀三千人，掠取财畜，夺居其地大榆中，由是始强。

滇良子滇吾立。中元元年，武都参狼羌反，杀掠吏人，太守与战不胜，陇西太守刘盱遣从事辛都、监军掾李苞，将五千人赴武都，与羌战，斩其酋豪，首虏千余人。时武都兵亦更破之，斩首千余级，余悉降。时滇吾附落转盛，常雄诸羌，每欲侵边者，滇吾转教以方略，为其渠帅。二年秋，烧当羌滇吾与弟滇岸率步骑五千寇陇西塞，刘盱遣兵于枹罕击之，不能克，又战于允街^①，为羌所败，杀五百余人。于是守塞诸羌皆复相率为寇。遣谒者张鸿领诸郡兵击之，战于允吾、唐谷^②，军败，鸿及陇西长史田颯皆没。又天水兵为牢姐种所败于白石，死者千余人^③。

注：①允音钽。街音阶。县名，属金城郡。②允音钽。吾音牙。县名，属金城郡。唐谷故城在今鄯州湟水县西也。③白石，县名，属金城郡，有白石山。

时烧何豪有妇人比铜钳者，年百余岁，多智算，为种人所信向，皆从取计策。时为卢水胡所击，比铜钳乃将其众来依郡县。种人颇有犯法者，临羌长收系比铜钳，而诛杀其种六七百人。显宗怜之，乃下诏曰：“昔桓公伐戎而无仁惠。故《春秋》贬曰‘齐人’^①。今国家无德，恩不及远，羸弱

何辜，而当并命！夫长平之暴，非帝者之功^②，咎由太守长吏妄加残戮。比铜钳尚生者，所在致医药养视，令招其种人，若欲归故地者，厚遣送之。其小种若束手自诣，欲效功者，皆除其罪。若有逆谋为吏所捕，而狱状未断，悉以赐有功者。”

注：①《秦秋》庄公三十年：“齐人伐山戎。”《公羊传》曰：“此齐侯也。其称人何？贬也。”何休注云：“或亦天地之所生，乃迫杀之，恶不仁也。”②言帝王好生恶杀，故不以为功也。《史记》曰，白起，昭王时为上将军，击赵，赵不利，将军赵括与六十万人请降，起乃尽坑之，遗其小者二百四十人。

永平元年，复遣中郎将窦固、捕虏将军马武等击滇吾于西邯，大破之。滇吾远引去，余悉散降，徙七千口置三辅。以谒者窦林领护羌校尉，居狄道。林为诸羌所信，而滇岸遂诣林降。林为下吏所欺，谬奏上滇岸以为大豪，承制封为归义侯，加号汉大都尉。明年，滇吾复降，林复奏其第一豪，与俱诣阙献见。帝怪一种两豪，疑其非实，以事诘林。林辞窘^①，乃伪对曰：“滇岸即滇吾，陇西语不正耳。”帝穷验知之，怒而免林官。会凉州刺史又奏林臧罪，遂下狱死。谒者郭襄代领校尉事，到陇西，闻凉州羌盛，还诣阙，抵罪，于是复省校尉官。滇吾子东吾立，以父降汉，乃入居塞内，谨愿自守。而诸弟迷吾等数为寇盗。

肃宗建初元年，安夷县吏略妻卑湍种羌妇，吏为其夫所杀，安夷长宗延迫之出塞，^①种人恐见诛，遂共杀延，而与勒姐及吾良二种相结为寇。陇西太守孙纯遣从事李睦及金城兵会和罗谷，与卑湍等战，斩首虏数百人。复拜故度辽将军吴棠领护羌校尉，居安夷。二年夏，迷吾遂与诸众聚兵，欲叛出塞。金城太守郝崇追之，战于荔谷，崇兵大败，崇轻骑得脱，死者二千余人。于是诸种及属国卢水胡悉与相应，吴棠不能制，坐征免。武威太守傅育代为校尉，移居临羌。迷吾又与封养种豪布桥等五万余人共寇陇西、汉阳，于是遣行车骑将军马防，长外校尉耿恭副，讨破之。于是临洮、索西、迷吾等悉降。防乃筑索西城^②，徙陇西南部都尉戍之，悉复诸亭候。至元和三年，迷吾复与弟号吾诸杂种反叛。秋，号吾先

轻人寇陇西界，郡督烽掾李章追之，生得号吾。将诣郡，号吾曰：“独杀我，无损于羌。诚得生归，必悉罢兵，不复犯塞。”陇西太守张紆权宜放遣，羌即为解散，各归故地。迷吾退居河北归义城。傅育不欲失信伐之，乃募人斗诸羌胡，羌胡不肯，遂复叛出塞，更依迷吾。

注：①安夷，县名，属金城郡。②故城在今洮州。

章和元年，育上请发陇西、张掖、酒泉各五千人，诸郡太守将之，育自领汉阳、金城五千人，合二万兵，与诸郡克期击之，令陇西兵据河南，张掖、酒泉兵遮其西。并未及会，育军独进。迷吾闻之，徙庐落去，育选精骑三千穷追之，夜至建威南三兜谷，去虏数里，须旦击之，不设备。迷吾乃伏兵三百人，夜突育营。营中惊坏散走，育下马手战，杀十余人而死，死者八百八十人。及诸郡兵到，羌遂引去。育，北地人也。显宗初，为临羌长，与捕虏将军马武等击羌滇吾，功冠诸军；及在武威，威声闻于匈奴。食禄数十年，秩奉尽贍给知友，妻子不免操井臼。肃宗下诏追褒美之。封其子毅为明进侯，七百户。以陇西太守张紆代为校尉，将万人屯临羌。

迷吾既杀傅育，狃怙[怙]边利^①。章和元年，复与诸种步骑七千人入金城塞。张紆遣从事司马防将千余骑及金城兵会战于木乘谷，迷吾兵败走，因译使欲降，紆纳之。遂将种人诣临羌县，紆设兵大会，施毒酒中，羌饮醉，紆因自击，伏兵起，诛杀酋豪八百余人。斩迷吾等五人头，以祭育冢。复放兵击在山谷间者，斩首四百余人，得生口二千余人。迷吾子迷唐及其种人向塞号哭，与烧何、当煎、当阆等相结，以子女及金银娉纳诸种，解仇交质，将五千人寇陇西塞，太守寇盱与战于白石，迷唐不利，引还大、小榆谷，北招属国诸胡，会集附落，种众炽盛，张紆不能讨。永元元年，紆坐征，以张掖太守邓训代为校尉，稍以赏赂离间之，由是诸种少解。东吾子东号立。是时，号吾将其种人降。校尉邓训遣兵击迷唐，迷唐去大、小榆谷，徙居颇岩谷。和帝永元四年，训病卒，蜀郡太守聂尚代为校尉。尚见前人累征不克，欲以文德服之，乃遣驿使招呼迷唐，使还居大、小榆谷。迷唐既还，遣祖母卑缺诣尚，尚自送至塞下，为设祖道，令译田汜等五人护送至庐落。迷唐因而反叛，遂与诸种共生屠裂汜等，以血盟诅，复寇金

城塞。五年，尚坐征免，居延都尉贯友代为校尉。友以迷唐难用德怀，终于叛乱，乃遣驿使构离诸种，诱以财货，由是解散。友乃遣兵出塞，攻迷唐于大、小榆谷，获首虏八百余人，收麦数万斛，遂夹逢留大河筑城坞，作大航，造河桥，欲度兵击迷唐。迷唐乃率部落远依赐支河曲。至八年，友病卒，汉阳太守史充代为校尉。充至，遂发湟中羌胡出塞击迷唐，而羌迎败充兵，杀数百人。明年，充坐征，代郡太守吴祉代为校尉。其秋，迷唐率八千人寇陇西，杀数百人，乘胜深入，胁塞内诸种羌共为寇盗，众羌复悉与相应，合步骑三万人，击破陇西兵，杀大夏长^②。遣行征西将军刘尚、越骑校尉赵代副，将北军五营、黎阳、雍营、三辅积射及边兵羌胡三万人讨之^③。尚屯狄道，代屯枹罕。尚遣司马寇盱监诸郡兵，四面并会。迷唐惧，弃老弱，奔入临洮南。尚等追至高山。迷唐穷迫，率其精强大战。盱斩虏千余人，得牛马羊万余头。迷唐引去。汉兵死伤亦多，不能复追，乃还入塞。明年，尚、代并坐畏懦征下狱，免。谒者王信领尚营屯枹罕，谒者耿谭领代营屯白石。谭乃设购赏，诸种颇来内附。迷唐恐，乃请降。信、谭遂受降罢兵，遣迷唐诣阙。其余种人不满二千，饥窘不立，入居金城。和帝令迷唐将其种人还大、小榆谷。迷唐以为汉作河桥，兵来无常，故地不可复居，辞以种人饥饿，不肯远出。吴祉等乃多赐迷唐金、帛，令杂谷市畜，促使出塞，种人更怀猜惊。十二年，遂复背叛，乃胁将湟中诸胡，寇抄而去。王信、耿谭、吴祉皆坐征，以酒泉太守周鲂代为校尉。明年，迷唐复还赐支河曲。

注：①狃(状)[怙]，惯习也。狃音女九反。(状)[怙]音时制反。②大夏，县名，属陇西郡。③五营即五校也。雍营即扶风都尉屯也。黎阳营解见南匈奴传也。

初，累姐种附汉，迷唐怨之，遂击杀其酋豪，由是与诸种为仇，党援益疏。其秋，迷唐复将兵向塞，周鲂与金城太守侯霸，及诸郡兵、属国湟中月氏诸胡、陇西牢姐羌，合三万人，出塞至允川，与迷唐战。周鲂还营自守，唯侯霸兵陷阵，斩首四百余级。羌众折伤，种人瓦解，降者六千余口，分徙汉阳、安定、陇西。迷唐遂弱，其种众不满千人，远逾赐支河首，

依发羌居。明年，周鲠坐畏懦征，侯霸代为校尉。安定降羌烧何种胁诸羌数百人反叛，郡兵击灭之，悉没入弱口为奴婢。

时西海及大、小榆谷左右无复羌寇。隃麋相曹凤上言^①：“西戎为害，世所患，臣不能纪古，且以近事言之。自建武以来，其犯法者，常从烧当种起。所以然者，以其居大、小榆谷，土地肥美，又近塞内，诸种易以为非，难以攻伐。南得钟存以广其众，北阻大河因以为固，又有西海鱼盐之利，缘山滨水，以广田蓄，故能强大，常雄诸种，恃其权勇，招诱羌胡。今者衰困，党援坏沮，亲属离叛，余胜兵者不过数百，亡逃栖窜，远依发羌。臣愚以为宜及此时，建复西海郡县，规固二榆，广设屯田，隔塞羌胡交关之路，遏绝狂狡窥欲之源。又殖谷富边，省委输之役，国家可以无西方之忧。”于是拜凤为金城西部都尉，将徙土屯龙耆^②。后金城长史上官鸿上开置归义、建威屯田二十七部，侯霸复上置东西邯屯田五部^③，增留、逢二部，帝皆从之。列屯夹河，合三十四部。其功垂立。至永初中，诸羌叛。乃罢。迷唐失众，病死。有一子来隆，户不满数十。

注：①隃麋，县名，属右扶风。②龙耆即龙支也，今鄯州县。③邯，水名。邯分流左右，在今廓州。

东号子麻奴立。初随父降，居安定。时诸降羌布在郡县，皆为吏人豪右所徭役，积以愁怨。安帝永初元年夏，遣骑都尉王弘发金城、陇西、汉阳羌数百千骑征西域，弘迫促发遣，群羌惧远屯不还，行到酒泉，多有散叛。诸郡各发兵饶遮，或覆其庐落。于是勒姐、当煎大豪东岸等愈惊，遂同时奔溃。麻奴兄弟因此遂与种人俱西出塞。

先零别种滇零与钟羌诸种大为寇掠，断陇道。时羌归附既久，无复器甲，或持竹竿木枝以代戈矛，或负板案以为楯，或执铜镜以象兵，郡县畏懦不能制。冬，遣车骑将军邓鹭，征西校尉任尚副，将五营及三河、三辅、汝南、南阳、颍川、太原、上党兵合五万人，屯汉阳。明年春，诸郡兵未及至，钟羌数千人先击败鹭军于冀西，杀千余人。校尉侯霸坐众羌反叛征免，以西域都护段禧代为校尉。其冬，鹭使任尚及从事中郎司马钧率诸郡兵与滇零等数万人战于平襄^④，尚军大败，死者八千余人。于是滇零

等自称“天子”于北地，招集武都、参狼、上郡、西河诸杂种，众遂大盛，东犯赵、魏，南入益州，杀汉中太守董炳，遂寇抄三辅，断陇道。湟中诸县，粟石万钱，百姓死亡，不可胜数。朝廷不能制，而转运难剧，遂诏骛还师，留任尚屯汉阳，为诸军节度。朝廷以邓太后故，迎拜骛为大将军，封任尚乐亭侯，食邑三百户。三年春，复遣骑都尉任仁督诸郡屯兵救三辅。仁战每不利，众羌乘胜，汉兵数挫。当煎、勒姐种攻没破羌县，钟羌又没临洮县，生得陇西南部都尉。明年春，滇零遣人寇褒中^②，燔烧邮亭，大掠百姓。于是汉中太守郑勤移屯褒中。军营久出无功，有废农桑，乃诏任尚将吏兵还屯长安，罢遣南阳、颍川、汝南吏士，置京兆虎牙都尉于长安，扶风都尉于雍，如西京三辅都尉故事^③。时羌复攻褒中，郑勤欲击之。主簿段崇谏，以为虏乘胜，锋不可当，宜坚守待之。勤不从，出战，大败，死者三千余人，段崇及门下史王宗、原展以身捍刃，与勤俱死，于是徙金城郡居襄武^④。任仁战累败，而兵士放纵，槛车征诣廷尉诏狱死。段禧病卒，复以前校尉侯霸代之，遂移居张掖。五年春，任尚坐无功征免。羌遂入寇河东，至河内，百姓相惊，多奔南渡河。使北军中候朱宠将五营士屯孟津，诏魏郡、赵国、常山、中山缮作坞侯六百一十六所。

注：①县名，属汉阳郡。②县名，属汉中郡。③西京左辅都尉都高陵，右辅都尉都都也。④襄武，县名，属陇西郡。

羌既转盛，而二千石、令、长多内郡人，并无守战意，皆争上徙郡县，以避寇难。朝廷从之，遂移陇西徙襄武^①，安定徙美阳^②，北地徙池阳^③，上郡徙衙^④。百姓恋土，不乐去旧，遂乃刈其禾稼，发彻室屋，夷营壁，破积聚。时连旱蝗饥荒，而驱蹙劫略，流离分散，随道死亡，或弃捐老弱，或为人仆妾，丧其太半。复以任尚为侍御史，击众羌于上党羊头山，破之^⑤，诱杀降者二百余人，乃罢孟津屯。其秋，汉阳人杜琦及弟季贡、同郡王信等与羌通谋，聚众人上邽城，琦自称安汉将军。于是诏购募得琦首者，封列侯，赐钱百万，羌胡斩琦者赐金百斤，银二百斤。汉阳太守赵博遣刺客杜习刺杀琦，封习讨奸侯，赐钱百万。而杜季贡、王信等将其众据橐泉营。侍御史唐喜领诸郡兵讨破之，斩王信等六百余人，没入妻子五百余人，

收金[钱银]彩帛一亿以上。杜[季]贡亡从滇零。六年,任尚复坐征免。滇零死,子零昌代立,年尚幼少,同种狼莫为其计策,以杜[季]贡为将军,别居于奚城。七年夏,骑都尉马贤与侯霸掩击零昌别部牢羌于安定,首虏千人,得驴骡骆驼马牛羊二万余头,以畀得者^⑥。

注:①县名,属陇西郡。②县名,属右扶风。③县名,属左冯翊。④县名,属冯翊。衙音牙。⑤羊头山在上党郡穀远县。⑥畀音必四反。

元初元年春,遣兵屯河内,通谷冲要三十三所,皆为坞壁,设鸣鼓。零昌遣兵寇雍城,又号多与当煎、勒姐大豪共胁诸种,分兵抄掠武都、汉中。巴郡板楯蛮将兵救之,汉中五官掾程信率壮士与蛮共击破之。号多退走,还断陇道,与零昌通谋。侯霸、马贤将湟中吏人及降羌胡丁枹罕击之,斩首二百余级。凉州刺史皮杨击羌于狄道,大败,死者八百余人,杨坐征免。侯霸病卒,汉阳太守庞参代为校尉,参以恩信招诱之。二年春,号多等率众七千余人诣参降,遣诣阙,赐号多侯印绶遣之。参始还居令居,通河西道。而零昌种众复分寇益州,遣中郎将尹就将南阳兵,因发益部诸郡,屯兵击零昌党吕叔都等。至秋,蜀人陈省、罗横应募,刺杀叔都,皆封侯赐钱。又使屯骑校尉班雄屯三辅,遣左冯翊司马钧行征西将军,督右扶风仲光、安定太守杜恢、北地太守盛包、京兆虎牙都尉耿溥、右扶风都尉皇甫旗等,合八千余人,又庞参将羌胡兵七千余人,与钧分道,并北击零昌。参兵至勇士东,为杜季贡所败^①,于是引退。钧等独进,攻拔丁奚城,大克获。杜季贡率众伪逃。钧令光、恢、包等收羌禾稼,光[等]违钧节度,散兵深入,羌乃设伏要击之。钧在城中,怒而不救,光等并没,死者三千余人。钧乃遁还,坐征自杀。庞参以失期军败抵罪,以马贤代领校尉事。后遣任尚为中郎将,将羽林、缇骑、五营子弟三千五百人,代班雄屯三辅。尚临行,怀令虞诩说尚曰:“使君频奉国命,讨逐寇贼,三州屯兵二十余万人,弃农桑,疲苦徭役,而未有功效,劳费日滋。若此出不克,诚为使君危之。”尚曰:“忧惶久矣,不知所如。”诩曰:“兵法弱不攻强,走不逐飞,自然之势也。今虏皆马骑,日行数百,来如风雨,去如绝弦。以步追之,势不相及,所以旷而无功也。为使君计者,莫如罢诸郡兵,各令出钱

数千，二十人共市一马，如此，可舍甲冑，驰轻兵，以万骑之众，逐数千之虏，追尾掩截^②，其道自穷。便人利事，大功立矣。”尚大喜，即上言用其计。乃遣轻骑钞击杜季贡于丁奚城，斩首四百余级，获牛马羊数千头。明年夏，度辽将军邓遵，率南单于及左鹿蠡王须沈万骑，击零昌于灵州^③，斩首八百余级。封须沈为破虏侯，金印紫绶，赐金、帛各有差。任尚遣兵击破先零羌于丁奚城。秋，筑冯翊北界候坞五百所。任尚又遣假司马募陷陈士，击零昌于北地，杀其妻子，得牛马羊二万头，烧其庐落，斩首七百余级，得僭号文书及所没诸将印绶。四年春，尚遣当阬种羌榆鬼等五人刺杀杜季贡，封榆鬼为破羌侯。其夏，尹就以不能定益州，坐征抵罪。以益州刺史张乔领尹就军屯，招诱叛羌，稍稍降散。秋，任尚复募效功种号封刺杀零昌，封号封为羌王。冬，任尚将诸郡兵与马贤并进北地击狼莫，贤先至安定青石岸，狼莫逆击，败之。会尚兵到高平^④，因合势俱进。狼莫等引退，乃转营迫之。至北地，相持六十余日，战于富平[上]河上，大破之^⑤，斩首五千级，还得所略人男女千余人，牛马驴羊骆驼十余万头。狼莫逃走，于是西河虔人种羌万一千口诣邓遵降。

注：①勇士，县名，属天水郡。②尾犹寻也。③县名，属北地郡。④县名，属安定郡。⑤富平，县属北地郡。

五年，邓遵募上郡全无种羌雕何等刺杀狼莫，赐雕何为羌侯，封遵武阳侯，三千户。遵以太后从弟故，爵封优大。任尚与遵争功，又诈增首级，受赇枉法，臧千万已上，槛车征弃市，没入田庐奴婢财物。自零昌、狼莫死后，诸羌瓦解，三辅、益州无复寇傲。

自羌叛十年间，兵连师老，不暂宁息。军旅之费，转运委输，用二百四十余亿，府帑空竭。延及内郡，边民死者不可胜数，并凉二州遂至虚耗。

六年春，勒姐种与陇西种羌号良等通谋欲反，马贤逆击之于安故，斩号良及种人数百级，皆降散。

永宁元年春，上郡沈氏种羌五千余人复寇张掖。其夏，马贤将万人击之。初战失利，死者数百人。明日复战，破之，斩首千八百级，获生口千

余人，马牛羊以万数，余虏悉降。时当煎种大蒙饥[五]等，以贤兵在张掖，乃乘虚寇金城。贤还军追之出塞，斩首数千级而还。烧当、烧何种闻贤军还，率三千余人复寇张掖，杀长吏。初，饥五同种大豪卢忽、忍良等千余户别留允街，而首施两端^①。建光元年春，马贤率兵召卢忽斩之，因放兵击其种人，首虏二千余人，掠马牛羊十万头，忍良等皆亡出塞。玺书封贤安亭侯，食邑千户。忍良等以麻奴兄弟本烧当世嫡。而贤抚恤不至，常有怨心。秋，遂相结共胁将诸种步骑三千人寇湟中，攻金城诸县。贤将先零种赴击之，战于牧苑，兵败，死者四百余人。麻奴等又败武威、张掖郡兵于令居，因胁将先零、沈氏诸种四千余户，缘山西走，寇武威。贤追到鸾鸟，招引之^②。诸种降者数千，麻奴南还湟中。延光元年春，贤追到湟中，麻奴出塞渡河。贤复追击战破之，种众散遁，诣凉州刺史宗汉降。麻奴等孤弱饥困，其年冬，将种众三千余户诣汉阳太守耿种降。安帝假金印紫绶，赐金银彩缯各有差。是岁，度人种羌与上郡胡反，攻谷罗城。度辽将军耿夔将诸郡兵及乌桓骑赴击破之。三年秋，陇西郡始还狄道焉。麻奴弟犀苦立。

注：①首施犹首鼠也。②鸾鸟，县名，属武威郡，(鸾)[鸟]音爵。

顺帝永建元年，陇西钟羌反。校尉马贤将七千余人击之，战于临洮，斩首千余级，皆率种人降。进封贤都乡侯，自是凉州无事。

至四年，尚书仆射虞诩上疏曰：“臣闻子孙以奉祖为孝，君上以安民为明，此高宗、周宣所以上配汤、武也。《禹贡》雍州之域，厥田惟上。且沃野千里，谷稼殷积，又有龟兹盐池以为民利^①。水草丰美，土宜产牧，牛马衔尾，群羊塞道。北阻山河，乘厄据险。因渠以溉，水春河漕^②。用功省少，而军粮饶足。故孝武皇帝及光武筑朔方，开西河，置上郡，皆为此也。而遭元元无妄之灾，众羌内溃^③，郡县兵荒二十余年。夫弃沃壤之饶，损自然之财，不可谓利；离河山之阻，守无险之处，难以为固。今三郡未复，园陵单外^④，而公卿选懦，容头过身^⑤，张解设难，但计所费，不图其安。宜开圣德，考行所长。”书奏，帝乃复三郡。使谒者郭璜督促徙者，各归旧县，缮城郭，置候驿。既而激河浚渠为屯田，省内郡费岁一亿计。遂令安定、

北地、上郡及陇西、金城常储谷粟，令周数年。

注：①上郡龟兹县有盐官，即雍州之域也。②水舂，即水碓也。③《前书音义》曰：“无妄者，无所望也。万物无所望于天，灾异之大也。”④园陵谓长安诸陵园也。单外谓无守固。⑤《前书音义》曰：“选懦，柔怯也。”懦音而掾反。

马贤以犀苦兄弟数背叛，因系质于令居^①。其冬，贤坐征免，右扶风韩皓代为校尉。明年，犀苦诣皓自言求归故地，皓复不遣。因转湟中屯田，置两河间，以逼群羌。皓复坐征，张掖太守马续代为校尉。两河间羌以屯田近之，恐必见图，乃解仇诅盟，各自戒备。续欲先示恩信，乃上移屯田还湟中，羌意乃安。至阳嘉元年，以湟中地广，更增置屯田五部，并为十部。二年夏，夏置陇西南部都尉如旧制^②。

注：①令音零。②《前书》南部都尉都陇西郡临洮县。

三年，钟羌良封等复寇陇西、汉阳，诏拜前校尉马贤为谒者，镇抚诸种。马续遣兵击良封，斩首数百级。四年，马贤亦发陇西吏士及羌胡兵击杀良封，斩首千八百级，获马牛羊五万余头。良封亲属并诣（实）[贤]降。贤复进击钟羌且昌，且昌等率诸种十余万诣凉州刺史降。永和元年，马续迁度辽将军，复以马贤代为校尉。初，武都塞上白马羌攻破屯官，反叛连年。二年春，广汉属国都尉击破之，斩首六百级，马贤又击斩其渠帅饥指累祖等三百级，于是陇右复平。明年冬，烧当种那离等三千余骑寇金城塞，马贤将兵赴击，斩首四百级，获马千四百匹。那离等复西招羌胡，杀伤吏民。

四年，马贤将湟中义从兵及羌胡万余骑掩击那离等，斩之，获首虏千二百级，得马骡羊十万余头。征贤为弘农太守，以来机为并州刺史，刘秉为凉州刺史，并当之职。大将军梁商谓机等曰：“戎狄荒服，蛮夷要服^①，言其荒忽无常。而统领之道，亦无常法，临事制宜，略依其俗。今三君素性疾恶，欲分明白黑。孔子曰：‘人而不仁，疾之已甚，乱也^②。’况戎狄乎！其务安羌胡，防其大故，忍其小过。”机等天性虐刻，遂不能从^③。到州之日，多所扰发。

注：①荒服，在九州之外也，言其荒忽无常。要服，在九州之内，侯卫之外，言以文德要来之。②《论语》文也。郑玄注云：“不仁之人，当以风化之，疾之已甚，是又使之为乱行。”③“虐”或作“庸”。庸，薄也。

五年夏，且冻、傅难种羌等遂反叛，攻金城，与西塞及湟中杂种羌胡大寇三辅，杀害长吏。机、秉并坐征。于是发京师近郡及诸州兵讨之，拜马贤为征西将军，以骑都尉耿叔副，将左右羽林、五校士及诸州郡兵十万人屯汉阳。又于扶风、汉阳、陇道作坞壁三百所，置屯兵，以保聚百姓。且冻分遣种人寇武都，烧陇关，掠苑马。六年春，马贤将五六千骑击之。到射姑山，贤军败，贤及二子皆战歿。顺帝愍之，赐布三千匹，谷千斛，封贤孙光为舞阳亭侯，租入岁百万。遣侍御史督录征西营兵，存恤死伤。

于是东西羌遂大合。巩唐种三千余骑寇陇西，又烧园陵，掠关中，杀伤长吏。郃阳令任颢追击，战死^①。遣中郎将庞浚募勇士千五百人顿美阳，为凉州援。武威太守赵冲追击巩唐羌，斩首四百余级，得马牛羊驴万八千余头，羌二千余人降。诏冲督河西四郡兵为节度。罕种羌千余寇北地，北地太守贾福与赵冲击之，不利。秋，诸种八九千骑寇武威，凉部震恐。于是复徙安定居扶风，北地居冯翊，遣行车骑将军执金吾张乔将左右羽林、五校士及河内、南阳、汝南兵万五千屯三辅。汉安元年，以赵冲为护羌校尉。冲招怀叛羌，罕种乃率邑落五千余户诣冲降。于是罢张乔军屯。唯烧何种三千余落据参系巒北界^②。三年夏，赵冲与汉阳太守张贡掩击之，斩首千五百级，得牛羊驴十八万头。冬，冲击诸种，斩首四千余级。诏冲一子为郎。冲复追击于阿阳，斩首八百级^③。于是诸种前后三万余户诣凉州刺史降。

注：①郃阳，[今]同州县也。颢音於筠反。②参巒，县名，属安定郡。巒音力全反。③阿阳，县，属汉阳郡。

建康元年春，护羌从事马玄遂为诸羌所诱，将羌众亡出塞。领护羌校尉卫瑶追击玄等，斩首八百余级，得牛马羊二十余万头。赵冲复追叛羌到建威鹑阴河^①。军度[未]竟，所将降胡六百余人叛走，冲将数百人追之，遇羌伏兵，与战歿。冲虽身死，而前后多所斩获，羌由是衰耗。永嘉元

年，封冲子恺义阳亭侯。以汉阳太守张贡代为校尉。左冯翊梁并稍以恩信招诱之，于是离湍、狐奴等五万余户诣并降，陇右复平。并，大将军冀之宗人。封为鄠侯，邑二千户。自永和羌叛，至乎是岁，十余年间，费用八十余亿。诸将多断盗牢禀，私自润入^②，皆以珍宝货赂左右，上下放纵，不恤军事，士卒不得其死者，白骨相望于野。

注：①《续汉书》“建威”作“武威”。鹑阴，县名，属安定郡。②《前书音义》曰：“牢，价直。”

桓帝建和二年，白马羌寇广汉属国，杀长吏。是时西羌及湟中胡复畔为寇，益州刺史率板楯蛮讨破之，斩首招降二十万人。

永寿元年，校尉张贡卒，以前南阳太守第五访代为校尉，甚有威惠，西垂无事。延熹二年，访卒，以中郎将段颍代为校尉。时烧当八种寇陇右，颍击大破之。四年，零吾复与先零及上郡沈氏、牢姐诸种并力寇并、凉及三辅。会段颍坐事征，以济南相胡閔代为校尉。閔无威略，羌遂陆梁，覆没营坞，寇患转盛，中郎将皇甫规击破之。五年，沈氏诸种复寇张掖、酒泉，皇甫规招之，皆降。乌吾种复寇汉阳，陇西、金城诸郡兵共击破之，各还降附。至冬，滇那等五六千人复攻武威、张掖、酒泉，烧民庐舍。六年，陇西太守孙羌击破之，斩首溺死三千余人。胡閔疾，复以段颍为校尉。

永康元年，东羌岸尾等胁同种连寇三辅，中郎将张奂追，破斩之。当煎羌寇武威，破羌将军段颍复破灭之，余悉降散。灵帝建宁三年，烧当羌奉使贡献。中平元年，北地降羌先零种因黄巾大乱，乃与(汉)[湟]中羌、义从胡北宫伯玉等反，寇陇右。兴平元年，冯翊降羌反，寇诸县，郭汜、樊稠击破之，斩首数千级。

自爰剑后，子孙支分，凡百五十种。其九种在赐支河首以西，及在蜀、汉饶北，前史不载口数。唯参狼在武都，胜兵数千人。其五十二种衰少，不能自立，分散为附落，或绝灭无后，或引而远去。其八十九种，唯钟最强，胜兵十余万。其余大者万余人，小者数千人，更相抄盗，盛衰无常，无虑顺帝时胜兵合可二十万人^③。发羌、唐旄等绝远，未尝往来。牦牛、白马羌在蜀、汉，其种别名号，皆不可纪知也。建武十三年，广汉塞外白马

羌豪楼登等率种人五千余户内属，光武封楼登为归义君长。至和帝永元六年，蜀郡饶外大牂夷种羌豪造头等率种人五十余万口内属，拜造头为邑君长，赐印绶。至安帝永初元年，蜀郡饶外羌龙桥等六种万七千二百八十口内属。明年，蜀郡饶外羌薄申等八种三万六千九百口复举土内属。冬，广汉塞外参狼种羌二千四百口复来内属。桓帝建和二年，白马羌千余人寇广汉属国，杀长吏，益州刺史率板楯蛮讨破之。

注：①无虑犹都凡也。②釐，力易反。

湟中月氏胡，其先大月氏之别也，旧在张掖、酒泉地。月氏王为匈奴冒顿所杀，余种分散，西逾葱岭。其羸弱者南入山阻，依诸羌居止，遂与共婚姻。及骠骑将军霍去病破匈奴，取西河地，开湟中，于是月氏来降，与汉人错居。虽依附县官，而首施两端。其从汉兵战斗，随势强弱。被服饮食言语略与羌同，亦以父名母姓为种。其大种有七，胜兵合九千余人，分在湟中及令居。又数百户在张掖，号曰义从胡。中平元年，与北宫伯玉等反，杀护羌校尉冷征、金城太守陈懿，遂寇乱陇右焉。

论曰：羌戎之患，自三代尚矣。汉世方之匈奴，颇为衰寡，而中兴以后，边难渐大。朝规失绥御之和，戎师蹇然诺之信。其内属者，或倥偬之豪右之手，或屈折于奴仆之勤。塞候时清，则愤怒而思祸；桴革暂动，则属鞬以鸟惊^①。故永初之间，群种蜂起。遂解仇嫌，结盟诅，招引山豪，转相啸聚，揭木为兵，负柴为械。（穀）[穀]马扬埃，陆梁于三辅；建号称制，恣睢于北地^②。东犯赵、魏之郊，南入汉、蜀之鄙，塞湟中，断陇道，烧陵园，剽城市，伤败踵系，羽书日闻^③。并、凉之士，特冲残毙，壮悍则委身于兵场，女妇则徽纆而为虏^④，发冢露髻，死生涂炭^⑤。自西戎作逆，未有陵斥上国若斯其炽也。和熹以女君亲政，威不外接。朝议惮兵力之损，情存苟安。或以边州难援，宜见捐弃；或惧疽食浸淫，莫知所限。谋夫回遑，猛士疑虑，遂徙西河四郡之人，杂寓关右之县。发屋伐树，塞其恋土之心；燔破货积，以防顾还之思。于是诸将邓骘、任尚、马贤、皇甫规、张奂之徒，争设雄规，更奉征讨之命，征兵会众，以图其隙。驰骋东西，奔救首尾，摇动数州之境，日耗千金之资。至于假人增赋，借奉侯王，引金钱缣

彩之珍，征粮粟盐铁之积。所以赂遗购赏，转输劳来之费，前后数十巨万。或梟克酋健，摧破附落，降俘载路，牛羊满山。军书未奏其利害，而离叛之状已言矣^⑥。故得不酬失，功不半劳。暴露师徒，连年而无所胜。官人屈竭，烈士愤丧。段颎受事，专掌军任，资山西之猛性，练戎俗之恣情，穷武思尽飙锐以事之。被羽前登，身当百死之阵^⑦；蒙没冰雪，经履千折之道。始殄西种，卒定东寇。若乃陷击之所歼伤，追走之所崩籍，头颅断落于万丈之山，支革判解于重崖之上，不可校计^⑧。其能穿窬草石，自脱于锋镞者，百不一二。而张奂盛称“戎狄一气所生，不宜诛尽，流血污野，伤和致妖”。是何言之迂乎！羌虽外患，实深内疾，若攻之不根，是养疾疴于心腹也^⑨。惜哉寇敌略定矣，而汉祚亦衰焉。呜呼！昔先王疆理九土，判别畿荒，知夷貊殊性，难以道御，故斥远诉华，薄其贡职，唯与辞要而已。若二汉御戎之方，失其本矣。何则？先零侵境，赵充国迁之内地^⑩；煎当做寇，马文渊徙之三辅。贪其暂安之势，信其驯服之情，计日用之权宜，忘经世之远略，岂夫识微者之为乎？故微子垂泣于象箸^⑪，辛有浩叹于伊川也^⑫。

注：①桴，击鼓槌也。革，甲也。鞬，箭服也。《左传》晋文公曰：“右属（橐）[囊]鞬。”鞬音纪言反。②《前书》班固曰：“乃始恣睢，奋其威诈。恣睢，肆怒之貌也。睢音火季反。③羽书即檄书也。《魏武奏事》曰“边有警急，即插羽以示急”也。④《说文》曰：“徽，纠绳也。经，索也。”⑤肯音才赐反。⑥奏犹上也。⑦《前书》扬雄曰“蒙盾负羽”也。⑧颎音卢。革，皮也。⑨根谓尽其根本。⑩宣帝时，后将军赵充国系先零，还，于金城郡置属国，以处降羌。⑪《帝王纪》曰：“纣作象箸，箕子为父师，叹曰：‘象箸不施于土簋，不盛于菽藿，必须犀玉之杯，食熊蹯豹胎。’”臣贤案：史记及韩子并云“箕子”，今云“微子”，盖误。⑫《左传》曰：“周平王之东迁也，大夫辛有适伊川，见被发而祭于野者，曰：‘不及百年，此其戎乎！’”后秦迁陆浑戎于伊川。言中国之地不宜徙戎狄居之，后将为患也。

赞曰：金行气刚，播生西羌。氏豪分种，遂用殷强。虔刘陇北，假僭泾阳^①。朝劳内谋，兵惫外攘^②。

注：①泾阳，县，属安安郡。②惫，疾亟也，音白拜反。

《旧唐书·吐蕃传》

《吐蕃》(上)

吐蕃，在长安之西八千里，本汉西羌之地也。其种落莫知所出也，或云南凉秃发利鹿孤之后也。利鹿孤有子曰樊尼，及利鹿孤卒，樊尼尚幼，弟儁檀嗣位，以樊尼为安西将军。后魏神瑞元年，儁檀为西秦乞佛炽盘所灭，樊尼招集余众，以投沮渠蒙逊，蒙逊以为临松太守。及蒙逊灭，樊尼乃率众西奔，济黄河，逾积石，于羌中建国，开地千里。樊尼威惠夙著，为群羌所怀，皆抚以恩信，归之如市。遂改姓为窋勃野，以秃发为国号，语讹谓之吐蕃，其后子孙繁昌，又侵伐不息，土宇渐广。历周及隋，犹隔诸羌，未通于中国。

其国人号其王为赞普，相为大论、小论，以统理国事。无文字，刻木结绳为约。虽有官，不常厥职，临时统领。征兵用金箭，寇至举烽燧，百里一亭。用刑严峻，小罪剜眼鼻，或皮鞭鞭之，但随喜怒而无常科。囚人于地牢，深数丈，二三年方出之。宴异国宾客，必驱牝牛，令客自射牲以供饌。与其臣下一年一小盟，刑羊狗猕猴，先折其足而杀之，继裂其肠而屠之。令巫者告于天地山川日月星辰之神云：“若心迁变，怀奸反覆，神明鉴之，同于羊狗。”三年一大盟，夜于坛墀之上与众陈设肴饌，杀犬马牛驴以为牲，咒曰：“尔等咸须同心戮力，共保我家，惟天神地祇，共知尔志。有负此盟，使尔身体屠裂，同于此牲。”

其地气候大寒，不生秔稻，有青稞麦、萱豆、小麦、荞麦。畜多牝牛猪犬羊马。又有天鼠，状如雀鼠，其大如猫，皮可为裘。又多金银铜锡。其人或随畜牧而不常厥居，然颇有城郭。其国都城号为逻些城。屋皆平头，高者至数十尺。贵人处于大毡帐，名为拂庐。寝处污秽，绝不栉沐。接手饮

酒，以毡为盘，捻麸为碗，实以羹酪，并而食之。多事獯羝之神，人信巫覡。不知节候，麦熟为岁首。围棋陆博，吹蠡鸣鼓为戏，弓箭不离身。重壮贱老，母拜于子，子倨于父，出入皆少者在先，老者居其后。军令严肃，每战，前队皆死，后队方进。重兵死，恶病终。累代战没，以为甲门。临阵败北者，悬狐尾于其首，表其似狐之怯，稠人广众，必以徇焉，其俗耻之，以为次死。拜必两手据地，作狗吠之声，以身再揖而止。居父母丧，截发，青黛涂面，衣服皆黑，既葬即吉。其赞普死，以人殉葬，衣服珍玩及尝所乘马弓箭之类，皆悉埋之。仍于墓上起大室，立土堆，插杂木为祠祭之所。

贞观八年，其赞普弃宗弄赞始遣使朝贡。弄赞弱冠嗣位，性骁武，多英略，其邻国羊同及诸羌并宾伏之。太宗遣行人冯德遐往抚慰之。见德遐，大悦。闻突厥及吐谷浑皆尚公主，乃遣使随德遐入朝，多赍金宝，奉表求婚，太宗未之许。使者既返，言于弄赞曰：“初至大国，待我甚厚，许嫁公主。会吐谷浑王入朝，有相离间，由是礼薄，遂不许嫁。”弄赞遂与羊同连，发兵以击吐谷浑。吐谷浑不能支，遁于青海之上，以避其锋。其国人畜并为吐蕃所掠。于是进兵攻破党项及白兰诸羌，率其众二十余万，顿于松州西境。遣使贡金帛，云来迎公主。又谓其属曰：“若大国不嫁公主与我，即当入寇。”遂进攻松州，都督韩威轻骑觐贼，反为所败，边人大扰。太宗遣吏部尚书侯君集为当弥道行营大总管，右领军大将军执失思力为白兰道行军总管，左武卫将军牛进达为阔水道行军总管，右领军将军刘兰为洮河道行军总管，率步骑五万以击之。进达先锋自松州夜袭其营，斩千余级。弄赞大惧，引兵而退，遣使谢罪。因复请婚，太宗许之。弄赞乃遣其相禄东赞致礼，献金五千两，自余宝玩数百事。

贞观十五年，太宗以文成公主妻之，令礼部尚书、江夏郡王道宗主婚，持节送公主于吐蕃。弄赞率其部兵次柏海，亲迎于河源。见道宗，执子婿之礼甚恭。既而叹大国服饰礼仪之美，俯仰有愧沮之色。及与公主归国，谓所亲曰：“我父祖未有通婚上国者，今我得尚大唐公主，为幸实多。当为公主筑一城，以夸示后代。”遂筑城邑，立栋宇以居处焉。公主恶其人赭面，弄赞令国中权且罢之，自亦释毡裘，袭纨绮，渐慕华风。仍遣

酋豪子弟，请入国学以习《诗》《书》，又请中国识文之人典其表疏。

太宗伐辽东还，遣禄东赞来贺，奉表曰：“圣天子平定四方，日月所照之国，并为臣妾，而高丽恃远，阙于臣礼。天子自领百万，度辽致讨，隳城陷阵，指日凯旋。夷狄才闻陛下发驾，少进之间，已闻归国。雁飞迅越，不及陛下速疾。奴忝预子婿，喜百常夷。夫鹅，犹雁也，故作金鹅奉献。”其鹅黄金铸成，其高七尺，中可实酒三斛。二十二年，右卫率府长史王玄策使往西域，为中天竺所掠。吐蕃发精兵与玄策击天竺，大破之，遣使来献捷。

高宗嗣位，授弄赞为驸马都尉，封西海郡王，赐物二千段。弄赞因致书于司徒长孙无忌等云：“天子初即位，若臣下有不忠之心者，当勒兵以赴国除讨。”并献金银珠宝十五种，请置太宗灵座之前。高宗嘉之，晋封为宾王，赐杂彩三千段。因请蚕种及造酒、碾、硃、纸、墨之匠，并许焉。乃刊石像其形，列昭陵玄阙之下。

永徽元年，弄赞卒。高宗为之举哀，遣右武侯将军鲜于臣济持节赍玺书吊祭。弄赞子早死，其孙继立，复号赞普，时年幼，国事皆委禄东赞。禄东姓薛氏，虽不识文记，而性明毅严重，讲兵训师，雅有节制，吐蕃之并诸羌，雄霸本土，多其谋也。初，太宗既许降文成公主，赞普使禄东赞来迎，召见顾问，进对合旨，太宗礼之，有异诸蕃，乃拜禄东赞为右卫大将军，又以琅琊长公主外孙女段氏妻之。禄东赞辞曰：“臣本国有妇，父母所聘，情不忍乖。且赞普未谒公主，陪臣安敢辄娶。”太宗嘉之，欲抚以厚恩，虽奇其答而不遂其请。禄东赞有子五人：长曰赞悉若，早死；次钦陵，次赞婆，次悉多干，次勃论。及东赞死，钦陵兄弟复专其国。

后与吐谷浑不和，龙朔、麟德中递相表奏，各论曲直，国家依违，未为与夺。吐蕃怨怒，遂率兵以击吐谷浑。吐谷浑大败，河源王慕容诺曷钵及弘化公主脱身走投凉州，遣使告急。咸亨元年四月，诏以右威卫大将军薛仁贵为逻娑道行军大总管，左卫员外大将军阿史那道真、右卫将军郭待封为副，率众十余万以讨之。军至大非川，为吐蕃大将论钦陵所败，仁贵等并坐除名。吐谷浑全国尽没，唯慕容诺曷钵及其亲信数千帐来内

属,仍徙于灵州。自是吐蕃连岁寇边,当、悉等州诸羌尽降之。

上元三年,进寇鄯、廓等州,杀掠人吏,高宗命尚书左仆射刘仁轨往洮河军镇守以御之。仪凤三年,又命中书令李敬玄兼鄯州都督,往代仁轨于洮河镇守。仍招募关内、河东及诸州骁勇,以为猛士,不简色役。亦有尝任文武官者召入殿庭赐宴,遣往击之。又令益州长史李孝逸、嵩州都督拓王奉等发剑南、山南兵募以防御之。其年秋,敬玄与工部尚书刘审礼率兵与吐蕃战于青海。官军败积,审礼没于阵,敬玄按军不敢救。俄而收军却出,顿于承风岭,阻泥沟不能动,贼屯于高冈以压之。偏将左领军员外将军黑齿常之率敢死之士五百人,夜斫贼营,贼遂溃乱,自相蹂践,死者三百余人。敬玄遂拥众鄯州,坐改为衡州刺史。往剑南兵募,于茂州之西南筑安戎城以压其境。俄有生羌为吐蕃乡导,攻陷其城,遂引兵守之。时吐蕃尽收羊同、党项及诸羌之地,东与凉、松、茂、嵩等州相接,南至婆罗门,西又攻陷龟兹、疏勒等四镇,北抵突厥,地方万余里,自汉、魏已来,西戎之盛,未之有也。

高宗闻审礼等败没,召侍臣问绥御之策,中书舍人郭正一曰:“吐蕃作梗,年岁已深,命将兴师,相继不绝。空劳士马,虚费粮储,近讨则徒损兵威,深入则未穷巢穴,望少发兵募,且遣备边,明烽堠,勿令侵抄。使国用丰足,人心叶同,宽之数年,可一举而灭。”给事中刘齐贤、皇甫文亮等皆言严守之便。寻而黑齿常之破吐蕃大将赞婆及素和贵于良非川,杀获二千余级,吐蕃遂引退。诏以常之为河源军使以镇御之。

仪凤四年,赞普卒,其子器弩悉弄嗣位,复号赞普,时年八岁,国政复委于钦陵。遣其大臣论寒调傍来告丧。且请和。高宗遣郎将宋令文入蕃会葬。永隆元年,文成公主薨,高宗又遣使吊祭之。

则天临朝,命文昌右相韦待价为安息道大总管,安西大都护阎温古为副。永昌元年,率兵往征吐蕃,迟留不进,待价坐流绣州^①,温古处斩。待价素无统御之才,遂狼狈失据,士卒饥谨,皆转死沟壑。明年,又命文昌右相岑长倩为武威道行军大总管以讨吐蕃,中路退还,军竟不行。如意元年,吐蕃大首领曷苏率其所属并贵川部落请降,则天令右玉铃卫大

将军张玄遇率精卒二万充安抚使以纳之。师次大渡水，曷苏事泄，为本国所擒，又有大首领咎捶率羌蛮部落八千余人诣玄遇内附。玄遇以其部落置叶川州，以咎捶为刺史。仍于大度西山勒石纪功而还。长寿元年，武威军总管王孝杰大破吐蕃之众，克复龟兹、于阗、疏勒、碎叶等四镇，乃于龟兹置安西都护府，发兵以镇守之。万岁登封元年，孝杰复为肃边道大总管，率副总管娄师德与吐蕃将论钦陵、赞婆战于素罗汗山。官军败绩，孝杰坐免官。万岁通天元年，吐蕃四万众奄至凉州城下，都督许钦明初不之觉，轻出按部，遂遇贼，拒战久之，力屈为贼所杀。时吐蕃又遣使请和，则天将许之；论钦陵乃请去安西四镇兵，仍索分十姓之地，则天竟不许之。

吐蕃自论钦陵兄弟专统兵马，钦陵每居中用事，诸弟分据方面，赞婆则专在东境，与中国为邻，三十余年，常为边患。其兄弟皆有才略，诸蕃惮之。圣历二年，其赞普器弩悉弄年渐长，乃与其大臣论岩等密图之。时钦陵在外，赞普乃佯言将猎，召兵执钦陵亲党二千余人，杀之。发使召钦陵、赞婆等，钦陵举兵不受召，赞普自率众讨之，钦陵未战而溃，遂自杀，其亲信左右同日自杀者百余人。赞婆率所部千余人及其兄子莽布支等来降，则天遣羽林飞骑郊外迎之，授赞婆辅国大将军、行右卫大将军，封归德郡王，优赐甚厚，仍令领其部兵于洪源谷讨击。寻卒，赠特进、安西大都护。

久视元年，吐蕃又遣其将趋莽布支寇凉州，围逼昌松县。陇右诸军州大使唐休璟与莽布支战于洪源谷，斩其副将二人，获首二千五百级。长安二年，赞普率众万余人寇悉州，都督陈大慈与贼凡四战，皆破之，斩首千余级。于是吐蕃遣使论弥萨等人朝请求和，则天宴之于麟德殿，奏百戏于殿庭。论弥萨曰：“臣生于边荒，由来不识中国音乐，乞放臣亲观。”则天许之。于是论弥萨等相视笑忭拜谢曰：“臣自归投圣朝，前后礼数优渥，又得亲观奇乐，一生所未见。自顾微琐，何以仰答天恩，区区褊心，唯愿大家万岁。”明年，又遣使献马千匹、金二千两以求婚，则天许之。

时吐蕃南境属国泥婆罗门等皆叛，赞普自往讨之，卒于军中。诸子争立，久之，国人立器弩悉弄之子弃隶踪赞为赞普，时年七岁。中宗神龙元年，吐蕃使来告丧，中宗为之举哀，废朝一日。俄而赞普之祖母遣其大臣悉薰然来献方物，为其孙请婚，中宗以所养雍王守礼女为金城公主许嫁之^①。自是频岁贡献。景龙三年十一月，又遣其大臣尚赞吐等来迎女，中宗宴之于苑内球场，命驸马都尉杨慎交与吐蕃使打球，中宗率侍臣观之。四年正月，制曰：圣人布化，用百姓为心；王者垂仁，以八荒无外。故能光宅遐迩，裁成品物。由是隆周理历，恢柔远之图；强汉乘时，建和亲之议。斯盖御宇长策^②，经邦茂范。朕受命上灵，克纂洪业，庶几前烈，永致和平。眷彼吐蕃，僻在西服，皇运之始，早申朝贡。太宗文武圣皇帝德侔覆载，情深亿兆，思偃兵甲，遂通姻好，数十年间，一方清净。自文成公主化往其国，因多变革，我之边隅，亟兴师旅，彼之蕃落，颇闻凋敝。顷者赞普及祖母可敦、酋长等，屡披诚款，积有岁时，思托旧亲，请崇新好。金城公主，朕之少女，岂不钟念，但为人父母，志息黎元，若允乃诚祈，更敦和好，则边土宁晏，兵役服息。遂割深慈，为国大计，筑兹外馆，聿膺嘉礼，降彼吐蕃赞普，即以今月进发，朕亲自送于郊外。

中宗召侍中纪处讷谓曰：“昔文成公主出降，则江夏王送之。卿雅识蕃情，有安边之略，可为朕充吐蕃使也。”处讷拜谢，既而以不练边事固辞。上又令中书侍郎赵彦昭充使。彦昭以既充外使，恐失其权宠，殊不悦。司农卿赵履温私谓之曰：“公国之宰辅，而为一介之使，不亦鄙乎？”彦昭曰：“然计将安出？”履温因阴托安乐公主密奏留之。于是以左卫大将军杨矩使焉。其月，帝幸始平县以送公主，设帐殿于百顷泊侧，引王公宰相及吐蕃使入宴，中坐酒阑，命吐蕃使进前，谕以公主孩幼，割慈远嫁之旨，上悲泣歔歔久之。因命从臣赋诗饯别，曲赦始平县大辟罪已下，百姓给复一年，改始平县为金城县，又改其地为凤池乡怆别里。公主既至吐蕃，别筑一城以居之。

注：①雍王守礼：“守”字各本原作“宗”，据《御览》卷七九八《册府》卷九七九改。②斯盖御宇长策：“御”字各本原无，据《御览》卷七九八、

《大唐诏令集》卷四二补。

睿宗即位，摄监察御史李知古上言：“姚州诸蛮，先属吐蕃，请发兵击之。”遂令知古征剑南兵募往经略之。蛮酋傍名乃引吐蕃攻知古，杀之，仍断其尸以祭天。时张玄表为安西都护，又与吐蕃比境，互相攻掠，吐蕃内虽怨怒，外敦和好。时杨矩为鄯州都督，吐蕃遣使厚遗之，因请河西九曲之地以为金城公主汤沐之所，矩遂奏与之。吐蕃既得九曲，其地肥良，堪顿兵畜牧，又与唐境接近，自是复叛，始率兵入寇。

开元二年秋，吐蕃大将盆达焉、乞力徐等率众十余万寇临洮军，又进寇兰、渭等州，掠监牧羊马而去。杨矩悔惧，饮药而死。玄宗令摄左羽林将军薛讷及太仆少卿王峻率兵邀击之。仍下诏将大举亲征，招募将士，克期进发。俄而峻等与贼相遇于渭源之武阶驿，前军王海宾力战死之，峻等率兵而进，大破吐蕃之众，杀数万人，尽收复所掠羊马。贼余党奔北，相枕藉而死，洮水为之不流。上遂罢亲征，命紫微舍人倪若水往按军实，仍吊祭王海宾而还。吐蕃遣其大臣宗俄因子至洮河祭其死亡之士，仍款塞请和，不上许之。自是连年犯边，郭知运、王君奭相次为河西节度使以捍之。

吐蕃既自恃兵强，每通表疏，求敌国之礼，言词悖慢，上甚怒之。及封禅礼毕，中书令张说奏言：“吐蕃丑逆，诚负万诛，然义事征讨，实为劳弊。且十数年甘、凉、河、鄯征发不息，纵令屡胜，亦不能补。闻其悔过请和，惟陛下遣使。许其稽颡内属，以息边境，则苍生幸甚。”上曰：“待吾与王君奭筹之。”说出，谓源乾曜曰：“君奭勇而无谋，常思侥幸，两国和好，何以为功？若入陈谋，则吾计不遂矣。”寻而君奭入朝奏事，遂请率兵深入以讨之。

十五年正月，君奭率兵破吐蕃于青海之西，虏其辎重及羊马而还。先是，吐蕃大将悉诺逻率众入攻大斗谷，又移攻甘州，焚烧市里。君奭畏其锋，不敢出战。会大雪，贼冻死者甚众，遂取积石军西路而还。君奭先令人潜入贼境，于其归路烧草。悉诺逻军还至大非川，将士息甲牧马，而野草皆尽，马死过半。君奭与秦州都督张景顺等率众袭其后，入至青海

之西，时海水冰合，将士并乘冰而渡。会悉诺逻已渡大非川，辎重及疲兵尚在青海之侧，君奭纵兵俘之而还。其年九月，吐蕃大将悉诺逻恭禄及烛龙莽布支攻陷瓜州城，执刺史田元献及王君奭之父寿，尽取城中军资及仓粮，仍毁其城而去。又进攻玉门军及常乐县，县令贾师顺婴城固守，凡八十日，贼遂引退。俄而王君奭为回纥余党所杀，乃命兵部尚书萧嵩为河西节度使，以建康军使、左金吾将军张守珪为瓜州刺史，修筑州城，招辑百姓，令其复业。时悉诺逻恭禄威名甚振，萧嵩乃纵反间于吐蕃，云其与中国潜通，赞普遂召而诛之。

明年秋，吐蕃大将悉末朗复率众攻瓜州，守珪出兵击走之。陇右节度使、鄯州都督张忠亮引兵至青海西南渴波谷，与吐蕃接战，大破之。俄而积石、莫门两军兵马总至，与忠亮合势追讨，破其大莫门城，生擒千余人，获马一千匹、牦牛五百头，器仗衣资甚众，又焚其骆驼桥而还。八月，萧嵩又遣副将杜宾客率弩手四千人，与吐蕃战于祁连城下，自辰至暮，散而复合，贼徒大溃，临阵斩其副将一人。贼败，散走投山，哭声四合。初，上闻吐蕃重来入寇，谓侍臣曰：“吐蕃骄暴，恃力而来，朕今按地图。审利害，亲指授将帅，破之必矣！”数日而露布至。

十七年，朔方大总管信安王祜又率兵赴陇右，拔其石堡城，斩首四百余级，生擒二百余口，遂于石堡城置振武军，仍献其俘囚于太庙。于是吐蕃频遣使请和，忠王友皇甫惟明因奏事面陈通和之便。上曰：“吐蕃赞普往年尝与朕书，悖慢无礼，朕意欲讨之，何得和也！”惟明曰：“开元之初，赞普幼稚，岂能如此。必是在边军将务邀一时之功，伪作此书，激怒陛下。两国既斗，兴师动众，因利乘便，公行隐盗，伪作功状，以希勋爵，所损巨万，何益国家！今河西、陇右，百姓疲竭，事皆由此。若陛下遣使往视金城公主，因与赞普面约通和，令其稽颡称臣，永息边境，此永代安人之道也。”上然其言，因令惟明及内侍张元方充使往问吐蕃。惟明、元方等至吐蕃，既见赞普及公主，具宣上意。赞普等欣然请和，尽出贞观以来前后敕书以示惟明等，令其重臣名悉猎随惟明等入朝，上表曰：外甥是先皇帝舅宿亲，又蒙降金城公主，遂和同为一家，天下百姓，普皆安乐。中间

为张玄表、李知古等东西两处先动兵马，侵抄吐蕃，边将所以互相征讨，迨至今日，遂成衅隙。外甥以先代文成公主、今金城公主之故，深识尊卑，岂敢失礼！又缘年小，枉被边将谗构斗乱，令舅致怪。伏乞垂察追留，死将万足。前数度使人入朝，皆被边将不许，所以不敢自奏。去冬公主遣使人娄众失力将状专往，蒙降使看公主来，外甥不胜喜荷。谨遣谕名悉猎及副使押衙将军浪些纥夜悉猎入朝^①，奏取进止。两国事意，悉猎所知。外甥蕃中已处分边将，不许抄掠，若有汉人来投，便令却送。伏望皇帝舅远察赤心，许依旧好，长令百姓快乐。如蒙圣恩，千年万岁，外甥终不敢先违盟誓。谨奉金胡瓶一、金盘一、金碗一、马脑杯一、零羊衫段一，谨充微国之礼。

金城公主又别进金鸭盘盞杂器物等。十八年十月，名悉猎等至京师，上御宣政殿，列羽林仗以见之。悉猎颇晓书记，先曾迎金城公主至长安，当时朝廷皆称其才辩。及是上引入内宴，与语，甚礼之。赐紫袍金带及鱼袋，并时服、缙彩、银盘、胡瓶，仍于别馆供拟甚厚。悉猎受袍带器物而却进鱼袋，辞曰：“本国无此章服，不敢当殊异之赏。”上嘉而许之。诏御史大夫崔琳充使报聘。仍于赤岭各竖分界之碑，约以更不相侵。

时吐蕃使奏云：“公主请《毛诗》《礼记》《左传》《文选》各一部。”制令秘书省写与之。正字于休烈上疏请曰：臣闻戎狄，国之寇也；经籍，国之典也。戎之生心，不可以无备；典有恒制，不可以假人。《传》曰：“裔不谋夏，夷不乱华。”所以格其非心，在乎有备无患。昔东平王入朝求《史记》、诸子，汉帝不与。盖以《史记》多兵谋，诸子杂诡术。夫以东平，汉之懿戚，尚不欲示征战之书；今西戎，国之寇仇，岂可贻经典之事！且臣闻吐蕃之性，剽悍果决，敏情持锐，善学不回。若达于书，必能知战。深于《诗》，则知武夫有师干之试；深于《礼》，则知月令有兴废之兵；深于《传》，则知用师多诡诈之计；深于《文》，则知往来有书檄之制。何异借寇兵而资盗粮也！臣闻鲁秉周礼，齐不加兵；吴获乘车，楚疲奔命。一以守典存国，一以丧法危邦，可取鉴也。且公主下嫁从人，远适异国，合慕夷礼，返求良书，愚臣料之，恐非公主本意也。虑有奔北之类，劝教于中。若陛下虑失蕃

情,以备国信,必不得已,请去《春秋》。当周德既衰,诸侯强盛,礼乐自出,战伐交兴,情伪于是乎生,变诈于是乎起,则有以臣召君之事,取威定霸之名。若与此书,国之患也。《传》曰:“于奚请曲县鞶纆,仲尼曰:‘惜也,不如多与之邑。惟名与器,不可假人。’”狄固贪婪,贵货易土,正可锡之锦绮,厚以玉帛,何必率从其求,以资其智!臣忝叨列位,职刊秘籍,实痛经典,弃在戎夷。昧死上闻,惟陛下深察。

疏奏不省。二十一年,又制工部尚书李晟往聘吐蕃。每唐使入境,所在盛陈甲兵及骑马,以矜其精锐。二十二年,遣将军李佺于赤岭与吐蕃分界立碑。二十四年正月,吐蕃遣使贡方物金银器玩数百事,皆形制奇异。上令列于提象门外,以示百僚。

其年,吐蕃西击勃律,遣使来告急。上使报吐蕃,令其罢兵。吐蕃不受诏,遂攻破勃律国,上甚怒之。时散骑常侍崔希逸为河西节度使,于凉州镇守。时吐蕃与汉树柵为界,置守捉使。希逸谓吐蕃将乞力徐曰:“两国和好,何须守捉,妨人耕种。请皆罢之,以成一家岂不善也?”乞力徐报曰:“常侍忠厚,必是诚言。但恐朝廷未必皆相信任。万一有人交拘,掩吾不备,后悔无益也。”希逸固请之,遂发使与乞力徐杀白狗为盟,各去守备。于是吐蕃畜牧被野。俄而希逸僚人孙海入朝奏事,海欲自邀其功,因奏言“吐蕃无备,若发兵掩之,必克捷。”上使内给事赵惠琮与孙海驰往观察事宜。惠琮等至凉州,遂矫诏令希逸掩袭之,希逸不得已而从之,大破吐蕃于青海之上,杀获甚众,乞力徐轻身遁逸。惠琮、孙海皆加厚赏,吐蕃自是复绝朝贡。希逸以失信怏怏,在军不得志。俄迁为河南尹,行至京师,与赵惠琮俱见白狗为祟,相次而死。孙海亦以罪被戮。诏以岐州刺史萧灵为户部侍郎判凉州事,代希逸为河西节度使;鄯州都督杜希望为陇右节度使;太仆卿王昱为益州长史^②、剑南节度使,分道经略,以讨吐蕃。仍令毁其分界之碑。二十六年四月,杜希望率众攻吐蕃新城,拔之,以其城为威戎军^③,发兵一千以镇之。其年七月,希望又从鄯州发兵夺吐蕃河桥,于河左筑盐泉城。吐蕃将兵三万人以拒官军,希望引众击破之,因于盐泉城置镇西军。时王昱又率剑南兵募攻其安戎城。先于安戎城左

右筑两城，以为攻拒之所，顿兵于蓬婆岭下，运剑南道资粮以守之。其年九月，吐蕃悉锐以救安戎城，官军大败，两城并为贼所陷，昱脱身走免，将士已下数万人及军粮资仗等并没于贼。昱坐左迁括州刺史。初，昱之在军，谬赏其子钱帛万计，并擅与紫袍等，所费巨万，坐是寻又重贬为端州高要尉而死。

注：①谨遣谕名悉猎 各本原作“护遣谕名悉猎”，据残宋本《册府》卷九七九改。②王昱“昱”字各本原作“昊”，据本书卷九《玄宗纪》、卷一〇三《王忠嗣传》《新书卷》二一六上《吐蕃传》改。下同。③威戎军“戎”字各本原作“武”，据本书卷九《玄宗纪》《通典》卷一七二改。

二十七年七月，吐蕃又寇白草、安人等军，敕临洮、朔方等军分兵救援。时吐蕃于中路屯兵，断临洮军之路。白水军守捉使高柬于拒守连旬，俄而贼退，萧昊遣偏将掩其后，击破之。王昱既败之后，诏以华州刺史张宥为益州长史、剑南防御使，主客员外郎章仇兼琼为益州司马、防御副使。宥既文吏，素无攻战之策，兼琼遂专其戎事。俄而兼琼入奏，盛陈攻取安戎之策。上甚悦，徙张宥为光禄卿，拔兼琼令知益州长史事，代张宥节度，仍为之亲画取城之计。

二十八年春，兼琼密与安戎城中吐蕃翟都局及维州别驾董承宴等通谋。都局等遂翻城归款，因引官军入城，尽杀吐蕃将士，使监察御史许远率兵镇守，上闻之甚悦。中书令李林甫等上表曰：“伏以吐蕃此城，正当冲要，凭险自固，恃以窥边。积年以来，蚁聚为患，纵有百万之众，难以施功。陛下亲纾秘策，不兴师旅，顷令中使李思敬晓喻羌族，莫不怀恩，翻然改图，自相谋陷。神算运于不测，睿略通于未然，累载逋诛，一朝荡灭。又臣等今日奏事，陛下从容问臣等曰：‘卿等但看四夷不久当渐摧丧。’德音才降，遽闻戎捷，则知圣与天合，应如响至，前古以来，所未有也。请宣示百僚，编诸史策。”手制答曰：“此城仪凤年中羌引吐蕃，遂被固守，岁月既久，攻伐亦多。其地险阻，非力所制。朝廷群议，不合取之。朕以小蕃无知，事须处置，授以奇计，所以行之，获彼戎心，归我城守，有足为慰也。”其年十月，吐蕃又引众寇安戎城及维州，章仇兼琼遣裨将率众御

之，仍发关中彍骑以救援焉。时属凝寒，贼久之自引退。诏改安戎城为平戎城。

二十九年春，金城公主薨，吐蕃遣使来告哀，仍请和，上不许之。使到数月后，始为公主举哀于光顺门外，辍朝三日。六月，吐蕃四十万攻承风堡，至河源军，西入长宁桥，至安仁军，浑崖峰骑将盛希液以众五千攻而破之。十二月，吐蕃又袭石堡城，节度使盖嘉运不能守，玄宗愤之。天宝初，令皇甫惟明、王忠嗣为陇右节度，皆不能克。七载，以哥舒翰为陇右节度使，攻而拔之，改石堡城为神武军。

天宝十四载，赞普乞黎苏笼猎赞死，大臣立其子婆悉笼猎赞为主，复为赞普。玄宗遣京兆少尹崔光远兼御史中丞，持节赍国信册命吊祭之。及还，而安禄山已窃据洛阳，以河、陇兵募令哥舒翰为将，屯潼关。

昔秦以陇山已西为陇西郡。汉怀匈奴于河右，置姑臧、张掖、酒泉、伊吾等郡；又于磧外置西域都护，控引胡国；又分陇西为金城、西平等郡，杂以氐、羌居之。历代丧乱，不为贤豪所据，则为远夷侵废；迨千年矣。武德初，薛仁果奄有陇上之地，至于河虏；李轨尽有凉州之域^①，通于磧外。贞观中，李靖破吐谷浑，侯君集平高昌，阿史那社尔开西域，置四镇。前王之所未伏，尽为臣妾，秦、汉之封域，得议其土境耶！于是岁调山东丁男为戍卒，缿帛为军资，有屯田以资糗粮，牧使以挽羊马。大军万人，小军千人，烽戍逻卒，万里相继，以却于强敌。陇右鄯州为节度，河西凉州为节度，安西、北庭亦置节度，关内则于灵州置朔方节度，又有受降城、单于都护庭为之藩卫。及潼关失守，河洛阻兵，于是尽征河陇、朔方之将镇兵入靖国难，谓之行营。曩时军营边州无备预矣。乾元之后，吐蕃乘我间隙，日蹙边城，或为掳掠伤杀，或转死沟壑。数年之后，凤翔之西，邠州之北，尽蕃戎之境，淹没者数十州。

肃宗元年建寅月甲辰，吐蕃遣使来朝请和，敕宰相郭子仪、萧华、裴遵庆等于中书设宴^②。将诣光宇寺为盟誓，使者云：蕃法盟誓，取三牲血歃之，无向佛寺之事，请明日须于鸿胪寺歃血，以申蕃戎之礼。从之。宝应元年六月，吐蕃使烛番、莽耳等二人贡方物入朝，乃于延英殿引见，劳

赐各有差。而剑南西山又与吐蕃、氐、羌邻接，武德以来，开置州县，立军防，即汉之笮路，乾元之后，亦陷于吐蕃。宝应二年三月，遣左散骑常侍兼御史大夫李之芳、左庶子兼御史中丞崔伦使于吐蕃，至其境而留之。广德元年九月，吐蕃寇陷泾州。十月，寇邠州，又陷奉天县。遣中书令郭子仪西御。吐蕃以吐谷浑、党项羌之众二十余万，自龙光度而东。郭子仪退军，车驾幸陕州，京师失守。降将高晖引吐蕃入上都城，与吐蕃大将马重英等立故邠王男广武王承宏为帝，立年号，大赦，署置官员，寻以司封崔瑰等为相^③。郭子仪退军南保商州，吐蕃居城十五日退，官军收上都，以郭子仪为留守。

注：①李轨：各本原作“李敷”，据《合钞》卷二五六上《吐蕃传》改。②裴遵庆“裴”字各本原作“张”，据本书卷一一三《裴遵庆传》《新书》卷二一六上《吐蕃传》改。③寻以司封崔瑰等为相《通鉴》卷二二三作“以前翰林学士于可封等相”，疑史文有误。

初，车驾东幸，衣冠戚里尽南投荆襄及隐窜山谷，于是六军将士持兵剽劫，所在阻绝。郭子仪领部曲数百人及其妻子仆从南入牛心谷，驼马车牛数百两，子仪迟留，未知所适。行军判官、中书舍人王延昌、监察御史李萼谓子仪曰：“令公身为元帅，主上蒙尘于外，家国之事，一至于此。今吐蕃之势日逼，岂可怀安于谷中，何不南趋商州，渐赴行在。”子仪遽从之。延昌曰：“吐蕃知令公南行，必分兵来逼，若当大路，事即危矣。不如取玉山路而去，出其不意。”子仪又从之。延昌与李萼皆从子仪，子仪之队千余人，山路狭隘，连延百余里，人不得驰。延昌与萼恐狭径被追，前后不相救，至倒回口，遂与子仪别行，逾绝涧，登七盘，趋于商州。先是，六军将张知节与麾下数百人自京城奔于商州^④，大掠避难朝官、士庶及居人资财鞍马，已有日矣。延昌与萼既至，说知节曰：“将军身掌禁兵，军败而不赴行在，又恣其下掳掠，何所归乎？今郭令公元帅也，已欲至洛南，将军若整顿士卒，喻以祸福，请令公来抚之，以图收长安，此则将军非常之功也。”知节大悦。其时诸军将臧希让、高升、彭体盈、李惟洗等数人，各有部曲，率其数十骑，相次而至，又从其计，皆相率为军，约不

侵暴。延昌留于军中主约，萼以数骑往迎子仪，去洛南十余里，及之，遂与子仪回至商州。诸将大喜，皆遵其约束。

吐蕃将入京师也，前光禄卿殷仲卿逃难而出，鞍马衣服尽为土贼所掠。仲卿至蓝田，纠合散兵及诸骁勇愿从者百余人，南保蓝田，以拒吐蕃，其众渐振，至于千人。子仪既至商州，未知仲卿之举，募人往探贼势，羽林将军长孙全绪请行，以二百骑隶之。又令太子宾客第五琦摄京兆尹，同收长安。全绪至韩公堆，昼则击鼓，广张旗帜，夜则多燃火以疑吐蕃。仲卿探知官军，其势益壮，遂相为表里，以状闻于子仪。仲卿帅二百余骑游奕，直渡浐水。吐蕃惧，问百姓，百姓皆给之曰：“郭令公自商州领众却收长安，大军不知其数。”贼以为然，遂抽军而还，余众尚在城。军将王抚及御史大夫王仲升顿兵自苑中入，椎鼓大呼，仲卿之师又入城，吐蕃皆奔走，乃收上都。郭子仪乘之，鼓行入长安，人心乃安。

吐蕃退至凤翔，节度孙志直闭门拒之，吐蕃围守数日。会镇西节度、兼御史中丞马璘领精骑千余自河西救杨志烈回，引兵入城。迟明，单骑持满，直冲贼众，左右愿从者百余骑，璘奋击大呼，贼徒披靡，无敢当者，贼疲而归。贼众恃其骁勇，翌日又逼城请战，璘披甲开悬门，贼乃抽退，皆曰：“此将不惜死，不可当，且避之。”又复居原、会、成、渭之地。

十二月，乘輿还上都。二年五月，放李之芳还。九月，叛将仆射、大宁郡王仆固怀恩自灵武遣其党范志诚、任敷等引吐蕃、吐谷浑之众来犯王畿。十月，怀恩之众至邠州挑战，节度白孝德及副元帅先锋郭晞婴城拒之，以挫其锋。贼众遂逼奉天县西二十里为营，郭子仪屯于奉天，又按军不战。郭晞于邠州西三十里，令精骑二百五十人、步卒五十人斫怀恩营，破五千众，斩首千余级，生擒八十五人，降其大将四人，马五百匹。十一月，仆固怀恩引吐蕃之众退。

广德二年，河西节度杨志烈被围，守数年，以孤城无援，乃跳身西投甘州，凉州又陷于寇。

永泰元年三月，吐蕃请和，遣宰相元载、杜鸿渐等于兴唐寺与之盟而罢。秋九月，仆固怀恩诱吐蕃、回纥之众，南犯王畿。吐蕃大将尚结息赞

磨、尚息东赞、尚野息及马重英率二十万众至奉天界，邠州节度使白孝德不能御，京城戒严。先是，朔方先锋兵马使浑日进、孙守亮屯军于奉天以拒之，于是诏追副元帅郭子仪于河中府领众赴援，屯于泾阳，诸将各屯守要害。初，吐蕃列营奉天，浑日进单骑冲之，骁骑二百人继进，冲突其营，左右击刺，贼徒惊骇，无不应弦而毙。日进挟一番将，跃马而归，番将奋身，失其撒饭一，日进之众，无中锋镝者，军中望而益振。明日，吐蕃悉众围之，日进命抛车夹石投之，杂以弓弩，贼死伤众。数日，敛军回营。寻又日进夜斫贼营于梁母神下，杀千余人，生擒五百人，获驼马器械。

上又下诏亲征，括朝官马，京城置团练。镇西节度马麟遇吐蕃游奕四百余人于武功东原，使五十人击而尽杀之，无噍类。自十七日雨至二十五日晚际始止^②，议者以为天助。吐蕃移营于醴泉县九嵎山北，因攻掠醴泉。京城大骇，人皆空室，大户凿窦以出。逆党任敷以兵五千余人犯白水县。浑日进露布而至，屯于奉天马嵬店。今月十九日以后至二十五日以前，交战二百余阵，破吐蕃一万余众，斩首五千级，生擒一百六十人，马一千二百四十二匹，驼一百一十五头，器械、幡旗共三万余事。朝官震惧，家口回避者十室八九，禁之不止。自前年吐蕃犯王畿后，于中渭桥鄠丰城以营兵，至是功毕。

注：①京城“京”字各本原无，据《通鉴》卷二二三《考异》引《旧书》史文补。②自十七日雨至二十五日晚际始止“雨”字各本原无，据《合钞》卷二五六上《吐蕃传》补。

吐蕃退至永寿北，遇回纥之众，虽闻怀恩死，皆悖其众，相诱而奔，复来寇。至奉天，两蕃猜贰争长，别为营垒。吐蕃游奕至窑底，吐蕃又至马嵬店，因纵火焚居人庐舍而退。回纥三千骑诣泾阳降款，请击吐蕃为效，子仪许之。于是朔方先锋兵马使开府南阳郡王白元光与回纥合于泾阳，灵台县东五十里攻破吐蕃。斩首及生擒获驼马牛羊甚众。上停亲征，京师解严，宰相上表称贺。

《吐蕃》(下)

永泰二年二月,命大理少卿、兼御史中丞杨济修好于吐蕃。四月,吐蕃遣首领论泣藏等百余人随济来朝,且谢申好。大历二年十月,灵州破吐蕃二万余众,生擒五百人,获马一千五百匹。十一月,和蕃使、检校户部尚书、兼御史大夫薛景仙自吐蕃使还,首领论泣陵随景仙来朝。景仙奏云:“赞普请以凤林关为界。”俄又遣使路悉等十五人来朝。三年八月,吐蕃十万寇灵武,大将尚悉摩寇邠州。邠宁节度使马磷破二万余众,擒其俘以献之。九月,寇灵州,朔方骑将白元光破之。俄又复破二万众于灵武,获羊马数千计。关内副元帅郭子仪于灵州破吐蕃六万余众。十二月,以蕃寇岁犯西疆,增修镇守,乃移马磷镇泾州,仍为泾原节度使。剑南西川亦破吐蕃万余众。五年五月,徙置当、悉、拓、静、恭五州于山陵要害之地,以备吐蕃。

八年秋,吐蕃六万骑寇灵武,蹂践我禾稼而去。十月,寇泾、邠等州,郭子仪遣先锋将浑瑊与贼战于宜禄,我师不利,副将史籍等三人死之,村墅居人为驱掠者凡千余人。是夜,瑊收合散卒袭贼营,会马磷亦袭其辎重,凡杀数千人,贼遂溃。子仪大破吐蕃十余万众。初,吐蕃犯我邠郊,马磷以精卒二千余人潜夜掩贼营,射贼豹皮将中目,贼众扶之号泣,遂举营遁去。磷因收获朔方兵健二百余人,百姓七百余,驼马数百匹。

九年四月,以吐蕃侵扰,预为边备,乃降敕:“宜令子仪以上郡、北地、四塞、五原、义渠、稽胡、鲜卑杂种步马五万众,严会栒邑,克壮旧军。抱玉以晋之高都,韩之上党,河、湟义从,汧、陇少年,凡三万众,横绝高壁,斜界连营。马磷以西域前庭,车师后部,兼广武之戍,下蔡之徭,凡三万众,屯于回中●,张大军之援。忠诚以武落别授,右地奇锋,凡二万众,出岐阳而北会。希让以三辅太常之徒,六郡良家之子,自渭上而西合汴宋、淄青、河阳、幽蓟,总四万众,分列前后。魏博®、成德、昭义、永平总六万众,大舒左右。朕内整禁旅,亲誓诸将,资以千金之费,锡以六牧之马。

其戎装战器，军用边储，各有司存，素皆精办。咨尔将相文武宣力之臣，夫师克在和，善战不阵，各宜保据疆界，屯据要冲，斥堠惟明，首尾相应。若既悔过，何必劳人；如或不恭，自当伐罪。然后眷求统一，以制诸军。进取之宜，俟于后命。”

注：①回中：闻、殿、惧盈齐、广本作“泗中”，局本作“洄中”，今据《唐大诏令集》卷一〇七、《册府》卷九九二改。②魏博：“博”字各本原无，据《唐大诏令集》卷一〇七补。

十一年正月，剑南节度使崔宁大破吐蕃故洪等四节度兼突厥、吐浑、氏、蛮、羌、党项等二十余万众，斩首万余级，生擒〈螭〉城兵马使一千三百五十人，献于阙下。牛羊及军资器械，不可胜纪。十二年九月，入寇坊州，掠党项羊马而去。十月，崔宁破吐蕃望汉城。十四年八月，命太常少卿韦伦持节使吐蕃，统蕃俘五百人归之。十月，吐蕃率南蛮众二十万来寇：一入茂州，过汶川及灌口；一入扶、文，过方维、白坝；一自黎、雅过邛崃关，连陷郡邑。乃发禁兵四千人及幽州兵五千人同讨，大破之。

建中元年四月，韦伦至。自大历中聘使前后数辈，皆留之不遣。俘获其人，必遣中官部统徙江、岭，因缘求财及给养之费，不胜其弊。去年冬，吐蕃大兴师以三道来侵，会德宗初即位，以德绥四方，征其俘囚五百余人，各给衣一袭，使伦统还其国，与之约和，敕边将无得侵伐。吐蕃始闻归其人，不之信，及蕃俘入境，部落皆畏威怀惠。其赞普乞立赞谓伦曰：“不知是来也，而有三恨，奈何？”伦曰：“未达所谓。”乞立赞曰：“不知大国之丧，而吊不及哀，一也。不知山陵之期，而贖不成礼。二也。不知皇帝舅圣明继立，已发众军三道连衡。今灵武之师，闻命辄已；而山南之师已入扶、文，蜀师已趋灌口，追且不及，是三恨也。”乃发使奉贄，不二旬而复命。蜀帅上所获戎俘，有司请准旧事颁为徒隶，上曰：“要约著矣，言庸二乎？”乃各给缣二匹、衣一袭而归之。五月，以韦伦为太常卿，复使吐蕃。其冬，遣宰相论钦明思等五十五人随伦至，且献方物。吐蕃见伦再至，甚欢。既就馆，声乐以娱之，留九日而还，兼遣其渠帅报命。

二年十二月，入蕃使判官常鲁与吐蕃使论悉诺罗等至自蕃中。初，

鲁与其使崔汉衡至列馆，赞普令止之，先命取国信敕。既而使谓汉衡曰：“来敕云：所贡献物，并领讫；今赐外甥少信物，至领取。我大蕃与唐舅甥国耳，何得以臣礼见处？又所欲定界，云州之西，请以贺兰山为界。其盟约，请依景龙二年敕书云：唐使到彼，外甥先与盟誓；蕃使到此，阿舅亦亲与盟。”乃邀汉衡遣使奏定。鲁使还奏焉，为改敕书，以“贡献”为“进”，以“赐”为“寄”，以“领取”为“领之”。且谓曰：“前相杨炎不循故事，致此误尔。”其定界盟，并从之。

三年四月，放先没蕃将士僧尼等八百人归还，报归蕃俘也。九月，和蕃使、殿中少监、兼御史中丞崔汉衡与蕃使区颊赞至。时吐蕃大相尚结息忍而好杀，以尝覆败于剑南，思刷其耻，不肯约和。其次相尚结赞有才略，因言于赞普，请定界明约，以息边人。赞普然之，竟以结赞代结息为大相，终约和好，期以十月十五日会盟于境上。以崔汉衡为鸿胪卿，以都官员外郎樊泽兼御史中丞、充入蕃计会使。初，汉衡与吐蕃约定月日盟誓，汉衡到，商量未决，已过其期，遂命泽诣结赞复定盟会期，且告遣陇右节度使张镒与之同盟，泽至故原州，与结赞相见，以来年正月十五日会盟于清水西。

四年正月，诏张镒与尚结赞盟于清水。将盟，镒与结赞约，各以二千人赴坛所，执兵者半之，列于坛外二百步，散从者半之，分立坛下。镒与宾佐齐映、齐抗及会盟官崔汉衡、樊泽、常鲁、于頔等七人皆朝服；结赞与其本国将相论悉颊藏、论臧热、论利驰、斯官者、论力徐等亦七人，俱升坛为盟。初约汉以牛，蕃以马，镒耻与之盟，将杀其礼，乃谓结赞曰：“汉非牛不田，蕃非马不行，今请以羊、豕、犬三物代之。”结赞许诺。塞外无豕，结赞请出羝羊，镒出犬及羊，乃于坛北刑之，杂血二器而歃盟。文曰：

唐有天下，恢奄禹迹，舟车所至，莫不率俾。以累圣重光，历年为永，彰王者之丕业，被四海之声教。与吐蕃赞普，代为婚姻，固结邻好，安危同体，甥舅之国，将二百年。其间或因小忿，弃惠为仇，封疆骚然，靡有宁岁。皇帝践祚，愍兹黎元，俾释俘隶，以归蕃落。蕃国展礼，同兹叶和，行

人往复，累布成命。是必诈谋不起，兵车不用矣。彼犹以两国之要，求之永久，古有结盟，今请用之。国家务息边人，外其故地，弃利蹈义，坚盟从约。今国家所守界：泾州西至弹箏峡西口，陇州西至清水县，凤州西至同谷县，暨剑南西山大渡河东，为汉界。蕃国守镇在兰、渭、原、会，西至临洮，东至成州，抵剑南西界磨些诸蛮，大渡水西南，为蕃界。其兵马镇守之处，州县见有居人，彼此两边见属汉诸蛮，以今所分见住处，依前为定。其黄河以北，从故新泉军，直北至大磧，直南至贺兰山骆驼岭为界，中间悉为闲田。盟文有所不载者，蕃有兵马处蕃守，汉有兵马处汉守，并依见守，不得侵越。其先未有兵马处，不得新置，并筑城堡耕种。今二国将相受辞而会，斋戒将事，告天地山川之神，惟神照临，无得愆坠。其盟文藏于宗庙，副在有司，二国之成，其永保之。结赞亦出盟文，不加于坎，但埋牲而已。盟毕，结赞请馐就坛之西南隅佛幄中焚香为誓。誓毕，复升坛饮酒。献酬之礼，各用其物，以将厚意而归。

二月，命崔汉衡持节答蕃，遣区颊赞等归。上初令宰相、尚书与蕃相区颊赞盟于丰邑里坛所。将盟，以清水之会疆场不定^①，遂罢，因留颊赞未遣，复令汉衡使于赞普。六月，答蕃使判官于頔与蕃使论颊没藏等至自青海。七月，以礼部尚书李揆加御史大夫，为入蕃会盟使。又命宰相李忠臣、卢杞、关播、右仆射崔宁、工部尚书乔琳、御史大夫于頔、太府卿张献恭、司农卿段秀实、少府监李昌夔、京兆尹王翺、左金吾卫将军浑瑊等与区颊赞等会盟于坛所。初，于頔至自蕃中，与尚结赞约：“疆场既定，请归其使。”从之。以丰邑坊盟坛在京城之内非便，请卜坛于京城之西。其礼如清水之仪。先盟二日，命有司告太庙，监官致斋。三日，朝服升坛，关播跪读盟文。盟毕，宴赐而遣之。

兴元元年二月，以右散骑常侍兼御史大夫于頔往泾州已来宣慰吐蕃，仍与州府计会顿递。时吐蕃款塞请以兵助平国难，故遣使焉。四月，命太常少卿、兼御史中丞沈房为入蕃计会及安西、北庭宣慰使。是月，浑瑊与吐蕃论莽罗率众大破朱泚将韩旻、张廷芝、宋归朝等于武功之武亭川，斩首万余级。

贞元二年，命仓部郎中、兼侍御史赵聿为入吐蕃使。八月，吐蕃寇泾、陇、邠、宁数道，掠人畜，取禾稼，西境骚然。诸道节度及军镇咸闭壁自守而已。京师戒严。上遣左金吾将军张献甫与神策将李升昱、苏清沔等统兵屯于咸阳，召河中节度骆元光率众戍咸阳以援之。九月，以吐蕃游骑及于好畤，上复遣张献甫等统兵屯于咸阳，又诏遣左监门将军康成使于吐蕃。初，吐蕃大相尚结赞累遣使请盟会定界，乃命成使之。至上砦原，与结赞相见，令其使论乞陀与成同来。

是月，凤翔节度使李晟以吐蕃侵轶，遣其将王佖夜袭贼营，率骁勇三千人入汧阳，之曰：“贼之大众，当过城下，无击其首尾。首尾虽败，中军力全，若合势攻之，汝必受其弊。但候其前军已过，见五方旗、虎豹衣，则其中军也。出其不意，乃是奇功。”佖如其言出击之，贼众果败，副将史廷玉力战死之。又寇凤翔城下，李晟出兵御之，一夕而退。十月，李晟遣兵袭吐蕃之催沙堡^②，大破之。焚其归积，斩蕃酋扈屈律设赞等七人，^③传首京师。

注：①将盟以清水之会疆场不定：“将”字及“疆场”二字各本原无，据《册府》卷九八一补。②催沙堡：“催”字各本原作“堆”，据本书卷一二《德宗纪》、卷一三三《李晟传》《册府》卷九九二改。③扈屈律设赞：“设赞”二字本书卷一三三《李晟传》作“悉蒙”。

十一月，吐蕃陷盐州。初，贼之来也，刺史杜彦光使以牛酒犒之。吐蕃谓曰：“我欲州城居之，听尔率其人而去。”彦光乃悉众奔鄜州。十二月，陷夏州，刺史拓拔乾晖率众而去，复据其城。又寇银州，素无城壁，人皆奔散。三年春，命检校左庶子、兼御史中丞崔浣为入吐蕃使，相次又遣左庶子李銛使之。河东、保宁等道节度使马燧来朝。初，尚结赞既陷盐、夏等州，各留千余人守之，结赞大众屯于鸣沙。自去冬及春，羊马多死，粮饷不给。时诏遣华州、潼关节度骆元光、邠宁节度韩游瑰统众与凤翔、鄜、邠及诸道戍卒，屯于塞上，又命燧率师次于石州，分兵隔河与元光等犄角讨之。结赞闻而大惧，累遣使请和，仍约盟会。上皆不许。又遣其大将论颊热厚礼卑词求燧请盟，燧以奏焉，上又不许。惟促其合势讨逐。燧

喜赂信诈，乃与颊热俱入朝，盛言其可保信，许盟约，上于是从之。燧既赴朝也，诸军但闭壁而已。结赞遽悉其众弃夏州而归，马既多死，有徒行者。及是夏平凉之会，竟渝盟，马燧亦由此失兵柄而奉朝请矣。

四月，崔浣至自鸣沙。初，浣至鸣沙，与尚结赞相见，询问其违约陷盐、夏州之故，对曰：“本以定界碑被牵倒，恐二国背盟相侵，故造境上请修旧好。又蕃军顷年破朱泚之众于武功，未获酬偿，所以来耳。及徙泾州，其节度使闭城自守，音问莫达。又徙凤翔，请通使于李令公，亦不见纳。及遣康成、王真之来，皆不能达大国之命。日望大臣充使，兼展情礼，实无至者，乃引军还。及盐、夏二州之师，二州惧我之众，请以城与我，求全而归，非我所攻陷也。今君以国亲将命，若结好复盟。蕃之愿也。盟会之期及定界之所，唯命是听。君归奏决，定当以盐、夏相还也。”又云：“清水之会，同盟者少，是以和好轻慢不成。今蕃相及元帅已下凡二十一人赴。灵州节度使杜希全禀性和善，外境所知，请令主盟会。泾州节度李观，亦请同主之。”又同章表上闻。浣诱赂蕃中给役者，求其人马真数，凡五万九千余人、马八万六千余匹，可战者仅三万人，余悉童幼，备数而已。

是日，改崔浣为鸿胪卿，再入吐蕃。令浣报尚结赞曰：“杜希全职在灵州，不可出境。李观今已改官，以待中浑瑊充盟会使。”约以五月二十四日复盟于清水。又令告以盐、夏二州归于我，才就盟会。上疑蕃情不实，以得州为信焉。五月，浑瑊以充盟会使来辞，且受命。以兵部尚书崔汉衡为盟会副使，司勋员外郎郑叔矩为判官。浑瑊赴会盟所，上令瑊统众二万余人，遣华州潼关节度骆元光赴之。上令宰臣召吐蕃使论泣赞等于中书议会盟之所。初崔浣与尚结赞约复会于清水，且先归我盐、夏二州，结赞云：“清水非吉地，请会于原州之土梨树。”又请盟毕归二州。浣遣使与泣赞等同奏，上务怀柔远人，皆从之。约以五月十五日盟于土梨树，上召宰臣谋之。先是左神策将马有麟奏：“土梨树地多险隘，恐蕃军隐伏，不利于我。平凉川四隅坦平，且近泾州。就之为便。”由是乃定盟所于平凉川。时蕃使论泣赞已复命，遽追还，告而遣之。

浑瑊与尚结赞会于平凉。初，瑊与结赞约，以兵三千人列于坛之东西，散手四百人至坛下。及将盟，又约各益游军相觐伺。结赞拥精骑数万于坛西，蕃之游军贯穿我师。瑊之将梁奉贞率六十骑为游军，才至蕃中，皆被执留，瑊不虞也。结赞又遣人请瑊曰：“请侍中以下服衣冠剑珮以俟命。”盖诱其下马，将劫持之。瑊与崔汉衡、监军特进宋凤朝等皆入幕次，坦无他虑，结赞命伐鼓三声，其众呼噪而至。瑊遽出自幕后，偶得他马，跨而奔归。时马不加衔，瑊伏于鬣而手加之，凡驰十余里，衔方及口，故追骑之矢，过而不伤焉。唯瑊之裨将辛荣招合数百人，据北阜与贼接战，须臾贼众四合，荣力屈而降。凤朝及瑊判官韩弇，并为乱兵所杀。汉衡及中官刘延邕、俱文珍、李清朝，汉衡判官郑叔矩、路泌，掌书记袁同直，大将扶余准、马宁及神策、凤翔、河东大将孟日华、李至言、乐演明、范澄、马弇等六十余人皆陷焉。余将士及夫役死者四五百人，驱掠者千余人，咸被解夺其衣。

初，汉衡为乱军所击，其从吏吕温以身蔽之，刃中温而汉衡获免。汉衡乃夷言谓执者曰：“我汉使崔尚书也，结赞与我善，如若杀我，结赞亦杀汝。”乃捨之，尽驱而西。既已面缚，各以一木自领至趾约于身，以毛绳三束之，又以毛绳连其发而约之。夜皆踣于地，以发绳各系一橛，又以毛罽都覆之，守卫者卧其上，以防其亡逸也。至故原州，结赞坐于帐中，召与相见，数让国家，因怒浑瑊曰：“武功之捷，皆我之力，许以泾州、灵州相报，皆食其言。负我深矣，举国所忿。本劫是盟，在擒瑊也。吾遣以金饰桎梏待瑊，将献赞普。既以失之，虚致君等耳，当遣君辈三人归也。”吕温带疮亦至，结赞嘉其义，厚给赉之。结赞率其众于石门，遣中官俱文珍、浑瑊之将马宁、马燧之将马弇归于我，遂送汉衡、叔矩等囚于河州，辛荣、扶余准等于故廓州、鄯州分囚之。结赞本请杜希全、李观问盟，将执二节将，率其锐师来犯京师，希全等既不行，又欲执浑瑊长驱入寇，其谋也如此。上遣中官王子恒赍诏书以遗结赞，蕃界不纳而还。

初，瑊与骆元光将发泾州，元光谓瑊曰：“本奉诏令营于潘原堡，以应援侍中。窃以潘原去盟所六七十里，蕃情多诈，侍中倘有急，何由知

之？请次侍中为营，以虞其变。” 瑊以非诏旨，固止之。元光与同进。瑊之营西去盟所二十余里，元光之营次之。其濠栅颇深固，瑊之濠栅可逾越焉。及瑊单骑奔归，未及其营，守将李朝彩不能整众，多已奔散。瑊至，空营而已，器械资粮悉弃之，赖元光之众阵于营中，瑊既入，贼追骑方退。元光乃先遣輜重，次与瑊俱申其号令，严其部伍而还。瑊复镇于奉天。

六月，盐、夏二州吐蕃焚城门及庐舍，毁城壁而归。七月，诏曰：

乃者吐蕃犯塞，毒我生灵，俶扰陇东，深入河曲。朕以兵戈粗定，伤夷未瘳，务息战伐之谋，遂从通和之请。亦知戎丑，志在贪婪，重违修睦之辞，乃允寻盟之会。果为隐匿，变发壘宫，纵犬羊凶狡之群，乘文武信诚之众，苍黄沦陷，深用恻然。此皆由朕之不明，致其至此。既无德于万众，亦有愧于四方，宵旰贻忧，何嗟而及。今兵部尚书崔汉衡等，皆国之良士，朝之荅臣，婴紮穷庐，眇然殊域。念其家室，或未周于屡空；录以息男，庶或资于薄俸。汉衡宜与一子七品官，司勋员外郎郑叔矩、检校户部郎中路泌、殿中侍御史韩弁及大将孟日华、辛荣、李至言、范澄、王良贲、乐演明、阳昔、权交成等，各与一子八品官；试左金吾兵曹参军袁同直、榆次尉裴颀及副兵马使以下，各与一子九品官。仍并与正员官。余将干各与一子官，仍委本使即具名衔闻奏。

于是遣决胜军使唐良臣以众六百人戍潘原堡，神策副将苏太平率其众五百人戍陇州。

八月，崔汉衡至自吐蕃。初，汉衡与同陷者并至河州，尚结赞令召汉衡与神策将孟日华、中官刘延邕，俱至石门而遣之。结赞令五十骑送至境上，且赍表请进。及潘原，李观使止曰：“有诏不许更纳蕃使。”受其表而返其人。自是吐蕃率羌、浑之众犯塞，分屯于潘口及青石岭。先是，吐蕃之众自潘口东分为三道：其一趋陇州，其一趋汧阳之东，其一趋钓竿原。是日，相次屯于所趋之地，连营数十里。其汧阳贼营，距凤翔四十里，京师震恐，士庶奔骇。贼遣羌、浑之众，衣汉戎服，伪称邢君牙之众，奄至吴山及宝鸡北界，焚烧庐舍，驱掠人畜，断吴山神之首，百姓丁壮者驱之

以归，羸老者咸杀之，或断手凿目，弃之而去。初，李晟在凤翔，令伐大木塞安化峡，及是，贼并焚之。

九月，诏神策军将石季章以众三千戍武功，召唐良臣自潘原戍百里城。是月，吐蕃大掠汧阳、吴山、华亭等界人庶男女万余口，悉送至安化峡西，将分隶羌、浑等。乃曰：“从尔辈东向哭辞乡国。”众遂大哭。其时一恸而绝者数百人，投崖谷死伤者千余人，闻者为之痛心焉。浑瑊遣其将任蒙主以众三千戍好畤。是月，吐蕃之众复至，分屯于丰义及华亭。百僚入计以破吐蕃围。陇州刺史韩清沔与苏太平夜出兵伏于大像龕。及夜半，令城中及龕各举火相应，贼大惊，因袭其营，贼乃退散。时吐蕃攻陷华亭。初，贼之围华亭也，先绝其汲水道。其守将王仙鹤及镇兵百姓凡三千人，皆在围中，使人间道请教于陇州，刺史韩清沔令苏太平率一千五百人赴之。及中路，其游骑百余没于贼，太平素懦怯寡谋，遽引众退归。贼自是每日令游骑千余至陇州，州兵不敢复出。凡四日，围中绝水，援军不至，贼又积柴城下，将焚之，仙鹤遂降于贼。贼并焚庐舍，毁城壁，虏士众十三四，收丁壮弃老而去。北攻连云堡，又陷。堡之三面颇峭峻，唯北面连原，以濠为固。贼自其北建抛楼七具，击堡中，堡中唯一井，投石俄而满焉。又飞梁架濠而过，苦攻之。堡将张明遂与其众男女千余口东向恸哭而降。泾州之西，唯有连云堡每侦察贼之进退，及是堡陷，泾州不敢启西门，西门外皆为贼境，樵苏殆绝，刈禾稼，必布阵于野而收获之。获既失时，所得多空穗。于是泾人有饥忧焉。吐蕃驱掠连云堡之众及邠、泾编户逃窜山谷者，并牛畜万计，悉其众送至弹箜峡。自是泾、陇、邠等贼之所至，俘掠殆尽。是秋，数州人无积聚者，边将唯遣使表贺贼退而已。

十月，吐蕃数千骑复至长武城，韩全义率众御之。韩游瑰之将请以众助之，游瑰不许。及暮，贼退，全义亦引还。自是贼之骑常往来泾、邠之间，诸城西门莫敢启者。贼又修故原州城，其大众屯焉。

四年五月，吐蕃三万余骑犯塞，分入泾、邠、宁、庆、麟等州，焚彭原县廨舍，所至烧庐舍，人畜没者约二三万，计凡二旬方退。陈许行营将韩

全义自长武城率众抗之，无功而还。游瑰素无军政，且疾不能兴，闭城自守，莫敢御也。先是，吐蕃入寇，恒以秋冬，及春则多遇疾疫而退。是来也，方盛暑而无患。盖华人陷者，厚其资产，质其妻子，为戎虏所将而侵轶焉。九月，吐蕃将尚悉董星、论莽罗等寇宁州，节度使张献甫率众御之，斩首百余级，贼转寇麟坊等州，纵掠而去。

五年十月，剑南节度使韦皋遣将王有道等与东蛮两林苴那时、勿邓梦冲等帅兵于故朮州台登北谷大破吐蕃青海、猎城二节度，杀其大兵马使乞臧遮遮、悉多杨朱，斩首二千余级，其投崖谷赴水死者不可胜数，生擒笼官四十五人，收获器械万余事、马牛羊万余头匹。遮遮者，吐蕃骁勇者也，或云尚结赞之子，频为边患。自其死也，官军所攻城栅，无不降下。蕃众日却，数年间，尽复朮州之境。

六年，吐蕃陷我北庭都护府。初，北庭、安西，既假道于回纥朝奏，因附庸焉。蕃性贪狠，征求无度。北庭近羌，凡服用食物所资，必强取之，人不卿生矣。又有沙陀部六千余帐与北庭相依，亦属于回纥。回纥肆其抄夺，尤所厌苦。其葛禄部及白服突厥素与回纥通和，亦憾其夺掠，因吐蕃厚赂见诱。遂附之。于是吐蕃率葛禄、白服之众，去岁各来寇北庭，回纥大相颉干迦斯率众援之，频战败绩，吐蕃攻围颇急。北庭之人既苦回纥，是岁乃举城降于吐蕃，沙陀部落亦降焉。北庭节度使杨袭古与麾下二千余人出奔西州，颉干迦斯不利而还。七年秋，又悉其丁壮五六万人，将复北庭，仍召袭古偕行，俄为吐蕃、葛禄等所击，大败，死者大半。颉干迦斯给之曰：“且与我同至牙帐，当送君归本朝也。”袭古从之，及牙帐，留而不遣，竟杀之。自是安西阻绝，莫知存否，唯西州之人，犹固守焉。颉干迦斯既败恤，慕禄之众乘胜取回纥之浮图川，回纥震恐，悉迁西北部落羊马于牙帐之南以避之^①。

八年四月，吐蕃寇灵州，掠人畜，攻陷水口城，进围州城，塞水口及支渠以营田。诏河东、振武分兵为援，又分神策六军之卒三千余人戍于定远、怀远二城，上御神武楼劳遣之，吐蕃引去。六月，吐蕃数千骑由青石岭寇泾州，掠田军千余人还，及连云堡，守捉使唐朝臣遣兵出战，大将

王进用死之。九月，西川节度使韦皋攻吐蕃之维州，获大将论赞热及首领献于京师。十一月，山南西道节度严震击破吐蕃于芳州及黑水堡，焚其积聚，并献首虏。

九年二月，诏城盐州。是州先为吐蕃所毁，自此塞外无保障。灵武势隔，西逼鄜坊，甚为边患，故命城之，二旬而毕。又诏兼御史大夫纥干遂统兵五千与兼御史中丞杜彦光之众戍之。是役也，上念将士之劳，厚令度支供给。又诏泾原、剑南^②、山南诸军深讨吐蕃，以分其力。由是板筑之际，虏无犯塞者。及毕，中外咸称贺焉。是月，西川韦皋献获吐蕃首虏、器械、旗帜、牛马于阙下。初，将城盐州，上命皋出师以分吐蕃之兵，皋遣大将董勔、张芬出西山及南道，破俄和城、通鹤军。吐蕃南道元帅论莽热率众来援，又破之，杀伤数千人，焚定廉故城。凡平栅堡五十余所。

注：①西北部落“北”字各本原作“州”，据本书卷一九五《回纥传》《通鉴》卷二二三改。②剑南各本原作“湖南”，据《新书》卷二一六《吐蕃传》《通鉴》卷二三四改。

十年，南诏蛮蒙异牟寻大破吐蕃于神川，使来献捷，语在《南诏传》。十一年八月，黄少卿攻陷欽、横、浔、贵四州，吐蕃渠帅论乞髯荡没藏悉诺律以其家属来降，明年并以为归德将军。十二年九月，吐蕃寇庆州及华池县，杀伤颇甚。十三年正月，邢君牙奏请于陇州西七十里筑城以备西戎，名永信城。吐蕃赞普遣使农桑昔赍表请修和好，边将以闻。上以其豺狼之性，数负恩背约，不受表状，任其使却归。五月十七日，吐蕃于剑南山、马岭三处开路，分军下营，仅经一月，进军逼台登城。雋州刺史曹高任率领诸军将士并东蛮子弟合势接战，自朝至午，大破之，生擒大笼官七人，阵上杀获三百人，馀被刀箭者不可胜纪，收获马畜五百余头匹、器械二千余事。十四年十月，夏州节度使韩全义破吐蕃于盐州西北。十六年六月，盐州破吐蕃于乌兰桥下^①。

十七年七月，吐蕃寇盐州，又陷麟州，杀刺史郭锋，毁城隍，大掠居人，驱党项部落而去。次盐州西九十里横槽烽顿军，呼延州僧延素辈七人，称徐舍人召。其火队吐蕃没勒遽引延素等疾趋至帐前，皆马革楷手，

毛绳縲颈。见一吐蕃年少，身長六尺余，赤髭大目，乃徐舍人也。命解缚，坐帐中，曰：“师勿惧。余本汉人，司空英国公五代孙也。属武后斫丧王室，高祖建义中泯，子孙流播绝域，今三代矣。虽代居职位，世掌兵要，思本之心无涯，顾血族无由自拔耳。此蕃、汉交境也，复九十里至安乐州，师无由归东矣。”延素曰：“僧身孤亲老，恳祈全活。”悲不自胜。又曰：“余奉命率师备边，因求资食，遂涉汉疆，辗转东进至麟州。城既无备，援兵又绝，是以拔之。知郭使君是勋臣子孙，必将活之，不幸为乱兵所害。”适有飞鸟使至，飞鸟，犹中国驿骑也，云：“术者上变，召军亟还。”遂归之。时诏韦皋分遣偏将勒步骑合二万，出成都西山，南北九道并进，逼栖鸡、老翁、故维州、保州、松州诸城，以纾北边故也。

九月，韦皋大破吐蕃于维州。十八年正月，韦皋擒吐蕃大首领论莽热来献，赐崇仁里宅以居之。莽热，吐蕃内大相也。先贞元十六年，韦皋累破吐蕃二万余众于黎州、嵩州，吐蕃遂大搜阅，筑垒造舟，潜谋寇边，皋悉挫之。于是吐蕃酋帅兼监统曩贡、腊城等九节度娑、笼官马定德与其大将八十七人，举部落来降。定德有计画，娑习知兵法及山川地形，吐蕃每用兵，定德常乘驿计议，诸将禀其成算。至是自以边功不立，惧得罪而归心焉。其明年，吐蕃昆明城管磨些蛮千余户又来降。吐蕃以其众外溃，遂北寇灵、朔，陷麟州。诏韦皋出兵成都西山以纾北边。皋遂命镇静军兵马使陈洎等统兵万人出三奇路^②，威戎军使崔尧臣率兵一千出龙溪石门路南，维保二州兵马使仇冕、保霸两州刺史董振等，率兵二千进逼吐蕃维州城中，北路兵马使邢玘并诸州刺史董怀愕等率兵四千进攻栖鸡、老翁等城，都将高倜、王英俊等率兵二千进逼故松州，陇东路兵马使元膺并诸将郝宗等复分兵八千出南道雅、邛、黎、嵩等路。又令邛州镇南军使、御史大夫韦良金发镇兵一千三百续进，雅州经略使路惟明与三部落主赵日进等率兵三千进攻逋租、偏松等城，黎州经略使王有道率三部落郝金信等二千过大渡河深入吐蕃界，嵩州经略使陈孝阳与行营兵马使何大海、韦义等及磨些蛮三部落主苴那时率兵四千进攻昆明、诺济城。自八月至于十二月，累破十六万众，拔其七城、五军镇，受降三千余户，生

擒六千余人，斩首一万余级，遂围维州。救军再至，转战千余里，吐蕃连败，灵、朔之寇引众南下。于是赞普遣莽热以内大相兼东境五道节度兵马使、都统群牧大使率杂虏十万众，来解维州之围。王师万余众，据险设伏以待之。先以千人挑战，莽热见我师之少也，悉众来追，入于伏中，请将四面疾击，遂擒莽热，虏众大溃。

注：①盐州《新书》卷二一六《吐蕃传》《通鉴》卷二三五均作“灵州”。②陈洎：“洎”字《闻》本原无，殿、《惧盈齐》、局、《广》本均作“洎”，据本书卷一四〇《韦皋传》《册府》卷九八七改。

十九年五月，吐蕃使论颊热至。六月，以右龙武大将军薛亓兼御史大夫，使于吐蕃。二十年三月上旬，赞普卒，废朝三日，命工部侍郎张荐吊祭之。赞普以贞元十三年四月卒，长子立；一岁卒，次子嗣立。命文武三品以上官吊其使。四月，吐蕃使臧河南观察使论乞冉及僧南拔特计波等五十四人来朝。十二月，遣使论袭热、郭志崇来朝。二十一年二月，顺宗命佐金吾卫将军、兼御史中丞田景度持节告哀于吐蕃，以库部员外郎、兼御史中丞熊执易为副使。七月，吐蕃使论悉诺等来朝。永贞元年十月，赞普使论乞缕勃藏来贡，助德宗山陵金银、衣服、牛马等。十一月，以卫尉少卿、兼御史中丞侯幼平充入蕃告册立等使。

元和元年正月，福建道送到吐蕃生口十七人，诏给递乘放还蕃。六月，遣使论勃藏来朝。五年五月，遣使论思耶热来朝，并归郑叔矩、路泌之柩及叔矩男文延等一十三人。叔矩、泌，平凉之盟陷焉，凡二十余年，竟不屈节，因没于蕃中，至是请和，故归之。六月，命宰相杜佑等与吐蕃使议事中书令厅，且言归我秦、原、安乐州地。七月，遣鸿胪少卿、摄御史中丞李钰为人蕃使^①，丹王府长史、兼侍御史吴晕副之。六年至十年，遣使朝贡不绝。十二年四月，吐蕃以赞普卒来告，以右卫将军乌重珣兼御史中丞，充吊祭使，殿中侍御史段钧副之。

十三年十月，吐蕃围我宥州、凤翔，上言遣使修好。是月，灵武于定远城破吐蕃二万人，杀戮二千人，生擒节度副使一人、判官长行三十九人，获羊马甚众。平凉镇遏使郝玘破二万余众，收复原州城，获羊马不知

其数。夏州节度田缙于灵武亦破三千余人。十一月，盐州上言：吐蕃入河曲，夏州破五万余人。灵武破长乐州罗城，焚其屋宇器械。西川节度使王播攻拔峨和、栖鸡等城。

十四年正月，敕曰：“朕临御万邦，推布诚信。西戎纳款，积有岁时，中或亏违，亦尝苞贷。我有殊德，宁不是思，重译贡珍，道途相继，申恩示礼，曾无阙焉。昨者蕃使奉章，又至京辇，将君长之命，陈和好之诚。临轩召见，馆饩加厚，复以信币，谕之简书。亦既言旋，才及近甸，遽闻蚁聚，来犯封陲，河曲之间，颇为暴扰。背惠弃约，斯谓无名，公议物情，咸请诛绝。朕深惟德化之未被，岂虑夷俗不之宾，其国失信，其使何罪！释其维繫以遂性，示之弘覆以忘怀。予衷苟孚，庶使知感。其蕃使论矩立藏等并后般来使，并宜放归本国。仍委凤翔节度使以此意晓喻。”

八月，吐蕃营于庆州方渠，大军至河州界。十月，吐蕃节度论三摩及宰相尚塔藏、中书令尚绮心儿共领军约十五万众，围我盐州数重，党项首领亦发兵驱羊马以助。阅历三旬，贼以飞梯、鹅车、木驴等四面齐攻，城欲陷者数四。刺史李文悦率兵士乘城力战，城穿坏不可守，撤屋板以御之，昼夜防拒，或潜兵斫营，开城出战，约杀贼万余众。诸道救兵无至者。凡二十七日，贼乃退。

十五年二月，以秘书少监兼御史中丞田洎入吐蕃告哀，并告册立。三月，攻掠我青塞堡。七月，遣使来吊祭。十月，侵逼泾州。命右军中尉梁守谦充左右神策、京西、京北行营都监，统神策兵四千人，并发八镇全军往救援。以太府少卿、兼御史中丞邵同持节入吐蕃，充答请和好使，贬前入吐蕃使、秘书少监田洎郴州司户^⑧。初，洎入蕃为吊祭使，蕃请于长武城下会盟，洎懦怯，恐不得还，唯唯而已。至是西戎入寇，且曰：“田洎许我统兵马赴盟誓。”遂贬之。戎人实以边将扰之致忿，徒假洎为辞也。泾州上言：“吐蕃大将并退。”于是罢神策行营兵。自田缙统夏州，以贪狼侵扰，党项苦之，屡引西戎犯塞。及是大兵入寇，边将郝玘数袭击蕃垒，杀戮甚众，邠州李光颜复以全师而至，戎人惧而退。盖田缙始生国患，而赖光颜、郝玘之驱戮也。十一月，夏州节度使李祐自领兵赴长泽镇，灵武节

度使李昕自领兵赴长乐州，并奉诏讨吐蕃也。十二月，吐蕃千余人围乌、白池。

注：①李铈：各本原作“李铭”，据《册府》卷九八〇、《新书》卷二一六下《吐蕃传》改。②郴州司户：“郴”字各本原作“柳”，据《新书》卷二一六下《吐蕃传》《通鉴》卷二四一改。

长庆元年六月，犯青塞堡，以我与回纥和亲故也。盐州刺史李文悦发兵进击之。九月，吐蕃遣使请盟，上许之。宰相欲重其事，请告太庙，太常礼院奏曰：“谨按肃宗、代宗故事，与吐蕃会盟，并不告庙。唯德宗建中末，与吐蕃会盟于延平门，欲重其诚信，特令告庙。至贞元三年，会于平凉，亦无告庙之文。伏以事出一时，又非经制，求之典礼，亦无其文。今谨参详，恐不合告。”从之。乃命大理卿、兼御史大夫刘元鼎充西蕃盟会使，以兵部郎中、兼御史中丞刘师老为副，尚舍奉御、兼监察御史李武、京兆府奉先县丞兼监察御史李公度为判官。十月十日，与吐蕃使盟，宰臣及右仆射、六曹尚书、中执法、太常、司农卿、京兆尹、金吾大将军皆预焉。

其词曰：维唐承天，抚有八紘，声教所臻，靡不来庭。兢业齐栗，惧其陨颠，缵武绍文，叠庆重光，克彰浚哲，罔忝洪绪，十有二叶，二百有四载。则我太祖，权明号而建不拔，铺鸿名而垂永久，类上帝以答嘉应，享皇灵以酬景福，曷有怠已？越岁在癸丑冬十月癸酉，文武孝德皇帝诏丞相臣植、臣播、臣元颖等，与大将和蕃使礼部尚书论讷罗等^①，会盟于京师，坛于城之西郊，坎于坛北。凡读誓、刑牲、加书、复壤、陟降、周旋之礼，动无违者，盖所以偃兵息人，崇姻继好，懋建远略，规恢长利故也。

原夫昊穹上临，黄祇下载，茫茫蠢蠢之类，必资官司，为厥宰臣，苟无统纪，则相灭绝。中夏见管，维唐是君；西裔一方，大蕃为主。自今而后，屏去兵革，宿忿旧恶，廓焉消除，追崇舅甥，曩昔结援。边堠撤警，戍烽韬烟，患难相恤，暴掠不作，亭障瓯脱，绝其交侵。襟带要害，谨守如故，彼无此诈，此无彼虞。呜呼！爱人为仁，保境为信，畏天为智，事神为礼，有一不至，搆灾于躬。塞山崇崇，河水汤汤，日吉辰良，奠其两疆，西为大蕃，东实巨唐。大臣执简，播告秋方。

大蕃赞普及宰相钵阐布、尚绮心儿等，先寄盟文要节云：“蕃、汉两邦，各守见管本界，彼此不得征，不得讨，不得相为寇讎，不得侵谋境土。若有所疑，或要捉生问事，便给衣粮放还。”今并依从，更无添改。

预盟之官十七人，皆列名焉。其刘元鼎等与论讷罗同赴吐蕃本国就盟，仍敕元鼎到彼，令宰相已下各于盟文后自书名。灵武节度使李进诚于大石山下破吐蕃三千骑^②。

注：①与大将和蕃使：《册府》卷九八一作“与大蕃合使”是。②大石山各本原作“太谷山”，据《新书》卷二一六下《吐蕃传》《通鉴》卷二四二改。

二年二月，遣使来请定界。六月，复遣使来朝。盐州奏：“吐蕃千余人入灵武界，遣兵逐便邀截。”又言：“擒得与党项送书信吐蕃一百五十人。”是月刘元鼎自吐蕃使回，奏云：“去四月二十四日到吐蕃牙帐，以五月六日会盟讫。”初，元鼎往来蕃中，并路经河州，见其都元帅、尚书令尚绮心儿云：“回纥，小国也。我以丙申年逾碛讨逐，去其城郭二日程，计到即破灭矣，会我闻本国有丧而还。回纥之弱如此，而唐国待之厚于我，何哉？”元鼎云：“回纥于国家有救难之勋，而又不曾侵夺分寸土地，岂得不厚乎！”是时元鼎往来，渡黄河上流，在洪济桥西南二千余里，其水极为浅狭，春可揭涉，秋夏则以船渡。其南三百余里有三山，山形如镞，河源在其间，水甚清冷，流经诸水，色遂赤，续为诸水所注，渐既黄浊。又其源西去蕃之列馆约四驿，每驿约二百余里。东北去莫贺延碛尾，阔五十里，向南渐狭小，北自沙州之西。乃南入吐浑国，至此转微，故号碛尾。计其地理，当剑南之直西。元鼎初见赞普于闷惧卢川，盖赞普夏衙之所，其川在逻娑川南百里，臧河之所流也。时吐蕃遣使论悉诺息等随元鼎来谢，命太仆少卿杜载使以答之。

三年正月，遣使论答热来朝贺。四年九月，遣使求《五台山图》。十月，贡牦牛及银铸成犀牛、羊、鹿各一。宝历元年三月，遣使尚绮立热来朝，且请和好。九月，遣光禄卿李锐为使以答之。太和五年至八年。遣使朝贡不绝，我亦时遣使报之。开成元年、二年，皆遣使来。会昌二年，赞普

卒。十二月，遣论赞等来告哀，诏以将作少监李璟吊祭之。大中三年春，宰相尚恐热杀东道节度使，以秦、原、安乐等三州并石门、木峽等七关款塞，泾原节度使康季荣以闻，命太仆卿陆耽往劳焉。其年七月，河、陇耆老率长幼千余人赴阙，上御延喜楼观之，莫不欢呼忭舞，更相解辫，争冠带于康衢，然后命善地以处之，观者咸称万岁。

史臣曰：戎狄之为患也久矣！自秦、汉已还，载籍大备，可得而详也。但世罕小康，君无常圣，我衰则彼盛，我盛则彼衰，盛则侵我郊圻，衰则服我声教。怀柔之道，备预之方，儒臣多议于和亲，武将唯期于战胜，此其大较也。彼吐蕃者，西陲开国，积有岁年，蚕食邻蕃，以恢土宇。高宗朝，地方万里，与我抗衡，近代以来，莫之与盛。至如式遏边境，命制出师，一彼一此，或胜或负，可谓劳矣。迨至幽陵盗起，乘輿播迁，戍卒咸归，河、湟失守，此又天假之也。自兹密迩京邑，时纵寇掠，虽每遣行人，来修旧好，玉帛才至于上国，烽燧已及于近郊，背惠食言，不顾礼义，即可知也。夫要以神明，贵其诚信，平凉之会，畜其诈谋，此又不可以忠信而御也。孔子曰：“夷狄之有君，不如诸夏之亡也。”诚哉是言！

赞曰：西戎之地，吐蕃是强。蚕食邻国，鹰扬汉疆。乍叛乍服，或弛或张。礼义虽掇，其心豺狼。

《汉书·地理志》

武都郡，武帝元鼎六年设置。王莽时叫乐平郡^①。有五万一千三百七十六户，二十三万五千五百六十口人。有九个县：武都县，东汉水接受氐道水的水源，一叫沔水，经过江夏，称为夏水，流入长江。天池大泽在县的西面。王莽时叫循虜县^②。上禄县，故道县，王莽时叫善治县。河池县，泉街水向南到沮县流入汉水，行程五百二十里。王莽时叫乐平亭县^③。平乐道县，沮县，沮水发源于东狼谷，向南到沙羨县的南面流入长江，经过五个郡，行程四千里，是荆州川^④。嘉陵道县，循成道县，下辨道县。王莽时叫杨德县^⑤。

注：①应劭曰：“故白马氐羌。”②师古曰：“以有天池大泽，故谓之都。”③师古曰：“《华阳国志》云一名仇池，地方百顷。”④师古曰：“沮音千余反。羨音夷。”⑤师古曰：“辨音步见反。”

陇西郡，秦时设置，王莽时叫厌戎郡。^①有五万三千九百六十四户，二十三万六千八百二十四口人。有铁官、盐官。有十一个县：狄道县，白石山在东。王莽时叫操虜县^②。上邦县^③，安故县，氐道县，《禹贡》上养水的发源地，到武都就成为汉水。王莽时叫亭道县^④。首阳县，《禹贡》上的乌鼠同穴山在西南，是渭水的发源地，向东到船司空进入黄河，经过四个郡，行程一千八百七十里，是雍州的灌渠。予道县，王莽时叫德道县。大夏县，王莽时叫顺夏县。羌道县，羌水流出塞外，向南到阴平县流入白水，经过三个郡，行程六百里^⑤。襄武县，王莽时叫相桓县。临洮县，洮水流出西羌中，向北到枹罕东面流入河。《禹贡》上的西顷山在县西，南部由都尉治理^⑥。西县。《禹贡》上的蟠冢山，是西汉水的发源地，向南流入广汉县的白水，向东南到江州县流入长江，经过四个郡，行程二千七百六十里。王莽时叫西治县。

注：①应劭曰：“有陇坻，在其西也。”师古曰：“陇坻谓陇阪，即今之陇山也。此郡在陇之西，故曰陇西，坻音丁计反，又音底。”②师古曰：“其地有狄种，故云狄道。”③应劭曰：“《史记》故邽戎邑也。”师古曰：“邽音圭。”④师古曰：“氐，夷种名也。氐之所居，故曰氐道，氐音丁溪反。养音戈向反，字本作漾。”⑤师古曰：“《水经》云羌水出羌中参谷。”⑥师古曰：“洮音吐高反。枹读曰肤。顷读曰倾。”

金城郡，昭帝始元六年设置。王莽时叫西海郡^①。有三万八千四百七十户，十四万九千六百四十八口人。有十三个县：允吾县，乌亭逆水流出参街谷，向东到枝阳县流入湟水。王莽时叫修远县^②。浩亶县，浩亶水流出西塞外，向东到允吾县流入湟水。王莽时叫兴武县^③。令居县，湟水流出西北塞外，到县的西南，流入郑伯津。王莽时叫罕虏县^④。枝阳县，金城县，王莽时叫金屏县。榆中县，枹罕县^⑤，白石县，离水流出西塞外，向东到枹罕县流入黄河。王莽时叫顺砾县^⑥。河关县，积石山在西南羌中。黄河水在塞外流动，向东北流入塞内，到章武县流入大海，经过十六个郡，行程九千四百里。破羌县，宣帝神爵二年设置。安夷县，允街县，宣帝神爵二年设置。王莽时叫修远县^⑦。临羌县。西北到塞外，有西王母石室、仙海、盐池。北面则是湟水的发源地，向东到允吾县流入黄河。西面有须抵池，有弱水、昆仑山祠。王莽时叫盐羌县^⑧。

注：①应劭曰：“初筑城得金，故曰金城。”臣瓚曰：“称金，取其坚固也，故《墨子》曰‘虽金城汤池’。”师古曰：“瓚说是也。一云，以郡在京师之西，故谓金城。金，西方之行。”②应劭曰：“允音松。”③孟康曰：“浩亶音合门。”师古曰：“浩音诘。浩，水名也。亶者，水流峡山，岸深若门也。《诗》《大雅》曰‘鳧翳在亶’，亦其义也。”④孟康曰：“令音连。”师古曰：“令音零。”⑤应劭曰：“故罕羌侯邑也。枹音肤。”师古曰：“读曰肤，本枹鼓字也。其字木。”⑥应劭曰：“白石山在东。”⑦孟康曰：“允音钤。”⑧师古曰：“阯云西有(毕)[卑]和羌，即献王莽地为西海郡者也。抵音丁礼反。”

天水郡，武帝元鼎三年设置。王莽时叫填戎郡。明帝改为汉阳^①。有六万三百七十户，二十六万一千三百四十八口人。有十六个县：平襄县，王

莽时叫平相县^②。街泉县，戎邑道县，王莽时叫填戎亭县。望垣县，王莽时叫望亭县。罕干县^③，绵诸道，阿阳县，略阳道县，冀《禹贡》上的朱圉山在县南的梧中聚。王莽时叫冀治县^④。勇士县，附属侯国的都尉治理满福。王莽时叫纪德县^⑤。成纪县，清水县，王莽时叫识睦县。奉捷县，陇县^⑥，獯道县，骑都尉治理密艾亭^⑦。兰干县。王莽时叫兰盾县。

注：①师古曰：“《秦州地记》云郡前湖水冬夏无增减，因以名焉。填音竹真反。其后并同。”②师古曰：“阨駟云故襄戎邑也。”③应劭曰：“干音羌肩反。”师古曰：“本破罕开之羌，处其人于此，因以名云。”④师古曰：“《续汉郡国志》云有缙群山、落门聚。圉读与图圉同。”⑤师古曰：“即今土俗呼为健士者也。隋室之初避皇太子讳，因而遂改。”⑥师古曰：“今呼陇城县者也。”⑦应劭曰：“獯，戎邑也，音完。”

武威郡，原来匈奴休屠王的地方。武帝太初四年设置。王莽时叫张掖郡^①。有一万七千五百八十一户，七万六千四百一十九口人。有十个县：姑臧县，谷水发源于南山，向北到武威县流入大海，行程七百九十里。张掖县，武威县，休屠泽在东北，古代文字记载认为是猪壁泽。休屠县，王莽时叫晏然县。都尉治理熊水障。北部都尉治理休屠城。揶次县，王莽时叫播德县^②。鸾乌县，扑刺县，王莽时叫敷虏县^③。媪围县，苍松县，柑陕水发源于南山，向北到揶次县流入大海。王莽时叫射楚县。宣威县。

注：①师古曰：“休音许虬反。屠音直闾反。其后并同。”②孟康曰：“揶音子如反。次音咨，诸本作恣恣。”③孟康曰：“音蒲环。”

张掖郡，以前匈奴昆邪王的地方，武帝太初元年设置。王莽时叫设屏县^①。有二万四千三百五十二户，八万八千七百三十一口人。有十个县：觥得县，千金渠向西到乐涓流入湖泽中。羌谷水从羌中流出，向东北到居延县流入大海，经过两个郡，行程二千一百里。王莽时叫官武县^②。昭武县，王莽时叫渠武郡。删丹县，桑钦认为从这里开始疏通弱水，向西到酒泉合黎。王莽时叫贯虏县。氐池县，王莽时叫否武。屋兰县，王莽时叫传武。日勒县^③，都尉的治所在泽索谷。王莽时叫勒治。骊靬县，王莽时叫揭虏^④。番和县，农都尉治理。王莽时叫罗虏县^⑤。居延县，居延泽在东

北,古文记载认为是流沙。都尉治理。王莽时叫居成县^⑥。显美县。

注:①应劭曰:“张国臂城掖,故曰张掖也。”师古曰:“昆音胡门反。”
②应劭曰:“觶得渠西入泽羌谷。”孟康曰:“觶音鹿。”师古曰:“孟音是也。涪音官。其下并同”③师古曰:“泽音铎。索音先各反。”④李奇曰:“音迟虔。”如淳曰:“音弓鞞。”师古曰:“骠音力迟反。鞞音虔是也。今其土俗人呼骠鞞,疾言之曰力虔。揭音其揭反。”⑤如淳曰:“番音盘。”⑥师古曰:“阹骠武帝使伏波将军路博德筑遮虏障于居延城。”

酒泉郡,武帝太初元年设置。王莽时叫辅平郡^①。有一万八千一百三十七户,七万六千七百二十六口人。有九个县:禄福县,呼蚕水发源于南羌中,向东北到会水流入羌谷。王莽时叫显德县。表是县,王莽时叫载武县。乐涪县,王莽时叫乐亭。天阹县^②,玉门县,王莽时叫辅平亭^③。会水县,北部都尉治偃泉障^④。东部都尉治东部障。王莽时叫萧武县^⑤。池头县,绥弥县,乾齐县。西部都尉治西部障。王莽时叫测虏^⑥。

注:①应劭曰:“其水若酒,故曰酒泉也。”师古曰:“旧俗传云城下有金泉,泉味如酒。”②师古曰:“音衣。此地有天阹阪,故以名。”③师古曰:“阹骠云汉罢玉门关屯,徙其人于此。”④师古曰:“阹骠云众水所会,故曰会水。”⑤如淳曰:“今日安弥。”⑥孟康曰:“乾音干。”

敦煌郡,武帝后元年分酒泉郡而设置。正西关外有白龙堆沙,有蒲昌海。王莽时叫敦德郡^①。有一万一千二百户,三万八千三百三十五口人。有六个县:敦煌县,中部都尉治步广侯官。杜林认为是古代瓜州地,出产美瓜。王莽时叫敦德县^②。冥安县,南面籍端水发源于南羌中,向西北流入湖泽,灌溉民田^③。效谷县^④,渊泉县^⑤,广至县,宜禾都尉治昆仑障。王莽时叫广桓县。龙勒县。有阳关、玉门关,都由都尉治理。氐置水发源于南羌中,向东北流入湖泽,灌溉民田。

注:①应劭曰:“敦,大也。煌,盛也。敦音屯。”②师古曰:“即《春秋》《左氏传》所云‘允姓之戎居于瓜州’者也。其地今犹出大瓜,长者狐入瓜中食之,首尾不出。”③应劭曰:“冥水出北,入其泽。”④师古曰:“本渔泽障也。桑钦说孝武元封六年济南崔不意为鱼泽尉,教力田,以勤效得谷,

因立为县名。”⑤师古曰：“阩邰云地多泉水，故以为名。”

安定郡，武帝元鼎三年设置。有四万二千七百二十五户，十四万三千二百九十四口人。有二十一个县：高平县，王莽时叫铺睦县。复累县①，安俾县②，抚夷县，王莽时叫抚宁县。朝那县，有端旬祠十五所，胡人的巫祝。还有湫渊祠③。泾阳县，杆头山在西面，《禹贡》上泾水的发源地，向东南到阳陵流入渭水，经过三个郡，行程一千零六十里，是雍州川④。临泾县，王莽时叫监泾县。鹵县，濯水从西面流出⑤。乌氏县，乌水从西面流出，向北流入黄河。都卢山在西面。王莽时叫乌亭县⑥。阴密县，《诗》上的密人国。有器安亭县⑦。安定县，参缣县，主骑都尉治理⑧。三水县，附国都尉治理。有盐官。王莽时叫广延亭县。阴槃县，安武县，王莽时叫安桓县。祖厉县，王莽时叫乡礼县⑨。爰得县，洴卷县，黄河水分流出成为河沟，向东到富平县流入黄河⑩。彭阳县，鹑阴县，月氏道县。王莽时叫月顺。

注：①师古曰：“复音服。累音力追反。”②孟康曰：“俾音卑。”③应劭曰：“《史记》故戎那邑也。”师古曰：“湫音子由反。”④师古曰：“开音苦见反，又音牵。此山在今灵州东南，土俗语讹谓之汧屯山。”⑤师古曰：“濯音其于反。”⑥师古曰：“氏音支。”⑦师古曰：“即《诗》《大雅》所云‘密人不恭，敢距大邦’者。”⑧师古曰：“缣音力全反。”⑨应劭曰：“祖音（置）[置]。”师古曰：“厉音赖。”⑩应劭曰：“洴音旬。卷音简。”

北地郡，秦时设置。王莽时叫威成郡。有六万四千四百六十一户，二十一万零六百八十八口人。有十九个县：马领县①，直路县，沮水向西流出，向东流入洛水。灵武县，王莽时叫威成亭。富平县，北部都尉治神泉障。浑怀都尉治塞外的浑怀障。王莽时叫特武县②。灵州县，惠帝四年设置。有河奇苑、号非苑。王莽时叫令周县③。洴衍县④，方渠县，除道县，土莽时叫通道县。五街县，王莽时叫吾街县。鹑孤县，归德县，洛水从北面蛮夷中流出，流入黄河。有堵苑、白马苑。回获县，略畔道县，王莽时叫延年道县⑤。泥阳县，王莽时叫泥阴县⑥。郁郅县，泥水从北蛮夷中流出。有牧师苑官。王莽时叫功著县⑦。义渠道县，王莽时叫义沟县。弋居县，有盐官。大要县⑧，廉县。卑移山在西北。王莽时叫西河亭。

注：①师古曰：“川形似马领，故以为名。领，颈也。”②师古曰：“浑音胡昆反。”③师古曰：“苑谓马牧也。水中可居者曰州。此地在河之州，随水高下，未尝沦没，故号灵州，又曰河奇也。二苑皆在北焉。”④应劭曰：“昫音煦。”师古曰：“音香于反。”⑤师古曰：“有略畔山，今在庆州界，其土俗呼曰洛盘，音讹耳。”⑥应劭曰：“泥水出郁郅北蛮中。”⑦师古曰：“郁音于六反。郅音之日反。”⑧师古曰：“要，音一遥反。”

《后汉书·郡国志》

陇西郡(秦置。雒阳西二千二百二十里。)十一城,户五千六百二十八,口二万九千六百三十七。

狄道安故氐道(养水出此^①)。首阳(有鸟鼠同穴山^②,渭水出^③)。大夏襄武(有五鸡聚。)临洮(有西顷山^④)。枹罕(故属金城。)白石(故属金城)鄯河关(故属金城。积石山在西南,河水出。)

注:①《巴汉志》曰:“汉水二源,东源出县之养山,名养。”《南都赋》注曰:“汉水源出陇西,经武都至武关山,历南阳界,出沔口入江。”《巴汉志》曰:“西汉,陇西幡冢山,会白水经葭萌入汉。始源曰沔,故曰汉沔。”②《尔雅》曰:“其鸟为𪚩。其鼠为𪚩,如人家鼠而短尾。𪚩似𪚩而小,黄黑色。穴地入三四尺,鼠在内,鸟在外。”孔安国《尚书传》曰:“共为雌雄。”张氏《地理记》云不为牝牡。《山海经》曰:“山多白虎、白玉。”③《地道记》曰:“有三危,三苗所处。”④《前志》曰在县西。本传(县)马防筑索西城。

汉阳郡(武帝置,为天水,永平十七年更名。在雒阳西二千里^①)十三城,户二万七千四百二十三,口十三万一百三十八。

注:①《秦州记》曰:“中平五年,分置南安郡。”《献帝起居注》曰:“初平四年十二月,已分汉阳、上郡为永阻,以乡亭为属县。”

冀^①(有朱圉山^②。有缙群山。有雒门聚^③)。望恒阿阳略阳(有街泉亭^④)。勇士成纪^⑤陇(刺史治^⑥)。有大坂名陇坻(𪚩坻聚有秦亭^⑦)。獯道^⑧兰干平襄显亲上邽(故属陇西^⑨)。西(故属陇西。有幡冢山,西汉水^⑩)。

注:①《史记》曰:“秦武公伐冀戎,县。”②《前志》曰在县南。③来歙破隗嚣处。④街(水)[泉]故县,省。⑤《帝王世记》曰:“庖犧氏生于成纪。”⑥《汉官》云:“去雒阳二千一百里。”⑦《三秦记》:“其坂九回,不知高几许,欲上者七日乃越。高处可容百余家,清水四注下。”郭仲产《秦州

记》曰：“陇山东西百八十里。登山岭，东望秦川四五百里，极目泯然。山东人行役升此而顾瞻者，莫不悲思。故歌曰：‘陇头流水，分离四下。念我行役，飘然旷野。登高远望，涕零双堕’。”⑧秦之先封起于此。⑨《史记》秦孝公西斩戎王。⑩《秦州记》曰：“县北有利山，川中平地有土堆，高五丈，生细竹，翠茂殊常。二杨树大数十围，百姓祀之。”⑪《史记》曰：“申命和仲居西土。”徐广曰：“今之西县。”郑玄曰：“西在陇西(之)西，今谓之(人)充山。”

武都郡(武帝置。雒阳西一千九百六十里。)七城，户二万一百二，口八万一千七百二十八。

下辨^①武都道^②上禄故道^③河池^④沮(沔水出东狼谷。)羌道

注：①有赤亭。②《华阳国志》曰：“有天池泽。”③干宝《搜神记》曰：“有(奴)特祠，秦置旄头骑起此。”④《地道记》曰：“有泉街水。”

金城郡(昭帝置。雒阳西二千八百里。)十城，户三千八百五十八，口万八千九百四十七。

允吾^①浩亶^②令居枝阳金城榆中临羌(有昆仑山。)破羌安夷允街

注：①《西羌传》有唐谷。秦州有牢北山，傍有三窟。②有雒都谷，马武破羌处。

安定郡(武帝置。雒阳西千七百里。)八城，户六千九十四，口二万九千六十。

临泾^①高平(有第一城^②)。朝那^③乌枝(有瓦亭^④，出薄落谷^⑤)。三水^⑥阴盘^⑦彭阳鹑觚(故属北地。)

注：①《谢承书》曰：“宣仲为长史，民叛留，改曰宜民。”见《李固传》，而志无此改，岂承之妄乎？②高峻所据。③有湫渊，方四十里，停不流，冬夏不增减，不生草木。郭璞注《山海经》曰：“泾水出县西(丹)头山，入渭。”④牛邯军处。⑤本传有龙池山，《地道记》曰乌水出。⑥有左谷，卢芳所居。⑦旧有阴密县，未详所并。杜预曰：“定安阴密县，古密须国。”《史记》曰，秦迁白起于阴密。《山海经》曰：“温水出崦嵫山，在临汾南入河，华阳北。”郭璞曰：“水常暖。”

北地郡(秦置。雒阳西千一百里。)六城,户三千一百二十二,口万八千六百三十七。

富平泥阳(有五柞亭^①)弋居(有铁。)廉^②参繇(故属安定^③)。灵州

注:①《地道记》曰:“泥水出郁郅北蛮中。”②《前志》卑移山在西北。

③有青山。《谢沈书》:“属国降羌胡数千人,居山田畜。”

武威郡(故匈奴休屠王地,武帝置。雒阳西三千五百里。)十四城,户万四十二,口三万四千二百二十六。

姑臧张掖武威休屠掾次鸾鸟朴剡媪围宣威仓松鹑阴(故属安定。)租厉(故属安定。)显美(故属张掖。)左骑(千人官。)

张掖郡(故匈奴昆邪王地,武帝置。雒阳西四千二百里。献帝分置西郡。)八城,户六千五百五十二,口二万六千四十。

觶得昭武删丹(弱水出。)氐池屋兰日勒骊轩番和

酒泉郡(武帝置。雒阳西四千七百里。)九城,户万二千七百六。

福禄表氏乐涓玉门^①会水沙头安弥(故曰[绥]弥)乾齐延寿

注:①《博物记》曰:“县南有山,石出泉水,大如管箎,注地为沟。其水有肥,如煮肉洎,羹羹永永,如不凝膏,燃之极明,不可食,县人谓之石漆。”

敦煌郡(武帝置。雒阳西五千里^①)。六城,户七百四十八,口二万九千一百七十。

注:①《耆旧记》曰:“国当乾位,地列艮墟,水有县泉之神,山有鸣沙之异,川无蛇虺,泽无兕虎,华戎所交,一都会也。”

敦煌(古瓜州,出美瓜。)冥安效穀拼泉广至龙勒(有玉门关。)

张掖属国(武帝置属国都尉,以主蛮夷降者。安帝时,别领五城。)户四千六百五十六,口万六千九百五十二。

候官左骑千人司马官千人官

张掖居延属国(故郡都尉,安帝别领一城。)户一千五百六十,口四千七百三十三。

居延(有居延泽,古流沙^①)。右凉州刺史部,郡十二,县、道、候官九

十八^②。

注：①献帝建安末，立为西海郡。②《袁山松书》曰：“兴平元年，分安定鞬觚、右扶风之漆置新平郡。”

《晋书·地理志》

雍州。按《禹贡》黑水、西河之地，舜置十二牧，则其一也。以其四山之地，故以雍名焉。亦谓西北之位，阳所不及，阴气雍阏也^①。《周礼》：西曰雍州。盖并禹梁州之地。周自武王克殷，都于酆镐，雍州为王畿。及平王东迁洛邑，以岐酆之地赐秦襄公，则为秦地，累世都之，至始皇遂平六国。秦灭，汉又都之。及武帝置十三州，其地以西偏为凉州，其余并属司隶，不统于州。后汉光武都洛阳，关中复置雍州。后罢，复置司隶校尉，统三辅如旧。献帝时又置雍州，自三辅距西域皆属焉。魏文帝即位，分河西为凉州，分陇右为秦州，改京兆尹为太守，冯翊、扶风各除左右，仍以三辅属司隶。晋初于长安置雍州，统郡国七，县三十九，户九万九千五百。

注：①阴气雍阏也：“阴”下原有“阳”字。斟注：《类聚》六、《御览》一六四引《太康地志》均无“阳”字。按：无“阳”字是，今据删。

安定郡(汉置。统县七，户五千五百。)临泾，朝那，乌氏，都卢，鹑觚，阴密(殷时密国)，西川。

北地郡(秦置。统县二，户二千六百。)泥阳，富平。

凉州。按《禹贡》雍州之西界，周衰，其地为狄。秦兴美阳甘泉宫，本匈奴铸金人祭天之处。匈奴既失甘泉，又使休屠、浑邪王等居凉州之地。二王后以地降汉，汉置张掖、酒泉、敦煌、武威郡。其后又置金城郡，谓之河西五郡。汉改周之雍州为凉州，盖以地处西方，常寒凉也。地势西北邪出，在南山之间，南隔西羌，西通西域，于时号为断匈奴右臂。献帝时，凉州数有乱，河西五郡去州隔远，于是乃别以为雍州。未又依古典定九州，乃合关右以为雍州。魏时复分以为凉州，刺史领戍已校尉，护西域，如汉故事，至晋不改。统郡八，县四十六，户三万七百。

金城郡(汉置。统县五，户二千。)榆中，允街，金城，白土，浩亶。

西平郡(汉置。统县四,户四千)。西都,临羌,长宁,安夷。

武威郡(汉置。统县七,户五千九百)。姑臧,宣威,揖次,仓松,显美,骊靬,番和。

张掖郡(汉置。统县三,户三千七百)。永平,临泽(汉昭武县,避文帝讳改也^①),屋兰(汉因屋兰名焉)。

注:①避文帝讳改也,“文”,原误作“景”,今改正。

西郡(汉置。统县五,户一千九百。)日勒,删丹,仙提,万岁,兰池(一云兰绝池)。

酒泉郡(汉置。统县九,户四千四百)。福禄,会水,安弥,骅马,乐涪,表氏,延寿,玉门,沙头。

敦煌郡(汉置。统县十二,户六千三百)。昌蒲,敦煌,龙勒,阳关,效谷,广至,宜禾,冥安^②,深泉^③,伊吾,新乡,乾齐。

注:①冥安:“冥”原作“宜”。毕校:应作“冥安”,《元和郡县志》以县界冥水为名。按:毕说是,今据改。下同。②深泉:《考异》“渊泉”作“深泉”,避唐讳。

西海郡(故属)张掖,汉献帝兴平二年,武威太守张雅请置。统县一,户二千五百。)居延(泽在东南,《尚书》所谓流沙也)。

元康五年,惠帝分敦煌郡之宜禾、伊吾、宜安、深泉、广至等五县,分酒泉之沙头县,又别立会稽、新乡,凡八县为晋昌郡。永宁中,张轨为凉州刺史,镇武威,上表请合秦雍流移人于姑臧西北,置武兴郡,统武兴、大城、乌支、襄武、晏然、新鄯、平狄、司监等县。又分西平界置晋兴郡,统晋兴、枹罕、永固、临津、临鄯、广昌、大夏、遂兴、罕唐、左南等县。是时中原沦没,元帝徙居江左,轨乃控据河西,称晋正朔,是为前凉。及张寔,分金城之令居、枝阳二县,又立永登县,合三县立广武郡。张茂分武兴、金城、西平、安故为定州。张骏分武威、武兴、西平、张掖、酒泉、建康、西海、西郡、湟河、晋兴、广武合十一郡为凉州^④,兴晋、金城、武始、南安、永晋、大夏、武成、汉中为河州,敦煌、晋昌、高昌、西域都护、戊己校尉、玉门大护军三郡三营为沙州^⑤。张骏假凉州都督,摄三州。张祚又以敦煌郡为商

州。永兴中，置汉阳县以守牧地，张玄靓改为祁连郡。张天锡又别置临松郡。天锡降于苻氏，其地寻为吕光所据。吕光都于姑臧后，以郭麾言讖，改昌松为东张掖郡。及吕隆降于姚兴，其地三分。武昭王为西凉，建号于敦煌。秃发乌孤为南凉，建号于乐都。沮渠蒙逊为北凉，建号于张掖。而分据河西五郡。

注：①张骏分武威武兴西平张掖酒泉建康西海西郡湟河晋兴广武合十一郡为凉州，原缺“西海”，“广武”误作“须武”，今据《后魏书》张骏传补改。②敦煌晋昌高昌西域都护戊己校尉玉门大护军三郡三营为沙州原缺“高昌”，“戊己”误作“张茂以”，今据《后魏书》张骏传增改。

秦州。按《禹贡》本雍州之域，魏始分陇右置焉，刺史领护羌校尉，中间暂废。及泰始五年，又以雍州陇右五郡及凉州之金城、梁州之阴平，合七郡置秦州，镇冀城。太康三年，罢秦州，并雍州。七年，复立，镇上邽。统郡六，县二十四，户三万二千一百。

陇西郡(秦置。统县四，户三千)。襄武首阳(乌鼠山在东)，临洮，狄道。

南安郡(汉置。统县三，户四千三百)。獮道，新兴，中陶。

天水郡(汉武置，孝明改为汉阳，晋复为天水^①。统县六，户八千五百。)上邽，冀(秦州故居)，始昌。新阳。显新(汉显亲县)，成纪。

注：①晋复为天水，“晋”当做“魏”。魏时有天水郡，见《三国志》《维传》姜及《注》《杨阜传》《曹真传》《张既传》《阎温传》。

略阳郡(本名广魏，泰始中更名焉。统县四，户九千三百二十。)临渭，平襄，略阳，清水。

武都郡(汉置。统县五，户三千)。下辩，河池，沮，武都，故道。

阴平郡(泰始中置。统县二，户三千)。阴平，平广^①。

注：①平广：《考异》《宋志》“平武，蜀立，本曰广武，晋武帝太康元年更名”。此志作“平广”，误。按：广武见《蜀志》《廖化传》；晋改平武，又见《元和郡县志》。

惠帝分陇西之狄道、临洮、河关，又立洮阳、遂平、武街、始兴、第五、真仇六县，合九县置狄道郡，属秦州。张骏分属凉州，又以狄道县立武始郡。江左分梁为秦，寄居梁州，又立氐池为北秦州。

《魏书·地形志》

秦州(治上封城)。领郡三,县十二。

天水郡(汉武帝置,后汉明帝改为汉阳郡,晋复)领县四。上封(前汉属陇西,后汉属汉阳,晋属。犯太祖讳改。有席水)。显亲(后汉属汉阳,晋属,真君八年并安夷,后属)。平泉。当亭(真君八年置)。

略阳郡(晋武帝分天水置)领县五。安戎(前汉曰戎邑,属天水,后汉、晋罢,后改属。有董城。)绵诸(前汉属天水,后汉、晋罢,后复属。有榆亭^①)。陇城(前汉属天水,后汉属汉阳,晋罢,后复属。有陇城、略阳城)。清水(前汉属天水,后汉罢,晋复属)。阿阳(前汉属天水,后属汉阳,晋罢,太和十一年复属)。

汉阳郡(真君七年分天水置)。领县三。

黄瓜(真君八年置。有始昌城)。阳廉(有邓松山)。阶陵。

注:①有榆亭:《水经注》卷一七水篇上:“渭水又东南出桥亭西。”杨疏:“按《地形志》略阳郡绵诸有‘榆亭’,相其地望,即此亭也,乃与此作‘桥’异。据《注》下文东亭水‘亦谓之桥水’,则亭因水得名,作‘桥’是也。在今秦州东。”

南秦州(真君七年置仇池镇,太和十二年为渠州^①,正始初置。治洛谷城)。领郡六,县十八。

天水郡(真君七年置)领县三。水南(郡治。真君二年置)。平泉(真君三年置)。平原。

汉阳郡(真君五年置)。领县二。穀泉。兰仓(郡治。真君三年置。有雷牛山、黄帝洞)。

武都郡(汉武帝置)。领县四。石门(郡治。真君九年置。有羌道城)。白水(真君九年置郡,后改)。东平(真君九年置)。孔提。

武阶郡,领县三。北部。南五部(太和四年置郡,后改)。赤万(太和四年置郡,后改)。

修城郡^②,领县四。平洛(太和四年置)。柏树^③(太和八年置)。下辨(二汉、晋属武都郡,太和四年分属焉)广长(郡治,太和四年置)。

仇池郡,领县二。阶陵(真君四年置。有牛头山)。苍泉(太和四年置)。

注:①太和十二年为渠州:杨校:“渠州无考,《一统志》卷二七七阶州二仇池故城条引作‘梁州’,亦无考。按《魏书氏传》卷一〇一、补杨难当已于刘义隆时拜秦梁二州牧、南秦王。是时南郑之梁州尚为宋有,至太和十二年,梁州亦仍属齐。此改为梁州者,或即以杨氏已为秦梁二州牧,因以立之。厥后夏侯道迁以南郑降魏,故以此地为南秦州,而南郑之梁州如故,后又于巴西置南梁州,于情事颇合。”②修城郡诸本“城”作“武”。温、杨并引《隋志》卷二九顺政郡作“修城”。《隋志》考证云:“《水经注》:卷二〇漾水篇汉水东南,径修城道南。又《周书赵昶传》:卷三三世宗初,凤州人仇周贡、魏兴等反,分兵围广业、修城二郡。又《杜杲传》卷三九世宗初,转修城郡守。据此则《地形志》作‘修武’误也。”按杨说是,今改正。③柏树诸本“柏”作“和”,不成字,局本作“和”。杨校:“《周书》《氏传》卷四九作‘柏树’,《隋志》修城县下同。此‘和’为‘柏’之误。”

泾州(治临泾城)。领郡六,县十七。

安定郡(汉武帝置,太和十一年罢石堂郡,以其县属)。领县五。安定(前汉属,后汉、晋罢,后复,有铜城)。临泾(二汉、晋属。有洪城)。朝那(二汉、晋属。有当原城、胡城)。乌氏^④(二汉、晋属。有岐山、泾乡城、阳邑城、抚夷城)。石堂(有自度山)。

陇东郡,领县三。泾阳(前汉属安定,后汉、晋罢,属,后复^⑤。有薄落山、泾水出焉。白城、方石渊、陇山)。祖居(前汉属,罢,后复,属武威^⑥,晋罢,后复属)。抚夷(前汉属安定,后汉、晋罢,后复属)。

新平郡(后汉献帝建安中置)领县四。白土(二汉属上郡,晋属金城,后属。有歧亭岭)。爰得(前汉属安定,后汉、晋罢,后复属。有邑成、东魏

城。)三水(二汉属安定,晋罢,后复属。有随意城)。高平(二汉属安定,晋罢,后复属,有石门山)。

赵平郡^④,领县二。鹑觚(前汉属山城,后汉、晋属安定,后属^⑤。有孤原、亭^⑥,台山。)东槃[●]。

平凉郡,领县二。鹑阴(郡治。前汉属安定,后汉属武威,晋罢,后复属。有瓦亭^⑧、泾阳^⑨、平凉城。)阴密(前汉属安定,后汉罢,晋复,后属)。

平原郡领县一。阴槃(二汉属安定,晋属京兆,后属。有安城、安武城)。

注:①乌氏:诸本“氏”作“氐”。温校:“《郡国志》五安定郡作‘乌枝’。”按《汉书》卷二八下《地理志》下安定郡“乌氏”,颜注:“氐音支。”本书卷四五《韦閼附梁颖传》称梁嵩遵封“乌氏县开国伯”。这里“氐”字乃“氏”形近而讹,今改正。②泾阳前汉属安定后汉晋罢属后复:按所谓“后汉、晋罢属”,不知属何郡,且既云“罢”,则当“併”或“入”他县,无所谓“属”。疑“属”字在“后复”下,本云:“后汉、晋罢,后复属。”同下抚夷及新平郡爰得、三水、高平诸县例。③祖居前汉属罢后复属武威殿本《考证》云:“祖居,即二汉之祖厉县也,前属安定,后属武威。此注‘前汉属’下似脱‘安定’二字,衍‘罢’字,又讹‘后汉’‘汉’字为‘复’字。”按无“安定”二字,似前汉已有陇东郡,祖厉属之,岂非大谬。《考证》云脱“安定”二字是。但所云“罢,后复,属武威”,“后复”既指后汉复,两汉间或曾罢县,魏收别有所据,不一定衍讹。④赵平郡:诸本“赵”作“随”。温校:“《隋志》卷二九安定郡鹑觚县作‘赵平’,又考《灵征志》卷一一二下景明二年‘赵平郡上言鹑觚县木连理’。此‘随’字误。”杨校引《元和郡县志》卷三泾州灵台县、《太平寰宇记》卷三四邠州宜禄下、《舆地广记》卷一五泾州灵台县并作“赵平郡”,证此《志》“随”字为“赵”之讹。按卷四四《费于附费穆传》以擒梁将曹义宗,“进封赵平郡开国公”。据卷一〇《孝庄纪》,事在永安元年。“随”字讹,今改正。⑤鹑觚前汉属北地后汉晋属安定后属:诸本“觚”作“觚”,“北地”作“山城”,句末无“属”字。杨校:“县,前汉曰鹑孤,属北地,《续汉志》《郡国志》五凉州安定郡、《晋志》卷一四雍州冯翊郡‘孤’作

‘觚’。此误‘觚’为‘觚’，又误‘北地’为‘山城’，‘后’下脱‘属’字。”按杨说是，今从改补。⑥有鹑觚原亭：按《太平寰宇记》卷三四邠州宜禄县下云：“鹑觚原一名浅水原。”“孤”上当是“鹑”字。“亭”连上读，也可能上有脱文。⑦东槃：温校：“当做‘东阴槃’。”无说。按《元和郡县志》卷三邠州宜禄县下云“後魏为东阴槃县”，《太平寰宇记》卷三四宜禄县下引《周地图》记云“后魏孝明熙平二年析鹑觚县置东阴盘县”。则此《志》“东”下当有‘阴’字。⑧有瓦亭：诸本“瓦”作“凡”。按《水经注》卷一七《渭水篇》上云：陇水“东北出陇山，其水西流，右径瓦亭南。隗嚣闻略阳陷，使牛邯守瓦亭，即此亭。一水亦出陇山，东南流，历瓦亭北，又西南合为一水，谓之瓦亭川”。杨《疏》，熊会贞据上引条谓此《志》“凡”乃“瓦”之讹。《元和志》卷三泾州平高县、卷三九秦州陇城县并有“瓦亭故关”，《太平寰宇记》卷三三原州圣高县下同《元和郡县志》。温校亦云：“‘凡亭’为‘瓦亭’之讹。”今改正。⑨泾阳：温校：“‘泾阳’下脱‘城’字。《元和郡县志》：卷三原州泾阳故城在平阳县西四十里。”

河州(有伏乾。阙二字^①。真君六年置镇，后改。治枹罕^②)。领郡四，县十四●。

金城郡(汉昭帝置，后汉建武十三年执陇西^④，孝明复)。领县二。榆中(二汉晋属)。大夏(二汉属陇西，晋属晋兴。皇兴三年改为郡，后复属。有白水、金柳城)。

武始郡(晋分陇西置)。领县三。勇田(真君八年置郡，后改)。狄道(二汉属陇西，晋属)。阳素。

洪和郡，领县三。水池(真君四年置郡，后改)。蓝川(真君八年置郡，后改)。蕈州^⑤(延兴四年置)。

临洮郡(二汉、晋县，属陇西。真君六年改置)。领县三。龙城(太和十年置。石门太和九年置。赤水)。

注：①河州有伏乾阙二字：钱氏《考异》卷三〇云：“按乞伏国仁尝自称河州牧，当云：‘乞伏乾归置’。‘有’盖‘乞’之讹。②枹罕：诸本“枹罕”作“抱至”。温、杨并云“抱至”为“枹罕”之讹。杨校：“《元和郡县志》：卷

三九今河州即汉金城之枹罕县也。又云：太和十六年，改枹罕镇为河州。是后魏河州治枹罕城。此‘枹至’为‘枹罕’之误，又脱‘城’字。”按“枹至”显讹，今改正。下亦当有“城”字，但他处也多此例，今皆不补。③县十四：按合计诸郡所领县只十一，“四”字当讹。④后汉建武十三年执陇西：百衲本所阙字作“执”，不成字。诸本空格或注“阙”字。温校：“据《元和郡县志》卷三九兰州当是‘省入’二字。”杨校亦引《元和郡县志》云“此乃阙‘并’字也。”按所阙止一字，疑杨说是，但与百衲本讹字不类，今从诸本空格。⑤葭州：温校：“《隋志》卷三九枹罕郡下作‘葭川’。考《水经注》：卷二《河水篇》：二‘洮水又北出门峡，历东历川。戴本“东历”作“未厥”，温乃用赵本，葭川水注之。’盖县以水名也。”杨校同。

渭州领郡三，县六。

陇西郡(秦置)。领县二。襄武。首阳。

南安阳郡^①，领县二。桓道。中陶。

广宁郡，领县二。彰。新兴(真君八年罢中陶、祿部、襄武属焉)。

注：①南安阳郡：钱氏《考异》卷三〇云：“此‘阳’字疑衍。《隋志》：卷二九陇西郡陇西县旧曰内陶即中陶，置南安郡。”按《元和郡县志》卷三九渭州陇西县条云：“本汉獮道县也，属天水郡，后汉末于此置南安郡。”《晋书》卷十四秦州有南安郡，统獮道、新兴、中陶三县。“獮”音“桓”。今此南安阳郡统桓道、中陶二县，则郡必因汉晋旧置，何以忽加“阳”字，当如钱说是衍文。

原州(太延二年置镇，正光五年改置，并置郡县。治高平城)。领郡二，县四。

高平郡领县二。高平。里亭。

长城郡领县二。黄石。白池。

凉州(汉置，治陇。神鼎中为镇，太和中复)。领郡十，县二十。户三千二百七十三。

武安郡领县一。户三百七十三。宜盛^②。

临杜郡^③领县二。户三百八十九。安平。和平。

建昌郡领县三。户六百五十七。榆中。治城。蒙水。

番和郡领县二。户一百三十九。彰。燕支。

泉城郡领县一。户七十二。新阳。

武兴郡领县三。户三百八十五。晏然。马城。休屠。

武威郡(汉武帝置)领县二。户三百四十。林中。襄城(有休屠城、武始泽)。

昌松郡领县三。户三百九十七。温泉。搆次^③。莫口。

东泾郡领县一。户一百九十一。台城^④。

梁宁郡领县二。户三百三十一。园池。贡泽。

鄯州郡县阙。

瓜州郡县阙。

注：①宜盛：杨校：“两汉、魏、晋武威郡并有‘宣威县’，此作‘宜盛’，以形近致误。”②临杜郡：诸本“杜”下注一作“社”。杨校：“《太平寰宇记》：卷一五二凉州‘后魏太和中置临松郡，故城在临松山下’。则‘杜’‘社’皆‘松’字之误。”按《隋书》卷三九张掖郡张掖县云：“又有临松县，后周废，有甘峻山、临松山。”《晋书》卷一四《地理志》上凉州后序云：“张天锡又别置临松郡。”则魏当因前凉旧名。“杜”“社”并“松”之讹。③搆次：诸本下有注云：“本作‘撮沙’，又做‘揖次’。”《晋书》卷一四《地理志》上凉州武威郡下作“揖次”。钱氏《考异》卷一九云：“当做‘搆次’，汉隶‘胥’‘聿’二字文相乱，故讹为‘揖’。”按《汉书》卷二八下《地理志》下、《续汉书》《郡国志》五武威郡下并作“搆次”，此《志》传本不误。④台城：温校：“《通鉴》注引作‘治城’。”

《隋书·地理志》

安定郡(旧置泾州)。统县七,户七万六千二百八十一。

安定(带郡)。鹑觚(旧置赵平郡。后周废郡。并以宜禄县入焉。大业初分置灵台县,二年废)。阴盘(后魏置平凉郡,开皇初郡废。有卢水)。朝那(西魏置安武郡,及析置安武县。开皇三年郡县并废入焉)。良原(大业初置)。临泾(大业初置,初曰湫谷,寻改焉)。华亭(大业初置。有陇水、芮水)。

北地郡(后魏置豳州,西魏改为宁州。大业初复曰豳州)。统县六,户七万六百九十。

定安(旧置赵兴郡。开皇初郡废,大业初置北地郡)。罗川(旧曰阳周,开皇中改焉。又西魏置显州,后周废。有桥山)。彭原(旧曰彭阳。后魏置西北地郡,有洛蟠城。西魏置蔚州,有丰城。西魏置云州。后周二州并废。开皇初郡废,十八年改县曰彭原。有珊瑚水)。襄乐(后魏置襄乐郡,后周废。又西魏置燕州,后周废。又有子午山)。新平(旧曰白土,西魏置豳州。开皇四年改县为新平,大业初州废)。三水(西魏置恒州,寻废)。

弘化郡(西魏置朔州,后周废,开皇十六年,轩庆州)。统县七,户五万二千四百七十三。

合水(开皇十六年置,大业初置弘化郡)。马岭(大业初置)。华池(仁寿初置。又西魏置蔚州,后周废)。归德(西魏置恒州,后周废。有雕水)。洛源(大业初置。有博水、洱水)。弘化(开皇十八年置弘州,大业初州废)。弘德(大业初置)。

平凉郡(旧置原州,后周置总管府,大业初府废)。统县五,户二万七千九百九十五。

平高(后魏置太平郡,后改为平高。开皇初郡废。大业初置平凉郡)。

有关官。有笄头山)。百泉(后魏置长城郡及黄石县,西魏改黄石为长城。开皇初郡废。大业初县改为百泉)。平凉(后周置。有可蓝山)。会宁(西魏置会州,后周废,开皇十六年置县)。默亭。

天水郡(旧秦州。后周置总管府,大业初府废)。统县六,户五万二千一百三十。

上邽(故曰上邽^①,带天水郡。开皇初郡废,大业初复置郡,县改名焉。有濛水)。冀城(后周曰冀城县,废入黄瓜县^②。大业初改曰冀城。有石鼓崖)。清水(后魏置,及置清水郡。开皇初郡废。有关官。有分水岭)。秦岭(后魏置,曰伯阳县。开皇中改焉)。陇城(旧曰略阳,置略阳郡。开皇二年郡废,县改曰河阳,六年改曰陇城)。成纪(旧废,后周置。有龙马城、仙人碛)。

注:①故曰上邽:《廿二史考异》:“当云‘故曰上封’。后魏避道武帝嫌名(珪),改上邽为上封。”②废入黄瓜县:按前后文例,“废”上当有“寻”字。

陇西郡(旧渭州)。统县五,户一万九千二百四十七。

襄武(带郡)。陇西(旧城内陶^①,置南安郡。开皇初郡废,改为武阳,十年改名焉)。渭源(有鸟鼠山。有渭水)。障(后魏置。西魏置广安郡,后周郡废)。长川(后魏置安阳郡,领安阳、乌水二县。西魏改曰北秦州,后又改曰交州。开皇三年郡废。十八年改州曰纪州,安阳曰长川。大业初州废,又废乌水入焉)。

注:①旧城内陶:《廿二史考异》:“城”当做“曰”。

金城郡(开皇初,置兰州总管府,大业初府废)。统县二,户六千八百一十八。

金城(旧县曰子城,带金城郡。开皇初郡废。大业初改县为金城。置金城郡。有关官)。狄道(后魏置临洮郡、龙城县,后周皆废。又后魏置武始郡,开皇初废。有白石山)。

枹罕郡(旧置河州)。统县四,户一万三千一百五十七。

枹罕(旧置枹罕郡,开皇初郡废。大业初置郡。有关官。有凤林山)。

龙支(后魏曰北金城,西魏改焉。有唐述山)。大夏(有金纽山)。水池(后魏曰葦川,后周改焉)。

浇河郡(后周武帝逐吐谷浑,以置廓州总管府。开皇初府废)。统县二,户二千二百四十。

河津(后周置洮河郡,领洮河、广威、安戎三县。开皇初郡废,并三县入焉。大业初置浇河郡。有滥水)。达化(后周置达化郡。开皇初郡废,并绥远县入焉。有连云山)。

西平郡(旧置鄯州)。统县二,户三千一百一十八。

湟水(旧曰西都,后周置乐都郡。开皇初郡废,十八年改县曰湟水。又有旧浩亶县,又西魏置龙居、路仓二县,并后周废。大业初置西平郡。有土楼山)。化隆(旧魏曰广威,西魏置浇河郡,后周废郡,仁寿初改为化隆,有拔延山、湟水、卢水)。

武威郡(旧凉州,后周置总管府,大业初府废)。统县四,户一万一千七百五。

姑臧(旧置武威郡,开皇初郡废。大业初复置武威郡。又后魏置武安郡、襄武县,并西魏废。又旧有显美县,后周废。有第五山^①)。昌松(后魏置昌松郡,后周废郡,以榆次县入^②)。开皇初改县为永世,后改曰昌松。又有后魏魏安郡,后周改置白山县,寻废。有白山)。番和(后魏置番和郡。后周郡废,置镇。开皇中为县,又并力乾、安宁、广城、障、燕支五县之地入焉。有燕支山)。允吾(后魏置,曰广武,及置广武郡。开皇初郡废,改县曰邑次,寻改为广武,后又改为邑次。大业初改为允吾。有青岩山)。

注:①第五山:“第”原作“茅”。《杨考》:“据《前凉录》,‘茅’疑‘第’讹。”按:《太平寰宇记》正作“第”,今据改。②揅次县原作“榆次”。《考异》:“‘榆次’当做‘揅次’,因并州有榆次县,相涉而误。”按:《汉书》《地理志》下正作“揅次”,今据改。

张掖郡(郡西魏置西凉州,寻改曰甘州)。统县三,户六千一百二十六。

张掖(旧曰永平县,后周置张掖郡。开皇初郡废,十七年县改为酒

泉。大业初改为张掖，置张掖郡。又有临松县，后周废。有甘峻山、临松山、合黎山、有玉石涧、大柳谷。删丹（后魏曰山丹，又有西郡、永宁县。西魏郡废，县改为弱水。后周省入山丹。大业改为删丹。又后周置金山县，寻废入焉。有祀山。有盐池。有溺水）。福禄（旧置酒泉郡，开皇初郡废。仁寿中以置肃州，大业初州寻废，又后周置乐涪县，寻废。有祁连山，崆峒山、昆仑山，有石渠）。

敦煌郡（旧置瓜州）。统县三，户七千七百七十九。

敦煌（旧置敦煌郡，后周并效谷、寿皇二郡入焉。又并敦煌、鸣沙、平康、效谷、东乡、龙勒六县为鸣沙县^①。开皇初郡废。大业置敦煌郡，改鸣沙为敦煌。有神沙山、三危山，有流沙）。常乐（后魏置常乐郡。后周并凉兴、大至、冥安、闰泉，合为凉兴县。开皇初郡废，改县为常乐。有关官）。玉门（后魏置会稽郡。后周废郡，并会稽、新乡、延兴为会稽县。开皇中改为玉门，并得后魏玉门郡地）。

注：①龙勒：“勒”原作“勤”，据《汉书》《地理志》下、《续汉书》《郡国志》五改。

汉阳郡（后魏曰南秦州，西魏曰成州）。统县三，户一万九百八十五。

上禄（旧置仇池郡，后魏置仓泉县，后周废阶陵、丰川、建平、城阶四县入焉。开皇初郡废，大业初置汉阳郡，改县曰上禄。有百顷堆）。潭水（西魏置潭水郡。后周郡废，并废甘若、相山、武定三县入焉）。长道（后魏置汉阳郡。后周郡废，又省水南县入焉。开皇初郡废，十八年改曰长道）。

临洮郡（后周武帝逐吐谷浑，以置洮阳郡，寻立洮州。开皇初郡废）。统县十一，户二万八千九百七十一。

美相（后周武帝置县，及置洮阳郡。开皇初郡废，并洮阳县入焉。大业初置监洮郡）。叠川（后周置叠州、叠川县。开皇四年置总管府，大业元年府废。有洮水、流水）。合川（后周置，仍立西疆郡。开皇初郡废。有白岭山）。乐川（后周置）。归政（开皇二年置，仍立疆泽郡，三年废，又后周立弘州及开远、河滨二郡。开皇初州郡并废）。洮源（后周置，曰金城，并立旭州，又置通义郡。开皇初郡废，十八年县改为美俗。大业初州废，县改

名焉)。洮阳(后周置,曰广恩,并置广恩郡。开皇初郡废,仁寿元年,改县为洮河,大业初改曰洮阳)。临潭(后周曰泛潭,开皇十一年改名焉)。临洮(西魏置,曰溢乐,并置岷州及同和郡。开皇初郡废,大业初州废,更名县曰临洮。又后周置祐川郡、基城县,寻郡县俱废。有岷山、崆峒山)。当夷(后周置。又立洪和郡,郡寻废。又置博陵郡及博陵、宁人二县。开皇初并入)。和政(后周置洮城郡,寻废)。

宕昌郡(后周置宕昌国,天和元年置宕州总管府。开皇四年府废)。统县三,户六千九百九十六。

良恭(后周置,初曰阳宕,置宕昌郡。开皇初郡废,十八年改名焉。大业初置宕昌郡)。和戎(后周置。有良恭山)。怀道(后周置甘松郡,开皇初郡废)。

武都郡(西魏置武州)。统县七,户一万七百八十。

将利(旧曰石门,西魏改曰安育。后周改曰将利,置武都郡,后改曰永都郡。开皇初郡废,大业初置武都郡。又有东平县,后周并入焉。有河池水)。建威(后魏置白水郡,郡废,改为白水县。西魏复立郡,改为绥戎。后周郡废,改为建威县,并废洪化县入焉。又西魏有孔堤郡及县,后周并废)。覆津(后魏初曰玩当,置武阶郡。西魏又置覆津县,及置万郡,统赤萬、^①接难、五部三县。后周一郡三县并玩当,并废入焉。开皇初武阶郡又废)。盘堤(西魏置,曰南五部县,后改名焉;并立武阳郡及茄芦县。后周郡废,县并入焉)。长松(西魏置,初曰建昌,置文州及卢北郡。开皇初郡废,十八年县改曰长松,大业初州废)。曲水(西魏置)。正西(西魏置)。

注:①赤萬:“萬”原作“方”,“方”当即“萬”(万)字之批,据《魏书》《地形志》下改。

同昌郡(西魏逐吐谷浑,置邓州。开皇七年改曰扶州)。统县八,户一万二千二百四十八。

尚安(西魏置县及邓宁郡。开皇初郡废,大业初置同昌郡。有黑水)。钳川(西魏置。有钳川山。有白水)。贴夷(西魏置,又置昌宁郡。开皇三年郡废)。同昌(西魏置。有邓至山,云邓艾所至,故名焉)。嘉诚(后周置县

并龙涸郡及扶州总管府。开皇初府废，三年郡废，七年州废。有雪山)。封德(后魏置，又立芳州，有深泉郡，开皇初郡废，又省理定县入焉。大业初州废)。常芬(后周置，及立恒香郡。开皇初郡废。有弱水)。金崖(后周置)。

河池郡(后魏置南岐州，后周改曰凤州)。统县四，户一万一千二百二。

梁泉(旧曰故道，后魏置郡，曰固道，县曰凉泉，寻改曰梁泉。西魏改郡曰归真。后周废郡，又废龙安、商乐二县入。大业初置郡)。两当(后魏置，及立两当郡。开皇初郡废)。河池(后魏曰广化，并置广化郡。开皇初郡废，仁寿初县改名焉。又后魏置思安县，大业初省入。有河池水)。同谷(旧曰白石，置广业郡。西魏改曰同谷，后周置康州。开皇初郡废，大业初州废。又有泥阳县，西魏废)。

《旧唐书·地理志》

关内道

泾州，上，隋安定郡。武德元年，讨平薛仁杲，改名泾州。天宝元年，复为安定郡。乾元元年，复为泾州。旧领县五，户八千七百七十三，口三万五千九百二十一。天宝，户三万一千三百六十五，口十八万六千八百四十九。在京师西北四百九十三里，至东都一千三百八十七里。

安定，隋县。灵台隋鹑觚县。天宝元年，改为灵台。良原。

潘原，隋阴盘县。天宝元年，改为潘原，县界有潘原废县^①。临泾隋县。

陇州，上，隋扶风郡之汧源县。义宁二年，置陇东郡，领县五。武德元年，改为陇州，以南由县属含州。四年，废含州，复以南由来属。天宝元年，改为汧阳郡。乾元元年，复为陇州。旧领县五，户四千五百七十一，口一万八千六百三。天宝，户二万四千六百五十二，口十万一百四十八。在京师西四百九十六里，去东都一千三百二十五里。

汧源，隋县。

汧阳，隋县。

注：①潘原隋阴盘县天宝元年改为潘原县界有潘原废县：第一个“潘原”二字各本原无，“隋……废县”十九字各本在上文良原下。按《元和志》卷三、《太平寰宇记》卷一五一，良原、潘原各为一县，上文良原下脱去沿革，此处“隋”上又脱“潘原”二字，据补“潘原”二字。

南由，隋县。武德元年，置含州于此，领南由一县。四年，废含州，以县属陇州。

吴山，隋长蛇县。贞观元年，改为吴山县，治槐衙堡。上元元年，移治龙盘城。

华亭,隋县。垂拱二年,改亭川。神龙元年,复旧。

宁州,上,隋北地郡。义宁元年,领安定、罗川、襄乐、彭原、新平、三水六县。二年,分定安置归义县,以新平、三水属新平郡。武德元年,改北地郡为宁州。其年,以彭原县属彭州。三年,分彭原置丰义县,属彭州。又分定安置定平县。贞观元年,废彭州,以彭原、丰义二县来属。仍于宁州置都督府。四年,罢都督府。十七年,废归义县。天宝元年,改为彭原郡。乾元元年,复为宁州。旧领县七,户一万五千四百九十一,口六万六千一百三十五。天宝,领县六,户三万七千一百二十一,口二十二万四千八百三十七。在京师西北四百四十六里,至东都一千三百二十四里。

定安,隋县。

彭原,隋县。武德元年,置彭州,领彭原一县。二年,分置丰义县。贞观元年,废彭州,以县来属宁州。

真宁^①,隋罗川县。天宝元年,改为真宁。

注:①各本原作“贞宁”,据《元和郡县志》卷三、《太平寰宇记》卷三四、《新志》改。下同。

定平,武德二年,分定安县置。贞观十七年,废归义县,并入定平襄乐,隋县。

丰义,武德二年,分彭原县置,属彭州。贞观元年废彭州,来属。

原州,中都督府隋平凉郡。武德元年,平薛仁杲,置原州。贞观五年,置都督府,管原、庆、会、银、亭、达、要等七州。十年,省亭、达、要三州,唯督四州。天宝元年,改为平凉郡。乾元元年,复为原州。旧领县三,户二千四百四十三,口一万五百一十二。天宝领县四,户七千三百四十九,口三万三千一百四十六。在京师西北八百里,至东都一千六百四十五里。

平高,隋县。

平凉,隋县,治阳晋川^①。开元五年,移治古塞城。

百泉,隋县。

萧关,贞观六年,置缘州^②,领突厥降户,寄治于平高县界他楼城^③。高宗时,于萧关置他楼县^④。神龙元年,废他楼县,置萧关县。大中五年,置

武州。

注：①阳晋川：“晋”字各本原作“音”，《元和郡县志》卷三百泉沿革、《太平寰宇记》卷三三百泉沿革俱作“阳晋川”，据改。②缘州：各本原作“银州”，据本卷下文及《太平寰宇记》卷三三、《新志》改。③他楼城：“他楼”各本原作“地楼”，据《太平寰宇记》卷三三、《新志》改。④他楼县：“他楼”，各本原作“地键”，据《太平寰宇记》卷三三、《新志》改。下同。

庆州中都督府。隋弘化郡。武德元年，改为庆州，领合水、乐蟠、三泉、马岭、弘化五县。三年，改三泉为同川县。六年，置总管府，改合水为合川县，又置白马、蟠交二县。七年，改总管为都督府。贞观元年，废都督府及合川县，仍割林州之华池县来属。二年，置洛源县^①。四年，复置都督府及北永州，以洛源属北永州。五年，又罢都督府，以庆州隶原州都督府。八年，又以废北永州之洛源县来属^②。开元四年，复置都督府。二十六年，升为中都督府。天宝元年，改为安化郡。至德元年，改为顺化郡。乾元元年，改为庆州。旧领县八，户七千九百一十七，口三万五千一十九。天宝领县十，户二万三千九百四十九，口一十二万四千三百三十六。在京师西北五百七十二里，至东都一千四百一十里。

注：①洛源县：“洛源”各本原作“洛原”，据本卷下文及《随书地理志》、《太平寰宇记》卷三三、《新志》改。下同。②北永州：“北”字各本原无，据本卷上文及补。下文“北永州废”句同例补“北”字。

安化，隋弘化县，治弘州故城。武德六年，移治今所，与合水县俱在州治。其年，改合水为合川县。贞观元年，省合川县并入。神龙元年，改为安化县。

乐蟠，义宁元年，分合水县置。

合水，武德六年，分合水置蟠交县。天宝元年废，并入合水。马岭隋县，治天家堡。贞观八年，移理新城。以县西有马岭坂。方渠景龙元年，分马岭置。同川义宁二年，废北永州，分宁州彭原置于三泉县故城。武德三年，复治同川城，改为同川县。

洛源，隋县。大业十三年，为胡贼所破，因废。贞观二年，复置。又自

延州金城县移北永州治于此。八年，北永州废，复以洛源县属庆州。

延庆，武德六年，分合水县置白马县。天宝元年，改为延庆县。

华池，隋旧县。大业十三年，为胡贼所破，县废。武德四年复置，又于此置林州总管府，管永州。其林州领华池一县。五年，改永州为北永州。七年，罢林州总管府。贞观元年，废林州，华池隶庆州。

怀安。开元十年，检括逃户置，因名怀安。

芳池州都督府。寄在庆州怀安县界，管小州十：静、獯、王、濮、林、尹、位、长、宝、宁，并党项野利氏种落。

安定州都督府。寄在庆州界，管小州七：党、桥、乌、西戎州、野利州、米州、还州。

安化州都督府。寄在庆州界，管小州七：永利州、威州、旭州、莫州、西沧州、儒州、琮州。

会州，上，隋会宁镇。武德二年，讨平李轨，置西会州。天宝元年，改为会宁郡。乾元元年，复为会州。永泰元年，升为上州，领县二，户四千五百九十四，口二万六千六百六十二。去京师一千一百里，至东都二千一百里。

会宁，隋凉川县。武德二年，改为会宁。

乌兰，后周县，置在会宁关东南四里。天授二年，移于关东北七里。

《新唐书·地理志》

关内道

泾州，保定郡，上。本安定郡，至德元载更名。土贡：龙须席。户三万一千三百六十五，口十八万六千八百四十九。县五：（有府六，曰泾阳、四门、兴教、纯德、肃清、仁贤。）保定，上。本安定，至德元载更名，广德元年没吐蕃，大历三年复置。有折墟故城。灵台，上。本鹑觚，天宝元年更名。临泾，中。良原，上。兴元二年没吐蕃，贞元四年复置。潘原，中。本阴盘，天宝元年更名，后省为彰信堡，贞元十一年复置。

原州，平凉郡，中都督府，望。广德元年没吐蕃，节度使马磷表置行原州于灵台之百里城。贞元十九年徙治平凉。元和三年又徙治临泾。大中三年收复关、陇，归治平高。广明后复没吐蕃，又侨治临泾。土贡：毡、覆鞍毡、龙须席。户七千三百四十九，口三万三千一百四十六。县二：（有府二，曰彭阳、安善。）平高，望。有崆峒山；西南有木峡关。州境又有石门、驿藏、制胜、石峡、木靖等关，并木峡、大盘为七关。又南有瓦亭故关。百泉，上。

渭州，元和四年以原州之平凉县置行渭州，广明元年为吐蕃所破，中和四年，泾原节度使张钧表置。凡乾元后所置州，皆无郡名；及其季世，所置州县，又不列上、中、下之第。县一。平凉，上。广德元年没吐蕃，贞元四年复置。及为行渭州，其民皆州自领之。西南陇山有六盘关；有银，有铜，有铁；西北五里有吐蕃会盟坛，贞元三年筑。

武州，中。大中五年以原州之萧关置。中和四年侨治潘原。县一：萧关，中。贞观六年以突厥降户置缘州，治平高之他楼城。高宗置他楼县，隶原州，神龙元年省，置萧关县。白草军在蔚茹水之西，至德后没吐蕃。

宁州彭原郡，望。本北地郡，天宝元年更名。土贡：五色覆鞍毡、龙须席、莞青、亭长、庵苘、假苏。户三万七千一百二十一，口二十二万四千八百三十七。县五：（有府十一，曰彭池、高望、静难、麟宝、天固、蒲川、东原、三会、大延、和泉、永宁。）定安，望。义宁二年析置归义县，贞观十七年省入定平^①。有定安故关。真宁，紧。本罗川。有要册湫。天宝元年获玉真人像二十七，因更名。襄乐，紧。彭原，紧。武德元年以县置彭州，二年析置丰义县。贞观元年州废，以彭原、丰义来属。开元八年以丰义隶涇州，寻复还属，唐末省。定平，上。武德二年析定安置，后隶邠州。元和三年复来属，四年隶左神策军。有高摭城。唐末以县置衍州。

注：①义宁二年析置归义县十七年省入定平：据《旧唐书》卷三八《地理志》《太平寰宇记》卷三四载，归义县省于贞观十七年。此处“十七年”上脱“贞观”二字。

庆州，顺化郡，中都督府。本弘化郡，天宝元年曰安化，至德元载更名。土贡：“胡女布、牛酥、麝、蜡。户二万三千九百四十九，口十二万四千二百三十六。县十：（有府八，曰龙息、交水、同川、永清、蟠交、永业、乐蟠、永安。）顺化，中。本弘化，天宝元年曰安化，至德元载更名。合水，中。本合川，武德元年置，是年，又析置蟠交县。贞观元年省合川入弘化。天宝元年更蟠交曰合水。乐蟠，中。义宁元年析合水置。马岭，中。华池，下。武德四年置，以县置林州，贞观元年州废。同川，中下。本三泉，义宁二年析彭原郡之彭原置，武德三年更名。洛源，中。贞观三年置，四年隶北永州，五年徙州来治，八年州废，来属。延庆，中。本白马，武德六年徙故丰州民析合水置，天宝元年更名。方渠，中下。神龙三年析马岭置。怀安，下。开元十一年括逃户连党项蕃落置。

会州，会宁郡，上。本西会州，武德二年以平凉郡之会宁镇置。贞观八年以足食故更名粟州，是年又更名。土贡：驼毛褐、野马革、覆鞍毡、鹿舌、鹿尾。户四千五百九十四，口二万六千六百六十。县二：（有新泉军，开元五年废为守捉。会宁，上。本凉川，武德二年更名。开元四年别置凉川县，九年省。有黄河堰，开元七年，刺史安敬忠筑，以捍河流。有河池，因雨

生盐。东南有会宁关。乌兰，上。武德九年置。西南有乌兰关。

陇右道

陇右道，盖古雍、梁二州之境，汉天水、武都、陇西、金城、武威、张掖、酒泉、敦煌等郡，总为鹑首分。为州十九，都护府二，县六十。其名山：秦岭、陇坻、鸟鼠同穴、朱圉、西倾、积石、合黎、崆峒、三危。其大川：河、洮、弱、羌、休屠之泽。厥赋：布、麻。厥贡：金屑、砺石、鸟兽、革角。自禄山之乱，河右暨西平、武都、合川、怀道等郡皆没于吐蕃，宝应元年又陷秦、渭、洮、临，广德元年复陷河、兰、岷、廓，贞元三年陷安西、北廷，陇右州县尽矣。大中后，吐蕃微弱，秦、武二州渐复故地，置官守。五年，张义潮以瓜、沙、伊、肃、鄯、甘、河、西、兰、岷、廓十一州来归，而宣、懿德微，不暇疆理，惟名存有司而已。

秦州，天水郡，中。都督府。本治上邽，开元二十二年以地震徙治成纪之敬亲川，天宝元年还治上邽，大中三年复徙治成纪。土贡：龙须席、芎藭。户二万四千八百二十七，口十万九千七百四十。县六：（有府六，曰成纪、修德、清德、清水、三度、长川。）成纪，上。有银，有铜，有铁。上邽，上。有蟠冢山。伏羌，中。本冀城。武德二年更名，是年，以伏羌及渭州之陇西置伏州，八年州废，县还故属。九年析置盐泉县，贞观元年更名夷宾，三年省。有石白山、朱圉山。陇城，下。武德二年以县置文州，八年州废，来属。贞观三年置长川县，六年省入焉。有银。清水，下。武德四年以县置邽州，六年州废，来属。又有秦岭县，贞观十七年省。大中二年先收复，权隶凤翔府，三年来属。东五十里有大震关；有银。长道，中下。本隶成州，天宝末废，咸通十三年复置，来属。有盐。

河州，安昌郡^①，下。本枹罕郡，天宝元年更名。土贡：麝香。户五千七百八十二，口三万六千八十六。县三：（西百八十里有镇西军，开元二十六年置；西八十里索恭川有天成军，西百余里雕窠城有振威军，皆天宝十三载置；西南四十里有平夷守捉城。）枹罕，中下。有可蓝关。大夏，中

下。贞观元年省入枹罕，三年复置。凤林，(中下。本乌州，贞观七年置，十一年州废，更置安昌县，来属，天宝元年更名。北有凤林关，有积石山。)

注：①河州安昌郡：“昌”，《旧唐书》卷四〇《地理志》《通典》卷一七四、《寰宇记》卷一五四均作“乡”。

渭州，陇西郡，中。都督府。土贡：龙须席、麝香、秦芫。户六千四百二十五，口二万四千五百二十。县四：(有府四，曰渭源、平乐、临源、万年。)襄武，上。陇西，上。鄣，下。天授二年曰武阳，神龙元年复故名。南二里有盐井。渭源，上。高宗上元二年更名首阳，于渭源故县别置渭源县。仪凤三年省首阳入渭源。有鸟鼠同穴山，一名青雀山。

兰州，金城郡，下。以皋兰山名州。土贡：赭金、麝香、鮃馘。户二千八百八十九，口万四千二百二十六。县二：(有府二，曰金城、广武。又有榆林军。)五泉，下。咸亨二年更名金城，天宝元年复故名。北有金城关。金城，下。本广武县，乾元二年更名。

临州，狄道郡，下。都督府。天宝三载析金城郡之狄道县置。县二：(有临洮军，久视元年置，宝应元年没吐蕃。)狄道，下。长乐，下。本安乐，天宝后置，乾元后更名。

阶州，武都郡，下。本武州，因没吐蕃，废，大历二年复置为行州，咸通中始得故地，龙纪初遣使招葺之，景福元年更名，治皋兰镇。土贡：麝香、蜜、蜡烛、山鸡尾、羚羊角。户二千九百二十三，口万五千三百一十三。县三：将利，中下。州又领建威县，贞观元年省入焉。福津，中下。本覆津，景福元年更名。盘堤，中下。没蕃后不复置。

洮州，临洮郡，下。本治美相，贞观八年徙治临潭。开元十七年州废，以县隶岷州，二十年复置，更名临州，二十七年复故名。土贡：甘草、麝香。户二千七百，口万五千六十。县一：(有府一，曰安西。有莫门军，仪凤二年置；西八十里磨禅川有神策军，天宝十三载置。临潭，中。本美相。贞观四年徙治洪和城，以故地置旭州。五年又置临潭县。八年州废，以临潭来属，徙州来治，迁于洮阳城。十二年省博陵县，天宝中省美相县，皆入临潭。西百六十里有广恩镇，有西倾山。)

岷州，和政郡，下。义宁二年析临洮郡之临洮、和政置。土贡：龙须席、甘草。户四千三百二十五，口二万三千四百四十一。县三：（有府三，曰祐川、临洮、和政。）溢乐，中下。本临洮，义宁二年更名，贞观二年析置当夷县，神龙元年省。有岷山，西有崆峒山。祐川，中下。本基城，义宁二年置，先天元年更名。和政，中。有阔博山。

叠州，合川郡，下。武德二年析洮州之合川、乐川、叠川置。土贡：麝香。户千二百七十五，口七千六百七十四。县二：（有府一，曰长利。）合川，下。武德五年以党项户置安化、和同二县，寻省。贞观二年省乐川、叠川入焉。有渭谿山。常芬，下。武德元年以县置芳州，并置丹岭县。四年以丹岭隶洮州。贞观二年置恒香县，侨治恒香戍，复以丹岭隶芳州。高宗上元二年陷吐蕃，神龙元年州废，省丹岭、恒香，以常芬来属。

宕州，怀道郡，下。本宕昌郡，天宝元年更名。土贡：麸金、散金、麝香。户千一百九十，口七千一百九十九。县二：（有府二，曰同归、常吉。怀道，下。贞观三年省和戎县入焉。西百八十三里有苏董戍。有同均山。）良恭，下。贞观元年以成州之潭水来属，后省入焉。

凉州，武威郡，中都督府。土贡：白麦^①、龙须席、毯、野马革、芎藭。户二万二千四百六十二，口十一万二百八十一。县五：（有府六，曰明威、洪池、番禾、武安、丽水、姑臧。又有赤水军，本赤乌镇，有赤青泉，因名之，幅员五千一百八十里，军之最大也；西二百里有大斗军，本赤水守捉，开元十六年为军，因大斗拔谷为名；东南二百里有乌城守捉，南二百里有张掖守捉，西二百里有交城守捉；西北五百里有白亭军，本白亭守捉，天宝十四载为军。）姑臧，中下。北百八十里有明威戍，西北百六十里有武安戍；有武兴盐池、黛眉盐池。神乌，下。武德三年置，贞观元年省，总章元年复置，曰武威，神龙元年复故名。昌松，中。东北百五十里有白山戍。天宝，中下。本番禾，咸亨元年以县置雄州，调露元年州废来属，天宝三载以山出醴泉更名。有通化镇，有焉支山。嘉麟。神龙二年于故汉鸾鸟县城置，景龙元年省，先天二年复置。

注：①白麦：“麦”，衲、十行、汲、局本同，殿本作“绫”。按《通典》卷

六、《元和郡县志》卷四〇，凉州贡有“白麦”，无“白麦”。“麦”疑为“麦”之讹。

沙州，敦煌郡，下都督府。本瓜州，武德五年曰西沙州，贞观七年曰沙州，土贡：子、黄矾、石膏。户四千二百六十五，口万六千二百五十。县二：（有府三，曰龙勒、效谷、悬泉。有豆卢军，神龙元年置。敦煌，下。东四十七里有盐池，有三危山。寿昌，下。武德二年析敦煌置，永徽元年省，乾封二年复置，开元二十六年又省，后复置，治汉龙勒城。西有阳关，西北有玉门关；有云雨山。

瓜州，晋昌郡，下都督府。武德五年析沙州之常乐置。土贡：野马革、紧鞞、草豉、黄矾、绛矾、胡桐律。户四百七十七，口四千九百八十七。县二：（有府一，曰大黄。西北千里有墨离军。）晋昌，中下。本常乐，武德四年更名。东北有合河镇，又百二十里有百帐守捉，又东百五十里有豹文山守捉，又七里至宁寇军，与甘州路合。常乐，中下。武德五年别置。有拔河帝山。

甘州，张掖郡，下。土贡：麝香，野马革，冬柰，枸杞实、叶。户六千二百八十四，口二万二千九十二。县二：（西北百九十里祁连山北有建康军，证圣元年，王孝杰以甘、肃二州相距回远，置军；西百二十里有蓼泉守捉城。）张掖，上。有祁连山、合黎山。北九百里有盐池，西有巩笔驿。删丹，中下。北渡张掖河，西北行出合黎山峡口，傍河东孺屈曲东北行千里，有宁寇军，故同城守捉也，天宝二载为军；军东北有居延海，又北三百里有花门山堡，又东北千里至回鹘衙帐。

肃州，酒泉郡，下。武德二年析甘州之福禄、瓜州之玉门置。土贡：麸金、野马革、苻蓉、柏脉根。户二千二百三十，口八千四百七十六。县三：（有酒泉、威远二守捉城。酒泉，中下。本福禄，唐初更名。西十五里有兴圣黄帝陵，七里有洞庭山，出金；有昆仑山。福禄，下。武德二年别置。东南百二十里有祁连戍，东北八十里盐池。玉门，中下。贞观元年省，后复置。开元中没吐蕃，因其地置玉门军，天宝十四载废军为县。北有独登山，出盐，以充贡；有神雨山。

《宋史·地理志》

庆阳府，中，安化郡，庆阳军节度。本庆州。建隆元年，升团练。乾德元年，复为军事。政和七年，升为节度，军额曰庆阳。宣和七年，改庆州为府。旧置环庆路经略、安抚使，统庆州、环州、邠州、宁州、乾州，凡五州。其后废乾州，置定边军，已而复置醴州，凡统三州一军。崇宁户二万七千八百五十三，口九万六千四百三十三。贡紫茸白花毡、麝香、黄蜡。县三：安化，中。有大顺一城，府城、东谷、柔远、人顺^①，四砦。元丰四年，废府城砦、金村堡、平戎镇。五年，收复疆砦，赐名安疆砦。元祐元年，复平戎镇。合水，望。熙宁四年始置，省华池、乐蟠二县为镇。七年，改华池镇为华池砦。有东华池、有东华池、西华池二砦，荔原一堡。彭原。熙宁三年，自宁州来隶。

注：①人顺：《元丰九域志》卷三作“大顺”。

安疆砦，本西人疆砦，元丰五年收复，赐名。元祐四年，给赐夏人。绍圣四年修复。东至德靖砦九十里，西至东谷砦六十里，南至大顺城四十里，北至白豹城四十里。又隶定边军。

横山砦，地名西擦移，元符元年进筑，赐名。东至东谷砦界擦移四十五里，西至宁羌砦七十里，南至通塞堡三十里，北至定边军三十里。

通塞堡，元符元年进筑。东至东谷砦二十里，西至西谷口砦二十里，南至怀安镇四十里，北至横山砦三十里。

定边城，元符二年修筑，后别为定边军。

白豹城，旧属西界，元符二年修复，赐旧名。东至安疆砦四十里，西至东谷砦二十里，南至柔远砦五十里，北至胜羌堡五十里。别见定边军。

绥远砦，地本骆驼巷，元符二年进筑，赐名。东至定边军二十里，西至宁羌砦六十里，南至横山砦五十里，北至神堂砦约五十里。宁羌砦，地

本萌门三岔,元符元年进筑,赐名。东至绥远砦六十里,西至安塞砦五十里,南至西谷砦三十里,北至王尚原界墩五十里。

镇安城,政和六年进筑。东至鄜延路通庆城三十里,西至九阳堡二十里,南至威边砦三十里,北至西界地名苍鸡二十里。

麦川堡,本名麦经岭,政和六年赐名。系环庆路,未详属何州军,姑附于此,东至怀威砦二十里,西至矜戎堡二十里,南至威边砦一十五里,北至镇安城一十里。

威宁堡,本名衡家堡,政和六年赐名。系环庆路,未详属何州军,姑附于此。东至九阳堡一十五里,西至定边军一十五里,南至矜戎堡一十里,北至七通哆移塔五里。

矜戎堡,东至怀威堡四十里,西至定边军约二十里,南至胡博川二十里,北至通祖卢门城砦五十里。

府城砦,元丰二年已废,不知何年修复。

金村堡,同上。

胜羌堡,东至洛河川二十里,西至通塞堡约五十里,南至白豹城五十里,北至威边砦二十里。

定戎堡,东至启祖峰二十里,西至那丁原五里,南至兴平城二十里,北至清平关一十里。

威边砦,东至洛河川二十里,西至横山砦三十五里,南至胜羌堡二十里,北至镇安城三十里。

怀威堡,东至鄜延路通庆城十五里,西至矜戎堡约四十里,南至威宁砦约二十里,北至西界罗轻嘴约五十里。

环州,下,军事。旧降为通远军,淳化五年复为州。崇宁户七千一百八十三,口一万五千五百三十二。贡甘草。县一:通远,上。有乌仑、肃远、洪德、永和、平远、定边、团堡、安塞八砦。

兴平城,地名灰家嘴,元符元年筑,赐名。东至贺子儿一十里,西至流井堡四十里,南至洪德砦二十里,北至清平关三十里。清平关,地名之字平,元符二年进筑,赐名。东至鬼通砦二十五里,西至安边城四十里,

南至兴平城三十里，北至陷道口铺二十七里。

安边城，地名徐丁台，崇宁五年筑，赐名。东至清平关四十里，西至折姜和市砦砦八十里，南至废肃远砦一百余里，北至牛圈界墩二十里。

罗沟堡，朱灰台至绥远砦中路，地名火罗沟及阿原烽，政和三年建筑，赐名。东南至绥远砦约二十里，西南至宁羌砦约六十里，南至阿原堡约四十里，西至朱台堡约一十五里。

阿原堡地名见“罗沟堡”，政和三年赐名。东至绥远砦三十里，西至宁羌砦三十里，南至西谷砦四十里，北至罗沟堡约四十里。

朱台堡，本朱灰台，政和三年建筑，赐名。东至鸡嘴堡约一十八里，西至木瓜堡约五十里，南至阿原堡约四十里北至蕤毛嘴约二百步。

安边砦，大拔砦，元丰二年已废，不知何年复修。

方渠砦，流井堡，东至兴平城四十里，西至安边城三十里，南至党罗原五里，北至萌井五十余里。

归德堡，东至木瓜堡五十里，西至定戎堡约三十里，南至洪德砦四十里，北至虾麻和市砦砦约四十里。

木瓜堡，东至宁羌砦二十五里，西至归德堡五十里，南至惠丁堡四十里，北至界墩里罗节砦五里。麝香堡，东至龙札谷五里，西至打米谷八里，南至木瓜原一十五里，北至乌丁原二十里。

通归堡，东至归德堡二十里，西至兴平城三十余里，南至洪德砦二十里，北至堡子谷约一十里。

惠丁堡，东至宁羌砦约四十里，西至麝香堡约三十里，南至安塞砦约三十五里，北至木瓜堡四十里。

邠州，紧，新平郡，静难军节度。崇宁户五万八千二百五十五，口一十六万二千一百六十一。贡火箸、荳蔻、剪刀。县五：新平，望。宜禄，望三水，上。定平，紧。熙宁五年，隶宁州。政和七年，自宁州来隶。淳化。中。淳化四年，升耀州云阳黎国镇为县。熙宁八年，置铸钱监，元丰三年废。宣和元年，自耀州来隶。

宁州，望，彭原郡，兴宁军节度。本军事州，宣和元年赐军额。崇宁户

三万七千五百五十八，口一十二万二千四十一。贡庵闾、荆芥、砚、席。县三：定安，紧。襄乐，上。真宁，下。

秦凤路。府一：凤翔。州十二：秦，泾，熙，陇，成，凤，岷，渭，原，阶，河，兰。军三：镇戎，德顺，通远。县三十八。其后增积石头、震武、怀德三军，西宁、乐、廊、西安、洮、会六州，又改通远军为巩州。凡府一，州十九，军五，县四十八。

秦州，下府，天水郡，雄武军节度。旧置秦凤路经略安抚使，统秦州、陇州、阶州、成州、凤州、通远军，凡五州一军，其后割通远军属熙河，凡统州五。崇宁户四万八千六百四十八，口一十二万三千二十二。贡席、芎穷。县四：成纪，上。有渭水、三阳、上蜗牛、下蜗牛、堡子、伏归、小三阳、照川、土门、四顾、平戎、赤崖湫、西青、远近湫、定西、小定西、下碛、注鹿原、上碛、圆川、伏羌、得胜、榆林、大像、菜园、探长、新水谷、旧水谷、桤林、丙龙、石人铺、驼项、永宁、盐泉、小永宁、冷水泉、双泉、新土、旧土三十九堡。

陇城，中。有静戎、永固、定平、长山、白榆林、郭马、安塞七堡。

清水，中。有弓门、铁窟、斫鞍、堡子、小弓门、坐交、得铁、冶坊、桥子、李子、古道、永安、四顾、威塞、床穰、镇边、和戎、安远、挟河、定川、中城、东城、西城、静边、临川、德威、广武、宁远、长樵二十九堡。

天水。上。监一：太平。城二：伏羌，熙宁三年，废丹山、纳述^①、乾川三堡，增伏羌砦为城，有得胜、榆林、大像、菜园、探长、新水、桤林、丙龙、石人、驼项、旧水一十一堡。

注：①丹山纳述：《宋会要方域》二〇之一、二〇之七和《长编纪事本末》卷八三都作“山丹、纳迷”。

甘谷。熙宁元年置，有吹藏、大甘、陇诺三堡。四年，置尖竿、陇阳二堡。

砦七：治平四年，置鸡川。熙宁元年，改擦珠堡^①为通渭堡。五年，改古渭砦为通远军，废者达、本当、七麻三堡，改通渭堡为砦，割永宁、宁远、威远、熟羊、来远并隶军。寻改绥远、定边二砦为镇，隶陇州。

注：①擦珠堡：《宋会要方域》二〇之一、《长编纪事本末》卷八都作“擦珠堡”。

定西，领宁西、牛鞞、上硖、下硖、注鹿原、圆川六堡。

三阳，领渭滨、武安、上下蜗牛、闻喜、伏归、硖口、照川、土门、四顾、平戎、赤崖湫、西青、远近湫十四堡。

弓门，领东鞞、安人、斫鞞、上下铁窟、坐交、得铁、治坊七堡^①。

静戎，领白榆林、长山、郭马、静塞、定平、永固、邦蹉、宁塞、长焦九堡。

注：①领东鞞安人斫鞞上下铁窟坐交得铁治坊七堡：按所记“七堡”，与上列堡数八不符；《元丰九域志》卷三，弓门领七堡，无“治坊”；又下文另有治坊堡，属秦州。此处“治坊”二字疑衍。

安远，陇城，鸡川。堡三：熙宁三年，改床穰为镇。五年，改治坊砦为治坊堡。八年，改床穰镇为堡。床穰，领白石、古道、中城、东城、西城、定戎、定安、雄边、临川、德威、广武、定川、挟河、镇边一十四堡。治坊，领桥子、古道、永安、博望、威塞、李子六堡。

达隆。堡川城，政和六年，于秦凤东西川口进筑，赐名。东至甘泉堡一十八里，西至熙河路安西城管下龟儿镇一十二里，南至甘谷城一百一十里，北至会川城一百二十里。

甘泉堡，东至泾原路第十七堡五十里，西至堡川城一十八里，南至泾原路治平砦一百五十里，北至泾原路通安砦一百五十里。别见“渭州”。

安远砦。《吏部通用酬赏格》：秦州又有安远等五堡，定边、绥远二砦。熙宁八年，废为镇，属陇州，其后，复为堡。

定边砦，绥远砦，小落门砦，保安砦，弓钟砦，董哥平堡。

成州，中下，同谷郡。开宝六年，升为团练。崇宁户一万二千九百六十四，口三万三千九百九十五。贡蜡烛、鹿茸。县二：同谷，上。有骨鹿、马邑、赤土、平原、滔山、胡桃六砦。栗亭，中。

凤州，下，河池郡，团练。本防御，乾德元年，降为团练。崇宁户三万

七千七百九十六，口六万一千一百四十五。贡蜜、蜡烛。县三：梁泉，上。河池，紧。开宝五年，移治固镇。有水银务。两当，上。至道元年，移治广乡镇。监一：开宝。建隆三年，于两当县置银冶。开宝五年，升为监。治平元年罢置官，以监隶两当县，元丰六年废。

阶州，中下，武都郡，军事。本唐武州。陷西戎，后复其地改置焉。崇宁户二万六百七十四，口四万九千五百二十。贡羚羊角、蜡烛。县二：福津，中下。领峰贴硖武平沙滩三砦、团城堡、平定关。

将利，中下。砦一：故城。本故城镇，不知何年建为砦。

渭州，下，陇西郡，平凉军节度。本军事，政和七年，升为节度。旧置泾原路经略、安抚使，泾州、原州、渭州、仪州、德顺军、镇戎军皆属。熙宁五年，废仪州。元符二年，增置西安州。崇宁三年，又以熙河路会州来属。大观二年^①，又增置怀德军。凡统五州三军。崇宁户二万六千五百八十四，口六万三千五百一十二。贡绢、苻蓉。县五：平凉，中。有瓦亭砦。潘原，中安化，中。熙宁七年，废制胜关，移县于关地，以旧地为镇。崇信，中。华亭。中下。熙宁五年，废仪州，与安化、崇信同来隶。

注：①大观二年：“二年”原作“三年”，据下文怀德军、镇戎军和本书卷二〇《徽宗纪》《十朝纲要》卷一五改。

靖夏城，政和六年，赐泾原路席苇平新城名曰靖夏。未详属何军州，姑附此。

甘泉堡。崇宁五年，泾原路经略司于甜井子修筑守御，赐名。未详属何州军，姑附此。别见“秦州”。

泾州，上，安定郡。太平兴国元年，改彰化军节度。崇宁户二万八千四百一十一，口八万八千六百九十九。贡紫茸、毛毳段。县四：保定，望。有长武砦。灵台，上。良原，上。长武，望。咸平四年，生长武镇为县。五年，省为砦，属保定县。大观二年，复以砦为县。

原州，望，平凉郡，军事。崇宁户二万三千三十六，口六万三千四百九十九。贡甘草。县二：临泾，中。彭阳，中。唐丰义县^①，太平兴国初改。至道三年，自宁州来隶。

镇二：新城，熙宁三年，废截原砦入焉。

柳泉。领耳朵城一砦。

砦五：开边，熙宁三年，废新门砦入焉。

西壕，平安，绥宁，领羌城、南山、颠倒三堡。

注：①丰义县：原作“丰业县”，据《新唐书》卷三七《地理志》《宋会要方域》五之四二、《舆地广记》卷一六改。

靖安。领中普^①、吃啰岔、中岭、张岳、常理、新勒、鸡川、立马城、杀獐川九堡。

安羌堡，新城堡。

德顺军，同下州。庆历三年，即渭州陇干城建为军。崇宁户二万九千二百六十九，口一十二万六千二百四十一。贡甘草。县一：陇干。元祐八年，以外底堡置。

城一：水洛。领王家城、石门堡。砦五：静边，别见“镇戎军”。得胜，领开边堡。隆德，通边^②，治平。治平四年置，领牧龙堡。

怀远砦，东至镇戎砦六十里，西至得胜砦三十里，南至张义堡四十里，北至镇羌砦二十七里。

中安堡，威戎堡。东至章川堡三十里，西至同家堡二十五里，南至治平砦四十里，北至静边砦二十里。

注：①中普：《宋会要方域》二〇之一一、《元丰九域志》卷三都作“中郭普”。②通边：原作“通远”，据《宋会要方域》一八之九、《元丰九域志》卷三改。

镇戎军，同下州。本原州平高县^①之地。至道三年，建为军。崇宁户一千九百六十一，口八千五十七。贡白毡。城一：彭阳。砦七：治平四年，置信岔堡、凉棚堡。熙宁元年，置熙宁砦、硝坑堡、东西水口堡。元丰四年，废东水口堡。六年，置故砦堡。

注：①平高县：“平”字原脱，据《元丰九域志》卷三、《舆地广记》卷一六补。

东山，乾兴，天圣，有信岔、凉棚二堡。

三川,高平,有故砦堡。

定川,熙宁。有硝坑堡。

堡二:开远,张义。熙宁四年,废安边堡入开远。五年,置张义。

平夏城,旧石门城,绍圣四年赐名。大观二年,升为怀德军。

灵平砦,旧好水砦,绍圣四年赐名。大观二年,割属怀德军。

镇羌砦,绍圣四年赐名。东至三川堡二十一里,西至寺子岔堡二十五里,南至怀远砦二十七里,北至九羊砦二十五里。

高平堡,元符元年修复,赐旧砦名。

威川砦,政和七年赐名,本密多台。

飞泉砦,政和七年赐名。本飞井坞。

飞井堡,乾兴砦管下。

狼井堡,熙宁砦管下狼井、安远、窰信、梅谷、开疆,凡五堡。

安远堡,窰信岔堡,梅谷堡,开疆堡,李家堡,肃远堡,埭地平堡,镇西堡,水口堡,怀远城,别见“德顺军”。

德靖砦,保安军旧有德靖砦,自属鄜延路。

静边砦。天禧旧砦,属德顺军。东至德顺军。七十里,西至第十七堡三十五里,南至威戎堡三十里,北至隆德砦五十里。

会州。元丰五年,熙河路加“兰会”二字,时未得会州。元符二年,始建筑,割安西城^①以北六砦隶州。崇宁三年,置倚郭县曰敷文,又以会州隶泾原路。县一:敷文。安西城,旧名汝遮,绍圣三年建筑,赐名,属熙河路。东至秦凤路界六十二里,西至原川子一百里,南至定西砦二十七里,北至平西砦三十三里。

注:①安西城:原作“西安城”,据下文和《长编》卷五一四、《通考》卷三二二《輿地考》改。

平西砦,绍圣四年赐名,地本青石硖,属熙河路。东至秦凤路界三十余里,西至胜如堡一百一十里,南至安西城三十三里,北至会宁关四十四里。

会宁关,旧名颠耳关,元符元年建筑,赐名通会,未几改今名,属秦

凤路。东至泾原路元和市七里，西至熙河路定远城分界五十里，南至熙河路平西砦四十里，北至黄河南岸古烽台一百余里。

会川城，旧名青南讷心，元符二年建筑，赐名，属秦凤路。东至泾原路通安砦六十里，西至熙河定路远城一百五十里，南至会宁关六十里，北至新泉砦四十里。

新泉砦，旧名东北冷牟，元符元年赐名，属秦凤路。东至怀戎堡界白草原三十里，西至会川城界粗儿原三十五里，南至会川城三十里，北至会州四十里。怀戎堡，崇宁二年筑，属秦凤路。东至泾原路分界定戎砦地分二十二里半，西至本堡管下水泉堡二十里，由香谷至会州共六十里，南至会川城分界三十五里，北至柔狼山界墩四十里，系与夏国西寿监军地对境，经由枯柴谷至柔狼山，有险隘去处。

德威城，政和六年，筑清水河新城，赐名，属秦凤路。东至麻累山二十五里，西至黄河四里，河北倚卓啰监军地分，水贼作过去处，南至啰迷谷口新移正川堡二十五里，北至北浪口至马练贼城约二十余里。

静胜堡，政和六年，赐清水河新城接应堡名静胜，会川城管下。新修筑静胜堡，不系守御处，在黄河南石觜上，至本城一百二十里，河北岸与夏国卓啰监军地分相对。

通泉堡，属秦凤路新泉砦管下，不系守御处，在黄河南岭上，至本砦四十里，与河北岸夏国卓啰监军地分相对。

水泉堡，系怀戎堡管下，距本堡二十里，不系守御处。

正川堡。系德威城管下，啰迷谷口新移正川堡距本处二十五里，不系守御处。

熙州，上，临洮郡，镇洮军节度。本武胜军。熙宁五年收复，始改焉。寻为州。初置熙河路经略、安抚使，熙州、河州、洮州、岷州、通远军五州属焉。后得兰州，因加“兰会”字。元祐改熙河兰会路为熙河兰岷路，元符复故。会州既割属泾原，又改为熙河兰廓路，宣和又改为熙河湟廓路，又改湟州为乐州，又改为熙河兰乐路，寻复改为熙河兰廓路。旧统五州军，兰、廓、西宁、震武、积石六州军^①相继来属，又改通远军为巩州，凡统九

州、三军^②。崇宁户一千八百九十三，口五千二百五十四。贡毛毳段、麝香。县一：狄道。中下。熙宁六年置，九年省。元丰二年复置。

注：①六州军：按此处上面所列仅五州军，与“六州军”之数不合。据下文和上文所叙沿革，“兰廓”下文当脱“乐州”一名。②凡统九州三军：按本路所统为九州二军，此处“三”字当为“二”之误。

砦一：康乐。熙宁六年，置康乐城为砦，省马踪砦。马踪砦旧属秦州长道县。

堡九：熙宁五年，置庆平、通谷、渭源、北关。六年，改刘家川为当川，置南关、南川。七年，置结河。元丰七年，置临洮。即通谷，庆平，渭源，结河，南川，当川，南关，北关，临洮。东至定远城四十里，西至定羌城界三十五里，南至熙州六十五里，北至阿千堡七十里。

安羌城，宣和六年，赐熙河兰廓路新建溢机堡名为安羌城，不知属何州军，姑附于此。

广平堡。

河州，上，安乡郡，军事。熙宁六年收复。崇宁户一千六十一，口三千八百九十五。贡麝香。县一：宁河。熙宁六年，置枹罕县，九年省。崇宁四年，升宁河砦为县。旧香子城。

城一：定羌。熙宁七年，改河诺城^①为定羌城。

砦一：南川。熙宁七年，置南山堡，寻改为南川砦。

堡四：熙宁七年，置东谷。八年，置阎精。元丰三年，置西原、北河二堡。东谷，阎精，西原，北河。关一：通会。熙宁七年置。

注：①河诺城：本书卷一五及《十朝纲要》卷一〇都作“珂诺城”，《长编》卷二五二作“阿纳城”。

循化城，旧一公城，崇宁二年收复，改今名。别见“乐州”。东至怀羌城四十五里，西至积石军界一百余里，南至下桥家族地分一百余里，北至来同堡六十五里。

大通城，旧达南城，崇宁二年收复，改今名。别见“乐州”。东至通津堡界十五里，西至菊花河六十里，南至扑水原二十一里，北至宁塞堡界

十五里。

安疆砦，旧名当标城，崇宁二年收复，改今名。别见“乐州”。东至来同堡三十三里，西至通津堡五十里，南至循化城一百一十里，北至黄河二十里。怀羌城，崇宁三年，王厚收复。东至南川砦六十里，西至循化城六十五里，南至洮州界一百七十余里。北至安疆砦一百七十里。

来羌城，崇宁三年，王厚收复。东至安乡关七十里，西至大通城界三十八里，南至南川界四十八里，北至黄河二十里。

讲朱城，元符二年，洮西安抚司收复河南讲朱、一公、错凿、当标、彤撒、东迎六城，寻弃之。崇宁二年，再收复。除一公改循化城，当标改安疆砦，余四城皆未详。按：讲朱、错凿、一公、当标皆在河州之南，元符二年，边厮波结先以此四城来降，未几，王瞻乃进据之。

错凿城，彤撒城，东迎城，宁河砦，崇宁四年，已升宁河砦为县，别有宁河砦。东至定羌城三十里，西至河州四十五里，南至通会关三十里，北至河州界二十里。

来同堡，旧名甘扑堡，崇宁三年筑，赐今名。东至南川砦九十里，西至安疆砦三十五里，南至怀羌城三十五里，北至来羌城三十里。

通津堡，旧名南达堡，崇宁三年赐今名。东至安疆砦四十五里，西至大通城界二十五里，南至循化城一百三十里，北至大通城界二十里。

南山堡，《元丰九域志》属原州绥宁县。

安乡关，旧城桥关，元符三年赐名。东至京玉关界四十里，西至临滩堡四十里，南至河州界三十五里，北至安川堡界一十五里。

临滩堡。东至安乡关四十里，西至古鸡山二十里，南至南川砦界二十里，北至黄河四十里。

巩州，下。本通远军。熙宁五年，以秦州古渭砦为军。崇宁三年，升为州。崇宁户四千八百七十八，口一万一千八百五十七。贡麝香。县三：陇西，元祐五年增置。永宁，宁远。崇宁三年，升永宁砦为县，又升宁远砦为县。城一：定西。元丰四年，以兰州西使城为定西城。五年，改定西城为通远军，以汝遮堡为定西城，属通远军。崇宁二年，废定西城管下熨斗平

堡,通西砦管下榆木岔堡,并安西城。别见“兰州”。东至龟儿鬐镇六十五里,西至龛谷堡一百一十五里,南至通西砦四十六里,北至安西城二十七里。砦六:熙宁五年,割秦州永宁、宁远、威远、通渭、熟羊、来远六砦隶军。六年,置盐川砦。八年,废威远砦为镇。元丰五年,收通西砦。七年,废来远砦为镇,属永宁。崇宁五年,通渭县复为砦,未详何年以砦为县。永宁,宁远,崇宁三年,与永宁同升为县。

通渭,东至甘泉城五十五里,西至巩州六十四里,南至来远镇一百里,北至甘泉城界六十里。

熟羊,盐川,熙宁六年九月置砦,后改为镇。

通西。东至甘泉城一百二十里,西至熟羊砦七十里,南至三岔堡四十八里,北至定西砦四十八里。

堡七:熙宁五年,割秦州三岔、乜羊、广吴、渭川、哑儿五堡隶军。七年,以岷州遮羊堡来隶。元丰元年,遮羊复隶岷州。五年,置榆木岔、熨斗平二砦堡。七年,废乜羊、广吴、渭川、哑儿四堡。

三岔,旧堡,熙宁四年置。

榆木岔,崇宁二年废^①。

熨斗平,崇宁二年废^②。

者达堡,秦州,熙宁五年改古渭砦为通远军,废者达、本当、七麻堡。今通渭乃领七麻堡,不知何年复置者达、本当堡。

注:①崇宁二年废:“废”原作“置”。据上文“定西”及“堡七”条改。

②崇宁二年废:“废”原作“置”。据上文“定西”及“堡七”条改。

七麻堡,本当堡,扑麻龙堡。

岷州,下,和政郡,团练。熙宁六年收复。崇宁户四万五百七十,口六万七千七百三十一。贡甘草。县三:祐川,唐县。崇宁三年复。大潭,中。建隆三年,合良恭、大潭两镇置县,隶秦州。熙宁七年,自秦州来隶。长道,紧,熙宁七年,自秦州来隶。

砦五:秦州临江砦,熙宁六年,割隶州。七年,置荔川、床川、闾川,又置宕昌。临江,荔川,宋川,闾川,宕昌。

堡三：熙宁六年，以秦州马务堡隶州。七年，置遮羊堡，寻改为镇。十年，置铁城堡。元丰元年，遮羊堡复隶于州。遮羊，谷藏，并熙宁七年置。铁城，熙宁十年置。

监一：滔山。熙宁九年置，铸铁钱。

兰州，下，金城郡，军事。元丰四年收复。崇宁户三百九十五，口九百八十一。贡甘草。县一：兰泉。崇宁三年置，倚郭。

砦一：元丰四年，置龛谷、吹龙二砦。七年，割吹龙属阿千堡。

龛谷。元祐七年废。绍圣三年，复修为堡。东至定远砦一百里，西至阿千堡七十里，南至通谷堡一百二十里，北至定远城三十里。

堡二：元丰四年，置皋兰堡、巩哥关。五年，置西关、胜如、质孤堡。六年，改巩哥关作东关堡，废西关、胜如、质孤堡，置阿千堡。七年，废皋兰堡。元祐五年，复修胜如、质孤二堡，寻废。东关，东至质孤堡三十六里，西至兰州一十八里，南至屈金支山三十里，北至黄河不及里。

阿千。有阿千水。东至屈金支山二十五里，西至西关堡界二十里，南至临洮堡七十里，北至兰州界三十七里。定西城，元丰四年，以兰州西使城为定西城。五年，改定西城为通远军，以汝遮堡为定西城，属通远军。别见“巩州”。

定远城，元祐七年筑，旧名李诺平，本龛谷砦，因地窄及无水，故废之，改筑为定远军城。东至安西城八十里，西至东关堡五十里，南至龛谷堡三十里，北至黄河一百七里。

金城关，绍圣四年建筑，南距兰州约二里。崇宁三年，王厚乞移置斫龙谷口，不行。

京玉关，元符三年赐名，本号把搆桥。东至西关堡四十里，西至通川堡四十里，南至临洮堡一百三十九里，北至乱六岭分界三十里。

通川堡。元符三年，自京玉关至啰叭抹通城中路镵斫狐川新筑堡，赐名，寻弃之。崇宁二年，再收复。东至京玉关四十里，西至通湟砦四十里，南至圆子堡约九里，北至乱六岭分界八十里。别见“乐州”。

洮州。唐末陷于吐蕃，号临洮城。熙宁五年，诏以熙、河、洮、岷、通远

军为一路,时未得洮州。元符二年得之,寻弃不守。大观二年收复,改临洮城仍旧为洮州。三年,升团练。东至岷州界一百一十三里,西至乔家族生界二百里,南至鲁黎族生界一百五里,北至河州界一百二十里。通岷砦。东至铎龙桥六十七里,西至洮州四十里,南至洮河二十里,北至熙州界五十五里。

《金史·地理志》

庆原路，旧作陕西西路。府一，领节镇二，刺郡三，县十八^①，镇二十三，城二，堡四，寨二十二^②，边将营八。

注：①县十八：殿本作“县十九”。②寨二十二：殿本作“寨十六”。

庆阳府，中。宋安化郡庆阳军节度。本庆州军事，国初改安国军，后置定安军节度使兼总管，皇统二年置总管府。户四万六千一百七十一。县三、城二、堡一、寨三、镇七：

安化倚。有马岭山、延庆水。彭原有彭池原、睦阳川。镇二董志、赤城。合水有子午山。镇五金柜、怀安、业乐^①、五交、景山。城二白豹、大顺。寨三安疆^②、华池、柔远。堡一荔原。

注：①业乐：“业”原作“华”。按《九域志》卷三，永兴军路庆州安化有业乐镇。《嘉庆一统志》卷二六二，庆阳府关隘“业乐镇，在县东北八十里，去怀安镇七十里，有城周二里二十步，亦宋范仲淹筑”。今据改。②安疆：“疆”原作“强”。按《九域志》卷三，庆州安化作“安疆寨”。《宋史》卷八七《地理志》，陕西庆阳府亦作“安疆寨”。今据改。

环州，上，刺史。宋军事，国初因之，大定间升为刺郡。户九千五百四。县一、堡三、寨六、镇三：

通远倚。有咸河、马岭坂、塔子平榷场。堡三木瓜、归德、兴平。旧有惠丁、射香、流井三堡，后废。寨六定边、平远、永和、^①洪德、乌伦、安边。镇三合道、马岭、木波。

注：①永和：“和”原作“乡”。按《元丰九域志》卷三，永兴军路环州通远有永和寨。《宋史》卷八七《地理志》，陕西环州通远同。《嘉庆一统志》卷二六二，庆阳府关隘“永和寨在县东南一百里”。今据改。

宁州，中，刺史。宋彭原郡兴宁军节度，国初因之，皇统二年降为军，

仍加“西”字，天德二年去“西”字，为刺郡。户三万四千七百五十七。县四、镇五：

安定本名定安，大定七年更。倚。有洛水、九陵水。镇一交城。定平。镇二枣社、大昌。真宁有子午山^①、罗川水。镇二要关、山河。襄乐有延川水。

注：①有子午山：原脱“子”字。按《元丰九域志》卷三，永兴军路宁州真宁有子午山。《元丰元和志》卷三，宁州真宁县“子午山，亦曰桥山，在县东八十里”。今据补。

邠州，中。宋新平郡静难军节度使^①，国初因之。户四万七千二百九十一。县五、镇三、寨一：

新平倚。有泾水、潘水。淳化有仲山、车箱坂。宜禄有泾水、汭水。镇一亭口。永寿宋隶醴州。有高泉山。镇一永寿。旧有邵寨镇，后割隶泾州。寨一常宁。三水有石门山、泾水、罗川水。镇一清泉。

原州，上，刺史。宋平凉郡军事^②，大定二十七年为泾州支郡，后复军事。户一万七千八百。县二、镇三、寨五：

临泾倚。有阳晋水、朝那水。彭阳有大湖河、蒲川河。镇三萧镇、柳泉、新城。寨五绥宁、平宁、靖安^③、开边、西壕。

泾州，中，彰化军节度使。本治泾川^④，元光二年徙治长武。户二万六千二百九十。县四、寨一、镇二：

泾川本保定县，大定七年更。寨一官地。长武。良原。灵台。镇二百里、邵寨。

注：①宋新平郡静难军节度使：“静”原作“靖”。按本书纪传中静难军十余见，皆作“静”，唯此作“靖”。《元丰九域志》卷三，永兴军路“邠州，新平郡静难军节度”。《宋史》卷八七《地理志》陕西邠州同。今据改。②宋平凉郡军事：原脱“郡”字。按《元丰九域志》卷三，秦凤路“原州平凉郡军事”。《宋史》卷八七《地理志》，陕西原州平凉同。今据补。③靖安：“靖”原作“清”。按《元丰九域志》卷三，陕西秦凤路原州有靖安，《宋史》卷八七《地理志》陕西原州同。今据改。④本治泾川：“川”原作“州”。按下文属县

四,首为“泾川”,注云,“本保定县”。唐、宋志书如《元和郡县志》卷三,《太平寰宇记》卷三二,《元丰九域志》卷三,以及《新唐书》卷三七《地理志》,《宋史》卷八七《地理志》,泾州皆以泾川为首县,知金元光二年以前,亦以此为州治。今据改。

皇统六年,以德威城、西安州、定边军等沿边地赐夏国,从所请也。正隆元年,命与夏国边界对立烽堠,以防侵轶。

临洮路,皇统二年改熙州为临洮府,置熙秦路总管府,大定二十七年更今名。府一,领节镇一,防御一,刺郡四,县一十三,镇六,城六^①,堡十二,寨九,关二。

注:①县一十三镇六城六:殿本作“县一十五、镇六、城七”。

临洮府,中。宋旧熙州临洮郡镇洮军节度,后更为德顺军,皇统二年置总管府。产甘草、庵苟子、大黄。户一万九千七百二十一。县三、镇一、城一、堡四:

狄道有白石山、洮水、浩亶河。镇一庆平。城一景骨。当川堡一通谷。康乐堡三渭源,临洮,南川临宋界。

积石州,下,刺史。本宋积石这溪哥城,大定二十二年为州,户五千一百八十五。县一、城三、堡三:

怀羌西至生羌界八十里。城三循化,西至生羌界一百里。大通,临河、夏界。来羌,临夏边。堡三通津、临滩、来同。

洮州,下。宋尝置团练。刺史。旧军事。临宋界,至西生羌界八十里。户一万一千三百三十七。堡二:通祐,临宋界,无民户,置军守。铁城,临宋界,无民户,置军守。

兰州,上,刺史。宋金城郡军事。户一万一千三百六十。县三、镇三、城二、堡三、关一:

定远兼第十将,去质孤堡一十五里。龛谷宋旧寨。阿干宋旧寨。城二宁远、安羌。堡三东关、质孤,临夏边,兼第八将。西关^①,临黄河、夏边镇三原川、猪鬃、纳米。关一京玉。

注:①西关:“关”原作“开”。按《元丰九域志》卷三,秦凤路兰州“堡

四：元丰四年置东关、皋兰……六年置阿干、西关”。又“东关，州东一十八里。西关，州西二十里”。《宋史》卷八七《地理志》，陕西秦风路兰州，元丰五年置西关堡。《嘉庆一统志》卷二五三，兰州府关隘“西关堡，在皋兰县西”。今据改。

巩州，下，节度。宋通远军，皇统二年升军事为通远军节度使。户三万六千三百一。县五、寨四、镇一：

陇西宋旧县。通渭。定西贞祐四年六月升为州，以通西、安西隶焉。镇一盐川。旧有赤觜镇，后废。通西。安西。寨四熟羊，临宋界。来远，去宋界二十五里，旧为镇。永宁，去宋界三十里。南川。旧有平西、宁远二寨，及南三岔堡^①。

注：①及南三岔堡：“岔”原作“分”。按《九域志》卷三，陕西秦风路通远军“堡一，熙宁四年置，三岔，军北二十五里”。《宋史》卷八七《地理志》，陕西秦风路巩州堡七，其中“三岔，旧堡，熙宁四年置”。《嘉庆一统志》卷二五六，巩昌府关隘“三岔堡，在陇西县北，《金史》《地理志》安西县旧有南三岔堡”。今据改。

会州，上，刺史。宋前旧名汝遮。户八千九百一十八。县一、旧有会川城。寨二、关一：

保川。寨二平西、通安。关一会安，旧作会宁。

河州，下，防御，宋安乡郡军事。至都西千七百一十里。皇统二年升军事为防御，贞祐四年十月升为节镇，军■平西。户一万四千九百四十二。县二、城一、寨三、镇一：

枹罕国初废，贞元二年复置。宁河。城一安乡关。寨三南川、通会关、定羌城。镇一积庆。

《元史·地理志》

泾州，下。唐改安定郡，后仍为泾州。宋改彰化军。旧领保定、长武、灵台、良原四县。金改保定县为泾川^①。元初以隶都元帅府，立总司辖邠州，后属巩昌都总帅府，或隶平凉府、陕西省，所隶不一，今直隶省。领县二：泾川，下。泾州治此，即保定。灵台。下。至元七年，并归泾川。十一年复立，以良原并入，而长武仍并于泾川。

开成州，下。唐原州。宋为镇戎军。金升镇戎州。元初仍为原州。至元十年，皇子安西王分治秦、蜀，遂立开成府，仍视上都，号为上路。至治三年，降为州。领县一、州一。

注：①金改保定县为泾(州)[川]。按《金史》卷二六《地理志》，泾州，县四，泾川本保定县，大定七年更。本书卷八《世祖纪》至元十一年十二月癸亥条有“长武县省入泾川”。据改。下同。

县一，开成。州一，广安州。本镇戎地，金升为县，隶镇戎州，经乱荒废。元至元十年，安西王封守西土，既立开成路，遂改为广安县，募民居止，未几户口繁夥。十五年升为州，仍隶本路。

庄浪州，下。沿革阙。成宗大德八年二月，降庄浪路为州。巩昌等处总帅府。

巩昌府，唐初置渭州，后曰陇西郡，寻陷入吐蕃。宋复得其地，置巩州。金为巩昌府。元初改巩昌路便宜都总帅府，统巩昌、平凉、临洮、庆阳、隆庆五府及秦、陇、会、环、金、德顺、徽、金洋、安西、河、洮、岷、利、巴、沔、龙、大安、褒、涇、邠、宁、定西、镇原、阶、成、西和、兰二十七州，又于成州行金洋州事。至元五年，割安西州属脱思麻路总管府。六年，以河州属吐蕃宣慰司都元帅府。七年，并洮州入安西州。八年，割岷州属脱思麻路。十三年，立巩昌路总管府。十四年，复行便宜都总帅府事，其年割

隆庆府，利、巴、大安、褒、沔、龙等州隶广元路。二十一年，又以泾、邠二州隶陕西汉中道宣慰司，而帅府所统者，巩昌、平凉、临洮、庆阳，府凡四；秦、陇、宁、定西、镇原、阶、成、西和、兰、会、环、金、德顺、徽、金洋，州凡十有五。户四万五千一百三十五，口三十六万九千二百七十二。壬子年数。领司一、县五。

录事司。

县五。陇西，下。宁远，下。伏羌，下。本旧寨，至元十三年升县。通渭，下。鞏县。下。宋名盐川寨，金为镇，至元十七年，置今县。

平凉府，唐为马监，隶原州。宋为泾原路，升平凉军。金立平凉府。元初并潘原县入平凉，化平入华亭，隶巩昌帅府。领县三：平凉，下。屯田一百一十五顷。崇信，下。华亭，下。

临洮府，唐临洮军。宋为镇洮军，又为熙州。金为临洮府。元至元十三年，复以渭源堡升为县。领县二：狄道，下。渭源，下。

庆州庆阳府，唐庆州。宋环庆路，改庆阳军，又升府。金为庆原路^①。元初改为庆阳散府，至元七年，并安化、彭原入焉。领县一：合水，下。

注：①金为庆(源)[原]路：按《金史》卷二六《地理志》，庆原路，旧作陕西西路。《金史》卷一三四《西夏传》，夏人攻庆原、延安、积石州。据改。《考异》已校。

秦州，中。唐初为秦州。宋为天水郡。金为秦州。旧领六县。元至元七年，并鸡川、陇城入秦安，治坊入清水。领县三：成纪，中。清水，中。秦安，下。

陇州，中。唐改汧阳郡，复为陇州。宋、金置防御使。旧领四县。元至元七年，省吴山、陇安入汧源，十三年，罢防御使散郡。有吴山为西镇。领县二：汧源，中。汧阳，下。

宁州，下。唐初改北地郡为宁州。宋、金因之。元至元七年，并襄乐、安定、定平入州。领县一：真宁，下。

定西州，下。本唐渭州西市，五代沦于先零。宋置定西城。金改定西县，复升为州，仍置安西县，倚郭，通西二寨，并置县来属。^①元至元三年，

并三县入本州。屯田四百六十七顷。

注：①仍置安西县倚郭通西二寨并置县来属：《金史》卷二六《地理志》“安西”作“定西”，并注“贞祐四年六月升为州，以通西、安西隶焉”。此处“安西”当做“定西”，“通西”下当有“安西”。

镇原州，下。唐原州，又为平凉郡。宋、金因之。元改镇原州，以镇戎州之东山、三川二县来属。至元七年，例并州县，遂以临泾、彭阳及东山、三川四县入本州。屯田四百二十六顷有奇。

西和州，下。唐岷州，又改和政郡，又仍为岷州。宋改曰西和。旧领县三，大潭、祐川军兴久废，唯有长道一县，元至元七年，亦并入本州。

环州，下。唐改威州。宋复为环州，后与庆州定为环庆路。金隶庆阳府。元初为散郡。旧领通远一县，元至元七年并入本州。

金州，下。本兰州龛谷寨，金升寨为县，以龛谷为金州治所。元至元七年，并县入州。

静宁州，下。宋庆历中，以渭州陇干城置德顺军，复置陇干县。金升为州。元初并治平、水洛入陇干^①，后复省陇干，改为静宁州。领县一：

注：①(永)[水]洛：据《金史》卷二六《地理志》，《宋史》卷八七《地理志》改。

隆德，下。

兰州，下。唐初置，后改金城郡，又仍为兰州。宋、金因之。元初领阿干一县及司候司，至元七年并司县入本州。

会州，下。唐初改西会州，又为粟州^①，又为会宁郡，又为会州。宋置敷川县。金置保川县^②，陷于河西，侨治州西南百里会川城，名新会州。元初弃新会州，迁于所隶西宁县。至元七年，并县入州。

注：①(粟)[粟]州：据《新唐书》卷三七《地理志》，《元一统志》改。

②宋置敷川县金置(宝)[保]川县：《宋史》卷八七《地理志》，会州，崇宁三年置倚郭县曰敷文。道光本改“敷川”为“敷文”。又“宝川”误。《金史》卷二六《地理志》，会州，县一，保川。据改。《新编》已校。

徽州，下。元兵入蜀，凤州二县首降，以凤州仍治梁泉，别置南凤州

治于河池。后又升永宁乡为县，与两当同为属邑。至元元年，改为徽州。七年，并河池、永宁二县入州。领县一：两当，下。

阶州，下。唐初置武州，又改武都郡，又更名阶州。宋因之。今州治在柳树城，距旧城东八十里。旧领福津、将利二县，至元七年并入本州。

成州，下。唐初为成州，又改同谷郡，后仍为成州。宋因之。旧领同谷、栗亭二县。元初岁壬寅，以田世显挈成都府归附，令迁于栗亭，行栗亭管民司事，不隶成州，割天水县来属。至元七年，并同谷、天水二县入州。

金洋州，本隶兴元路，戊戌岁，有雷、李二将挈民户归附，令迁至成州，自行金洋州事。

吐蕃等处宣慰司都元帅府至元九年，于吐蕃西川界立宁河站^①。

注：①至元九年于吐蕃西[川]界立宁河站：按本书卷七《世祖纪》至元九年四月己丑条有“诏于吐蕃、西川界立宁河驿”。据补。

河州路，下。领县三：定羌，下。宁河，下。安乡，下。

洮州，下。领县一：可当，下。

岷州，下。

礼店文州蒙古汉儿军民元帅府。自河州以下至此多阙，其余如朵甘思、乌思藏、积石头州之类尚多，载籍疏略，莫能详录也。

甘肃等处行中书省，为路七、州二，属州五。本省马站六处。

河西陇北道肃政廉访司

甘州路，上。唐为甘州，又为张掖郡，宋初为西夏所据，改镇夷郡，又立宣化府。元初仍称甘州。至元元年，置甘肃路总管府。八年，改甘州路总管府。十八年，立行中书省，以控制河西诸郡。户一千五百五十，口二万三千九百八十七。至元二十七年数。本路黑山、满峪、泉水渠、鸭子翅等处屯田，计一千一百六十余顷。

永昌路，下。唐凉州。宋初为西凉府，景德中陷入西夏。元初仍为西凉府。至元十五年，以永昌王宫殿所在，立永昌路，降西凉府为州隶焉。

西凉州，下。

肃州路，下。唐为肃州，又为酒泉郡。宋初为西夏所据。元太祖二十一年，西征，攻肃州下之。世礼至元七年，置肃州路总管府。户一千二百六十二，口八千六百七十九。至元二十七年数。

沙州路，下。唐为沙州，又为敦煌郡。宋仍为沙州，景祐初，西夏陷瓜、沙、肃三州，尽得河西故地。金因之。元太祖二十二年，破其城以隶八都大王。至元十四年，复立州。十七年，升为沙州路总管府，瓜州隶焉。沙州去肃州千五百里，内附贫民欲乞粮沙州，必须白之肃州，然后给予，朝廷以其不便，故升沙州为路。

瓜州，下。唐改为晋昌郡，复为瓜州。宋初陷于西夏。夏亡，州废。元至元十四年复立。二十八年徙居民于肃州，但名存而已。

亦集乃路，下。在甘州北一千五百里，城东北有大泽，西北俱接沙磧，乃汉之西海郡居延故城，夏国尝立威福军。元太祖二十一年内附。至元二十三年，立总管府。二十三年，亦集乃总管忽都鲁言：“所部有田可以耕作，乞以新军二百人凿合即渠于亦集乃地，并以傍近民西僧余户助其力”。从之，计屯田九十余顷。

山丹州，下。唐为删丹县，隶甘州。宋初为夏国所有，置甘肃军。元初为阿只吉大王分地。至元六年，行山丹城事，删讹为山。二十二年，升为州，隶甘肃行省。

《明史·地理志》

庆阳府元属巩昌总帅府。洪武二年五月直隶行省。领州一，县四。东南距布政司五百七十里。

安化倚。洪武二十四年四月建庆王府。二十六年迁于宁夏卫。元省。洪武中复置。东北有白于山，洛水所出。又城东有东河，西有西河，流合焉，下流为马莲河。又西有黑水河，源出县北之太白山，下流至长武县合于泾河。东北有槐安、北有定边二巡检司。又西南有驿马关、又有灵州、又有大盐池三巡检司，废。

合水府东南。东有建水，西有北岔河，流合焉，谓之合水，西南入马莲河。又东北有华池水，有平戎川流合焉，东入鄜州之洛河。有华池巡检司。

环府西北。元环州，属巩昌总帅府。洪武初，降为县，来属。西有环河，出县北青冈峡，下流为府城之西河。又南有黑水河，又有咸河，西南有甘河，俱注于环河。又西有葫芦泉。西北有清平关。西北有安边守御千户所，弘治中置。

真宁府东南。元属宁州。万历二十九年改属府。西有马莲河。南有大陵、小陵诸水，即九陵川之上源也。东有雕山岭巡检司。

宁州元属巩昌总帅府。洪武中来属。东有横岭，又有九龙川，亦曰宁江，亦曰九陵川，西南流，会上流群川，而南注于泾河。东北有襄乐巡检司。北距府百五十里。

平凉府元属巩昌总帅府。洪武三年五月直隶行省。领州三，县七。东南距布政司六百五十里。

平凉倚。洪武二十四年建安王府。永乐十五年除。二十二年，韩王府自辽东开原迁此。西南有可蓝山。西有崆峒山。又有笄头山，泾水出焉，下流至高陵县入渭。又西有横河，东有湫峪河，俱流入泾河。又西有群牧

监。洪武三十年置陕西行太仆寺。永乐四年置陕西苑马寺，领长乐等六监，开成等二十四苑，俱在本府及庆阳、巩昌境内。正统三年又并甘肃苑马寺入焉。又东有通梢关。

崇信府东南。北有汭水。西南有赤城川，南有白石川流合焉。下流合于泾水。

华亭府南。西有小陇山。西北有瓦亭山，有瓦亭关巡检司，所谓东瓦亭也。东北有泾河。东南有汭水。又东南有三乡镇，北有马铺岭二巡检司。

镇原府东北。元镇原州，属巩昌总帅府。洪武初，降为县，来属。西北有胡卢河，分二流，一北注于黄河，其支流东南注于泾河。南有高平川，流入胡卢河。西有安平寨巡检司。西北有萧关。西南有木峡关。又西有石峡关。南有驿藏、木靖二关。

隆德府西南。元属靖宁州。嘉靖三十八年十一月改属府。东有好水，西流与苦水合。西北有武廷川，流入好水。东南有捺龙川，流入苦水。

泾州元直隶陕西行省。洪武三年以州治泾川县省入，来属。旧治在泾水北。今治本皇甫店，洪武三年徙于此。北有泾河，有汭水。东有金家凹巡检司。西北距府百五十里。领县一。

灵台州东南。西北有白石原。东北有三香水，一名三交川，下流至邠州合泾水。又西南有细川水，东北流合于三交川。

静宁州元属巩昌总帅府。洪武中来属。南有陇山。北有横山，即陇山支阜。南有水洛川，一名石门水，下流至秦州入略阳川。又西有苦水河，即高平川之上源。东距府二百三十里。领县一。

庄浪州东南。元庄浪州，直隶陕西行省。洪武三年属凤翔府。八年三月降为县，来属。西有苦水川。

固原州本固原守御千户所，景泰三年以故原州城置。成化四年升为卫。弘治十五年置州，属府。西南有六盘山，上有六盘关，东北有清水河出焉，下流合镇原县之胡卢河。又北有黑水，北流入于大河。又东西有二朝那湫，其下流注于高平川。南有开成州，元直隶陕西行省，治开成县。

洪武二年省州，以县属平凉府。成化三年废县。又东南有广安州，元属开成州，洪武二年省。又西有甘州群牧所，永乐中置。又西北有西安守御千户所，成化五年以旧西安州置。北有镇戎守御千户所，成化十二年以葫芦峡城置。东北有平虏守御千户所，弘治十四年以旧豫望城置。又北有下马关，嘉靖五年置。东南距府百七十里。

巩昌府元属巩昌总帅府。洪武二年四月直隶行省。领州三，县十四。东距布政司千六十里。

陇西倚。西有首阳山，上有关。北滨渭水，东有赤亭水，西流入焉。

安定府北。元定西州，属巩昌总帅府。至正十二年三月改名安定州。洪武十年降为县，属府。北有车道岷。西有西河，东有东河，流合焉。北有恫峴口巡检司。

会宁府东北。元会州，属巩昌总帅府。至正十二年三月改为会宁州。洪武十年降为县，属府。东有响水，北流入大河。东有青家巡检司。

通渭府东北。北滨渭，西有华川，东流入焉。

漳府南。西南有故城。今治，正统中所徙。西北有西倾山。南有漳水，北流入渭。东南有盐井。

宁远府东。南有太阳山，旧产铁。北有桃花峡，两山夹峙，渭水经其中。西有广吴水，又有山丹水，俱源出岷州，并流北注渭。

伏羌府东。西南有朱圉山，俗名白崖山。北有渭水，西南有永宁河，西有洛门川，俱东北注于渭。

西和府东南。元西和州，属巩昌总帅府。洪武十年降为县，属府。旧治在西南白石镇，洪武中，移于今治。北有祁山。南有黑谷山，上有关。西北有西汉水，亦曰盐官水。西南有浊水，即白水江也。东北有盐井。

成府东南。元成州，属巩昌总帅府。洪武十年降为县，属府。西北有仇池山。东南有西汉水。西南有浊水，又西有建安水，又有洛谷川，俱流入西汉水。又东有泥阳水，下流至徽州界入嘉陵江。又北有黄渚关巡检司。

秦州元属巩昌总帅府。洪武二年属府，省州治成纪县入州。西南有蟠冢山，西汉水出焉，下流至宁羌州合嘉陵江。东北有渭水，有秦水东流

入渭。又西有西谷水，下流入西汉水。又南有籍水，西南有段谷水流入焉。又东有长离水，即瓦亭川下流也，俱流入于渭。南有高桥巡检司。又有石榴关。又有现子关。西距府三百里。领县三。

秦安州北。东有大陇山。又东北有瓦亭山，所谓西瓦亭也。城南有渭水。又西有陇水，瓦亭川自东北流合焉。又东有松多川，下流入于秦水。又东有陇城关巡检司。

清水州东。东有陇山，有盘岭巡检司。西南又有小陇山。西有渭水。东有秦水，南有清水流入焉。

礼州西南。元礼店文州军民元帅府，属吐蕃宣慰司。洪武四年十一月置礼店千户所。十一年属岷州卫。十五年改属秦州卫。成化九年十二月置礼县于所城，属州。故城在东。洪武四年移于今治。东南有西汉水。西南有岷峨山，岷江出焉，东南流入阶州界合于西汉水。又西有漩水镇、南有板桥山二巡检司。

阶州元属巩昌总帅府。洪武四年降为县，属府。十年六月复为州。旧城在东南坻龙冈上。今城，洪武五年所置。北有白水江。东北有犀牛江，即西汉水也。又西北有羌水，下流合白水江。又东有七防关巡检司。西北距府八百里。领县一。

文州东南。元文州。至元九年十月置，属吐蕃宣慰司。洪武四年降为县，属府。十年六月改属州。二十三年三月省。成化九年十二月复置，仍属州。东南有青唐岭，路入四川龙安府。东有白水，西有黑水，流合焉。又北有羌水，一名太白水。东有文县守御千户所，本文州番汉千户所，洪武四年四月置。二十三年改文县守御军民千户所。成化九年更今名。又东有玉垒关。西北有临江关。

徽州元属巩昌总帅府。洪武十年六月降为县，属府，后复升为州。东南有铁山。南有嘉陵江，又有河池水流入焉。又南有虞关巡检司。西南有小河关。西北距府四百八十里。领县一。

两当州东。洪武十年六月省入徽县，后复置，属州。南有嘉陵江。

临洮府元临洮府，属巩昌总帅府。泰定元年九月改为临洮路。洪武

二年九月仍为府。领州二，县三。南距布政司千二百六十里。

狄道倚。西南有常家山，与西倾山相接。北有马寒山，浩尾河出于其北，阿干河出于其南，俱东流入大河。又西南有洮河，自洮州卫流入。又东有东峪河，南有邦金川，皆流会洮河。北有摩云岭巡检司。又北有打壁峪关，有结河关。南有南关，有下衬关，有八角关、十八盘关。西有三岔关，有分水岭关。

渭源府东少南。西有南谷山，渭水所出。又有鸟鼠山，渭水所经，东至华阴县入大河。又西有分水岭，东流者入渭，西流者入洮，上有分水岭关巡检司。又西南有五竹山，清源河出焉，径县东南入渭。

兰州元属巩昌总帅府。洪武二年九月降为县，来属。成化十三年九月复为州。建文元年，肃王府自甘州卫迁此。南有皋兰山。北滨大河，所谓金城河也，湟水自西，洮水、阿干河俱自南，先后流入焉。又西南有漓水，合于洮水。北有金城关，下有镇远浮桥，有河桥巡检司。西北有京玉关，南有阿干镇关。西南有凤林关。南距府二百十里。领县一。

金州东少南。元金州，属巩昌总帅府。洪武二年九月降为县，属府。成化十三年改属州。旧城在南，洪武中，移于今治。北有大河，东北流乱山中，入靖虏卫界。又南有浩尾河，一名闪门河，入于大河。东北有一条城，万历二十五年置。

河州元河州路，属吐蕃宣慰司。洪武四年正月置河州卫，属西安都卫。六年正月置河州府，属陕西行中书省。七年七月置西安行都卫于此，领河州、朵甘、乌斯藏三卫。八年十月改行都卫为陕西行都指挥使司。九年十二月，行都指挥使司废，卫属陕西都指挥使司。十年分卫为左右。十二年七月，府废，改左卫于洮州，升右卫为军民指挥使司。成化九年十二月置州，属府，改军民指挥使司为卫。西南有雪山，与洮州界。西北有小积石山，上有关。大河自塞外大积石山东北流，径此，又径榆林卫北，折而南，与山西中流分界，至潼关卫北，折而东，入河南界，回环陕西境四千余里。南有大夏河，即漓水也，亦曰白石川。又西北有积石州，元属吐蕃宣慰司，洪武四年正月改置积石州千户所。西南有贵德州，元属吐蕃

宣慰司,洪武八年正月改置归德守御千户所。又南有宁河县,东北有安乡县,元俱属河州路,洪武三年废,六年复置。十二年复废。又东南有定羌巡检司。东北距府百八十里。

洮州卫元洮州,属吐蕃宣慰司。洪武四年正月置洮州军民千户所,属河州卫。十二年二月升为洮州卫军民指挥使司,属陕西都司。西南有西倾山,桓水出焉,下流为白水江,又湟川亦出焉,一名洮水。又北有石岭山,上有石岭关。东有黑松岭,上有松岭关。又东有黑石关、三岔关、高楼关。北有羊撒关。西南有新桥关、洮州关。东南有旧桥关。南距布政司千六百七十里。

岷州卫元岷州,以旧祐川县地置,属吐蕃宣慰司。洪武四年正月置岷州千户所,属河州卫。十一年七月升为卫,属陕西都司。十五年四月升军民指挥使司。嘉靖二十四年又置州,改军民指挥使司为卫。四十年闰五月,州废,仍置军民指挥使司。洪武二十四年建岷王府。二十六年迁云南。北有岷山,洮河经其下。南有白水,一名临江。又东有石关。东北有铁州,元属吐蕃宣慰司。洪武四年正月置铁城千户所,属河州卫,后废。领所一。南距布政司千五百五十里。西固城守御军民千户所卫南。本西固城千户所,洪武七年三月置,属巩昌府。十五年四月改置,来属。南有白水。北有化石关。西北有平定关。

靖虏卫正统二年以故会州地置,属陕西都司。南有乌兰山,上有乌兰关。北有大河。西南有祖厉河,东北有亥刺河,皆注于大河。西南有会宁关。南距布政司千二百二十里。

陕西行都指挥使司元甘肃等处行中书省,治甘州路。洪武五年十一月置甘肃卫。二十五年罢。二十六年,陕西行都指挥使司自庄浪徙置于此。领卫十二,守御千户所四。距布政司二千六百四十五里。

甘州左卫倚。元甘州路。洪武初废。二十三年十二月置甘州左卫。二十七年十一月罢。二十八年六月复置。洪武二十五年三月建肃王府。建文元年迁于兰县。西南有祁连山。西北有合黎山。东北有人祖山,山口有关,曰山南,嘉靖二十七年置。又东北有居延海。西有弱水,出西南山谷

中，下流入焉。又有张掖河，流合弱水，其支流曰黑水河，仍合于张掖河。又东南有卢水，亦曰沮渠川。

甘州右卫、甘州中卫俱洪武二十五年三月置。

甘州前卫、甘州后卫俱洪武二十九年置。四卫俱与甘州左卫同城。

肃州卫元肃州路，属甘肃行省。洪武二十七年十一月置卫。西有嘉峪山，其西麓即嘉峪关也。弘治七年正月扁关曰镇西。西南有小昆仑山，亦曰雪山，与甘州山相接。北有讨来河，东会于张掖河。西南有白水，又西北有黑水，东南有红水，俱流入白水，下流入西宁卫之西海。又东北有威虏卫，洪武中置，永乐三年三月省。东距行都司五百十里。

山丹卫元山丹州，直隶甘肃行省。洪武初废。二十三年九月置卫，属陕西都司，后来属。东南有焉支山。西有删丹河，即弱水也。北有红盐池。西距行都司百八十里。

永昌卫元永昌路，属甘肃行省，至正三年七月改永昌等处宣慰司。洪武初废。十五年三月置卫，属陕西都司，后来属。北有金山，丽水出焉。西南有白岭山，亦曰雪山。西有水磨川，上有水磨关。又东南有蹇占河。西北距行都司三百十里。

凉州卫元西凉州，属永昌路。洪武九年十月置卫，属陕西都司，后来属。南有天梯山，三岔河出焉。东南有洪池岭。又东北有白亭海，有瀟野泽。又西有土弥干川，即五涧水也，亦出天梯山，下流合于三岔河。又东有杂木口关。又有凉州土卫，洪武七年十月置。西北距行都司五百里。

镇番卫本临河卫，洪武中，以小河滩城置。三十年正月更名。建文中罢。永乐元年六月复置。西有黑河，即张掖河下流也。又东有三岔河。南有小河。西有盐池。西南有黑山关。西距行都司五百五十里。

庄浪卫洪武五年十一月以永昌地置。十二年正月置陕西行都指挥使司于卫城。二十六年，行都司徒于甘州。建文中，改卫为守御千户所。洪武三十五年十月复改所为卫，属陕西都司，后来属。东有大松山。其北有小松山。西有分水岭，南出者为庄浪河，北出者为古浪河。又南有大通河，与庄浪河合，北流经卫西，入于沙漠。北距行都司九百四十里。

西宁卫元西宁州，直隶甘肃行省。洪武初废。六年正月置卫。宣德七年十一月升军民指挥使司，属陕西都司，后来属。西南有小积石山，与河州接界。东南有峡口山，亦曰湟峡。南有大河，自西域流入，回环于陕西、山西、河南、山东四布政司，及南直隶之地，几至万里，至淮安府清河县，南合长淮，又东至安东县南入于海。又北有湟水，即苏木连河也，东入大河。又西南有赐支河，又城北有西宁河，皆流入大河。又西北有浩亶水，西南有宗哥川，俱流合于湟水。又西有西海，亦名卑禾羌海，俗呼青海。西北有赤海。又有乌海盐池。东南有绥远关。西北距行都司千三百五十里。

碾伯守御千户所本碾北地。洪武十一年三月置庄浪分卫。七月改置碾北卫，后废，而徙西宁卫右千户所于此。成化中更名。南有碾伯河。西北距行都司千二百三十里。

沙州卫元沙州路，属甘肃行省。洪武初废。永乐元年置卫。正统间废。南有鸣沙山。东南有三危山。又东有龙勒山，又有渥洼水。西有瓜州，元属沙州路，洪武初废。东距行都司千三百六十里。

镇夷守御千户所洪武三十年以甘州卫地置。建文二年罢。永乐元年复置所，旧在西北，天顺八年移于今治。南有黑河，即张掖河也。西南有盐池。北有兔儿关。东南距行都司三百里。

古浪守御千户所正统三年六月以庄浪卫地置。古浪河在东。又南有古浪关。东有石峡关。东南距行都司六百四十里。

高台守御千户所景泰七年以甘州卫之高台站置。弱水在北。又西有合黎山。西南有白城山。东南距行都司一百六十里。

《清史稿·地理志》

甘肃：《禹贡·雍州》（南兼梁州）之域。明陕西布政使司及陕西行都指挥使司地。清顺治初，因明制，设甘肃巡抚，驻宁夏（宁夏巡抚旋裁）。五年，徙甘肃巡抚驻兰州。康熙三年，分陕西为左、右布政使司，以右布政使司驻巩昌，领四府如故。六年，改陕西右布政使司为巩昌布政使司。七年，又改甘肃布政使司，徙治兰州。雍正三年，裁行都指挥使司及诸卫所，改置甘州、凉州、宁夏、西宁，升肃州及秦、阶二州为直隶州。乾隆三年，废临洮府徙兰州，因更名。二十四年，置安西府。二十九年，裁巡抚，以陕甘总督治兰州，行巡抚事。三十八年，置镇西府于巴里坤、迪化直隶州于乌鲁木齐。三十九年，降安西府为直隶州。四十二年，升泾州为直隶州。同治十一年，置化平川直隶。十二年，升固原州为直隶州。光绪十二年，新疆改建行省，割迪化、镇西往属。东至陕西；（及鄜州、邠州）。南至四川；（保宁、龙安）。西南至青海；北至阿拉善、额济纳二旗。（及喀尔喀札萨克图汗部）。广二千一百二十里，袤一千四百十里。宣统三年，编户九十万六千六百三十九，口四百六十九万一千六百二十。领府八，直隶州六，直隶厅一，州六厅八，县四十七。其名山：陇、蟠冢、崆峒、西倾、积石。其大川：黄河、西汉、渭、泾、洮、湟。其重险：萧关、嘉峪、玉门。其驿道：一，东南逾六盘达陕西长武；一，西北渡河出嘉峪关达新疆哈密。电线：西北通迪化，东南通西安。

兰州府：（冲，繁，难。陕甘总督，布政、提学、提法三使，巡警、劝业道驻）。明为州，属临洮府，领金、渭源、河州。乾隆三年，徙临洮府来治，更名，以所隶河州、狄道、渭源三州县改属，升狄道为州，置皋兰县为府治，兼割巩昌府属之靖远隶之。东北距京师四千四十里。广千二百二十五里，袤八百里。北极高三十六度八分。京师偏西四十二度三十四分。领州

二,县四。皋兰冲,繁,疲,难。倚。城南五里,皋兰山,五泉出其下。百四十里,康狼山。北:九州、台山、松山。西:沃干岭、马衔山。黄河,西南自河州入,西流,至孔家寺,折而东北,复东流,迤南,径城北,至东坪,与金县分界。又东北,径乌金峡,入靖远。洮水南自狄道入,西北流,至毛龙峡入黄河。边墙,西自平番来,起县西北毛牛圈,东南迤至小芦塘,入靖远盐池。边墙外,北与蒙古分界,有界碑六。镇一:纳米。驿三:兰泉、沙井、摩云。县丞驻红水堡。金冲,疲。府东南八十里。南:龛山。西南:马衔山。东北:北峦山、车道岭。东:驼项。西北:猪嘴。黄河自皋兰入,南新营河自狄道入,至大营川,右合瓦家河,左合清水河,合龛峪、徐家峡、大峡诸水,西北至皋兰入于河。黄河又东北过乌金峡入靖远。边墙,西自皋兰来,逾黄河南至索桥,合旧边墙,东北入中卫。驿二:定远、清水。狄道州繁,疲,难。府南二百里。南:抹邦山、煤山。北:马衔山,故关原。西:西平山。西南:十八盘山。洮水,南自洮州入,合抹邦、东峪、三岔、留川四水及诸小水,屈曲北注,径沙泥州判境,沙泥水出摩云岭西麓,西流入之。洮水又北,入皋兰。州北河渠,雍正三年濬,引洮流溉田三百顷。赵土司驻所,州东南六盘山麓。驿四:沙泥、洮阳、窑店、庆平。州判驻沙泥堡。渭源冲,疲。府南少东二百五十里。西北:七峰山。南:露骨。西南:五行。西:鸟鼠山,渭水出其北麓,东南流,径城北,合清源、锹峪两水,东入陇西。驿一:庆平。靖远疲,难。府东北二百里。明,靖虏卫。雍正二年省卫,设同知,属巩昌。八年置县,裁同知。乾隆三年来属。东:红山、屈吴山。南:乌兰。北:雪山。黄河,西南自金县入,至城北,祖厉河南自会宁来,会左关川水,北流入之。黄河又纳县境诸水,北流,迤西逾边墙,东北入中卫。边墙,自皋兰红水堡来,接中卫。河州繁,疲,难。府西南二百里。陕西河州镇总兵驻,雍正四年,省河水卫并入州属。北:凤林山。西南:石门山。西北:小积石山,即水经注唐述山。黄河,西自循化入,至积石关入州境,右纳样卑、吹麻、银川三水,东径城南,又东至莲花寺。大夏河,西南自循化来,会州境诸小水,屈曲北流入之。黄河又东入皋兰。韩土司及吐蕃、老鸦、端言、红岩、牙党、川撒诸族,分居州西境。驿五:长安、凤林、银川、和政、定羌。

太子寺，州判驻。

平凉府：(中，冲，繁。平庆泾固化道治所)。明为府，领州三，县七。顺治初，因明制。乾隆四十三年，升泾州为直隶州。同治十一年，割平凉、华亭、固原、隆德四州县属地置化平川直隶，十二年，升固原州为直隶州。西北距省治七百六十里。广五百里，袤五百八十里。北极高三十五度三十五分。京师偏西九度四十八分。领州一，县三。平凉冲，疲，难。倚。西北：天坛。东南：石马。西南：可蓝。西：空同山。其支麓为笄头、马屯山、弹箏峡。泾水北源西自固原州来，至沙沟门入境；南源西自化平川来，至味子沟入境。合流城西，右纳大峡河，左纳小芦、大芦、潘阴涧诸水，东南入泾州。油水西自崇信入，径县东南王家寺，东入泾州。东：利民渠，明濬，县南诸水汇焉。峡石、安国二镇。驿一：高平。华亭疲。府南九十里。东：义山。西：陇山。北接大漠，南抵湟陇。西北：美高、朝那山。汭水北源出县西锹头津，南源出县西大关山，东流夹城汇为一，又东，右纳策底河，左纳五村川水，东迤北入崇信。盘口河出县西南山中，东流，支津左出为五村川水，入崇信。惠民渠，明濬，遏汭流引入城。制胜、六盘关、三乡、黄石河镇。驿一：瓦亭静宁州冲，疲，难。府西二百三十里。东：陇山、上峡、东山。南：石门。西：西岩。北：横山。苦水河即长源河，北自隆德入，环城南注，纳甜水河及州境诸小水，屈曲南入秦安。西：兴陇渠，明濬。驿一：泾阳。隆德冲，难。府西北百四十里。乾隆四十三年，省庄浪县，以其地来属。东：六盘山。若水河，北自固原入；纳马莲川、滥泥河诸水，南入静宁。其东支甜水河，即陇水，亦出六盘，径城北，西合底堡川、南源沟水，并从之。驿一：隆城。县丞驻庄浪故城。

巩昌府：(冲，繁，疲，难。隶平庆泾固化道)。明置府，领州三，县十四。顺治初，因明制。雍正七年，升秦、阶二州为直隶州，降徽州为县，及清水、秦安、礼、两当隶秦州，以文县、成县隶阶州。八年，增置岷州及靖远县。乾隆三年，割靖远隶兰州。十三年，改洮州卫为来属，旋并漳县入陇西，隶巩秦阶道。西北距省治四百二十里。广二百九十五里，袤千二百三十里。北极高三十四度五十七分。京师偏西十一度四十三分。领一，州

一,县七。陇西冲,繁。倚。东:三品石、仁寿。北:赤亭。西南:首阳。西:西倾。西北:八角山。渭水,西自渭源入,合广阳水为山河口,左合援阳河,右合科阳,径城北,纳县境诸水,东南入宁远。漳水一曰清水河,西南自岷州入,径漳县故城南,东入宁远。镇一:天衢。驿二:通远、三岔。县丞驻漳县故城。安定冲,难。府北百六十里。南:南安山。东:照城、凤凰。西:西岩山。东南:温泉山。北:车道岷。关川水东源出县南禅牧山麓,一曰东河,西北流,西源出县西南胡麻岭,一曰西河,东北流,径县城北,汇为一川,一曰北河,北入会宁。镇一:龟兄嘴。驿四:延寿、通安、西巩、秤钩。会宁冲,难。府东北二百里。东南:桃花。北:乌兰山,乌兰关在其下。南:铁木山。东北:屈吴山。祖河出东南王家山,西流,厉河出南米家峡,北流,汇于城南,曰祖厉河。左纳西巩驿水,右合仓下什子川,西北入靖远。关川水西南自安定入,径县境西北入靖远。镇一:翟家。驿四:保安、乾沟、郭城、青家。通渭筒。府东北二百里。西北:笔架山。东北:玉狼。南:十八盘山。华川水出会宁华川岭,入县境。东南径西河湾;左合南家河,右龙尾沟,又东错秦安,关川河从之。再错复入,为散渡河,合青石峡水、清溪,入伏羌。镇二:鸡川、安远。宁远冲。府东南九十里。南:银观峪。西:广吴山。南:董墨。东北:石门。西南:武城。渭水,西北自陇西入,径鸳鸯嘴,合漳水及广吴河,迤东径城北,纳县境诸水,东入伏羌。县境灌渠二十七。镇六:马务、威远、来远、落门、纳泥、榆盘。伏羌冲,难。府东南百九十里。南:天门山。西:三都谷。西南:朱圉山。渭水,西自宁远入,纳南来诸水,径城北,华川水北自通渭来注之,东入秦安。藉水一曰乌油江,出县南山中,东入秦州。广济、陆田、通济三渠,皆明溶。西和疲。府东南三百里。东南:太祖山。北:宝泉。东北:鸡峰。西北:祁山。西南:仇池山。西汉水,东自礼县入,径县北,横水河径城东,合叶家河、白水,仍西入礼县。复东流入境,径县南,江底河出县西南香山,东南流注之,又东南入阶州。东北:盐井。镇一:长道。岷州疲,难。府西南二百四十里。明卫。雍正八年改置。北:岷山。东南:岷瓘山。洮水自西洮州入,东流过城北,叠藏河西南自杨土司境来,合多邦、绿园二水,北流注之。洮水西北复入洮

州。岷江一曰良恭河，出岷山麓分水岭；南流迤东入礼县。白龙江上源曰阿坞河，出岷山西麓分水岭，东南流，合数小水，曰岷江，又东南径临铺江西入阶州。驿三：岷山、西津、酒店。土司二：麻童、百林口堡。番族一：沙庄。洮州繁，难。府西南三百六十里。西南：西倾山。山脉东迤，曰阴得尔图塔拉山、绰那搜尔山、多克第山、阿穆尼恰珠温恭山、多噶尔山。洮水出西倾东麓，一曰巴克西河，南流迤东，纳库库乌苏、波尔波河、多克第河，合拉尔河、底穆唐河诸水，径城南，东入岷州，折而西北，复入境，径东北入狄道。白水江，即禹贡桓水，一曰垫江；西自四川松潘入，径城西南，东南入阶州。边墙，南起洮州卫故城南峪口，北入河洲。镇一：广思。土司三：著逊、卓泥杨氏、资卜马氏。诸土司皆贫弱，地什九入卓泥杨氏，幅员千余里，南与松潘接。南路隘口七，通四川番地。西路隘口六，通青海。北路隘口三，通循化番地。

庆阳府：(中，疲，难。隶平庆泾固道)。顺治初，因明制，并置庆阳卫。雍正五年省卫。西距省治千一百八十里。广三百十里，袤四百二十里。北极高三十六度三分。京师偏西八度四十六分。领州一，县四。安化疲，难。倚。东北：太白、青沙岭。西北：铁边山。环河一曰马莲河，西北自环县入，东南流，径城南，铁边河纳境内诸水南流注之。又东南，合教子川，入合水，东北荔原川亦入焉。又北，白豹川，入陕西保安。县北大小盐池。镇五：槐安、五交、业乐、马岭、董志。驿一：驿马关。县丞驻董志原。合水筒。府东七十里。西：锦屏。东：桥山、子午山。环河西北自安化入，至板桥镇合建水，一曰东河，西南径城东，右东北川为合水，纳马莲河，南入宁州。故城川出子午从之。镇四：华池、凤川、平戎、太白。驿三：华池、邵庄、宋庄。环筒。府西北百八十里。东：尖山。西：青山。西北：青冈峡，环河出其南麓，东南流，径城西，左右纳小水十余，又东南入安化，清水、萧家河并从之。西南，寡妇川亦入焉。镇三：马岭、木钵、石昌。驿三：灵武、灵祐、曲干。正宁筒，府南二百四十里。本真宁，乾隆初更名。罗水出县东罗山；西南流，径城南，纳马造沟水，西入宁州。镇三：湫头、平子、山河。宁州中，疲，难。府南百四十里。东：雕岭。南：云寂。东北：五掌山。泾水，西

自泾州入，纳茹水河，南流迤东，环河北自合水来会，纳境内诸水，径城西南流注之，又东纳罗水，入陕西长武。镇八：襄乐、政平、早社、焦村、大昌、新庄、南义井、凤皇。驿二：彭原、焦村。

宁夏府：(冲，繁，疲，难。宁夏道治所)。将军、副都统、总兵驻。明，宁夏五卫。初因明制。顺治十五年，并前卫入左卫、中卫入右卫。雍正三年，省卫、所，置府及宁夏、宁朔、平罗、中卫四县，以灵州直隶州来属。五年，置新渠县。七年，置宝丰县。乾隆三年，省新渠、宝丰入平罗。同治十一年，置宁灵。西南距省治九百四十里。广五百三十里，袤六百六十里。北极高三十八度三十二分。京师偏西十度二十分。领一，州一，县四。宁夏冲，繁，疲，难。倚。治府东偏。本前、左二卫地。雍正四年置县。黄河，西南自灵州入，东北至昌润渠口入平罗。河入中国，宁夏独食其利，支渠鬲分，灌溉府境。惠农渠，雍正四年溶，汉延渠，雍正九年重修，皆南自宁朔入。唐渠，雍正九年重修，西自宁朔入。皆东北入平罗。东：高台寺湖。北：月湖。东北：金波湖、三塔湖。驿三：宁夏、王铎、横城口。宁朔冲，难。倚。治府西偏。本中、右二卫地。雍正三年置县。西北：贺兰山，山脉绵褱，北抵大漠，南迄中卫，山外蒙古阿拉善、额济纳地。黄河，南自宁灵、中卫入，东北至叶升渡入宁夏。惠农渠于县南上马家滩承黄河支流，东北入宁夏。汉延渠于县南下马家滩承黄河支流，东北纳数小渠，入宁夏。大清渠，康熙四十九年濬，于汉渠南承河流，北过双塔湖合唐渠。唐渠于县南青铜峡首受河流，东北纳支渠十余，入平罗。南：长湖。西：观音湖。吉兰泰盐池在贺兰山麓。边墙，沿山自北而南，逾分守岭入中卫。定远城在打台沟，雍正间，阿拉善迁博罗克科克于此，筑城设守。阿拉善王旋还旧游牧，仍以定远城赐之。平罗疲，难。府北少东百二十里。故平罗所。雍正三年置县。乾隆三年省新渠、宝丰二县，以其地来属。黄河，西南自宁夏入，分为两派，东北流百余里复合流，北入鄂尔多斯。唐渠、惠农渠西南自宁朔入，东北至石嘴子，复入于河。昌润渠，雍正六年溶，即故六羊河故渎，疏流建闸；起县东南，北流径宝丰故县东，复入于河。边墙，县北，西起贺兰山麓，东迄河干。县丞驻宝丰故城。灵州要，繁，疲，难。府东南九十里。

初因明制为直隶州。雍正三年来属，并省后卫，以其地入州境。黄河，西南自宁灵来，东岸旁州西境。山水河出州南山中，西北流，入平远，复北入州境。苜蓿渠首受黄河，自西来会，支渠右出曰秦渠。山水河又北流，迤西北入黄河。支流北出曰涝河；北至三道桥又分二渎，一西北入黄河，一北流会秦渠入河。黄河又东北至横城口入宁夏。东南有蒲草湖、东湖。南、北、中三盐池，花马池，红柳池，俱州东南。边墙，起横城堡，东入陕西延安。镇一：耀德。驿三：灵州、红山、沙泉。州同驻华马池。盐捕通判驻惠安堡。中卫冲，繁，疲。府西南三百六十里。故中卫地。雍正三年置县。黄河，西自靖远入，径城西南，支渠左酺为美利渠、太平渠，右酺为羚羊角渠，过城东南，右酺为羚羊店渠，又东，左酺为永兴渠、胜水渠，右酺为羚羊峡渠。清水河，东南自平远来，北流注之。黄河又东，迤北，右酺为七星渠，左酺为顺水渠，丰乐渠。诸渠皆东北复入于河。黄河又东北入宁灵。边墙，旁黄河南岸，逾河东入宁灵。驿三：中卫、渠口、长流水。巡司驻渠宁。县北阿拉善旗界有汉、蒙分界碑。宁灵要。府南二百里。故金积堡，属灵州。同治十一年，总督左宗棠督师克复，奏设，改宁夏水利同知为抚民同知驻焉。南：金积山。东南：大蠡。东北：紫金。西南：青铜峡。黄河，南自中卫入，行峡中；东北入宁朔、灵州。清水河，西南自海城入，左合边墙沟、红沟，入中卫注河。汉渠自城西首受黄河，下流汇山水河。

西宁府：（最要，冲，繁，疲，难。西宁道治所）。办事大臣、总兵驻。明，西宁卫。初因明制。雍正二年，省卫，置府及西宁、碾伯二县。乾隆九年，置巴燕戎格。二十六年，置大通县。五十七年，置贵德、丹噶尔二，割兰州之循化来属。东南距省治六百二十里。广三百五十里，袤六百五里。北极高三十六度三十九分。京师偏西十四度十三分。领四，县三。西宁冲，繁，疲，难。倚。东：峡口山，叹隍[A112]地；红崖子山。西：土楼山、金山。南：拔延山。西南：南禅山、积石山、拉脊山。西北：北禅山。黄河，西自贵德径城南，东入巴燕戎格。湟水西自丹噶尔入，径城北，北川河西北自大通来注之，又东南入碾伯。大通河径县东北入平番。县西：伯颜川渠。县南：那孩川渠。驿二：西宁、平戎。土司四：陈氏、吉氏、祁氏、李氏。番庄二：上朵

壤尔、乜亥加。番族三：上郭、松巴、巴哇。碾伯冲，繁。府东百三十里。故守御千户所，属西宁卫。雍正二年置县。南：雪山。西：四望山。东北：阿刺古山。湟水，西自西宁入，东南流，径城南，曰碾伯河。纳县境诸川，东南至莲花台；大通河北自平番来会。河北、河南两渠，引湟溉田，酃支渠三十。驿三：嘉顺、老鸦、巴州。土司三：九家港、胜番沟、老鸦堡。他番族十余，分居县境。大通难。府西北百三十里。故番地。雍正二年，以番族效顺，置大通卫。乾隆二十六年省卫置县。西北：大雪山。北：大寒。东：五峰。南：元朔山。大通河古浩亶水，西自青海入，东南入平番。北川河西自青海入，有二源，北曰布库克河，南曰沙库克河，合流至城北为北川河，又东南入西宁。东峡川、峡门堡二渠。长宁驿。土司六：起塔镇、迭沟、大通川、王家堡、硃家堡、美都沟。西北与青海分界，有界碑。贵德要。府南。故归德千户所，属河州卫。雍正四年，省卫所隶河州。乾隆三年改隶西宁。二十六年设县丞。五十七年升，设抚番同知。东：郭图。南：莫曲山、图尔根山。东南：圆柱。南：南山。黄河，南自青海改西北流，折而东北，恰克图河东来注之。又东北，环西境，至陇羊峡西折而东南，合龙池河及乌兰石尔廓尔河，并诸小水，入循化、巴燕戎格。番族分生、熟、野番三种。熟番五十四族，阱赋视齐民。生番十九族，畜牧资生。野番八族，其汪食代克一族，乾隆末北徙丹噶尔，余七族成居东境，插帐黄河南岸。循化要。府东南。旧属兰州，为河州同知驻所。乾隆末，移隶西宁。西南：多噶尔群山，不一名。黄河，西自贵德入，北岸为巴燕戎格地。保安大河南自丹噶尔北流注之，又东纳境诸水，至积石关入河州。大夏河，古漓水，出南边外山中，北流，径拉布楞寺，屈曲东南入河州。青海和硕特游牧地错入南境。番族：上隆布西番十六寨，南番二十一寨，阿巴那西番八寨，多奈错勿日二寨，素呼思记二寨，边都沟西番十寨，东乡西番五寨。回民撒拉族所居，曰上八工、下八工。丹噶尔府西南。抚番同知驻。东：翠山。南：日月。北：北极山。湟水出青海噶尔藏岭，东流，至札藏寺入境，径城南，东入西宁。清水河出贵德南速古山，东北流。隆武河出循化西南番地，北流，汇为保安大河，北入循化。韩土司辖地在东南。东科尔寺在西南。西

宁、青海孔道。沙喇库图尔番族聚居处。巴燕戎格府东南，通判驻。明，西宁、碾伯、洮州地。乾隆三年，以巩昌裁缺通判徙改。北：雪山。西：小积石。东南：拉札山。黄河，西自贵德入，南岸为循化境，巴燕戎格河出小积石山东麓，纳境诸小水，南入黄河。

凉州府：(冲，繁，疲，难)。甘凉道治所。副都统、总兵驻。明，凉州卫。顺治初，因明制。雍正二年升府，置、县。东南距省治五百六十里。广九百三十里，袤五百二十里。北极高三十七度五十九分。京师偏西十三度四十八分。领一，县五。武威冲，繁，疲，难。倚。故凉州卫地。雍正二年置县。南：祁连山，一名大雪山，绵亘千里，西北抵甘州境。沙沟水出山麓，屈曲北注，会黄羊渠为白塔河，又西北迤，径城北，会杂木河、大七河、金塔寺渠、海藏大河、炭山河、北沙河诸川，为郭河，北入镇番。东北：边墙，起镇番境蔡旗堡，南至土门关入古浪。驿三：武威、怀安、大河。镇番繁，疲，府东北二百里。故镇番卫。雍正二年置县。南：亦不刺山，环东北三面。郭河，南自武威入，西北出边墙，酺支渠四，又西北出塞，潴为大泽，蒙古谓之哈刺海漠，古休屠泽也。青盐池、鸳鸯白盐池、小白盐池皆在西北边墙外。边墙，西接永昌，东至县城北，折而南，逾郭河入武威。永昌冲，繁，疲。府西北百六十里。故永昌卫。雍正二年置县。北：金山。西：燕支。东北：马汜。东南：炭山。水磨川出县西南祁连山北麓，四源并导，汇为一川，北流折东，又东北出边墙，潴为昌宁湖；今涸。炭山河出县南，北流至永丰堡南，折而东南入武威。边墙，西起水泉堡，东迄镇番境红崖堡。驿二：永昌、水泉。古浪冲，疲。府东南百三十里。故古浪所。雍正二年置县。西：白岭。东南：黑松林。古浪河出县南乌鞘岭北麓，纳县境诸水；东北出边墙，潴为泽，曰白海。边墙，自武威南境逾古浪河，迤东南入平番。驿二：古浪、黑松。巡司驻大靖。平番冲，繁，疲，难。府东南三百三十里。故庄浪所。雍正二年置县。东：松山。北：炭山。西：卓子山。西北：分水岭。北为萱麻河，入古浪。庄浪河出岭南麓，纳金羌、石门、清水诸小河，至城南，又南至头道河入皋兰。大通河，西北自大通入，迳城西入碾伯注湟水。大盐沟，东南。边墙，起县西北，东南入皋兰。驿五：庄浪、大通、通远、

镇羌、平城。土司二：古城、连城。县丞驻西大通。庄浪筒。府东南。同知、理事通判同驻。庄浪河，北自平番入，南至皋兰境入于河。大通河，西北自平番入，东南至皋兰、河州境入于河。土司一：大营湾。

甘州府：（冲，繁，疲。隶甘凉道）。提督驻。明，陕西行都司治。顺治初，因明制。雍正二年，罢行都司，置府及张掖、山丹、高台三县。七年，割高台隶肃州。乾隆间，增置抚彝。东南距省治千五百里。广三百二十里，袤二百里。北极高三十九度。京师偏西十五度三十一分。领一，县二。张掖要，冲，繁，疲。倚。故甘州左、右卫。雍正二年置县。北：合黎山。西南：祁连山，绵亘府境，与青海分界。山丹河，东自山丹入，洪水河出县东南金山北麓，北流注之。又西北径城北，张掖河古羌谷水，出祁连山中，汇县境诸渠，北流来会。山丹河自此蒙黑河之称。又西北，入抚彝。张掖河东岸黑番牧地，西岸黄番牧地。边墙，傍山丹河北岸，东入山丹。驿二：甘泉、仁寿。县丞驻东乐。山丹冲，繁，疲。府东百二十里。故山丹卫。雍正二年置县。山丹河即禹贡弱水，出县南祁连山麓，四源并导，汇于城南，东入张掖。红盐池在县北，白盐池滨居延泽。大草滩，东南与凉州、西宁、青海分界。边墙，起合黎山南，径县城北，东入永昌。驿四：山丹、东乐、新河、峡口。抚彝府西北百五十里。旧隶甘州后卫。雍正二年卫省，属高台。乾隆十八年来属，置设通判。南：祁连。响山河出东南，黑河自张掖入合之，西北径北，左合三清渠，右出支渠，北自鲁墩湾入高台。边墙，傍黑河北岸东入张掖。驿一：同名。

泾州直隶州：（要，冲，疲。难）。隶平庆泾固化道。明隶平凉府，领灵台。顺治初，因明制。乾隆四十二年，升直隶州。割崇信、镇原来属。西距省治九百五十九里。广百一十里，袤三百五里。北极高三十五度二十三分。京师偏西九度七分。领县三。北：兼山。西：回山。西南：弁耳山、青溪岭。泾水西自平凉入，径城北，汭水西南自崇信来注之。又东至唐长武故城，洪河西北自镇原来注之。又东至宁州界，茹水西北自镇原来注之，南入陕西长武。盘口河，西自灵台入，旁州南境，东入长武。镇一：盘口。驿一：安定。崇信难。州西南百二十里。城据锦屏山北麓。西南：箭筈山。西

北：峡口。纳水，西自华亭入，汇五龙、断万、五马三山及九峪水，屈东径城北，东入平凉。盘口河即黑河，亦自华亭入，傍县南境，东北入灵台。新柳滩旁纳水，顺治中疏为渠。镇原疲。州西北二百里。东：东山。北：潜夫、孝山。茹水，西北自固原入，径城南，纳交口河、蒲河暨县北境诸水，东南入宁州。洪河，西北自固原入，合平泉水，西南潘阳涧，入州。镇二：新城、柳泉。驿一：白水。灵台疲，难。州南二百里。北：台山。东：苍山。东北：书台。西南：离山。达溪水，西自陕西陇州入，左合镇川口河，至百里镇，右合姐己，左小建河，径城南，东北入陕西长武。盘口河，西自崇信入，径县东北，合槐树沟水，东入州。镇七：东朝那、良原、百里、邵寨、石塘、上良、西屯。

固原直隶州：(冲，繁，难)。隶平庆泾固化道。陕西提督驻。明隶平凉府。顺治初因之。同治十二年，升直隶州，置平远、海城二县属焉。西距省治八百九十里。广五百二十里，袤三百十里。北极高三十六度四分。京师偏西十度七分。领县二。西北：石城山。北：须弥。西南：陇山，一曰六盘山，绵跨平凉化平川境。清水河出陇山开城岭北麓，古高平川，二源并导，汇为一川，径城东，纳州境诸水，北入平远。泾水北源出开城岭南麓，为大小南川，会于瓦亭驿；东径蒿店，曰横河，出弹箏峡，入平凉。茹水出开城岭东麓，洪河出州东南陶家海子，并东入镇原。驿三：永宁、三营、瓦亭。州判驻硝河城。平远冲，难。州北二百四十里。故平远所。同治十二年置县，又割海城之下马关西地及灵州同心城来属。西北：罗山。南：打狼。西北：麦朵。西南：白杨林。清水河，南自州境入；甜水河自东来注之，又纳县境诸水，西北入中卫。山水河，东自灵州入，径县北境，复西入灵州。海城冲，疲，难。州西北二百十里。平凉府属海刺都地。乾隆十四年徙盐茶同知驻此。同治十二年省同知置县。西：天都山。西南：莲花。南：五桥山。北：大黑河、红井堡水、相洞川，并东入州，注清水河。清水河径红古堡，合石峡水，又北合兴仁堡水，入宁灵。西北：乾盐池堡水，迳打拉池，县丞驻。

平州直隶州：(疲)。隶巩秦阶道。明隶巩昌府，领文县。顺治初，因明

制。雍正七年，升直隶州，割巩昌之成县来属。西北距省治千一百五十里。广二百九十里，袤五百五十里。北极高三十三度二十三分。京师偏西十一度二十三分。领县二。北：凤凰山。白水江，西北自洮州入，南流，迤东径西固城南，白龙江北自岷州来注之。又东南，径城西，纳数小水，南入文县。西汉水，西北自礼县入，屈曲东南入成县。镇四：平洛、安化、角弓、石门。驿三：阶州、官城、杀贼桥。州同驻西固城。州判驻白马关。文简。州西南二百里。白水江，北自州境来，径县东南，清江水一曰文县河，西北自四川松潘，上承察冈公河，东南流入境，纳县西诸水来会。白水江又东南纳县东诸水，入四川昭化。南：阴平隘。驿二：文县、临江。成疲。州东北二百里。西：泥功山、仇池山。东：木皮岭。西汉水，西北自州境入，径县西南，黑峪河出县北山中，纳县境诸水，西南流注之。西汉水至此蒙犀牛江之称，东南入陕西略阳。镇三：泥阳、横川、抛沙。驿一：小川。

秦州直隶州：(要，冲，繁，难)。巩秦阶道治所。明隶巩昌府，领秦安、清水、礼三县。顺治初，因明制，雍正七年，升直隶州，降巩昌属之徽州为县，与所领两当县来属。西北距省治七百三十里。广三百九十里，袤四百五十里。北极高三十四度三十五分。京师偏西十度四十分。领县五。西：刑马山。西北：邦山。东南：麦积。西南：蟠冢。渭水，西自伏羌入，右纳藉水，左纳牛头河，东径城南，又东纳诸小水，过三岔城北，迤南入陕西陇州。西汉水出蟠冢山南麓，西入礼县。骆驼川水出蟠冢山东麓，流合数小水，南入徽县。镇四：关子、高桥、社树坪、董城。州判驻三岔镇。秦安疲，难。州北八十里。东：九龙山。北：显亲峡。南：新阳崖。东北：青龙。罗玉河古陇水，北自静宁州入，上承苦水河，南径县西，至新阳崖入州境注渭。略阳川水东自清水入，西合石版泉，入静宁注苦水河。镇六：金城、川口、郭嘉、太平、陇城、大寨。清水冲，疲。州东北百二十里。东：陇山，大震关在其下。牛头河一曰东亭河；古桥水，出陇山西麓，众源并导，汇为一川，径城北，东流，迤南入州境。略阳川水亦出陇山西麓，西流，纳县境诸水，径龙山镇入秦安。镇八：白沙、岩年、清水、百家、玉屏、松树、龙山、恭门。

驿一：长宁。礼疲。州西南二百里。东：祁山。东南：仇池山。西南：岷隴山。西汉水，东自州境入，纳县境诸水，径城东折南，又西入阶州。镇二：石头、崖城。徽难。州南二百八十里。北：鸾亭。东：赤玉。南：铁山、青泥岭。西：栗亭山、木皮岭。东南：杀金坪，仙人关在其上。故道河，东自两当入，骆驼川入北自州境来入之，西径县南，纳小水二，西南入陕西略阳，嘉陵江上游也。栗水出栗亭山，南流为泥阳河，南入略阳。镇三：永宁、栗亭、火钻。两当简。州南百七十里。东：鸞鷲。南：天门。东北：申家，古南大夫山。故道河，东自陕西凤县入，河即两当水，径县南，纳小水二，西南径秦冈山为琵琶湖，入微。镇二：广乡、两当。有驿。

肃州直隶州：(冲，繁，疲)。安肃道治所。总兵驻。明，肃州卫。顺治初，因明制。雍正二年，省卫并入甘州府。七年，置直隶州，割甘州之高台县来属。东南距省治千四百六十里。广百九十里，袤百五十里。北极高三十九度十六分。京师偏西十七度十二分。领县一。东南：观音山。南：祁连山。东跨高台，与青海分界。西：嘉峪山。其西麓设关，俄罗斯通商孔道，税务司驻焉。洮赖河出州西南祁连山北麓，古呼蚕水，北流东迤，支渠旁出，左播为四，右播为三。又东为北大河，至临水堡，临水河出祁连山最高处，东北流注之，折而北，径金塔寺，西出边墙为北大河，至古城，右合红水，左合清水河，曰白河，东北入高台。丰乐川出州东南祁连山天涝池，北流酺十数渠。南：金厂。边墙，自嘉峪关迤西北逾洮赖河，折而东南，入高台。驿二：酒泉、临水。州同驻金塔寺。巡司驻嘉峪关。高台冲，繁，疲。州东南二百七十里。故守御千户所。雍正三年置县。西：崆峒。南：榆木。东北：合黎山。黑河，东自抚彝入，西北流，径城北，左出支渠五。又西北径深沟驿，复酺为数小渠，又北至镇夷营。出边墙，右酺为双树子屯渠，左酺为毛目渠，白河西南自州来会，北入额济纳旗界，汇于居延海。县西北盐池。边墙，西自州境来，逾黑河，东南入抚彝。驿四：双井、深沟、黑泉、盐池。县丞驻毛目屯。

安西直隶州：(冲，繁，疲，难)。隶安肃道。明，赤斤、沙州二卫。后以番扰内徙，空其地。康熙五十七年，番族内附，置靖逆、赤斤二卫，设靖逆

同知领之，寻增设通判，治柳沟。雍正元年，复置沙州所，筑布隆吉城，设安西同知治焉。三年，省靖逆同知，徙通判治其地，仍领二卫，旋升沙州所为卫。六年，徙安西治大湾。乾隆二十四年升府，置渊泉县附郭，省靖逆通判，并赤厅卫置玉门县。二十五年，以沙州卫为敦煌县，省渊泉入府治。二十八年，降直隶州，隶安肃道。东距省治二千一百二十里。广六百二十里，袤六百里。北极高三十九度四十分。京师偏西十八度五十二分。领县二。雪山自葱岭支分，迤迤东趋，绵跨州境，山外皆大戈壁，与青海分界。其北连山无极，与哈密及札萨克图汗分界。疏勒河，古南极端水，一日布隆吉河，其西源昌马河出，东入玉门，与东源合，复入，右合支渠。巩昌河西北径桥湾营南，左纳小水七，迤北西流，径城南，支渠左出为南工渠、北工渠，经流西入敦煌。边墙，西起布隆吉城东疏勒河北岸，东迄桥湾营入玉门。驿七：柳沟、小宛、瓜州口、白打子、红柳圈、大泉、马连井。敦煌繁，难。州西南二百七十里。东南：三危山、鸣沙山。西南：龙勒山。西：白龙堆流沙碛。疏勒河，东自州境入，西至城北双河岔，党河自南来注之。党河，古氐置水，蒙古谓之西拉噶金，出县南山中，两源并导，汇为一川，北流径城西，酺分十数渠，又北入疏勒河。疏勒河又西潴为哈刺泊。东南：盐池。玉门关、阳关，皆县西南。玉门冲，繁。州东二百九十五里。金山环东、西、北三面，绵亘二百余里。西北：赤金峡。疏勒河出县南山中，北流，纳昌马河、巩昌河，又北迳城西，迤东入州境。阿拉克湖即延兴海。又东白杨河。有石油泉，古石脂水。边墙，西自州境来，东入肃州。驿二：赤金湖、赤金峡。

化平川直隶厅：(繁，疲，难)。隶平庆泾固化道。平凉、华亭、固原、隆德四州县地。同治十一年，陇东戡定，置设通判。西北距省治七百四十九里。广袤各百余里。北极高三十五度有奇。京师偏西南十度有奇。东：观山。西南：大关山。泾水南源出山麓老龙潭，东径白崖山，合白岩河，又东径飞龙挾银，左纳圣女川、龙江峡水，东入平凉。

《水经注》(北魏)郦道元

卷一

三成为昆仑丘^①。《昆仑说》曰^②：昆仑之山三级，下曰樊桐，一名板桐；二曰玄圃，一名閼风；上曰层城，一名天庭，是为太帝之居^③。

注：①三成为昆仑丘：三级的土丘称为昆仑丘。出自《尔雅·释丘》：“丘一成为敦丘，再成为陶丘……三成为昆仑丘。”晋代郭璞注：“昆仑山三重，故以名云。”意思是说：昆仑山有三级，所以叫昆仑丘。成，级，层。②《昆仑说》：书名。不详。③太帝：天帝。

《山海经》称方八百里^①，高万仞^②。郭景纯以为自上二千五百余里^③。《淮南子》称高万一千里百一十四步三尺六寸^④。

注：①《山海经》：中国古代历史地理名著，作者已不可考，内容包括山川、道里、鸟兽、祭祀、医巫、风俗等。方：方圆。②仞：古时八尺或七尺叫做一仞。③郭景纯：即郭璞(276~324)，字景纯，东晋河东闻喜(今山西闻喜)人，熟知五行、天文、卜筮之术。自上：为“自此以上”的省略，从这里向上。④《淮南子》：西汉淮南王刘安及其门客撰写的杂家书，也称《淮南鸿烈》。步：古代长度单位，周代以八尺为一步，秦代以六尺为一步，旧制以营造尺五尺为一步。

《山海经》曰^①：南即从极之渊也^②，一曰中极之渊，深三百仞，惟冯夷都焉^③。《括地图》曰^④：冯夷恒乘云车驾二龙^⑤。河水又出于阳纁、陵门之山^⑥，而注于冯逸之山^⑦。《穆天子传》曰^⑧：天子西征，至阳纁之山，河伯冯夷之所都居^⑨，是惟河宗氏^⑩，天子乃沉珪璧礼焉^⑪，河伯乃与天子披图视典^⑫，以观天子之宝器：玉果、璇珠、烛银、金膏等物^⑬，皆《河图》所载^⑭。河伯以礼，穆王视图，方乃导以西迈矣^⑮。粤在伏羲^⑯，受《龙马图》于河，

八卦是也^⑩。故《命历序》曰^⑪：《河图》，帝王之阶^⑫，图载江河、山川、州界之分野^⑬。后尧坛于河^⑭，受《龙图》，作《握河记》^⑮。逮虞舜、夏、商^⑯，咸亦受焉。李尤《盟津铭》^⑰：洋洋河水，朝宗于海^⑱，径自中州^⑲，《龙图》所在。《淮南子》曰：昔禹治洪水^⑳，具禱阳纒，盖于此也。高诱以为阳纒秦蕞^㉑，非也。释氏《西域记》曰^㉒：阿耨达太山^㉓，其上有大渊水，宫殿楼观甚大焉。山，即昆仑山也。《穆天子传》曰：天子升于昆仑，观黄帝之宫，而封丰隆之葬^㉔。丰隆，雷公也。黄帝宫，即阿耨达宫也。

注：①《山海经》曰：所引文字出自《山海经·海内北经》。②南：即昆仑墟南边。从极之渊：古地名。今不详。③惟：只有。冯夷：传说中的黄河水神，天帝赐封号为河伯。都：居住。焉：在那里。④《括地图》：古代的地理书。时代、作者都不详。⑤恒：常，经常。云车：传说中仙人的车乘，仙人以云为车，故名。⑥阳纒、陵门之山：山名。古黄河水从此两山流过。今不详。⑦冯逸之山：山名。不详。⑧《穆天子传》：为晋武帝司马炎咸宁五年（279年）在汲郡战国魏王古家中出土的古书，书中有很多荒诞不经的记载。⑨都居：居住。⑩是：指河伯冯夷。惟：是，为。⑪沉：古代祭川泽叫沉，因为要向水中投祭品，故名。珪璧：古代祭祀朝聘所用的玉器。礼：行祭礼。⑫披：展开，翻开。⑬玉果：形状像果实一样的美石。璇珠：美玉珠。金膏：传说道教中的仙药。⑭《河图》：儒家关于《周易》卦形来源的传说。《尚书·顾命》：“大玉、夷玉、天球、河图，在东序。”伪汉代孔安国传：“伏羲王天下，龙马出河，遂则其文以画八卦，谓之‘河图’。”下文的《龙马图》《龙图》都指的是《河图》。⑮导：引导。西迈：向西行进。⑯粤：发语辞。伏羲：古代传说中的三皇之一，相传其始画八卦，又教民渔猎，取牺牲以供庖厨，因称庖牺。⑰八卦：《周易》中八种具有象征意义的基本图形：乾、坤、震、巽、坎、离、艮、兑，分别象征天、地、雷、风、水、火、山、泽。八卦相传是伏羲所作。⑱《命历序》：即《春秋命历序》。⑲阶：基础，阶梯。⑳分野：古人把地理区域分别按照方位跟天上的星宿联系起来，叫做“分野”。㉑尧：传说中古帝陶唐氏之号。坛：筑坛祭祀。㉒《握河记》：即《尚书中候·握河记》，讖纬之类的书，今已亡佚。㉓虞舜：上古五帝之一，姓姚，名重华，因其先国

在虞(故城在今山西平陆北),故称虞舜。^{②4}李尤:东汉文学家,字伯仁,广汉雒(在今四川广汉)人。盟津:即孟津,古黄河渡口名。在今河南孟津东、孟州西南。铭:古代文体的一种。^{②5}朝宗:本来是指古代诸侯春、夏朝见天子。《周礼·春官·大宗伯》:“春见曰朝,夏见曰宗,秋见曰覲,冬见曰遇。”后来比喻小水流注大水。^{②6}径自:从……经过。中州:指中原地区。^{②7}禹:古代部落联盟首领,传说曾用疏导的方法治理洪水。有“八年于外,三过其门而不入”的故事。^{②8}高诱:东汉末涿郡(在今河北涿州)人,现有《吕氏春秋注》和《淮南子注》传世。秦薮:秦地的湖泊。古代有九大湖泊,叫九薮,其中之一即秦之阳纒。^{②9}释氏《西域记》:书名。不详。杨守敬认为是晋释道安的《西域志》。^{③0}阿耨达太山:即今西藏的冈底斯山。一说即昆仑山。见于佛经。^{③1}丰隆:古代神话中的雷神,即雷公。后多用作雷的代称。

《山海经》曰:河水入渤海^①,又出海外,西北入禹所导积石山^②。山在陇西郡河关县西南羌中^③。余考群书^④,咸言河出昆仑^⑤,重源潜发^⑥,沦于蒲昌^⑦,出于海水。故《洛书》曰^⑧:河自昆仑,出于重野^⑨。谓此矣。径积石而为中国河^⑩。故成公子安《大河赋》曰^⑪:览百川之宏壮^⑫,莫尚美于黄河^⑬;潜昆仑之峻极^⑭,出积石之嵯峨^⑮。释氏《西域记》曰:河自蒲昌,潜行地下,南出积石。而《经》文在此,似如不比^⑯,积石宜在蒲昌海下矣。

注:①渤海:即蒲昌海,今新疆东南部的罗布泊。汉、唐时称为蒲昌海,又名盐泽。②积石山:即今阿尼玛卿山,在青海东南部,延伸至甘肃南部边境,为昆仑山脉中支,黄河绕流东南侧。③陇西郡:秦朝所设置的三十六郡之一,王莽时期改名为厌戎。因为此郡在陇之西,故名陇西。大致在今甘肃南部和东南部。河关县:汉设晋废,治所不详,疑在今青海贵德西南。羌中:羌族人居住的地域中。④考:考寻,考索。⑤咸:都。⑥重源潜发:这里是说黄河从蒲昌海潜流到积石山,又重新发源。⑦沦:进入,流入。⑧《洛书》:儒家关于《尚书·洪范》“九畴”创作过程的传说。据说大禹治水时有神龟出于洛水,背上有裂纹,纹如文字,禹取法而作《尚书·洪范》“九畴”。九畴就是传说中天帝赐给大禹治理天下的九类方法。⑨重野:地名。不详。⑩中国河:中原的河流。⑪成公子安:成公绥,字子安,东郡白

马(在今河南滑县)人。西晋文学家,以赋得名。⑫宏壮:宏大壮阔。⑬尚美:比……更美。尚,超越,超过。⑭峻极:高峻,高耸。⑮嵯峨:山高峻、耸立的样子。⑯似如:好像。比:合适。

卷二

敦煌索劭^①,字彦义,有才略,刺史毛奕表行贰师将军将酒泉、敦煌兵千人^②,至楼兰屯田^③。起白屋^④,召鄯善、焉耆、龟兹三国兵各千^⑤,横断注滨河^⑥。河断之日,水奋势激^⑦;波陵冒堤^⑧。劭厉声曰:王尊建节^⑨,河堤不溢,王霸精诚^⑩,呼沱不流^⑪。水德神明,古今一也。劭躬祷祀^⑫,水犹未减,乃列阵被杖^⑬,鼓噪讙叫^⑭,且刺且射,大战三日,水乃回减,灌浸沃衍^⑮,胡人称神。大田三年^⑯,积粟百万,威服外国^⑰。

注:①敦煌:古郡名。西汉置,治今甘肃敦煌西,辖境相当于今甘肃疏勒河以西及以南地区。索劭:人名。具体不详。②刺史:古代官名。原为朝廷所派督察地方之官,后沿为地方官职名称。表:启奏,上奏章。行:兼摄官职。贰师将军:指李广利。酒泉:古郡名。西汉置,治今甘肃酒泉。③楼兰:古西域国名。处在汉代通往西域的南道上,故址在今新疆若羌罗布泊西岸。屯田:利用戍卒、农民或者商人垦殖荒地。④白屋:以白茅覆盖的屋子。⑤鄯善:西域古国名。即古楼兰国。其国都扞泥城故址在今新疆若羌境。焉耆:西域古国名。都城员渠城故址在今新疆焉耆境内。龟兹:西域古国名。国都治今新疆库车东皮朗旧城。⑥横断:横着截断。注滨河:古黄河水经过扞弥(在今新疆于田)、且末(在今新疆且末)诸国后,与且末河汇合,通称注滨河。⑦奋:涌起。激:激荡。⑧陵:翻越。冒:上腾。⑨王尊:字子懿,涿郡(在今河北逐州)人,汉元帝时为益州刺史。建节:建立勇节。《汉书》记载:黄河水泛滥,浸决瓠子金堤,王尊祭祷河神,请求以身填堤。大水猛涨,金堤决口,官吏和百姓都逃走了,王尊一直站立不动,后来大水渐渐回落。⑩王霸:字元伯,颍川高阳(在今河南平顶山)人,东汉初为上谷太守、淮陵侯。⑪呼沱:即滹沱河,在今河北西部。⑫祷祀:有

事祈求鬼神而祭祀。⑬被：握持。杖：枪棒。⑭鼓噪讙叫：擂鼓呐喊。⑮灌浸：灌溉。沃：肥沃。衍：低下而平坦的土地。⑯大：竭力。田：屯垦。⑰威：威名。服：使……慑服。

河自蒲昌，有隐沦之证^①，并间关入塞之始^②。自此，《经》当求实致也。河水重源，又发于西塞之外，出于积石之山。《山海经》曰：积石之山，其下有石门，河水冒以西流，是山也，万物无不有。《禹贡》所谓导河自积石也。

注：①隐沦：潜流。②间关：曲曲折折。③《经》：即《水经》，当今学者认为是三国魏人所作的有关水道的专门著作，记载了当时中国境内的一百三十七道川流。实致：实际的事理。④《禹贡》：《尚书》中的一篇，是中国最早的一部区域地理著作，历来被奉为中国“古今地理志之祖”。

卷三

河水又东北历石崖山西，去北地五百里^①，山石之上，自然有文^②，尽若虎马之状，粲然成著，类似图焉，故亦谓之画石山也。

注：①北地：古郡名。相当于今陕西铜川耀州、富平地。②自然：天然。文：纹理，花纹。

始皇三十三年，起自临洮^①，东暨辽海^②，西并阴山^③，筑长城及开南越地^④，昼警夜作^⑤，民劳怨苦，故杨泉《物理论》曰^⑥：秦始皇使蒙恬筑长城^⑦，死者相属^⑧，民歌曰：生男慎勿举^⑨，生女哺用铺^⑩，不见长城下，尸骸相支柱^⑪。其冤痛如此矣。蒙恬临死曰：夫起临洮，属辽东，城堑万余里^⑫，不能不绝地脉，此固当死也。

注：①临洮：秦长城的西端，治今甘肃岷县。②暨：到。辽海：即辽东，泛指辽河流域以东至海地区，秦长城的东端。③并：挨着，依傍。④南越：古国名。在今湖南南部、两广及越南北部一带。⑤昼警夜作：白天警戒，夜晚劳作。警，警戒。作，劳作。⑥杨泉：晋朝人，字德渊，杂采秦汉诸子之说为《物理论》。⑦蒙恬：秦始皇时的大将。秦并天下，秦始皇派遣蒙恬修筑万

里长城。⑧属：连接，绵延。⑨举：养育，养活。⑩舖：可以用来喂养孩子的糖。⑪支柱：支撑。⑫塹：挖壕沟。

《东观记》曰^①：郭伋，字细侯，为并州牧，前在州，素有恩德^②，老小相携道路，行部到西河美稷^③，数百小儿各骑竹马迎拜^④，伋问：儿曹何自远来^⑤？曰：闻使君到^⑥，喜，故迎。^⑦伋谢而发去，诸儿复送郭外^⑧。问：使君何日还^⑨？伋计日告之。及还，先期一日^⑩，念小儿，即止野亭^⑪，须期至乃往。

注：①《东观记》：即《东观汉记》，东汉官修的本朝纪传体史书，已亡佚。今本是后人辑供之本，残缺甚多。②素：平时。③行部：巡行所管辖区域，考核政绩。美稷：汉县，属西河郡，治今内蒙古准格尔西北纳林村古城。④竹马：儿童游戏时当做马骑的竹。迎拜：迎接礼拜。⑤儿曹：儿辈。何自：为什么。⑥使君：对州郡长官的尊称。⑦故：特地。⑧郭：外城，古代在城的外围加的一道城墙。⑨还：回来。⑩期：约定。⑪野亭：野外供人休息的亭子。

赫连龙升七年，于是水之北，黑水之南，遣将作大匠梁公叱干阿利改筑大城^①，名曰统万城。蒸土加功^②。雉堞虽久^③，崇墉若新^④。

注：①将作大匠：官名。职掌宫室、宗庙、陵寝及其他土木营建。梁公叱干阿利：阿利，是赫连勃勃的臣子。梁公，是赫连勃勃建大夏国后给阿利的封号。叱干，复姓。②蒸土：把土加热。加功：施工。③雉堞：城上的女墙。雉，古代计量城墙面积的单位，长三丈、高一丈为一雉。堞，城上的矮墙。④崇墉：高耸的城墙。墉，城墙。

故言高奴县有洧水^①，肥可燠^②，水上有肥，可接取用之。《博物志》称酒泉延寿县南山出泉水^③，大如筥^④，注地为沟，水有肥如肉汁，取著器中^⑤，始黄后黑，如凝膏^⑥，然极明^⑦，与膏无异，膏车及水碓缸甚佳^⑧，彼方人谓之石漆。水肥亦所在有之^⑨，非止高奴县洧水也。

注：①高奴县：古县名。秦置，治今陕西延安东北延河北岸。②肥：油脂。这里指石油。燠：燃烧。③《博物志》：西晋张华所著。延寿县：古县名。东汉置，治今甘肃玉门南。④筥：圆形的竹筐。⑤著：放置。⑥凝膏：凝固的油脂。膏，油脂。⑦然：后来写作“燃”，燃烧。⑧膏：加油脂使润滑。水碓：东

汉时期发明的利用水力冲击木轮舂米的器械。⑨所在：到处，处处。

卷一七

渭水出首阳县首阳山渭首亭南谷^①，山在鸟鼠山西北^②。此县有高城岭，岭上有城，号渭源城，渭水出焉。三源合注，东北流径首阳县西与别源合。水南出鸟鼠山渭水谷，《尚书·禹贡》所谓渭出鸟鼠者也。

注：①渭水：今称渭河，从今甘肃发源流入陕西而注于黄河，是黄河的最大支流，也是关中平原上的最大河流。首阳县：古县名。汉置，治今甘肃渭源东北。首阳山：在今甘肃渭源东南。②鸟鼠山：在今甘肃渭源西。

瓦亭水又西南流^①，历僵人峡^②，路侧岩上有死人僵尸冢穴，故岫壑取名焉。释鞍就穴直上，可百余仞，石路逶迤，劣通单步^③。僵尸倚窟，枯骨尚全，惟无肤发而已。访其川居之士，云其乡中父老作童儿时，已闻其长旧传^④，此当是数百年骸矣。

注：①瓦亭水：今名苦水河，源出宁夏海原南，至甘肃天水北注入渭河。②僵人峡：在今甘肃庄浪。③劣：仅仅。单步：独行。这里指一个人。④长旧：长辈，老者。

魏明帝遣将军太原郝昭筑陈仓城^①，成，诸葛亮围之。亮使昭乡人靳祥说之^②，不下，亮以数万攻昭千余人，以云梯、冲车、地道逼射昭^③；昭以火射连石拒之^④，亮不利而还。今汧水对亮城^⑤，是与昭相御处也。

注：①郝昭：字伯道，三国魏太原（在今山西太原）人。陈仓城：故城在今陕西宝鸡东。②靳祥：三国魏太原（在今山西太原）人，郝昭同乡人。③冲车：古兵车名。用以冲城攻坚。④火射：火箭。连石：《三国志》裴松之注引《魏略》中说，用绳子连接石磨。⑤汧水：古水名。即今陕西西部渭河支流千水。对亮城：在今陕西宝鸡。

卷一八

渭水又东,温泉水注之^①,水出太一山^②,其水沸涌如汤,杜彦达曰^③:可治百病,世清则疾愈,世浊则无验。

注:①温泉水:水出今陕西眉县东。②太一山:即陕西秦岭终南山。③杜彦达:人名,具体不详。

卷一九

田溪水又北流^①,注于渭水也。县北有蒙茏渠,上承渭水于郿县^②,东径武功县为成林渠^③;东径县北,亦曰灵轺渠,《河渠书》以为引堵水^④。徐广曰:一作诸川是也。渭水又东径槐里县故城南^⑤。县,古犬丘邑也^⑥,周懿王都之,秦以为废丘,亦曰舒丘。中平元年,灵帝封左中郎将皇甫嵩为侯国^⑦。县南对渭水,北背通渠。

注:①田溪水:在今陕西周至附近。②郿县:故城在今陕西眉县东。③武功县:古县名。治今陕西武功。成林渠:在今陕西武功、周至附近,即下文的“灵轺渠”。同一条河流在不同地域的名称不同。④《河渠书》:即西汉司马迁《史记·河渠书》,是我国比较早的一篇关于水利发展史的文献。⑤槐里县:古县名。治今陕西兴平东南。⑥犬丘邑:古邑名。在今陕西兴平东南,周懿王自镐徙都于此,秦更名废丘。亦称舒丘。⑦左中郎将:郎中令的属官。皇甫嵩:字义真,东汉安定朝那(在今宁夏彭阳)人,时号名将。侯国:侯爵的封地。

池水北径郿京东、秦阿房宫西^①。《史记》曰:秦始皇三十五年,以咸阳人多,先王之宫小,乃作朝宫于渭南^②,亦曰阿城也。始皇先作前殿阿房,可坐万人,下可建五丈旗,周驰为阁道^③,自殿直抵南山^④。表山巅为阙^⑤,为复道自阿房度渭^⑥,属之咸阳^⑦,象天极^⑧,阁道绝汉抵营室也^⑨。《关中记》曰^⑩:阿房殿在长安西南二十里,殿东西千步,南北三百步,庭

中受十万人。其水又屈而迳其北，东北流注塌水陂。陂水北出，迳汉武帝建章宫东，于凤阙南，东注沔水^⑩。沔水又北迳凤阙东。《三辅黄图》曰^⑪：建章宫，汉武帝造，周二十余里，千门万户，其东凤阙，高七丈五尺，俗言贞女楼。非也。《汉武帝故事》^⑫云：阙高二十丈。《关中记》曰：建章宫圆阙，临北道，有金凤在阙上，高丈余，故号凤阙也。故繁钦《建章凤阙赋》曰^⑬：秦汉规模，廓然毁泯，惟建章凤阙，岿然独存，虽非象魏之制，亦一代之巨观也。沔水又北，分为二水，一水东北流，一水北迳神明台东^⑭。《傅子·宫室》曰^⑮：上于建章中作神明台、井干楼^⑯，咸高五十余丈，皆作悬阁，辇道相属焉^⑰。《三辅黄图》曰：神明台在建章宫中，上有九室，今人谓之九子台。即实非也。沔水又迳渐台东。《汉武帝故事》曰：建章宫北有太液池，池中有渐台三十丈。渐，浸也，为池水所渐。一说星名也。南有璧门三层，高三十余丈，中殿十二间，阶陛咸以玉为之，铸铜凤五丈，饰以黄金，楼屋上椽首，薄以玉璧^⑱。因曰璧玉门也。沔水又北流注渭，亦谓是水为滴水也。故吕忱曰^⑲：滴水出杜陵县^⑳。《汉书音义》曰^㉑：滴，水声，而非水也。亦曰高都水。前汉之末，王氏五侯大治池宅^㉒，引沔水入长安城。故百姓歌之曰：五侯初起，曲阳最怒^㉓，坏决高都，竟连五杜^㉔，土山渐台，像西白虎。即是水也。

注：①鄙京：周朝初年的国都，在今陕西西安。阿房宫：秦始皇时修建，在今陕西西安西北。即下文的“阿城”。②朝宫：帝王的宫殿。③周驰：四周绵延。驰，绵延。阁道：道路，阶梯。④南山：古山名。即秦岭终南山，在今陕西西安南。⑤表：以为标记。⑥复道：上下两重通道，即空中通道。度：渡过。⑦属：连接。⑧象：模仿，仿效。天极：紫宫后十七星。⑨阁道：星名。共六颗。绝汉：横过天河。营室：星宿名。与天极隔着天河。⑩《关中记》：西晋潘岳所作。⑪沔水：古水名。渭河支流，上游沔水即今陕西西安东南的滴河上游。即下文的“滴水”“高都水”。⑫《三辅黄图》：撰者不详。主要记录汉代三辅宫观、陵庙、明堂、辟雍、郊畴等事。⑬《汉武帝故事》：《隋书·经籍志》记载，二卷，未著撰者。⑭繁钦：东汉末文学家，字休伯，颍川（在今河南禹州）人。⑮神明台：在今陕西西安西北。⑯《傅子》：沈钦韩认为晋

傅玄撰《傅子》百四十篇。^⑰井干楼：楼观名。像井干一样的楼观。井干，井上的栏杆，其形状或四角，或八角。^⑱辇道：可乘辇往来的道路。^⑲薄：通“敷”，装饰，贴。^⑳吕忱：晋时的文字学家，字伯雍，任城（在今山东济宁）人。有文字学著作《字林》，七卷，今亡佚，后人有辑本。^㉑杜陵县：古县名。西汉置，治今陕西西安东南。^㉒《汉书音义》：给《汉书》作的音义。撰者不详。^㉓王氏五侯：《汉书·元后传》记载：西汉成帝刘骘河平二年（前 27 年），封舅舅王谭为平阿侯、王商为成都侯、王立为红阳侯、王根为曲阳侯、王逢时为高平侯。五人同日封，故世谓之“五侯”。^㉔曲阳：指曲阳侯王根。最怒：最为豪奢。^㉕五杜：《汉书·元后传》作“外杜”。具体不详。

渭水又东径长安城北，汉惠帝元年筑，六年成，即咸阳也。秦离宫无城^①，故城之，王莽更名常安^②。十二门：东出北头第一门，本名宣平门，王莽更名春王门正月亭，一曰东都门，其郭门亦曰东都门，即逢萌挂冠处也^③。第二门，本名清明门，一曰凯门，王莽更名宣德门布恩亭，内有藉田仓，亦曰藉田门。第三门，本名霸城门，王莽更名仁寿门无疆亭，民见门色青，又名青城门，或曰青绮门，亦曰青门。门外旧出好瓜，昔广陵人邵平为秦东陵侯^④，秦破，为布衣，种瓜此门，瓜美，故世谓之东陵瓜。是以阮籍《咏怀诗》云：昔闻东陵瓜，近在青门外，连畛拒阡陌^⑤，子母相钩带^⑥。指谓此门也。南出东头第一门，本名覆盎门，王莽更名永清门长茂亭。其南有下杜城^⑦，应劭曰^⑧：故杜陵之下聚落也，故曰下杜门，又曰端门，北对长乐宫。第二门，本名安门，亦曰鼎路门，王莽更名光礼门显乐亭，北对武库。第三门，本名平门，又曰便门，王莽更名信平门诚正亭，一曰西安门，北对未央宫。西出南头第一门，本名章门，王莽更名万秋门亿年亭，亦曰光华门也。第二门，本名直门，王莽更名直道门端路亭，故龙楼门也。张晏曰^⑨：门楼有铜龙。《三辅黄图》曰：长安西出第二门。即此门也。第三门，本名西城门，亦曰雍门，王莽更名章义门著义亭，其水北入有函里，民名曰函里门，亦曰突门。北出西头第一门，本名横门，王莽更名霸都门左幽亭。如淳曰：音光，故曰光门。其外郭有都门、有棘门。徐广曰：棘门在滑北。孟康曰^⑩：在长安北，秦时宫门也。如淳曰：《三辅黄图》

曰棘门在横门外。按《汉书》：徐厉军于此备匈奴^①，又有通门、亥门也。第二门，本名厨门，又曰朝门，王莽更名建子门广世亭，一曰高门。苏林曰^②：高门，长安城北门也。其内有长安厨官在东，故名曰厨门也。如淳曰：今名广门也。第三门，本名杜门，亦曰利城门，王莽更名进和门临水亭，其外有客舍，故民曰客舍门，又曰洛门也。凡此诸门，皆通逵九达^③，三途洞开。隐以金椎^④，周以林木，左出右入，为往来之径，行者升降，有上下之别。

注：①离宫：正宫之外供帝王出巡时居住的宫室。②常安：即长安，在今陕西西安。③逢萌挂冠：《后汉书》记载，时王莽杀其子宇，萌谓友人曰：“三纲绝矣。不去，祸将及人。”即解冠挂东都城门。逢萌，字子康，北海都昌（在今山东昌邑）人。④广陵：在今江苏扬州。邵平：秦东陵侯，秦破，为布衣，贫，种瓜于长安城东。⑤畛：田间的边界。拒：通“距”，到。阡陌：田地间纵横交错的小路。⑥子母：指大小不等的瓜。一说，子指瓜，母指瓜藤。相钩带：形容瓜一个连接一个，结得很多。⑦下杜城：故址在今陕西西安。⑧应劭：字仲远，东汉学者，汝南南顿（在今河南项城）人。⑨张晏：三国魏中山（在今河北正定）人，字子传，有《汉书音释》四十卷。⑩孟康：三国魏广宗（在今河北威县）人，字公休，曾注《汉书》。⑪徐厉：西汉文帝时人，具体不详。⑫苏林：三国魏陈留外黄（在今河南民权）人，字孝友。⑬通逵：犹“通途”。逵，四通八达的道路。⑭隐：夯筑。金椎：铁铸的锤击工具。

又东逐未央宫北。高祖在关东，令萧何成未央宫^①，何斩龙首山而营之^②。山长六十余里，头临渭水，尾达樊川^③；头高二十丈，尾渐下，高五六丈；土色赤而坚，云昔有黑龙从南山出饮渭水，其行道因山成迹。山即基^④，阙不假筑^⑤，高出长安城。北有玄武阙^⑥，即北阙也。东有苍龙阙^⑦，阙内有闾阖、止车诸门^⑧。未央殿东有宣室、玉堂、麒麟、含章、白虎、凤皇、朱雀、鹞鸾、昭阳诸殿^⑨，天禄、石渠、麒麟三阁^⑩。未央宫北，即桂宫也，周十余里，内有明光殿、走狗台、柏梁台，旧乘复道，用相径通。

注：①萧何：西汉沛（在今江苏）人，进韩信为大将，辅佐刘邦建立西

汉王朝,为开国名相。②龙首山:古山名。在今陕西西安旧城北。③樊川:滴水的支流,在陕西西安南。④即:作为。⑤不假:不须。⑥玄武:古代神话中的北方之神,后代指北方。⑦苍龙:古代二十八星宿中东方七宿的总称。⑧阊阖:古宫门。⑨鸞鸾:凤凰。鸞、鸾,各是凤凰的一种。⑩天禄、石渠、麒麟:汉代阁名。为皇家藏书之所。⑪桂宫:宫名。在今陕西西安西北。

《汉武帝故事》曰:帝崩后见形,谓陵令薛平曰^①:吾虽失势,犹为汝君,奈何令吏卒上吾陵磨刀剑乎?自今以后,可禁之。平顿首谢^②,因不见。推问陵傍,果有方石,可以为砺^③,吏卒常盗磨刀剑^④。霍光欲斩之^⑤,张安世曰^⑥:神道茫昧,不宜为法。乃止。

注:①陵令:即守卫汉武帝的陵墓茂陵的官长。薛平:人名。具体不详。②顿首:磕头,旧时礼节之一。谢:谢罪。③砺:磨刀石。④盗:偷偷地。⑤霍光:汉霍去病异母弟,字子孟,受遗诏,辅佐幼主。⑥张安世:汉张汤之子,字子孺。

秦始皇大兴厚葬,营建冢圻于丽戎之山^①,一名蓝田^②,其阴多金,其阳多玉,始皇贪其美名,因而葬焉^③。斩山凿石,下锢三泉,以铜为椁^④,旁行周回三十余里^⑤,上画天文星宿之象,下以水银为四渎、百川、五岳、九州岛^⑥,具地理之势。宫观百官,奇器珍宝,充满其中。令匠作机弩^⑦,有所穿近,辄射之。以人鱼膏为灯烛^⑧,取其不灭者久之。后宫无子者,皆使殉葬甚众。坟高五丈,周回五里余,作者七十万人,积年方成。而周章百万之师^⑨,已至其下,乃使章邯领作者以御难^⑩,弗能禁。项羽入关,发之,以三十万人三十日运物不能穷。关东盗贼,销椁取铜^⑪,牧人寻羊烧之,火延九十日不能灭。

注:①冢圻:坟墓。圻,墓穴。丽戎之山:即骊山,在今陕西西安。②蓝田:即蓝田山,在今陕西蓝田东南。丽戎之山实际上是蓝田山之北山。③三泉:三重泉,即地下深处,多指人死后的葬处。④椁:古代套在棺材外面的大棺材。⑤旁行:遍行,到处。周回:周围。⑥四渎:古人对四条独流入海的大川的总称,即江(长江)、河(黄河)、淮、济。五岳:我国五大名山的总称,古书中记载各异。九州:古代分中国为九州,说法不一。⑦机弩(nǚ):

古代用机械发射的强弓。⑧人鱼膏：鲛鱼的油脂。人鱼，即鲛鱼，俗称娃娃鱼。⑨周章：陈涉时人。《史记·秦始皇本纪》：“（秦二世）二年冬，陈涉所遣周章等将西至戏，兵数十万。”其余不详。⑩章邯；秦二世时官少府。陈涉兵起，二世使章邯发骊山徒拒之，击杀周章。⑪销：加热使金属变成液态。

卷二〇

汉水北^①，连山秀举^②，罗峰竞峙^③。祁山在蟠冢之西七十许里^④，山上有城，极为岩固^⑤。昔诸葛亮攻祁山，即斯城也。汉水迳其南，城南三里有亮故垒^⑥，垒之左右犹丰茂宿草^⑦，盖亮所植也，在上邽西南二百四十里^⑧。《开山图》曰^⑨：汉阳西南有祁山^⑩，蹊径透施，山高岩险，九州之名阻，天下之奇峻。今此山于众阜之中，亦非为杰矣。

注：①汉水：即西汉水，源出甘肃天水南蟠冢山。②秀举：高耸。③罗：罗列，广布。竞峙：争高。④祁山：在今甘肃礼县东。⑤岩固：险要而坚固。⑥垒：军营。⑦宿草：久植的荒草。⑧上邽：古县名。在今甘肃天水。⑨《开山图》：《隋书·经籍志》载，《遁甲开山图》三卷，荣氏撰，其余不详。⑩汉阳：故城在今甘肃天水、礼县一带。

虞诩为武都太守^①，下辨东三十余里有峡^②，峡中白水生大石，障塞水流，春夏辄溃溢^③，败坏城郭。诩使烧石，以醯灌之^④，石皆碎裂，因镌去焉，遂无泛滥之害。

注：①虞诩：东汉陈国武平（在今河南鹿邑）人，字升卿，一说定安。武都：古郡名。汉置，治今甘肃西和西南。②下辨：古县名。秦置，故城在今甘肃成县西北。③溃溢：喷涌漫溢。④醯：醋。

虞诩为郡，漕谷布在沮，从沮县至下辨^①，山道险绝，水中多石，舟车不通，驴马负运，僦五致一^②。诩乃于沮受僦直^③，约自致之^④，即将吏民按行^⑤，皆烧石榘木^⑥，开漕船道，水运通利，岁省万计，以其僦廩与吏士，年四十余万也。

注：①沮县：古县名。西汉置，治今陕西略阳东。②僦：租赁。③僦直：

租赁费。下文的“僦廩”也是租赁费。直，同“值”。④约：约定。自致：亲自送达。⑤按行：巡查，巡视。⑥榆：段熙仲认为《后汉书·虞诩传》作“烧石翦木”。“榆”当为“翦”之异体，义为“除去”。

《元和郡县图志》(唐)李吉甫

关内道三

泾原节度使,泾州、原州。

邠宁节度使,邠州、宁州、庆州。

邠坊观察使,邠州、坊州、丹州、延州。

泾州,安定。上。开元户一万五千九百五十二。乡五十五。元和户一千九百九十。乡三十。今为泾原节度使理所。

管州二:泾州,原州。县九。都管户。垦田。

《禹贡》雍州之域。春秋时属秦,至始皇分三十六郡,属北地郡。汉分北地郡置安定郡,即此是也。汉以六郡良家子补羽林郎,按六郡,安定即其一焉。后汉安帝永初五年,徙其人于美阳以避羌寇,郡寄理美阳,在今武功县界美阳故城是也。至顺帝移于今理,后魏太武神鼎三年于此置泾州,因水为名,隋大业三年改为安定郡。大业末,金城贼帅薛举侵扰豳、泾,武德元年太宗西讨,会举死,因平举子仁杲,遂改安定郡为泾州。

州境:东西一百九十六里。南北二百八十六里。

八到:东南至上都四百八十里。东南至东都一千三百四十里。东北至宁州一百五十里。西北至原州平凉县一百五十里。北至原州城三百三十里。北至庆州三百二十三里。南至凤翔二百五十八里。东南至邠州一百八十里。西南至陇州私路一百八十里。

贡、赋:开元贡:龙须席。赋:麻,布。

管县五:保定,灵台,临泾,良原,潘原。

保定县,上。郭下。本汉安定县地,今临泾县安定故城也,后汉省。后魏文帝大统元年,自高平城移于今理,属安定郡。隋开皇三年罢郡,以县

属泾州。至德二年，改保定县。

泾水，在县东一里。

折墟故城，在县东十里。西魏泾州刺史乙弗贵所筑，隋末薛举屯据於此城，举死仁杲复窃据，武德元年讨平之。

万俟丑奴余趾，在县东五里。丑奴，高平人，后魏建义元年僭号于此。

灵台县，上。西至州一百里。本汉鹑觚县，属北地郡，周属赵平郡，隋开皇三年属泾州。天宝元年，改为灵台县。今县理西阴密故城，东接县城，即古密国之地是也。《诗》曰“密人不恭。”

临泾县，上。东南至州九十里。本汉旧县，属安定郡。隋大业元年于今县理置湫谷县，取县内湫谷为名。十二年，复为临泾县，皇朝因而不改。按：县有彭阳川，去彭阳县一百步。县界兼有汉安定、安武、彭阳、抚夷四县之地。

良原县，上。东北至州六十里。本汉三水县地，属安定郡，今安定县界三水故城是也。隋大业元年，分安定县之地置良原县，县西南三十里有良原，因以为名。

汭水，一名宜禄川，西自陇州华亭县流入。

石原，在县西南，即所谓良原也。

潘原县，中。东至州一百里。本汉阴盘县，属安定郡，在今邠州宜禄县西二十三里阴盘故城是也。地有阴槃驿。

原州，平凉。中都督府。垦田。

《禹贡》雍州之域。春秋时地属秦，始皇时属北地郡。汉为安定郡。

州境：

八到：东南至上都八百里。东南至东都一千六百六十里。东南至泾州三百二十里。西至会州三百九十里。南至秦州四百六十里。正西微南至临洮军六百二十里。北至灵州五百里。

贡、赋：开元贡：覆鞍毡。赋：布，麻。

管县四：平高，平凉，百泉，萧关。

平高县，望。郭下。本汉高平县，属安定郡。后魏太武帝太延二年，于

今县理置平高县，属平高郡。隋开皇三年罢郡，以县属原州。大业三年，以原州为平凉郡。武德元年重为原州，县仍属焉。

笄头山，一名崆峒山，在县西一百里，即黄帝谒广成子学道之处。《史记》曰“黄帝东至于海，西至崆峒，登笄头”，是也。《汉书》曰杆头山，在泾阳西。《禹贡》泾水所出。《庄子》云广成子学道崆峒之山。又《后汉书》隗嚣使将王孟塞鸡头道，即此也。

木碛关，在县西南四十里。

萧关故城，在县东南三十里。《汉书》文帝十四年，匈奴入萧关，杀北地都尉，是也。

瓦亭故关，在县南七十里。即陇山北垂。隗嚣使牛邯守瓦亭，即此是也。

秦长城，在县北十里。

朝那湫，《郊祀志》云“湫泉祠朝那”，苏林云“在安定朝那县。方四十里，冬夏不增减，不生草木，旱时即祠之，以壶浥水，置之于所在，则雨；雨不止，反水于泉，俗以为恒。”今周回七里，盖近代减耗。

监牧，贞观中自京师东赤岸泽移马牧于秦、渭二州之北，会州之南，兰州狄道县之西，置监牧使以掌其事。仍以原州刺史为都监牧使，以管四使。南使在原州西南一百八十里，西使在临洮军西二百二十里，北使寄理原州城内，东宫使寄理原州城内。天宝中，诸使共有五十监：南使管十八监，西使管十六监，北使管七监，东宫使管九监。

监牧地，东西约六百里，南北约四百里。天宝十二年，诸监见在马总三十一万九千三百八十七匹，内一十三万三千五百九十八匹课马。

平凉县，上。西北至州一百六十里。本汉泾阳县地，今县西四十里泾阳故城是也。后魏为长城郡长城县之地。周武帝建德元年，割泾州平凉郡于今理置平凉县，属长城郡。隋开皇三年属原州，皇朝因之。开元五年移于泾水南，贞元七年又移于旧县南坂上，今县是也。仍屯军其中。

马屯山，在县西。《十六国春秋》云“姚萇与苻登战于高平，登败，奔于马屯山”，即此也。其山南北二十里，东西三十里。

百泉县,上。西至州九十里。本汉朝那县地,故城在今县理西四十五里。后魏孝明帝于今县西南阳晋川置黄石县,隋炀帝改为百泉县,武德八年移于今所。

可蓝山,一名都卢山,在县西南七十里。《十六国春秋》曰“赫连定据平凉,登可蓝山望统万城,泣曰:‘先帝若以朕承大业,岂有今日!’”

泾水,源出县西南泾谷。《地理志》云泾阳县 头山,泾水所出。《淮南子》云“笄头山一名薄落山”,故泾水亦曰薄落水。又南流经都卢山,山路之中,常如弹箏之声,故行旅因谓之弹箏峡。

萧关县,中。南至州一百八十里。本隋他楼县,大业元年置,神龙三年废。别立萧关县,以去州阔远,御史中丞侯全德奏于故白草军城置,因取萧关为名。

蔚茹水,在县之西,一名葫芦河,源出原州西南颓沙山下。

宁州,彭原。望。开元户三万二百二十六。乡七十二。元和户一千一百七。乡。垦田。

《禹贡》雍州之域。古西戎地也,当夏之衰,公刘邑焉。周时为义渠戎国,其后戎翟攻太王,亶父避于岐山而作周。按今州理城,即公刘邑地也。后西伯伐犬戎,武王都镐京逐戎夷于泾、洛之北,以时入贡,命曰“荒狄”。周道衰,荒狄不至。后幽王为犬戎所杀,至秦穆公得由余,西戎八国来至。秦昭王杀义渠戎王,并其地,始皇分三十六郡,此为北地郡,即义渠旧地也。汉氏因之,后汉移北地郡居富平故城是也。后魏延兴二年为三县镇,孝文帝太和十一年改置班州,十四年改为邠州,二十年改“邠”为“豳”,取古地名也。废帝三年改豳州为宁州,以抚宁戎狄为名。后周改为北地郡,隋又为宁州,大业中又为郡。武德元年复为宁州,贞观元年改为都督府,四年又废府为州。

州境:东西二百十六里。南北五百十四里。

八到:东南至上都四百五十六里。东南至东都一千三百里。东至坊州三百二十里。西至泾州一百五十里。东北至延州三百九十里。北至庆州一百三十里。南至邠州一百四十里。

贡、赋：开元贡：龙须席。赋：麻，布。

管县六：安定，真宁，襄乐，彭原，定平，丰义。

安定县，望。郭下。本汉泥阳县，在今县理东南十五里泥阳故城是也。至后魏太武帝置定安县，取定俗安人为义，在今县理西北三里定安故关。自隋开皇三年移县入废赵兴郡理，仍属宁州，皇朝因之。

扶苏墓，在县西北十八里。始皇太子也，监蒙恬筑长城。始皇崩，李斯矫诏赐死，葬于此。

真宁县，紧。西北至州七十里。本汉阳周县地属，上郡。《汉书》陈余与章邯书曰：“蒙恬为秦将，北逐戎人，开榆中地数千里，竟斩阳周。”谓此县也。后魏置泥阳、惠涉二护军，孝文帝太和十一年复置阳周县。隋开皇十八年改为罗川，因县南罗水为名，属宁州。皇朝因之，天宝元年改为真宁县。

子午山，亦曰桥山，在县东八十里，黄帝陵在山上，即群臣葬衣冠之处。《史记》曰，汉武帝北巡朔方，还祭黄帝冢于桥山，曰：“吾闻黄帝不死，今有冢，何也？”或对曰：“黄帝已上仙，群臣葬其衣冠，故有冢。”

襄乐县，紧。西南至州六十里。本汉襄洛县地，属上郡。后魏孝文帝改“洛”为“乐”，属襄乐郡。后周属北地郡。隋开皇三年改属宁州。皇朝因之。

秦故道，在县东八十里子午山。始皇三十年，向九原抵云阳，即此道也。

彭原县，紧。南至州一百里。本汉彭阳县地，在今县理西南六十里临泾县界彭阳故城是也。暨于后汉，又为富平县之地。后魏破赫连定后，于此复置富平县，废帝改为彭阳县，属西北地郡。隋开皇三年罢郡，以县属宁州，八十年改为彭原县，因彭池为名。原南北八十一里，东西六十里。

定平县，上。北至州七十里。自汉至晋并泥阳县地，后魏至周并为定安县地。隋大业十年，于此筑城，置枣社驿。武德二年，于驿分定安县置定平县，其驿移出城北。

丰义县，上。东南至州八十里。本汉彭阳县地，今县理西四十里彭阳

故城是也。后魏于县理置云州，周武帝保定二年废州为防，隋文帝废防名为丰义城。武德二年，分彭原县置丰义县，因旧城为名，属彭州，贞观元年州废，县属宁州。

庆州，顺化。都督府。开元户一万七千九百八十一。乡五十一。垦田。

《禹贡》雍州之域，古西戎地。《周本纪》曰夏氏政衰，后稷子不窋奔戎、翟之间，今州理东南三里有不窋城是也。春秋及战国时为义渠戎国，秦厉公伐义渠并之，虏其王。至始皇时属北地郡。按今州理，即汉郁郅城也，《地理志》属北地郡。后汉郡境为虏所侵，北地郡寄寓冯翊。后魏文帝大统十一年置朔州，周武帝保定元年废朔州为周武防。隋文帝开皇三年改置合川镇，十六年割宁州归德县置庆州，立嘉名也，义宁元年为弘化郡。天宝元年改为安化郡，至德元年改为顺化郡，乾元元年复为庆州。

州境：东西二百五十二里。南北四百七十二里。

八到：东南至上都五百七十里。东南至东都一千四百三十里。东北至延州四百四十里。西北至灵州六百二十里。东至鄜州三百九十里。南至宁州一百二十七里。西至原州三百四十里。北至盐州五百七十二里。

贡、赋：开元贡：牛苏、麝香。赋：胡布。

管县十：顺化，乐蟠，马领，合水，华池，同川，洛原，延庆，方渠，怀安。

顺化县，中。郭下。本汉郁郅县。后汉迄晋，戎虏所侵，不立州县。后魏及周，以为镇防。隋开皇十六年，于今州城西南一里置合水县，在马领、白马二水口，因以为名，属庆州。大业二年，以庆州为弘化郡，合水属焉。至武德六年改合水为合川县，取隋合川镇为名，贞观元年改为弘化县，天宝元年改为安化县，至德元年改为顺化县。

不窋墓，在县东二里。

乐蟠县，中。北至州三十二里。本汉略畔道地，今县理北五里略畔故城是也。后汉及晋，为虏所侵逼，此地无复郡县。后魏文帝于此置蔚州，周武帝置北地郡。隋开皇三年罢郡，以彭阳、襄乐二县属宁州。义宁元年，分合水县置乐蟠县，属弘化郡，取乐蟠城为名也。《百官表》云“县有蛮夷曰道”，按略畔、乐蟠，皆指此城，方言讹舛，故不同耳。

马领县，中。东南至州六十七里。本汉旧县，属北地郡。汉末为虏所侵，至后魏为朔州之地。隋大业元年，分合水县于此置马领县，复汉县之旧名也。十三年陷贼，县废。义宁二年，于今县理北四十里百家堡置马领县，属弘化郡，以县西一里有马领坂，因名。

秦长城，在县西北一百二十六里，即蒙恬所筑也。

合水县，中。西至州五十里。本汉略畔道之地，在今县西南三十八里故城是也。自后汉至晋，此地皆无郡县。至后魏为襄乐县之地。武德六年，分合水县置蟠交县以城临大、小乐蟠二水交口，因以为名。天宝元年，改为合水县。

华池县，下。西南至州一百五十里。本汉归德县地也。按汉归德县，今洛原县是。隋仁寿二年，于今县东北二里库多汗故城置华池县，因县西华池水为名，属庆州。皇朝因之。

子午山，旧名翟道山，在县西四十五里。

同川县，中下。东至州八十里。本汉郁郅县地，隋义宁三年，分宁州之彭原县西南十五里三泉故城置三泉县，属弘化郡。武德元年，改为庆州，县属焉，仍改为同川，因同川城为名。

洛原县，中下。东南至州二百七十五里。本汉归德县地，属北地郡。后汉更始二年，封岑彭为归德侯，谓此地也。后汉迄晋，无复郡县。后魏文帝大统元年，复置归德县。隋大业元年改为洛原县，因洛水所出为名。皇朝因之。

洛水，原出白于山，一名女郎山，在县北三十里。

延庆县，中。南至州四十里。本汉郁郅县地，后魏于今县理置朔州，隋开皇中改置合水县。武德六年，移丰州户住此，仍分合水县置白马县，以西临白马川水为名。天宝元年，改名延庆县。

方渠县，中下。东南至州一百八十里。古庆匡州仓在马领川内。因渠为名，景龙元年置，取汉县为名。县西北马领山诸谷水，东南流经县所置方渠堡，因名之。

怀安县，下。南至州一百六十里。古居近党项藩落，开元十年，检逃

户初置,故以“怀安”为名。

陇右道上

秦州,渭州,武州,兰州,河州,鄯州,廓州,岷州,洮州,叠州,芳州,宕州,临州。

秦州,天水。中府。开元户二万五千七。乡三十九。

《禹贡》雍州之域。古西戎地,周孝王时,其地始为秦邑。孝王使非子主马于汭、渭之间,马大蕃息,孝王邑诸秦,使为附庸,今天水陇西县秦亭秦谷是也。其后秦仲始大,襄公列为诸侯。武公伐邽戎,灭而县之,今州理上邽,即秦之旧县也。始皇分天下为三十六郡,此为陇西地。汉武帝元鼎三年,分陇西置天水郡。郡前有湖水,冬夏无增减,取天水名,由此湖也。王莽末,隗嚣据其地。后汉建武、永平之后,改天水曰汉阳郡。魏分陇右为秦州,因秦邑以为名,后省入雍州。晋复改汉阳为天水郡,武帝泰始中又立秦川郡,与州同理。隋开皇三年罢郡,所领县并属州。大业三年罢州,为天水郡。隋末陷于盗贼,武德二年讨平薛举,改置秦州,仍立总管府。天宝元年改为天水郡,乾元元年复为秦州。宝应二年陷于西蕃。

州境:东西四百三十九里。南北五百五十五里。

八到:东至上都八百里。东至东都一千六百六十里。东[北]至陇州三百六十里。西[北]至渭州三百里。西南至成州二百里。东北至原州四百六十里。

贡、赋:麻布、龙须席、牦牛尾、芎蒭。

管县五:上邽,伏羌,陇城,清水,成纪。

上邽县,上。郭下。本邽戎地,秦伐邽戎而置县焉。汉属陇西郡,晋属天水郡。后魏以避道武帝讳,改曰上邽,废县为镇。隋大业元年复为上邽县,属天水郡。武德二年属秦州。

蟠冢山,在县西南五十八里。漾水之所出也,东流为汉水。

渭水,在县北十三里。西自伏羌县界流入。

段谷水，源出县东南山下。蜀将姜维，为邓艾破于段谷，星散流离，即此谷也。

司马宣王垒，俗名上募城，在县东二里。魏明帝太和五年，诸葛亮寇天水，诏大将军拒之，此其垒也。

诸葛亮垒，俗名下募城，在县东二里。初，亮出，议者或欲自芟上邽左右麦以夺贼食，帝不从，又勅令护麦。及宣王与亮相持，赖此麦以为军粮。

姜维垒，在县北八里。

汉高祖庙，在县东北五里。隗嚣自立为大将军，聘平陵人方望为军师，劝嚣立高祖庙，以取信于人。

伏羌县，中。东北至州一百二十里。本冀戎地，秦伐冀戎而置县焉。汉冀县，属天水郡。后汉隗嚣自称西伯，都于此。后魏以冀为当亭，周为黄瓜，隋大业二年，改黄瓜为冀城县。武德三年初立伏州，仍置伏羌县，八年罢伏州，以县属秦州。

朱圜山，在县西南六十里。上有石鼓，不击自鸣，则有兵起。

渭水，经县北，去县一里。

县城，本秦冀县也，隗嚣称西伯都比，时冀人有谣曰：“出冀门，望羝群，有一跛人欲上天，谓天可上，地上安得人。”嚣卒败。

陇城县，中。西南至州一百二十里。本汉略阳道，属天水郡。初，隗嚣之据冀城也，来歙从上道袭得略阳城，嚣乃使王元拒陇坻，牛邯军瓦亭，嚣自率众攻略阳道。隋开皇[三]年罢郡，河阳县徙理焉，六年改为陇城县。

大陇山，在县东一百里。

略阳川水，北去县三十步。

瓦亭山，在县东北二百余里。隗嚣使将牛邯守处。其山亦入原州界。又有街泉亭，蜀将马谡为魏将张郃所败。

清水县，中下。西南至州一百二十五里。本汉旧县也，属天水郡。后魏分略阳置清水郡，隋开皇三年罢郡，县属秦州。

小陇山，一名陇坻，又名分水岭。隗嚣时，来歙袭得略阳，嚣使王元拒之。陇坂九回，不知高几里，每山东人西役，升此瞻望，莫不悲思。陇上有水，东西分流，因号驿为分水驿，行人歌曰：“陇头流水，鸣声幽咽，遥望秦川，肝肠断绝。”东去大震关五十里。上多鸚鵡。

成纪县，中。东南至州一百里。本汉旧县，属天水。伏羲氏母曰华胥，履大人迹，生伏羲于成纪，即此丘也。周成纪县，属略阳郡，隋开皇三年罢郡，县属秦州。皇朝因之。

瓦亭川水，东去县一十五里。

渭州，陇西。下。开元户五千二百三十二。乡一十四。

《禹贡》雍州之域。古西戎地。战国时羌、戎杂居其地，秦昭王伐得义渠戎，始置陇西郡。按天水有大坂名曰陇坻，郡处坻西，故曰陇西。有铁官、盐官。汉末隗嚣窃据，建武十年嚣降，陇右平，仍旧为郡。灵帝分立南安郡，魏于此置镇守，邓艾曰：“蜀师来而为一，我分为四以御之。”谓狄道、陇西、南安、岐山西处。齐王嘉平五年，蜀将姜维围南安、襄武，皆不克。后魏庄帝永安三年，于郡置渭州，因渭水为名。《禹贡》“导谓自鸟鼠同穴”，山在州西一百二十九里渭源界。隋大业三年罢州，复置陇西郡。隋乱陷贼，武德元年，西土底平，复置渭州。宝应二年陷于西蕃。

州境：东西二百六十六里。南北三百八十六里。

八到：东至上都一千一百里。东至东都一千九百六十里。东南至秦州三百里。西南至岷州二百二十六里。东北至原州五百五十里。西北至临洮军一百九十里。

贡、赋：开元贡：秦芄，麝香。赋：布，麻。

管县四：襄武，渭源，陇西，鄣。

襄武县，上。鄣下。本汉旧县也，属陇西郡。隋开皇三年罢郡，县属渭州，大业三年复属陇西郡。武德元年，改属渭州。

渭水，北自渭源县界流入。

六泉水，在县东北原上。泉源有六，因以为名。

渭源县，上。正东微南至州九十里。本汉首阳县，属陇西郡。西魏文

帝分陇西置渭源郡，因渭水为名也。隋开皇三年罢郡，县属渭州。

鸟鼠山，今名青雀山，在县西七十六里。渭水所出，凡有三源并下。其同穴鸟如家雀，色小青；其鼠如家鼠，色小黄。近穴溲溺气甚辛辣，使人变逆呕吐，牛马得此气，多疲卧不起而大汗。

陇西县，上。西至州五十里。本汉獬道县也。属天水郡。后汉末于此置南安郡，隋开皇元年废郡，移武阳县名于郡理，属渭州，八年改武阳为陇西。

安都山，在县西四十九里。

落门水，出县东南落门谷。后汉建武十年，来歙大破隗嚣于落门，即此。渭水，经县南。

鄠县，上。东北至州六十里。本汉鄠县也，属陇西郡，永元元年封耿秉为鄠侯是也。永嘉南渡，县遂废焉。后魏宣武帝复置，属略阳，隋开皇三年罢郡，县属渭州。

龙马山，在县西四十里。

鄠水，南去县一里。

盐井，在县南二里。远近百姓仰给焉。

武州，武都。下。开元户三千四百五十三。乡十二。

《禹贡》梁州之域。古西戎地也。战国时，白马氏居焉，氏即西戎之别种也。元鼎六年，开白马氏，以其地为武都郡。魏太祖以杨阜为武都太守。及刘备取汉中，魏文帝徙武都于美阳，即今好畤县界也。后诸葛亮使将攻武都、阴平，遂克定二郡，其地始入于蜀。蜀平后，晋复以为郡。及永嘉南迁，中原背叛，武都又为氐杨茂搜所据，群氐推以为王。其后杨难当为宋所破，其苗裔复拥众据武都之仇池山，在今成州界。后魏平仇池，于仙陵山东置武都镇，宣武帝于镇城复置武都郡，废帝改置武州。隋大业三年又改为武都郡，武德元年复为武州。

州境：东西二百五十六里。南北二百九十里。

八到：东北至上都一千三百里。东北至东都二千六百里。东至兴州三百五十七里。西北至宕州二百五十里。南至文州二百五十里。北至成

州三百八十里。

贡、赋：开元贡：蜡烛，椒。赋：布。

管县三：将利，福津，盘隄。

将利县，中下。郭下。本汉羌道县地，后魏于此置石门县。周闵帝改为将利县，属武都郡。隋开皇三年罢郡，县属武州，皇朝因之。

仙陵山，在县西六里。

武都有紫水，泥亦紫，汉朝封玺书用紫泥，即此水之泥也。又出上品雄黄，色如鸡冠。

羌水，一名陵水，经州城南二里。

福津县，中下。西北至州六十六里。本后魏之武阶郡也，属南秦州。文帝又置福津县，属武阶郡。隋开皇三年罢郡，移福津县于郡置焉，属武州。皇朝因之。

陇东山，在县北四十五里。

盘隄县，中下。西北至州一百五十里。本汉河池县地也，后魏废帝于此置武阳郡，领盘隄县。隋开皇三年罢郡，县属武州。皇朝因之。

盘隄山，在县东南七十三里。

县城，魏邓艾与蜀将姜维相持，于此筑城，置茄芦戍，后于此置县。

兰州，金城。下。开元户四千。乡一十五。

《禹贡》雍州之域。古西羌地也。秦并天下，是为陇西郡。汉武帝降匈奴，以其地置武威、酒泉、张掖、敦煌四郡，又分陇西置天水郡。昭帝六年，分陇西、张掖以为金城郡，今州即金城郡之旧地也。初筑时得金，故曰金城。又言金取其坚固。领县十三。宣帝又置金城属国，以处降羌。平帝元始四年，金城塞外羌献鱼盐之地内属，汉遂得西王母石室，以为西海郡，理龙夷城，即今河源军西一百八十里威戎城是也。后汉建武十三年，省金城入陇西郡，明帝永平元年复立。永嘉末，前凉张轨分立晋兴郡，张寔徙金城县，即今州理是也。西秦乞伏乾归都苑川，南凉秃髮乌孤都广武，皆此地也。苑川在今五泉县，至乞伏慕末为赫连定所灭。广武，至秃髮儁檀，为乞伏炽磐所灭。隋开皇元年立为兰州，置总管府，取皋兰

山以为名。大业三年罢州，为金城郡。武德二年讨平薛举，复置兰州，八年置都督府，显庆元年罢，复为州。宝应元年陷于西蕃。

州境：东西二百一十七里。南北六百一十里。

八到：东南至上都一千四百六十里。东南至东都二千三百二十里。东至临州一百九十里。东北至会州三百八十里。西北至鄯州四百里。西南至河州三百里。

贡、赋：开元贡：褐，野马皮。赋：麻。

管县二：五泉，广武。

五泉县，中下。郭下。本汉金城县地，属金城郡。前凉张寔徙金城郡理焉。隋开皇三年罢郡，县属兰州。皇朝因之。

康狼山，亦名热薄汗山，在县南一百四十里。西秦乞伏乾归太子炽磐，招结诸部二万七千，筑城于康狼山以据之，即此山也。

黄河，流经县北，去县二十里。

金城关，在州城西。周武帝置金城津，隋开皇十八年改津为关。

广武县，中下。南至州二百二十五里。本汉枝阳县地，前凉张骏三年分晋兴置广武郡，隋开皇三年罢郡置广武县，属兰州。大业二年改为允吾县，取汉旧名也，六年改为会宁县。武德三年，重置广武县。

琵琶山，在县西北一百五十里。北凉沮渠蒙逊恃其强，阴谋图周，周乃拥众南保琵琶山，即此也。

乌逆水，在县西南二十许里。水西有马蹄谷，汉武帝使李广利伐大宛，得天马，胡马感北风之思，遂顿绝羁绊而驰，晨发京城，食时至敦煌塞下，今谷中石上犹存蹄迹。

允吾故城，在县西南一百六十里。本汉县，属金城郡。

浩亶故城，在县西南一百三十里。汉县也，属金城郡。亶者，水流峡岸深若门也。

河州，安乐，上。开元户五千二百八十三。乡一十四。

《禹贡》雍州之域。古西羌地也。汉昭帝分陇西、天水、张掖三郡立金城郡，今州即金城郡之枹罕县也。灵帝时，陇西宋建自称河平王，聚众枹

罕,改元,置百官。献帝建安末,夏侯妙才讨平之。晋惠帝立枹罕护军。前凉张轨保据凉州,立为晋兴郡。张骏二十一年,以州界辽远,分置河州,以《禹贡》“导河积石,至于龙门”,积石州界,故曰河州。后乞伏炽磐,又自金城郡都于此。后魏平定秦陇西,改置枹罕镇。孝文帝太和十六年,改镇复为河州。隋大业三年罢州,改为枹罕郡。武德二年讨平李轨,改置河州。宝应元年陷于西番。

州境:东西二百二十八里。南北三百七里。

八到:东至上都一千四百六十里。东至东都二千三百二十里。东北至兰州三百里。西至廊州三百九十里。(东)南至洮州三百里。西北至鄯州三百里。

贡、赋:开元贡:麝香,麸金。赋:布,麻。

管县三:枹罕,凤林,大夏。

枹罕县,中下,郭下。本汉旧县,属金城郡。故罕羌侯邑,秦灭为县,后遂因之。

积石山,一名唐述山,今名小积石山,在县西北七十里。按河出积石山,在西南羌中,注于蒲昌海,潜行地下,出于积石,为中国河。故今人目彼山为大积石,此山为小积石。

凤林山,在县北三十五里。

河水,在县北五十里。河,下也。按四渎之中,河源最高,从高注下,故其流峻急。《禹贡》“导河积石,至于龙门”。又曰“导洛自熊耳”。按洛水出上洛西山,经熊耳之北,所言导者,皆谓纪所施功,不必自其源也。

凤林县,中下。东南至州八十里。本汉白石县地,后魏大统十二年,刺史杨宽于河南凤林川置凤林县,因以为名。仪凤元年,于河州西移安乡县理此,又名安乡,天宝元年改名凤林。

石门山,在县东北二十八里。山高险绝,对岸若门,即皋兰山门也。汉武帝元狩二年,霍去病出陇西,至皋兰,即此也。

离水,西去县二百步。

大夏县,中下。西北至州七十里。本汉旧县,属陇西郡。前凉张骏置

大夏郡，县属焉。周改属枹罕郡。隋开皇三年罢郡，县属河州。

金剑山，在县西二十里。

大夏山水，经县南，去县十步。

镇西军，在州西一百八十里。开元三年，哥舒翰于索恭川置。

振威军，在天成军西一百余里。天宝十三年，哥舒翰攻吐蕃雕窠城置。

鄯州，西平。下府。开元户六千四百四十六。乡一十五。

《禹贡》雍州之域。古西戎地。春秋及秦、汉为羌胡所居。昭帝元始元年置金城郡，按今州界即金城郡地也。后汉献帝分置西平郡，属凉州。前凉张轨分西平置晋兴郡。张天锡以晋兴、西平二郡辽远，分为广源郡。后凉吕光改西平为西河郡，南凉秃发乌孤自称武威王，徙都于此。弟傉檀迁于姑臧，后复徙理于此，为乞伏炽磐所并。后魏以西平郡为鄯善镇，孝昌二年改镇立鄯州。隋大业三年罢州，复为西平郡。隋乱陷贼，武德二年讨平薛举，关、陇平定，改置鄯州。仪凤二年置都督府，后复为州，开元二十一年置陇右节度使，都管兵七万五千人，马一万六千匹。衣赐二百五十一万匹段。备西戎。统临洮军，开元中移就节度衙置。管兵五万五千人，马八千四百匹。河源军，州西一百二十里。仪凤二年中郎将李乙支置。管兵一万四千人，马六百五十三匹。白水军，州西北二百三十里。开元五年郭知运置。管兵四千人，马五百匹。安人军，河源军西一百二十里星宿川。开元七年郭知运置。管兵万人，马三百五十匹。振威军，州西三百里。开元中信安王祗置。管兵千人。威戎军，州西三百五十里。开元二十六年杜希望置。管兵千人，马五十匹。绥和守捉，州西南二百五十里。开元二年郭知运置。管兵千人，今分为五百人。合川郡守捉，州南一百八十里。贞观中侯君集置。管兵千人。合川郡，今叠州。莫门军，洮州城内。仪凤二年置。管兵五千五百人，马二百匹。宁塞军，鄯州城内。管兵五百人，马五十匹。积石军，鄯州西一百八十里。仪凤二年置。管兵七千人，马一百匹。镇西军，河州城内。开元二十六年杜希望置。管兵一万二千人，马三百匹。平夷守捉，河州城西南四十余里。开元二年郭知远置。管兵三千人。宝应元年没于西蕃。

州境:东西三百五里。南北二百一十五里。

八到:东南至上都一千九百六十里。东南至东都二千七百六十里。东南至兰州本百里。西至青海三百七十里。西南至廓州二百四十里。东北至凉州五百里。

贡、赋:开元贡:褐十匹,羚羊角两只。赋:布,麻。

管县三:湟水,鄯城,龙支。

湟水县,中。郭下。本汉破羌县地,属金城郡。魏分置西都县,属西平郡。隋开皇三年罢郡,县属鄯州。十八年改为湟水县。皇朝因之。

土楼山,在县西一百三十里。下有土楼神祠。

湟水,名湟河,亦谓之乐都水,出青海东北乱山中,东南流至兰州西南入黄河。浩亶水,今谓之闾门水,经县东,去县五十五里。汉宣帝神爵元年,遣后将军赵充国击先零羌,充国欲罢骑兵,屯田以待其弊。计度临羌东至浩亶,羌虏故田,人所未垦,可二千顷已上。又理湟峡以西道桥七十所,令可至鲜水左右留步士万人屯田,为必禽之具。诏从之。充国竟以屯田之利,支解先零。

鄯城县,中。东至州一百二十里。仪凤二年分湟水县置。北枕湟水,西即土楼山。

龙支县,中。北至州一百三十五里。本汉充吾县也,属金城郡。后魏初于此置金城县,废帝二年改名龙支县,西南有龙支谷,因取为名。

积石山,在县西九十八里。南与河州枹罕县分界。

黄河,在县西南六十里。

岷州,和政。下。开元户三千九百五十。乡一十四。

《禹贡》雍州之域。古西羌地也。《禹贡》“西倾、朱圉、鸟鼠”,按西倾山在洮州之西,今州处其东北,此则雍州之域明矣。在秦为陇西郡洮县也,自秦至晋不改。后魏文帝始于此置岷州,南有岷山,因以为称,仍领同和郡,又改为临洮郡。隋开皇三年罢郡,属岷州,大业三年复为临洮郡。隋末沦陷寇贼,义宁二年改置岷州,天宝元年改为和政郡。乾元年元年复为岷州。上元二年因羌叛,陷于四蕃。

州境:东西一百六十三里。南北三百六十七里。

八到:东北至上都一千三百三十六里。东北至东都二千一百八十六里。东北至渭州二百二十六里。西南至洮州一百八十里。南至宕州三百八十里。北至临州三百四十里。

贡、赋:开元贡:龙须席,鸚鵡鸟,牦牛酥,雕翎。赋:布,麻。

管县三:溢乐,祐川,和政。

溢乐县,中下。郭下。本秦、汉之临洮县也,属陇西郡。后魏置同和郡,县属焉。隋开皇三年罢郡,县属岷州,义宁二年改置溢乐县。

岷山,在县南一里。

崆峒山,在县西二十里。

州城,本秦临洮城也,后汉建初二年,金城陇西保塞羌皆反,车骑将军马防、长水校尉耿恭击平之,即此地也。

董卓台,在县北十五步。

秦长城,首起县西二十里。始皇三十四年并天下,使蒙恬将三十万众北逐戎狄,筑长城,起临洮至辽东,延袤万余里。

祐川县,中下。西北至州七十里。本基城县,周明帝武成元年置。隋开皇九年省,义宁二年重置。先天元年改为祐川县,取县西祐川为名也。

和政县,中下。南至州三十二里。本后周洮城郡也,武帝保定元年郡省,置同和县,属同和郡,宣政元年改为和政县。隋开皇三年罢郡,县属岷州。皇朝因之。

和政府,在县西北七里。

洮水,西南自溢乐县界流入。

洮州,临洮。下。开元户三千七百八十四。乡七。

《禹贡》雍州之域。古西羌地也。自秦、汉至于魏、晋,皆诸羌所居。至后魏吐谷浑又侵据其地,后周明帝武成中,西逐诸戎,其地内属,置洮阳防,武帝保定元年立洮州。隋大业三年罢州,改为临洮郡。隋季乱离,所在陷没,郡守孙长询率所部百姓婴城固守,以义宁元年举城归国,武德二年复于此置洮州。贞观四年,州移理故洪和城,于此置临洮镇,五年废

镇置[淳]州，八年废州，复移洮州理此。永徽元年置都督府，开元十七年废入岷州。二十年于临潭又置临州，二十七年又改为洮州。广德元年陷于西蕃。

州境：东西五百五十里。南北二百二十里。

八到：东北至上都一千五百里。东北至东都二千三百六十里。东至岷州一百八十里。西至黄河六百里。西南至叠州一百八十里。北至河州三百里。

贡、赋：开元贡：褐，酥。

管县二：临潭，美相。

临潭县，中。郭下。本隋美相县，周保定元年置。贞观四年，移美相县于东北洪和城内，五年于州理改置临潭县。其城东西北三面并枕洮水。

洮水，出县西南三百里嶂台山，即《禹贡》西倾山也。

扑傍山，在县东十一里。扑傍，羌语也，羌语呼石为扑，呼高为傍，因以为名。

安西府，在县东四十里。周明帝武成元年，行军总管博陵公贺兰祥讨吐谷浑，筑此城以保据西土，后因置博陵郡。隋又为县，属洮州，贞观十二年省县入临潭，十三年于此置安西府。

广恩镇，在县西一百八十里。

莫门军，仪凤二年置。在州城内。

神策军，在州西八十里。天宝十三年哥舒翰置。在洮河南岸。

美相县，中。西至州七十五里。本汉、隋旧县，理在州城，贞观四年移洮州在此，县亦随徙焉。

雾露山，在县北一十里。

叠州，合川。下。开元户一千二百七十七。乡十一。

《禹贡》梁州之域。历秦、汉、魏、晋，诸羌常保据焉。至后魏，其地入吐谷浑。周武帝建德六年，西逐诸戎，始统有其地，乃置叠州，盖取山川重叠为义。隋大业元年废叠州，以县属洮州。武德二年，西土内附，于今州西二十九里合川故城置叠州，五年陷吐谷浑，七年讨平之，复置叠州。

今州城在独山上，西临绝涧，南枕羌水。十三年置都护府，永徽元年罢，天宝元年改为合川郡，乾元元年复为叠州。

州境：东西二百六十五里。南北一百二十九里。

八到：东至上都一千七百里。东至东都二千五百六十里。东南沿流至宕州二百五十里。西至黄河上党项岸二百八十里。东南至故芳州一百四十里。东北至洮州一百八十里。

贡赋：开元贡：甘松香，麝香，酥。赋：布，麻。

管县二：合川，常芳。

合川县，下。郭下。本周武成二年置，有三谷水，至县东合流，因以为名，属西疆郡。隋开皇三年云郡，县属叠州。皇朝因之。

常芳县，中。西北至州一百二十里。本周武成中所置恒香县，属芳州郭下，前上元中芳州没蕃，神龙元年移县名于天法山东，苏董谷西，即合川县理是也。

宕州，怀道。下。开元户一千六百五十九。乡六。

《禹贡》梁州之域。古西羌地也。自秦、汉至魏、晋，皆诸羌据焉。后魏招抚西戎，始有其地。有梁弥忽者，宕昌羌也，其先羌豪祖勤自称宕昌王。弥忽于太武初表求内附，太武嘉之，拜弥忽为宕昌王，其后递相傅袭，称藩于魏，谓其地为宕昌藩。周天和元年，改藩置宕州。隋大业三年罢州，置宕昌郡，武德元年复宕州。天宝元年改为怀道都，乾元元年复为宕州，因宕昌山为名也。

州境：东西三百六十五里。南北四百二十九里。

八到：东北至上都一千四百七十里。东北至东都二千三百三十里。东南至武州二百五十里。西北至叠州二百五十里。西南至扶州四百里。北至岷州三百八十里。

贡、赋：开元贡：麸金，麝香。赋：布，麻。

管县二：怀道，良恭。

怀道县，中下。郭下。本周武帝天和元年置，属甘松郡。隋开皇三年罢郡，属宕州。皇朝因之。

苏董戍,在县西一百八十三里。

良恭山,在县北四十里。出雌黄。

斫花山,在县东北八十里。出朱砂、雄黄,人常采取之。

宕昌故城。今为交和戍,在县东五十二里。

良恭县,下。西南至州二百一十里。本周之阳谷县也,武帝天和五年置宕昌郡,隋开皇三年罢郡,县属宕州,十八年改为良恭县。

愿虜山,接县城西北隅,东西四十里,南北三里。

临州,狄道。下府。天宝初,割兰州狄道县又别置安乐县置临州。州郭旧有临洮军,久视元年置,宝应元年陷于西蕃。

州境:

八到:东南至上都一千四百八十里。东南至东都二千二百四十里。南至岷州三百四十里。西至兰州一百九十里。

贡、赋:

管县二:狄道,长乐。

狄道县,下。本汉县,属陇西郡。晋改为武鞬县。隋复为狄道,属兰州。天宝初改属临州。

长乐郡,下。天宝初置安乐县,乾元后改为长乐。

陇石道下

凉州,甘州,肃州,沙州,瓜州,伊州,西州,庭州。

凉州,武威。中府。开元户二万六千一百六十五。乡二十五。

《禹贡》雍州之西界。自六国至秦,戎狄及月氏居焉。后匈奴破月氏,杀其王,以其头为饮器,月氏乃远过大宛,西击大夏而臣之。匈奴使休屠王及浑邪王居其地。汉武帝之讨北边,休屠、浑邪数见侵掠,单于怒,遣使责让之,二王恐见诛,乃降汉。汉得其地,遂置张掖、酒泉、敦煌、武威四郡,昭帝又置金城一郡,谓之河西五郡,改州之雍州为凉州,五郡皆属焉。地势西北邪出,在南山之间,隔绝西羌、西域,于时号为断匈奴右臂。

献帝时，凉州数有乱，河西五郡去州隔远，自求别立州，于是以五郡立为雍州。魏又分雍州置凉州，领河西五郡。晋惠帝永宁元年，以张轨为刺史，持节领护羌校尉，会永嘉之乱，因保据凉州，是为前凉，至张天锡，为苻坚所灭。后十余年，又为吕光所据，是为后凉，至吕隆，为姚兴所灭。及沮渠蒙逊起兵据张掖，是为北凉，至沮渠茂虔，为后魏所灭。及太武帝，改州镇，置四军戍，孝文帝太和十四年复为凉州，领武威等十郡二十县。周置总管府，隋大业三年改为武威郡，废总管。隋末丧乱，陷于寇贼，武德二年讨平李轨，改为凉州，置河西节度使，都管兵七万三千人，马万八千八百匹。备羌胡。统赤水军，在凉州城内。管兵三万三千，马万三千匹。本赤乌镇，有青赤泉，名焉。军之大者，莫如赤水，幅员五千一百八十里，前拒吐蕃北临突厥者也。大斗军，凉州西二百里。本是赤水军守捉，开元十六年改为大斗军，因大斗(枝)[拔]谷为名也。管兵七千五百人，马二千四百匹。建康军，证圣元年尚书王孝杰开镇，周回以甘、肃两州中间阔远，频被贼钞，遂于甘州西二百里置此军。[管]兵五千二百人，马五百匹。东去理所七百余里也。后仿此。宁寇军，甘州东北十余里。天宝二年置。管兵一千七百人，马五百余匹。玉门军，肃州西二百余里。武德中杨恭仁置。管兵千人，实三百人，马六百匹。东去理所一千一百余里。墨离军，瓜州西北一千里。管兵五千人，马四百匹。东去理所一千四百余里。新泉(郡)[军]，会州西北二百里。大足初郭元振置。管兵七千人。西去理所四百里也。豆卢军，沙州城内。以当匈奴要路，山川回阔，神龙初置立豆卢军以镇之。管兵四千五百人，马四百匹。去理所一千七百余里。张掖守捉，东去理所五百里。管兵六千五百人，马一千匹。交城守捉，凉州西二百里。管兵一千人。白亭军。凉州西北三千里。管兵一千七百人。天宝元年，改为武威郡，乾元元年复为凉州。广德二年陷于西蕃。州城本匈奴所筑，汉置为县。城不方，有头尾两翅，名为鸟城。南北七里，东南三里，地有龙形，亦名卧龙城。

州境：东西四百里。南北八百三十里。

八到：东北至上都取秦州路二千里，取泉兰路一千六十里。东南至

东都二千八百六十里。

贡、赋：开元贡：野马皮五张，白麦，柔毛毡。

管县五：姑臧，神乌，昌松，嘉麟，天宝。

姑臧县，上。郭下。本汉旧县，属武威郡，因姑臧山为名。亦言故匈奴盖臧城，后人音讹为“姑臧”焉。

姑臧南山，一名雪山，在县南二百三十里。

天梯山，在县南二十五里。

白亭军，在县北三百里马城河东岸。旧置守捉，天宝十年哥舒翰改置军，因白亭海为名也。

文车泽，在县东三十里。前秦苻坚遣将军苟萇、毛盛伐北凉，造机械冲车于此，因名。

休屠城，在县北六十里。汉休屠县也。

明威戍，在县北一百八十里。

武安戍，在县西北一百六十里。

武兴盐池、眉黛盐池，并在县界，百姓咸取给焉。

神乌县，上。旧郭下。本汉鸾鸟县，张天锡改置武兴县，后废。武德三年，又于城内置神乌县，与姑臧分理，神乌理西，姑臧理东。贞观元年废，总章元年又置也。

昌松县，中。西北至州一百二十里。本汉苍松县，属武威郡。后凉置昌松郡。县属焉。隋开皇三年改昌松为永年县，后以重名，复为昌松。

金山，在县南一百八十里。丽水出焉。

苍松故城，在县东北十里。汉苍松县也。

丽水府，在县城内。

白马戍，在县东北五十里。

嘉麟县，中下。东南至州七十里。本汉宣威县地，前凉张轨于此置武兴郡，后凉吕光改置嘉麟县，后废，万岁通天元年重置。

天宝县，中下。东至州一百八十里。本汉番音盘禾县，属张掖郡，北凉沮渠蒙逊立为番禾郡。后魏太武帝平凉，罢郡置军，隋开皇三年改为

县。皇朝因之，天宝中改为天宝县。

甘州，张掖。中府。开元户五千四百四十。乡一十七。

《禹贡》雍州之域。自六国至秦，戎、狄、月氏居焉。汉初为匈奴右地，武帝元鼎六年，使将军赵破奴出令居，乃分武威、酒泉地置张掖、敦煌郡，断匈奴之右臂，自张其掖，因以为名。初属张轨，后凉末段业亦尝据此地，后业为北凉沮渠蒙逊所杀，据之，后又迁理姑臧。后魏太武帝平凉，以为张掖军，废帝二年改军置甘州，因州东甘峻山为名。或言地多甘草，故名。隋大业三年罢州，为张掖郡。隋乱陷贼，武德二年讨平李轨，改置甘州。永泰二年陷于西番。

州境：东西四百一十六里。南北一千三百七里。

八到：东南至上都二千五百里。东南至东都三千三百六十里。东至凉州五百里。西至肃州四百里。南至大雪山二百三十里。东北至花门山一千四百五十里。

贡、赋：开元贡：野马皮，白柰，枸杞。

管县二：张掖，删丹。

张掖县，下。郭下。本汉觶得县，属张掖郡。本匈奴觶得王所居，因以名之。晋改名永平县。隋开皇三年，改永平为酒泉县，大业二年改为张掖县，取旧郡为名也。皇朝因之。

合黎山，俗名要涂山，在县西北二百里。《禹贡》“导弱水至于合黎”。

祁连山，在县西南二百里。张掖、酒泉二界上，美水茂草，山中冬温夏凉，宜放牧，牛羊充肥，乳酪浓好，夏泻酥不用器物，置于草上不解散，作酥特好，一斛酪得斗余酥。

雪山，在县南一百里。多材木箭竿。

甘峻山，在县东北四十五里。出青鹞鹰，称为奇绝，常充贡献。

居延海，在县东北一百六十里。即居延泽，古文以为流沙者，风吹流行，故曰流沙。

盐池，在县北九百三十里。其盐洁白甘美，随月亏盈，周回一百步。

建昌军，在州西北一百九十里。

删丹县,中下。西至州一百二十里。本汉旧县,属张掖郡。按焉支山,一名删丹山,故以名县。山在县南五十里,东西一百余里,南北二十里,水草茂美,与祁连山同。匈奴失祁连、焉支二山,乃歌曰:“亡我祁连山,使我六畜不繁息。失我焉支山,使我妇女无颜色。”

弱水,在县南山下。

大斗(枝)[拔]谷,在县南二百里。隋大业五年,炀帝躬率将士出讨吐谷军,还此谷,会大霖雨,士卒冻馁死者十六七。

宁寇军,在居延水两汉中,天宝二年置。

肃州,酒泉。下。开元户二千二百五十三。乡八。

《禹贡》雍州之域。古西戎地也。六国时,月氏居焉,后为匈奴所逐,奔逃西徙。匈奴得其地,使休屠,昆邪王分守之。武帝元狩二年,昆邪王杀休屠王,并将其众来降,以其地为武威、酒泉郡,以隔绝胡与羌通之路。以城下有泉,其味若酒,故名酒泉。初属张轨,后凉吕光复据有其地。后魏道武帝天兴三年,晋昌太守唐瑶移檄六郡,推武昭王为主,为大都督、凉公,领秦、凉二州牧,自敦煌迁都于此,号西凉王。后沮渠蒙逊复据有其地。后魏太武帝平沮渠氏,以酒泉为军,属敦煌镇。明帝孝昌中,改镇立瓜州,复置酒泉郡。隋开皇三年罢郡,立酒泉镇,所领县并属甘州。仁寿二年,以境宇辽远,分甘州置肃州。隋末陷于寇贼,武德元年河右底定,复于酒泉县置肃州。大历元年陷于西蕃。

州境:东西五百六十四里。南北四百三十五里。

八到:东南至上都二千九百里。东南至东都三千七百六十里。东至甘州四百里。南至吐蕃雪岭二千五里。西北至葭芦泉五百里。

贡、赋:开元贡:野马皮,砺石,肉苁蓉,柏脉根。

管县三:酒泉,福祿,玉门。

酒泉县,中。郭下。本汉福祿县也,属酒泉郡,自汉至隋不改。义宁元年,分置酒泉县。初,西凉武昭王自敦煌迁都于此,至子歆为沮渠蒙逊所破。

昆仑山,在县西南八十里。周穆王见西王母,乐而忘归,即此山。

洞庭山,在县西七十里。四百悬绝,人不能上,遥望焰焰如铸铜色。

山中出金。

白亭海，在县东北一百四十里。一名会水，以众水所会，故曰会水。以北有白亭，故曰白亭海。方俗之间，河北得水便名为河，塞外有水便名为海。

遮虏障，在县北二百四十里。李陵与单于战处。隋镇将杨玄于其地得铜弩牙箭镞。

西凉武昭王陵，在县西十五里。

福祿县，中下。西至州一百里。本汉乐涓县，属酒泉郡。后魏太武帝平沮渠茂虔，改县为戍，隶敦煌镇。孝文帝改为乐涓县，隋改县为镇。武德二年置福祿县，取旧名也。

崆峒山，在县东南六十里。黄帝西见广成子于崆峒，汉武帝行幸雍，祠五畹，遂登崆峒，并为此山也。

祁连戍，在县东南一百二十里。

盐池，在县东北八十里，周回百姓仰给焉。

玉门县，中下。东至州二百二十里。本汉旧县，属酒泉郡。汉罢玉门关屯戍，徙其人于此，因以名县。后魏孝明帝改为玉门郡，周武帝省入会川县，隋开皇十年复改为玉门县。皇朝因之。

金山，在县东六十里。出金。

独登山，在县北十里。其山出盐，鲜白甘美，有异常盐，取充贡献。

石脂水，在县东南一百八十里。泉有苔如肥肉，燃之极明。水上有黑脂，人以草盥取用，涂鸱夷酒囊及膏车。周武帝宣政中，突厥围酒泉，取此脂燃火，焚其攻具，得水逾明，酒泉赖以获济。

玉门军，开元中玉门县为吐蕃所陷，因于县城置玉门军。天宝十四年，哥舒翰奏废军，重置县。

沙州，燉煌。中府。开元户六千四百六十六。乡十三。

《禹贡》雍州之域。古戎地也，《左传》所谓“充姓之戎，居于瓜州”，注云“在今敦煌”，是也。汉武帝元鼎六年，分酒泉置敦煌郡，今州即其地也。前凉张骏于此置沙州，盖因鸣沙山为名。流沙即居延泽也。以西胡校杨宣为刺史，后三年宣让州，复改为敦煌郡。凉武昭王初都于此，后又迁

于酒泉。后魏太武帝于郡置敦煌镇，明帝罢镇立瓜州，以地为名也，寻又改为义州，庄帝又改为瓜州。隋大业三年，又罢州为敦煌郡。隋末丧乱，陷于寇贼，武德二年西土平定，置瓜州，五年改为沙州，建中二年陷于西蕃。皇朝以敦煌为燉煌。

州境：

八到：东南至上都三千七百里。东南至东都四千五百六十里。东至瓜州三百里。西至石城镇一千五百里。西至吐蕃界三百里。北至伊州七百里。

贡、赋：开元贡：野马皮，石膏，棋子石，特羊角。

管县二：燉煌，寿昌。

燉煌县，上。郭下。本汉旧县，属敦煌郡。周武帝改为鸣沙县，以界有鸣沙山，因以为名。隋大业二年，复为敦煌。敦，大也。以其开广西域，故以盛名。

三危山，在县南三十里。山有三峰，故曰三危。《尚书》“甯三苗于三危”，即此山也。

鸣沙山，一名神沙山，在县南七里。今按其山积沙为之，峰峦危峭，逾于山石。四面皆为沙垆，背有如刀刃，人登之即鸣，隋足颓落，经宿风吹，辄复如旧。有一泉水，名曰沙井，绵历古今，沙填不满，水极甘美。

悬泉水，在县东一百三十里。出龙勒山腹，汉将李广利伐大宛还，士众渴乏，引佩刀刺山，飞泉涌出，即此也。水有灵，车马大至即出多，小至即出少。

盐池，在县东四十七里。池中盐常自生，百姓仰给焉。

寿昌县，中下。东至州一百五里。本汉龙勒县，因山为名，属敦煌郡。周武帝省入鸣沙县。隋大业十一年，于城内置龙勒府，武德二年改置寿昌，因县南寿昌泽为名也。

龙勒水，在县南一百八十里龙勒山上。李陵发兵至遮虏障东浚稽山南龙勒水上，徘徊观虏，所见即此水。

阳关，在县西六里。以居玉门关之南，故曰阳关。本汉置也，谓之南

道,西趣鄯善、莎车。后魏当于此置阳关县,周废。

玉门故关,在县西北一百一十七里。谓之北道,西趣车师前庭及疏勒。此西域之门户也,班超在西域上疏曰:“臣幸得护西域,如自以寿终屯部,诚无所恨,恐后代谓臣没西域,臣能无依风首丘之思哉!臣不敢望酒泉郡,但愿生入玉门关。”即此是也。

豆卢军,神龙元年置,在州城内。

瓜州,晋昌。下府。

本汉酒泉郡,元鼎六年分酒泉置敦煌郡,今州即酒泉、敦煌二郡之地。晋惠帝又分二郡置晋昌郡,周武帝改为永兴郡。隋开皇三年罢郡,置瓜州。按隋瓜州,即今沙州也。大业三年改瓜州为敦煌郡,武德五年改瓜州,别于晋昌置瓜州。地出美瓜,故取名焉。狐食其瓜,不见首尾。大历十一年陷于西蕃。

州境:东西三百九十三里。南北六百八十四里。

八到:东南至上都三千四百里。东南至东都四千二百六十里。东南至肃州四百八十里。西至沙州三百里。南至大雪山二百四十里。

贡、赋:开元贡:草鼓子,吉莫皮。

管县二:晋昌,常乐。

晋昌县,中下。郭下。本汉冥安县,属敦煌郡,因县界冥水为名也。晋元康中改属晋昌郡,周武帝省入凉兴郡。隋开皇四年改为常乐县,属瓜州,武德七年为晋昌县。

雪山,在县南一百六十里。积雪复不消。东南九十里,南连吐谷浑界。

冥水,自吐谷浑界流入大泽,东西二百六十里,南北六十里。丰水草,宜畜牧。

玉门关,在县东二十步。

合河戍,在县东北八十里,在州西二百步。盖神龙元年置也。

常乐县,中下。东至州一百一十五里。本汉广至县地,属敦煌郡。魏分广至置宜禾县,后魏明帝改置常乐郡。隋于此置常乐镇,武德五年置常乐县也。

《通典》(唐)杜祐

安定郡(东至彭原郡一百七十里。南至扶风郡二百六十里。西至平凉郡百八十五里。北至安化郡三百二十里。东南到新平郡一百九十里。西南到涇阳郡百六十里。西北到平凉郡二百八十五里。东北到彭原郡百八十里。去西京四百八十七里,去东京一千三百八十里。户三万五百五十五,口十七万五千五百六十)。

涇州(今理安定县)。春秋秦地。始皇时属北地郡。武帝分置安定郡。后汉徙其人以避羌寇,郡寄在美阳。(今京兆府武功县界美阳故城是也,顺帝移于此)。魏晋亦为安定郡。后魏太武帝置涇州,盖以涇水为名。隋为安定郡。大唐为涇州,或为安定郡。领县五:

安定(汉旧县,又汉三水县。有左右谷故城,在今县南。又有汉乌氏故城在东)。

阴盘(汉旧县。后魏兼置平凉郡。天宝初改为潘原)。

监涇(汉旧县。有后魏故朝那城)。

良原(汉三水县之地。隋置今县)。

灵台(后魏置鹑觚县。天宝中改此)。

彭原郡(东至中部郡二百二十五里。南至新平郡百四十二里。西至安定郡百七十里。北至安化郡百二十七里。东南到上都三百三十里。西南到安定郡百八十里。西北到安定郡临涇县二百三十里。东北到洛交郡直罗县三百八十里。去西京四百五十里,去东京一千三百二十里。户三万六千六百二十八,口二十万六千三百九十)。

宁州(今理定安县)。夏之季公刘之邑。春秋时戎地。(即义渠戎国)。战国时属秦,始皇初为北地郡。汉为北地、上二郡地。后汉属北地、安定二郡地。(魏晋未详。按晋史云,自愍帝时,其地没于刘聪。郡县之名,不

得知也。他皆类此)。后魏献文帝置华州，孝文改为班州，后改为邠州，又改为豳州。西魏改为宁州，立嘉名也。后周分置赵兴郡。隋炀帝初，改宁州为豳州；寻废豳州，改赵兴郡为北地郡。大唐复置宁州，或为彭原郡。

领县六：

定安(汉泥阳县地。有洛水，一名马岭川)。

罗川(汉阳周县，今县城是。后魏为显州，隋改为罗川。天宝初改为真宁。有桥山，黄帝葬处)。

彭原(汉曰彭阳县，亦后汉富平县地。西魏置蔚州，后置云州。隋改曰彭原县。隋天固堡在县南，极峻绝)。

襄乐(汉襄洛县地。后魏改“洛”为“乐”，即今县西城)。

定平(汉泥阳县)。

丰义(武德二年置。本汉彭阳县也)。

安化郡(东至洛交郡三百九十里。南至彭原郡五百三十里。西至平凉郡三百七十里。北至五原郡五百五十里。东南到洛交郡三百九十里。西南到安定郡三百二十里。西北到灵武郡六百四十里。东北到延安郡四百五十里。去西京五百六十里，去东京一千四百里。户二万四千三百九十，口一十万七千四百六十)。

庆州(今理安化县)。周之先不窋所居。春秋时义渠戎之地。秦灭之，始皇以属北地郡。二汉因之。西魏置朔州。后周废。隋文帝置庆州，炀帝初置弘化郡。大唐复为庆州，或为安化郡。领县十：

安化(汉郁郅县地，今名尉李城，在白马两川交口，亦曰不窋城)。

乐蟠(汉略畔道地。有夷曰道。故城在今县北)。

合水

马岭(汉旧牧地，川形似马领也。汉灵州县故城在岭北。有山在西北)。

方渠(汉旧县)。

同川(武德年置)。

洛源(汉归德县地，后汉岑彭所封也。隋置。洛水所出)。

延庆

华池(西魏属蔚州)。

怀安(隋柳谷城。武德六年置县)。

平凉郡 (东至安定郡二百八十里。南至天水郡五百里。西至会宁郡四百里。北至灵武郡五百六十里。东南到安定郡三百八十里。西南到天水郡四百七十里。西北到灵武郡五百六十里。东北到安化郡四百四十里。去西京八百一十里,去东京一千六百四十里。户七千五百八十,口三万九千一百二十三)。

原州(今理平高县)。春秋时属秦,始皇属北地郡。汉属安定郡,后汉因之。晋属新平郡。后魏太武帝置高平镇,后为太平郡兼置原州,后置总管府。隋初郡废,而原州如故;炀帝初州废,置平凉郡。大唐为原州,或为平凉郡。领县五:

平高(汉高平县。有笄头山,语讹亦曰汧屯山,泾水所出,一名崆峒山。隗嚣使将王孟塞鸡头道,即此也。又有逢义山。有木峡关)。

平凉(汉朝那县地。有可蓝山。汉泾阳县故城今县南)。

萧关(汉朝那县地,古萧关也。汉文时,匈奴入关,即此也。瓦亭关,隗嚣使将牛邯守处)。

百泉(汉朝那县地。后魏置今县。有弹箏峡,在郡东南)。

他楼(汉高平县地。贞观六年置今县)。

天水郡 (东至汧阳郡三百里。南至同谷郡四百三十里。西至陇西郡三百里。北至平凉郡五百里。东南到河池郡五百三十里。西南到同谷郡三百里。西北到会宁郡五百一十里。东北到平凉郡四百七十五里。去西京八百里,去东京一千六百里。户二万五千六百五,口十一万三千二百九十五)。

秦州(今理上邽县)。古西戎之地,秦国始封之邑,(周孝王封为附庸)。今郡有秦亭、秦谷是也。(周平王东迁,秦襄公救周有功,始赐郊鄠之地,列为诸侯也。鄠音岐)。春秋时属秦,秦平天下,是为陇西郡。汉武分陇西置天水郡。王莽末,隗嚣据其地。(初据平襄,后保冀县)。后汉建

武中,平之,更名天水,为汉阳郡。郡有大坂,名曰陇坻,亦曰陇山。(三秦记曰:“其坂九回,上者七日乃越。上有清水四注下。”俗歌曰:“陇头流水,鸣声幽咽。遥见秦川,肝肠断绝。”坻,都礼反)。兼置凉州。(领郡十,理于此)。魏亦为重镇。(明帝蒙,蜀将诸葛亮至南安、汉阳,皆应亮)。晋分为天水及略阳二郡,兼置秦州。(领郡六,理于此)。后魏为略阳郡。隋初郡废,炀帝初,复置天水郡。大唐为秦州,或为天水郡。领县五:

上邽(有朱圉山,俗名曰白岩山。汉旧县。古邽戎邑。又有汉西城县城,一名始昌,在今县西南。嶓冢山,西汉水所出,今经嘉陵曰嘉陵江,经阆中曰阆中江。又有段谷泉,蜀将姜维为魏将邓艾破于此。籍水一名洋水,今名峰水)。

成纪(汉旧县。古帝庖牺生于此。又有汉明亲县故城,在今县东南)。

陇城(汉略阳道故城在今县西北,河阳县故城亦在县西北。瓦亭山在今县东北二百余里,隗嚣将牛邯守处,其山亦入今平凉郡界。有街泉亭,蜀将马谡为魏将张郃所败处。有大陇山,亦曰陇首山。谡,所六反)。

清水(秦仲始所封地。小陇山,汉置县)。

伏羌(本冀戎地。秦汉冀县。又有汉平襄县故城,在今县南。又有落门谷水,在今县西。武德三年置今县)。

陇西郡(东至天水郡三百里。南至同谷郡四百三十六里。西至和政郡三百里。北至金城郡四百里。东南到天水郡三百四十五里。西南到和政郡二百五十四里。西北到金城郡四百五里。东北到天水郡三百九十六里。去西京千一百五十三里,去东京二千一十三里。户六千一百三十五,口三万三千一百七)。

渭州(今理襄武县)。《禹贡》曰“导渭自鸟鼠同穴”,即其地也。(鸟鼠同穴山在今渭源县,渭水所出也。今谓之青雀山)。春秋为羌戎之居。秦置陇西郡,以居陇坻之西为名。二汉因之,灵帝分立南安郡。魏置镇守在此。(邓艾曰“蜀师来而为一,我分为四”,谓狄道、陇西、南安、祈山四处。齐王嘉平五年,蜀将姜维围南安、襄武,皆不克)。晋为南安、陇西二郡地。后魏为陇西郡,兼置渭州。后周为南安郡。隋初废,炀帝初,复置陇西

郡。大唐为渭州，或为陇西郡。领县四：

襄武(汉旧县。有五谿聚)。

陇西(汉獠道地，立南安郡于此。后周置南安郡。隋废郡，改为县。东南有落门水出焉。獠音原)。

渭源(汉首阳县。后魏改之。有鸟鼠山，渭水所出)。

鄯(后汉置。兼有武阳水)。

金城郡 (东至会宁郡四百二十里。南至陇西郡四百里。西至西平郡四百九十里。北至武威郡五百七十里。东南到陇西郡四百五里。西南到安乡郡三百里。西北到武威郡五百四十里。东北到会宁郡四百二十里。去西京一千四百四十五里，去东京二千二百九十五里。户四千四百八十九，口二万一千三百八十六)。

兰州(今理五泉县)。古西羌地。秦属陇西郡。汉属金城、陇西二郡地。后汉、魏、晋因之，魏以为重镇。(蜀将姜维攻狄道，不克)。前凉张寔置广武郡，张骏又分置武始郡，西秦乞伏国仁都苑川，南凉秃发乌孤都广武，皆此地也。(苑川在今五泉县。至乞伏慕末，为赫连定所灭。广武即今广武县。至秃发褥檀，为乞伏炽盘所灭也)。后魏、后周并属武始郡。隋初郡废，置兰州；(盖取兰皋山为名)。炀帝初州废，置金城郡。大唐因之。领县三：

五泉(汉金城县地。汉榆中县故城在今县东。后汉时羌乱，隗嚣相曹凤上言：“西羌为寇，自建武以来，以居大、小榆谷，土地肥美，又近塞内，北阻大河，因以为固，缘山滨水，以广田畜，故能强大，常雄诸种。”又有故苑川城及故长城。隗音俞)。

狄道(秦、汉、魏旧县。有白石山)。

广武(前凉置广武郡，隋罢之为县。有琵琶山。汉浩亶县故城亦在西南。浩音合。亶音门。今俗呼此水为合门河，盖疾言耳。又有汉允吾县故城，亦在西南。允音沿)。

会宁郡 (东至平凉郡四百里。南至金城郡四百二十里。西至武威郡六百里。北至灵武郡六百里。东南到平凉郡四百里。西南到金城郡四百

二十里。西北到武威郡六百五十里。东北到灵武郡六百里。去西京一千三百七十里，去东京二千二百七十里。户四千四百二十八，口二万五千七百五十一。

会州(今理会宁县)。古西羌地。秦属陇西郡。汉属金城、安定二郡地。后汉属金城、武威二郡。西魏置会州，后周废。隋属平凉郡。大唐平李轨后，置会州，或为会宁郡。领县二：

会宁(汉枝阳县)。

乌兰(汉祖厉县地。后周置乌兰关。武德末置县)。

安乡郡(东至金城郡三百里。南至临洮郡三百一十七里。西至宁塞郡三百九十里。北至西平郡三百里。东南到金城郡狄道县一百四十八里。西南到临洮郡三百一十七里。西北到西平郡龙支县一百八十六里。东北到金城郡三百里。去西京一千四百七十五里，去东京二千二百七十五里。户五千七百九十二，口三万一千三百)。

河州(今理枹罕县)。古西羌地。秦属陇西郡。汉属金城、陇西二郡。后汉属陇西郡。汉末宋建据焉，称河首平汉王。晋惠帝时，属晋兴郡。前秦苻坚置河州，西秦乞伏乾归又据于此。后魏亦为河州。后周置枹罕郡。隋初郡废，置河州；炀帝初州废，复置枹罕郡。大唐为河州，或为安乡郡。领县三：

枹罕(故羌侯邑。汉为枹罕县也。枹音浮，本枹鼓字)。

大夏(汉旧县)。

凤林(有凤林关)。

临洮郡(东至和政郡一百七十六里。南至合川郡一百七十九里。西至野，更无郡县。北至安乡郡三百一十七里。东南到合川郡一百八十里。西南到吐谷浑界。西北到千旭戍界一百八十里。东北到安乡郡三百一十七里。去西京一千五百六里，去东京二千三百九十六里。户二千七百七十六，口一万四千九百二十四)。

洮州(今理临潭县)。秦汉以来为诸戎之地，后为吐谷浑所据。至后周武帝，逐吐谷浑，得其地，置洮阳郡，寻立为洮州。隋初郡废，而洮州如

故；炆帝初废，置临洮郡。（郡城本名洮阳，城临洮水，甚牢险）。大唐为洮州，或为临洮郡。领县一：

临潭（有洮水，源出西倾山，在郡西南吐谷浑界，桓水所出）。

和政郡（东至陇西郡三百里。南至怀道郡二百五十里。西至临洮郡一百七十六里。北至金城郡狄道县五百三十四里。东南到怀道郡良恭县一百一十三里。西南到临洮郡临潭县一百七十六里。西北到安乡郡大夏县三百六十三里。东北到陇西郡三百五十四里。去西京一千三百七十八里，去东京二千二百二十里。户四千五百一十，口二万六千六百一十四）。

岷州（今理溢乐县）。春秋及七国时并属秦，蒙恬筑长城之所起也。（属陇西郡，长城在今郡西二十里。崆峒山，自山傍洮而东，即秦之临洮境在此矣）。秦、二汉及晋并属陇西郡。西魏置岷州及同和郡。隋初郡废，炆帝初州废，并其地入临洮郡。大唐复置岷州，或为和政郡。领县三：

溢乐（有岷山、崆峒山）。

祐川。

和政（后汉索西故城在今县东，亦名临洮东城，亦谓之赤城。后汉明帝时，金城、陇西羌反於临洮，道险，车骑不得方驾，车骑将军马防设奇兵破之，因筑此城也）。

武威郡（东至会宁郡六百里。南至西平郡浩亶河二百六十里。西至张掖郡五百里。北至突厥界安盖泉五百八十里。东南到金城郡五百四十里。西南到张掖郡张掖县界陈北烽三百七十里。西北到张掖郡六百里。东北到会宁郡乌兰县界白鹿烽三百五十里。去西京二千一十里，去东京二千八百七十里。户二万五千六百九十三，口一十二万八千一百九十二）。

凉州（今理姑臧县）。周时为狄地。秦兴，匈奴既失甘泉，（甘泉在今云阳县）。又使休屠、浑邪王居其地。（此河西五郡皆是，不止于武威也。休音许虬反。屠音除）。汉武帝开之，置武威郡。（汉武初开置张掖、酒泉、敦煌、武威、金城，谓之河西五郡，地势西北邪出，南隔西羌，通西域，于时号为断匈奴右臂）。后汉、魏、晋皆因之，魏、晋并置凉州。（领郡八，理

于此)。前凉张轨、后凉吕光并据之。(至张天锡,为苻坚所灭。至吕崇玮,为姚兴所灭)。北凉沮渠蒙逊亦迁都于此。(至沮渠茂虔,为后魏所灭)。后魏亦为武威郡。隋炀帝初,复置。大唐初,李轨改焉,据之。及克平,置凉州,或为武威郡。领县五:

姑臧(汉旧县。《西河旧事》曰:“昔匈奴故盖藏城也。后人音讹名姑臧。”又有汉鹑阴县故城,在今县东南,因水为名。有猪野泽、古休屠城)。

神乌(汉鸾乌县)。

番禾(汉旧县。后魏增置张掖郡。天宝中改为天宝)。

昌松(汉苍松县。吕光改为昌松。汉允衙县故城在今县东南,城临丽水,一名丽水城。允音沿。衙亭故城,沮渠蒙逊所筑,地势险隘)。

嘉麟。

张掖郡(东至武威郡五百里。南至雪山以南吐谷浑分界二百三十里。西至酒泉县四百二十里。北傍张掖河,屈曲过同城镇,至峡口烽,总三千七十八里。东南到武威郡六百里。西南到酒泉郡福禄县界赤柳涧三百三十里。西北到酒泉郡福禄县咸池烽东张掖河三百五里。东北到武威郡番禾县石碛烽三百七十里。去西京二千五百一十里,去东京三千三百一十里。户六千六百三十九,口二万三千三百四)。

甘州(今理张掖县)。《禹贡》曰:“导弱水,至于合黎,余波入于流沙”,即此地也。(合黎水、弱水并在张掖县界。其北又有居延泽,即古流沙地)。又黑水之所出焉。(黑水出张掖县鸡山)。春秋及秦并为狄地。汉初为匈奴所居,武帝开之,置张掖郡。后汉、魏、晋并同。沮渠蒙逊始都于此。(号为北凉)。西魏置西凉州,寻改为甘州。(因州东甘峻山为名)。后周置张掖郡。隋初废,炀帝初复置。大唐为甘州,或为张掖郡。领县二:

张掖(隋旧县。汉表是县故城在今县西北,又曰昭武县。汉张掖郡城亦在西北。又有汉居延县城,今在县东北,即本匈奴中地名也,亦曰居延塞。祁连山,居延海,弱水,合黎水。遮虏障,汉将路博德之所筑也。又有甘峻山。临松山,后魏临松郡在此。吐蕃赞府,即其郡丞)。

删丹(汉旧县。有焉支山。匈奴初失祁连、焉支二山,乃歌曰:“夺我

祁连山,使我六畜不繁息。失我焉支山,使我妇女无颜色。”又汉日勒县故城在东南)。

酒泉郡 (东至张掖郡四百二十里。南至吐蕃界二百里。西至晋昌郡五百二十六里。北至回纥界伏谷泉三百里。东南到张掖郡界赤柳涧二百里。西南到晋昌郡界安乐烽三百四十里。西北到晋昌郡三百四十里。东北到张掖郡咸池烽二百三十里。去西京二千九百六十八里,去东京三千七百八十里。户二千一百六,口七千九百一十二)。

肃州(今理酒泉县)。旧月支地,后匈奴居焉。汉武开之,置酒泉郡。(城下有泉,其味如酒)。后汉、魏、晋皆因之。西凉武昭王迁都于此。(至李歆,为沮渠蒙逊所灭)。后魏亦为酒泉郡。隋初废,置肃州;炀帝初州废,以其地入张掖郡。大唐复置肃州,或为酒泉郡。领县三:

酒泉(汉福祿县地。古长城,汉遮虏障也。今县隋置。有九龙山。昆仑山在县西南,体如昆仑,故名之,周穆王见王母于此山。汉平帝时,金城塞外羌献鱼盐之地,遂得西王母石室,以为西海郡,后为吐谷浑之国也。隋破吐谷浑,又于其地置西海郡。按汉旧尝置郡,今郡直北一千二百里也)。

福祿(崆峒山。旧乐涓县,武德二年改之。涓音官)。

玉门(汉旧县)。

晋昌郡 (东至酒泉郡五百二十六里。南至新乡镇一百八十里。西至敦煌郡二百八十里。北至豹门守捉四百五十里。东南到酒泉郡界三百四十里。西南到敦煌郡界一百六十里。西北到伊吾郡界五百里。东北到酒泉郡界三百四十里。去西京三千三百八十四里,去东京四千三百六里。户一千一百六十七,口三千八百六十四)。

瓜州(今理晋昌县)。古西戎地。战国时,为月支所居。秦末汉初,属匈奴,武帝以后为敦煌郡地。后汉、魏、晋皆因之。后魏属常乐、会稽二郡。后周属会稽郡。(苻坚徙江汉之人万余户于敦煌,中州人有田畴不辟者亦徙七千余户。凉武昭王遂以南人置会稽郡,以中州人置广夏郡。后周因旧名置晋昌郡。)隋废之,以属敦煌郡。大唐置瓜州,(古瓜州,说在

《敦煌郡》)。或为晋昌郡。领县二：

晋昌(汉冥安县地。武德四年改置。今县北有伊吾故城、白水。有昆仑障,汉宜禾所居,故城在县界。后魏明帝正光中置会稽郡即于此)。

常乐(汉广至县地,故城在东。武德五年置)。

敦煌郡(东至晋昌郡二百八十里。南至故南口烽二百五十里,烽以南吐谷浑界。西至寿昌废县中界五十里,以破石亭为界。北至故咸泉戍三百三十六里,与伊吾郡分界。东南到晋昌郡界三百五十里。西南到郡废寿昌县界三百九十里。西北到河苍烽二百四十二里,与废寿昌县分界。东北到伊吾郡界三百八十六里。去西京三千七百五十九里,去东京四千六百九里。户六千三百九十五,口三万二千二百三十四)。

沙州(今理敦煌县)。昔舜流三苗于三危,即其地也。其后子孙为羌戎,代有其地。古谓之瓜州,(其地多生美瓜,故曰瓜州。至今犹出大瓜,长者,狐入其中,首尾不出)。《左传》所说“允姓之戎,居于瓜州”是也。(戎子名驹支也)。亦古流沙地。(其沙风吹流行,在郡西八十里)。又黑水之所经焉。(黑水自北而南,经三危,过梁州,入南海)。秦及汉初,为月支、匈奴之境。武帝开其地,后分酒泉置敦煌郡。(敦,大。煌,盛也)。后汉、魏、晋皆因之。凉武昭王始都于此。后魏、后周并为敦煌郡。隋初废,置瓜州;炀帝初废州,复置敦煌郡。大唐为沙州,或为敦煌郡。领县二：

敦煌(汉旧县。三危山在东南,山有三峰。有鸣沙山,渥洼水。汉武帝元鼎中,南阳新野人暴利长遭刑,屯田于此水边,见群野马来饮,中有奇者。先作土人持勒鞞立,后马玩习。久之,利长因代土人,收得马以献帝。欲神异之,云从水中出,于是作天马之歌也)。

寿昌(汉龙勒县地。阳关居玉门关之南。玉门故关,汉置也。二关之西三百余里,有蒲昌海,一名盐泽,广袤三四百里,则葱岭于阗两河之所注)。

《太平寰宇记》(宋)乐史

泾州

泾州,安定郡。今理保定县。禹贡雍州之域。春秋属秦,至秦始皇并天下,属北地郡。汉武帝又分北地郡,置安定郡,故《汉书》:“云以六郡良家子补羽林郎。”安定即六郡之一焉。《宋永初山川记》云:“安定;昆戎壤也。”其郡在今原州高平县。后汉永初五年徙其人于美阳以避羌寇,郡寄理美阳,即今雍州武功界美阳故城是也。永建四年移于今所,按《晋太康地记》云:“安定郡领临泾、朝那、乌氏、鹑觚、阴密、西川六县,属雍州。”魏、晋亦为安定郡,及魏神鼎三年于此置泾州,盖因泾水为其名。隋大业三年改为安定郡。大业末,金城贼帅薛举侵扰豳、泾,唐武德元年太宗西讨,会举死,因平举子仁果,遂改安定郡为泾州。天宝元年改为安定郡。乾元元年复为泾州。皇朝为彰化军节度。

元领县五。今三:保定、灵台、良原。

二县割出:潘原,唐末割置行渭州。临泾。唐末割置行原州。

州境:东西七十里。南北一百三十五里。

四至八到:东南至东京一千七百里。东南至西京一千二百五十里。东南至长安四百五十里。东至凤翔府麟游县长武镇界四十里。西至渭州潘原县界三十里。南至凤翔府普润县界一百里。西北至原州临泾县界三十里。西南至陇州汧阳县界九十里^①。东北至宁州丰义县界四十里。

户:唐开元户一万五千九百五十三。皇朝管户主一万二千一百七十一^②,客五千二百九十八^③。

注:①九:万本、《库》本皆作“七”。②管:底本无,据万本、《库》本及傅校补。七十一:中大本作七十,无一字。③客五千二百九十七:中大本

同,万本、《库》本九十八皆作九,无十八二字。

风俗:水土杂于河西,人烟接于此地,故安定处山谷之间,其实昆戎旧壤,迫近春秋,修习武备,士则高尚气略,人以骑射为先,盖与邠、陇之俗同尔。

姓氏:安定郡四姓:梁、席、安、皇甫。

人物:梁统,安定乌氏人。为酒泉太守。梁竦,统子,字叔敬。李恂,安定临泾人。为兖州刺史。张耽,安定人,好学。程卓,孝友著名。皇甫谧,字士安,安定人。

土产:龙须席,羊,马,驼毛,红花,麻,布,黄耆,毡,麝香,秦胶。

保定县。旧三乡,今十一乡。本汉安定县也,后汉省。后魏文帝大统元年自高平城移于今理,属安定郡。隋开皇三年罢郡,以县属泾州。唐至德二年改为保定县。

笋头山。一名崆峒山。昔皇帝学道于广城子,即此。

弹箏峡。自原州百泉县界都卢山泾水所出,南流山谷之间,水声清响有如弹箏。

振履堆。故老云:“夸父追日,振履于此阜上。”胡卢河,本名蔚茹水,源出原州西南颍沙山下,入泾。乌亭。《史记》云:“秦惠王取其地,置乌氏县^①。”属安定郡,莽曰乌亭。有乌水出西,北入河。都卢山在其西。今亭即汉为县所也,瓦亭。《续汉志》云:“乌氏县有瓦亭^②。”名薄落亭。三水故城。《汉书》《地理志》三水县属安定郡,有监官。后汉末,卢芳据三水县,在左谷间。魏攻三水。即此也。《晋太康地志》云:“西川,属安定郡。”西王母祠。《周地图记》云:“王母乘五色云降于汉武,其后帝巡郡国,望彩云以祠之,而云浮五色,屡见于此。因立祠焉。每水旱,百姓祷祈,时有验焉。”左右谷城,在今县南。乌氏故城,即乌亭也,废城在今县东焉。泾川水,在县南十里。从潘原来,入邠州宜禄。阁川水,在县西南三里。从潘原县来,入泾水。

注:①史记云秦惠王取其地置乌氏县:按《史记》卷一一〇《匈奴列传》《正义》引《括地志》云乌故城,周之故地,后入戎,秦惠王取之,置乌氏

县也。则出于《括地志》，非《史记》，此云《史记》误。^② 乌氏县：按《续汉书》《郡国志》五作乌枝，即乌氏。

灵台县。南一百里。元七乡。按《梁氏志》，即汉鹑觚县地，属北地郡。后魏大统中自鹑觚故城移今所。《周地图记》云：“鹑觚县属平凉郡。唐天宝元年八月改为灵台县理，即古密国之地。”蒲川，酈道元注《水经》云：“蒲水出南山蒲谷，东北合细川水，又东北流合且氏川水焉。”阴密城。诗曰：“密人不恭。”《春秋》《左传》昭公十五年：“晋荀跖如周，葬穆后。王曰：‘叔父唐叔，成王之母弟也。密须之鼓，与其大路，文所以大蒐也。’”杜预云：“密须，姑姓国也，在安定阴密县。”《史记》：“周共王游于泾上，密康公从，有三女奔之。其母曰：‘必致之于王。夫兽三为群，人三为众，女三为粦。王田不取群，公行不下众，王御不参一族。夫粦，美之物也，众以美物归汝，而何德以堪之？王犹不堪，况尔小丑乎！小丑备物，终必亡。’康公不献，一年，共王灭密。”即此城也。三交川水，在县东南十五里，亦名三香水，源从麟游县。卧龙原，在县东十里。左丘明庙，在县东北三十里。牛仙客祖父墓，在县西一里。蒲川水西石关前有碑存。祖赠泾州刺史，父赠户部尚书。

良原县。西南六十里。旧三乡，今七乡。本汉三水县地，属安定郡。隋大业元年分安定、鹑觚二县之地置县，县西南三十里有良原，因以为名。白石原，其原自起自县西南三十里，东下三十里分为两原：一在南三十里，更名良原，一在东北四十里^①，更名梁杜原。《汉书》《地理志》属安定郡。朝那城，后魏大统元年自原州百泉县朝那城徙朝那县于此，其地今割入临泾县界。

注：①一在南三十里更名良原一在东北四十里：前一在，底本脱，《库》本同；后在，底本作原，《库》本同。并据万本及《嘉庆重修一统志》泾州引本书补改。

望儿原，在县东三十里。

原州，平凉郡。今理临泾县。《禹贡》雍州之域。春秋时其地属秦，至始皇时属北地郡。汉之安定高平县地，至安帝永初五年，避羌寇移郡寄

理于今武功县美阳故城，顺帝时复还理高平。自移郡入户稍小，至曹魏废。后魏太延二年于今理置高平镇。至孝明帝正光五年改为原州，盖取高平曰原为名。隋大业三年罢州，为平原郡，后陷寇中。唐武德元年平薛仁杲，复其地为原州。贞观五年置都督府，管原、庆、会、宁、亭、达、要等七州；十年省亭、达、要三州，唯督四州。天宝元年改为平凉郡。乾元元年复为原州。自禄山乱后，西戎犯边，洮、兰、秦、陇尽为敌境。贞元七年，泾原节度使刘昌置于平凉县。至元和三年移于泾州临泾县，置行原州，遂命镇将郝玼为刺史。始玼以临泾地宜蓄息，西番每为寇，即屯其地，尝白于其帅，请城以控之，前帅不从。其后段佑为节度使，玼复白佑。佑多其策，以乃表请城之，故诏玼镇其地，自是西戎无敢犯泾者。玼出自行间，前无强敌。在边三十年，生得蕃人辄剝剔而归其尸，蕃人畏之如神，下令得玼者，赏以等身金。蕃人小儿啼号者，但连呼郝玼以怖之。大中三年，本道节度康季荣收复关、陇，却归旧原州。唐末，黄巢作乱，复陷城壁，再移原州于临泾县置。

元领县四。今一：临泾。唐末自泾州置原州。三县落番：平高，百泉，平凉。一县割出：萧关。

州境：东西五十五里。南北九十五里。

新四至八到：东南至东京一千七百九十里。东南至西京九百四十里。东南至长安五百四十里。东至宁州彭阳县五十五里^①。西至当州开边堡三十里，壕外番界。南至渭州潘原县九十里。北至邠州宁羗县九十里，东南至泾州保定县界四十里。西南至当州新城镇西菴堡蕃界七十里。北至宁羗县四十五里。东至彭阳县界三十四里。

户：唐开元户八千七十五。皇朝领县一，管户主三千四百三十六^②，客三千五百四十九。

风俗：地广人稀，质木，不寇盗。

人物：皇甫规，安定朝那人。为度辽将军。皇甫嵩，字义真，朝那人。少有文武志，好《诗》《书》，平黄巾贼，封槐里侯。

土产：覆鞍毡，贡白毡，黄蓍，白药。赋：麻，布。

注：①东至宁州彭阳县五十五里：五十五，《库》本同，万本作五十九。②管户主三千四百三十六：管，底本无，据万本、中大本、《库》本及傅校补。

临泾县。旧十乡，今四乡。汉旧县，属安定郡。隋大业元年于今县理置湫谷县，十二年复为临泾县。唐贞元十一年，泾原帅刘昌奏自临泾县定城堡移于今所。元和三年改为行原县。今复旧名。

阳晋水。在县南一十五里。自罗使堡番界来，入本州八十里，入泾州保定县界。原州川水，自番界来，入州界五十五里，^①入宁州彭阳县界来。和戎原，在县南二十五里。

注：①入州界五十五里：入，《库》本同，万本及《嘉庆重修一统志》泾州引本书皆作经，此入为经字之误。

唐广德己前旧县。平高县三乡。本汉高平县。《地理志》云属安定郡。后魏太武太延二年于今县，理置平高县，属平高郡。隋开皇三年罢郡，以县属原州。大业三年以原州为平凉郡。武德元年重为原州，县仍旧焉。

马屯山。《十六国春秋》云：“姚萇与苻登战于高平，登败，奔于马屯山。”是此也。笄头山，一名崆峒山，在县西一百里。《史记》云：“黄帝东至于海，登丸山，西至于崆峒，登鸡头。”即此山也。《汉书》：“笄头山，在泾阳西。”《禹贡》泾水所出。《淮南子》云：“薄落山，一名笄头山。”《水经注》云：“盖大陇山之异名耳。”《庄子》谓“皇帝学道于广成子”，盖在此山。按今萧州又有崆峒山，未详孰是。今此见柏堂在山之顶上，不知何代所置。后汉隗嚣使王孟塞鸡头道，即此也。

朝那湫渊祠。《史记》：“湫渊，祠朝那。”苏林曰：“湫渊，方四十里，停水不流，冬夏不增不减，不生草木。”师古曰：“此水在今泾州界，或暄污，辄兴云雨。亢旱，每于此求之。”故有祠存。

木峡关。在頹沙山上县南一百一十里陇山上，有陇山关。与此有别。

萧关故城。在县东南三十里。《汉书》文帝十四年，匈奴入萧关，杀北地都尉^①，汉亦谓之障关。

注：①杀北地都尉：万本据《汉书》《文帝纪》于都尉下补印。

瓦亭关。在县南七十里，即陇山北垂。《后汉书》隗嚣使牛邯军瓦亭，即此也。

刘表墓。按《从征记》云：刘表冢，在高平郡。表子琮。四方珍香数十石，著棺中。永嘉中，郡人卫熙发其墓，见表貌如生，香闻数十里，熙懼不敢犯。

唐监牧。贞观中自京东赤岸泽移马牧于秦、渭二州之北，会州之南，兰州狄道县入东原州之西，置监牧使以掌其事。仍以原州刺史为都监牧使，以管南使、西使、北使、东使。

百泉县。东九十里。五乡。亦汉朝那县地，故城在今县理西四十五里^①。后魏正光五年于今县西阳晋川置黄石县^②，废帝二年改为长城县。隋大业二年改长城为百泉。唐武德八年移于今理。

注：①地故：底本作故地，《库》本同，据万本及《元和郡县图志》原州乙正。②于今县西阳晋川置黄石县：《库》本同，万本据《元和郡县图志》于县西下补南字。

弹箏峡。《水经注》云：泾水经都卢山，山路之内，常有如弹箏之声，行者闻之，歌舞而去。又云：弦歌之山，峡口水流风吹，滴崖响如弹箏之韵^①，因名之。

注：①滴：万本、《库》本皆作洒，傅校同。按以文义，宜作滴。

泾水。源出县西南泾谷。《汉书》《地理志》云：泾阳县笄头山，《禹贡》泾水所出。《水经》云：泾水出安定泾阳县高山泾谷。《山海经》曰：高山，泾水出焉，东流注于渭。入关，谓之八水。

可蓝山。在县西南七十里，一名都卢山。《十六国春秋》：赫连定胜光二年，攻于阴盘，登可蓝山望统万城，泣曰：“先帝若以朕承大业，岂有今日之事！”俄有群狐，鸣于定旁。命射之，无所获。

萧关县，北一百八十里。四乡。本隋他楼县唐贞观六年置缘州，领突厥降户，寄治于平高县界他楼城。高宗时于萧关置他楼县。神龙元年废他楼县，御史中丞侯全德以去州阔远，奏于故白草军城置萧关县。大中五年置武州周显德五年废入潘原县。

蔚茹水^①，一名葫芦河，源出原州西南颓沙山中。

废他楼县，本汉高平县地，隋时为楼县，唐贞观六年于此置缘州，领突厥降户。

注：①蔚茹水：万本水下有在县西，同《元和郡县图志》原州，此盖脱。

庆州

庆州，安化郡。今理安化县。《禹贡》雍州之域，古西戎地。夏衰，后稷子不窋奔戎翟之间，今州理东南三里有不窋故城。春秋时为义渠戎之土。嬴秦灭之，得其地，以属北地郡。后汉至晋，戎虏所侵，不立郡县。后魏及周，以为镇防，故《后魏书》云：大统十一年置为朔州。后周废。隋文帝改置合州镇，十年废镇，十六年割宁州归德县置庆州，以庆美取其嘉名也。炀帝初改州为化郡。唐武德元年改为庆州，领合水、乐蟠、三泉、马岭、弘化五县；三年改三泉为同川县；六年置总管府，改合水为合川县，又置白马、蟠交二县；七年改总管为都督。府贞观元年废都督府及合川县，仍割林州之华池县来属；二年置洛源县；四年复置都督府及北永州，以洛源县属北永州；以庆州隶原州都督府；五年又罢都督府，八年又以废北永州之洛源县来属。开元四年复置都督府，二十六年升为中都督府。天宝元年改为安化郡。至德元年改为顺化郡。乾元元年改为庆州。今郡城亦名尉李城，在白马两川交口，亦曰不窋城。

元领县十一。今三：安化，华池，乐蟠。三县所并合：同川，入安化。延庆，入安化。合水，入乐蟠。五县旧废：马岭，洛源，方渠，怀安，蟠交。

州境：东西二百五十二里。南北四百七十里。

四至八到：东南至西京一千四百一十四里。东南至西京一千八百二十四里^①。东南至长安五百六十四里。东至鄜州三百九十里。南至宁州一百二十七里。西至原州三百七十里。北至防州五百五十里。东南至鄜州三百九十五里。西南至泾州三百二十三里。西北至灵州六百四十里。东北至延州四百五十里。

户：唐开元户一万七千九百八十一。皇朝管户主四千二百九十四^②，客七千五百八十七。

风俗：与邠、宁略同。

人物：岐伯，北地人。与黄帝论医，有《素问》《难经》行世^③。傅介子，北地人。为平乐监拜中郎，使大宛，斩楼兰王头。封义阳侯。甘延寿，北地都郅人。少以良家子为羽林^④。傅燮，北地人。为汉阳太守。

注：①东南至东京一千八百二十四里：四，万本无，傅校删。②皇朝管户主四千三百九十四：管，底本无，据万本、《库》本及傅校补。③岐伯本地人与皇帝论医有素问难经行世，万本、《库》本皆无。④少以良家子为羽林：《库》本同，万本羽林下据《汉书》《甘延寿传》补“期门”二字。

土产：胡女布、香子、龙须席、牛酥、麝香。

安化县。旧二乡，今七乡。本汉都郅县，属北地郡。自后汉迄晋，戎翟所侵，不立州县。后魏及周，以为镇防。《周地图记》云：都郅城，今名尉李城，在白马岭两川交口。即今县是也。《水经注》云：尉李城，亦曰不窋城。隋开皇十六年于今州城西南一里置合水县，属庆州。唐武德六年改为合川县。贞观元年改为弘化。天宝元年改为安化。至德元年改为顺化。皇朝复为安化。

白马水。出北塞夷中。《水经注》云：洛川南经尉李城东北，合马岭水，号白马水，合于渭。谷北川，与合水县相接。

废延庆县。本汉都郅县地柳谷城。后魏于今县理置朔州。隋开皇中改置合水县。唐武德六年移丰州户住于此，仍分合水县置白马县，以县西临白马川为名。天宝元年改名延庆。周显德三年并入安化县。

子午山。亦名桥山。

马岭山。亦名箭括山。

寡妇原与白马川。皆在县界。

废同川县。在州西八十里。本汉都郅之地，隋义宁二年分宁州之彭原县，于县西南十五里于三泉故城置三泉县，属弘化郡。唐武德三年自三泉故城移于今所为同川县，因同川故城为名。皇朝乾德二年并入安化。

刘灵墓。在县北三十里延庆乡。出《旧图经》。

华池县。东一百五十里。旧二乡，今四乡。本汉归德县之地即洛源县也。西魏时为华池县，以隶蔚州，后废。至隋仁寿二年于今县东北二里库多汗故城又置华池县，西有华池水，因旧额为名，属庆州。大业元年自库多汗城移于今所。

子午山。旧名翟道山，一谓鸡山，《水经注》云：有乌鸡水出焉，西北注于洛水。

乐蟠县。南四十里。旧七乡，今三乡。本汉略畔道之地，《汉书》：县有蛮夷曰道。又为富平县地。后汉延晋，为虜所侵，无复州县。后魏大统六年于此置蔚州。后周建德二年置北地郡。义宁元年分合水县置乐蟠县，属弘化郡。取乐蟠城为名。

略畔故城。在县东北五里。《地理志》略畔道北地郡。

富平故城。在县西八十里，宁州彭原县界富平故城是也。

废合水县。在州东五十里。后魏为襄乐县之地，唐武德六年分合水县置蟠交县，取蟠交故城为名。天宝元年改为合水县。至周显德三年并入乐蟠废。废马岭县，在州北七十里。本汉旧县，属北地郡，后汉省马岭，复为灵州县之地。后魏为朔州之地。隋大业元年分合水县于此置马岭县，复汉县之名，以山形似马岭为名。按韦述《十道录》：与同州、怀安、方渠等四县并废。

马岭山。俗名箭括岭。与青山相连亘，在县西一里。有马岭坂，左右带川，相传汉之牧地也。又有水出县西北，《水经注》云，与青山水合。

灵武城。《地理志》灵武县，属北地郡，今废故城在岭北。

弘州城。周武帝太和四年筑置长城镇，后改为长川镇。隋开皇十六年废镇，立弘州。唐初州废。

秦长城。在县西北一百八十六里，蒙恬所筑。

废方渠县。在州北一百八十里。汉旧县，后废其地入马岭县。至唐景隆元年分马岭县以置焉，因方渠水以名也。

废怀安县。在州东北一百六十里，隋柳谷城也。居近党项，民无产

税。唐开元十年以检括逃户所置，故以“怀安”为名。

废洛源县。在州东北二百七十里。本汉归德县地，属北地郡。后汉更始二年封岑彭为归德侯，谓此也。后魏大统元年复置归德县。隋大业元年改为洛源，因洛水所出处为名。

白于山。在县北三十里，一名女郎山。《山海经》云：上多松柏，下多栎檀，兽多牧牛、羴羊、鸟多鸱。洛水出其阳，东流注于渭。

洛水。源出县北白于山，经上郡雕阴县秦望山，南道襄乐郡，又东南过冯翊衙县地也。

废芳池州都督府。寄在庆州怀安县界，管小州十：静、獯、王、濮、林、尹、位、长、宝、宁等州，并党项野利名种落。

废安定州都督府。寄在庆州界，管小州七：党、桥、乌、西戎州、野利州、米州、还州。

废安化州都督府。寄在庆州界，管小州七：永利州、威州、旭州、莫州、西沧州、儒州、宗州。以上三州，并唐朝所置，今废。

邠州，新平郡。理新平县。《禹贡》雍州之域，古西戎之地，本周公刘所居。故《诗》谓豳国。公刘卒，子庆节复立于此。古颛顼之墟。秦并天下，属内史。汉为右扶风、北地、安定三郡地。后汉兴平元年分安定之鹑觚、右扶风之漆置新平郡，理漆县。徐广注：《汉书》云：新平，汉之漆县地，以漆、沮之水在焉。县东北有古邠亭，即古之柁邑也，历魏、晋同之，晋武帝分漆县置邠汾邑县，苻秦时改漆取郡名为新平郡。姚萇乱，郡县俱废。后魏大统十四年分泾州之新平县置南豳州，以北别有豳，此为南。废帝三年废北豳州，此遂去南字。后周因之。隋开皇三年于今州西南十里陈阳原上移白土县入州城中，四年又改为新平县。大业二年省豳州，以县属宁州；其年又改宁州为豳州；三年改豳州为北地郡，以其地属安定、北地二郡。至义宁二年割北地之新平、三水二县置新平郡，复后汉末旧名。唐武德元年改为豳州，复西魏旧名，二年分新平置永寿县。贞观二年又分新平置宜禄县。开元十三年以豳与幽字相涉，改为邠字。天宝元年改为新平郡。乾元元年复为邠州。皇朝为静难军节度。

元领县五。今四：新平，三水，宜禄，定平。宁州割到。一县割出：永寿。入乾州。

州境：东西二百里。南北一百二十里^①。

四至八到：东至东京一千五百三十二里。东南至西京一千一百三十三里。东南至长安二百八十二里。若至奉天县一百三十里。东至坊州三百二十五里^②。北至宁州一百九十里。西至泾州一百九十里。西南至凤翔府一百六十二里。东南至坊州三百十五里。西北至泾州三百十五里。

户：唐开元户一万九千四百六十一。皇朝管户主一万四千一百一十二^③，客五千七百八十五。

注：①南北一百二十里：万本、中大本、《库》本皆作一百二十里，傅校同。《元和郡县图志》邠州州境：南北二百七十里。此误。②东至坊州三百二十五里：二，万本、《库》本皆作三。按《元和郡县图志》邠州：东至坊州三百一十里。与此不同。③皇朝管户主一万四千一百一十二：管，底本无，据万本、中大本、《库》本及傅校补。

风俗：《汉书》云：公刘处豳，其人有先王遗风。好稼穡，务本业，故豳诗言农桑衣食之本甚备焉。其俗尚勇力，习战备，居戎狄处，势使之然。天水、陇西、安定颇同也。

姓氏：新平郡三姓：古、附、异。

人物：李育，习《公羊春秋》，为同郡班固所重。为尚书令。唐侯君集。三水人，上将军。反，伏诛。

土产：蜜、蜡、麻、布、羊、马、麀、鹿、菀豆、铁器，汉于漆县置铁官。甘草。贡：剪刀，火筋。

新平县。旧十七乡，今十乡。本汉漆县，属右扶风。建武八年，隗嚣率悉众攻略阳。上至漆，进止未定。会马援夜至，上喜，闻之，援聚米以为山谷，于上前指军所从入^①。上笑曰：虏在吾目中矣。遂进兵。姚萇之乱，郡县不立。后魏于今县西南至白土县，属新平郡。隋开皇三年罢郡，于今州城中置邠州，四年改白土县为新平县。大业二年省豳州入宁州。义宁二年复为新平郡。唐武德元年以新平县又为豳州，县属焉。

五龙原。原侧有五泉出水^②，因以为名。

注：①于上前指军所从入：底本军下衍以字，据万本、《库》本、傅校及《太平御览》卷一六四引《后汉书》、《元和郡县图志》邠州删。②五龙原原侧有五泉出水：万本据《元和郡县图志》于五龙原下补在县南三里五字；出水，万本作出焉，《库》本同。

漆水。按酈元注《水经》云：漆水自宜禄县界来，又东过扶风漆县北。以《水经》验之，即邠州所理是也。《汉志》注云：漆水在县西。今县西九里有白土川水，东北流白土原东、陈阳原西^①，又东北流注于泾水，或恐白土水是汉之漆水，但古今异名耳，今凤翔府东北一百六十里麟游县东南亦有一漆水，南流与杜阳水合，非汉之漆水也，故举此以明之。

注：①东北流径白土原东陈阳原西：径，底本脱，《库》本同，据万本及《嘉庆重修一统志》卷二四八邠州引本书补。

爰得城。《汉书》《地理志》云爰得县属安定郡。后汉省，即此城也。

苻坚墓。《十六国春秋》：苻坚建元二十一年，坚至五将山，姚萇将吴忠围坚，坚众奔散，神色自若，召宰人进食。俄而忠至，执坚以归新平，幽之。萇求传国玺于坚曰：萇次膺符历，可以为惠。坚睁目叱之曰：小羌乃敢逼天子，岂以传国玺授汝羌也。图纬符命，何所依据？五胡次序，无汝羌名。玺已送晋，不可得也。萇乃缢坚于新平佛寺，时年四十八。

槁邱堡。在县西十八里。东西南三面石坡峭峻，高十丈，北面筑城高二丈，唐武德二年置，贞观元年废^①。

注：①贞观元年废：元，《元和郡县图志》邠州作七。

三水县。东北六十里。旧十三乡，今十二乡。汉旧县，属安定郡，以县界有罗川谷，三泉并流为名。今县东北二十五里邠邑原上有柁邑故城，即汉理所。魏改三水县为西川县，仍旧属。后魏初于今县西二十八里置三水县，复汉旧名，属新平郡。大统十四年移县于今邠州西北十五里白马堡。隋开皇三年移理于邠州东三里新平故郡城。大业元年自故郡城移于今理。唐武德元年以新平郡为豳州，三水县属焉。元和十二年移县于陇堡下旧城。初大历中，吐蕃焚县城，又移堡上。后人民不便，为邠师郭

钊所请，复移下之。

三水。出宁州罗川谷，有三水并经郡界。

马岭山。俗名箭括岭。底庆州界，有马岭水出焉。

翟道山。一名子午山。

华池、女郎山，并在郡邑。

洛源。洛水源出女郎山。

石门山。王褒《云阳宫记》：东北有石门山，冈峦纠纷，干霄秀出，有石干，容数百人。《甘泉赋》云：封峦、石关，施靡乎延属^①。

注：①施靡乎延属：底本施作地，万本、《库》本同，地下有音以二字，乎作摩，并据《文选》卷七《甘泉赋》改删。延，底本作连，据万本、库本、傅校及《文选》《甘泉赋》改。

枸邑故城。在县东二十五里。即汉枸邑，属右扶风，有豳乡。应劭注曰：《左传》毕、原、酆、郇，文之昭也。郇侯、贾伯伐晋是也。汉为县。

古豳城。地在县西南三十里，有古豳城，在陇川水西，盖古公刘之邑，即此城也。《国都城记》：豳国者，后稷之曾孙曰公刘，始都焉。豳，国名也^①，与故枸邑城相去约五十余里。《汉志》注云豳乡是也。

注：①豳国名也：国，万本《库》本同；中大本作谷，《嘉庆重修一统志》邠州引本书同，未知孰是。

宜禄县，西十八里。依旧八乡。本汉鹑觚县也^①。《周地图记》云：后魏孝明帝熙平二年析鹑觚县置东阴盘县。废帝元年以县南临宜禄川，又改为宜禄县，属赵平郡，隶泾州。鹑觚源，一名浅水泉。

注：①本汉鹑觚县也：也，傅校作地。按本书下文云：废鹑觚县，在县西四十里。则傅校是。

宜禄川水，一名汭水。西自泾州鹑觚县界流入。《周礼》《职方氏》：雍州，其川泾、汭。水经注云：汭水，又东经宜禄县，俗谓之宜禄川水。

芹川，《水经注》云：出罗山县子午山，一名子午岭，东流经宜禄北过。即此水也。

废鹑觚县。在县西十里。按《周地图》记：鹑觚县者，秦使太子扶苏及

蒙恬筑长城，见此原原高水浅^①，因欲筑城，遂以觚爵奠祭，乃有鹑鸟飞升觚上，以为灵异，因以名县。《汉书》《地理》志云：后汉永建四年属凉州。石勒改为赵平郡。建武十年，泾州东南置赵平郡，此县遂废。

废阴盘县。按《汉书》，武帝元鼎元年立阴盘县^②，属凉州。灵帝末徙于新丰，其县遂废。

注：①见此原原高水浅：万本作见此平原水浅，《库》本同。《嘉庆重修一统志》卷二七二泾州引本书前原字作地，万本、《库》本恐误。②按汉书武帝元鼎元年立阴盘县：按《汉书》卷二八《地理志》下：安定郡，武帝元鼎三年置。领阴槃县，则县亦置于元鼎三年。此云元鼎元年，恐非。

折墟城。唐武德元年，薛举寇泾州，屯兵于安定县折墟城，太宗亲征，相守六十有余日。会举死，其子仁杲统其众，并羌人十余万来挑战。上遣总管庞玉自浅水原南出贼之右，因高而阵，上率大兵自原北，出其不意，斩首万余级，贼大溃，仁杲惧而请降，俘其精兵万余人、男女五万口。故城犹在今县北五里。

长武城。在县西五十里。隋开皇中筑在泾河南岸，唐武德初废，大历初，郭子仪置兵以备西戎。

废浅水县。在县北五里。后魏大统十四年废。

定平县。北六十里。旧四乡，今六乡。本汉泥阳之地，后汉不改。又为独乐县，今县东北三十里独乐故城是也。后魏及周并为安定郡。隋大业十年于此筑城，置枣社驿。唐武德二年于驿城分置定平县，仍移于今所。唐末丧乱，防为衍州。周世宗显德五年，废为定平县，于邠州，寻属宁州。皇朝又隶邠州。

五柞亭。《续汉书》云泥阳县有五柞亭是也。

宁州

宁州，彭原郡。今理定安县。《禹贡》雍州之域。古西戎地，公刘邑也。周时为义渠戎国，《史记》《匈奴传》云：夏道衰，而公刘失其稷官，窜于西

戎^①，邑于邠。至秦穆公由余，西戎八国服于秦，岐、梁山、泾、漆之北有义渠、大荔、乌氏、胸衍之戎在此地。其后义渠之戎筑城以自守，而秦稍吞食，至于惠王，拔义渠二十五城。秦昭王时，杀义渠戎王于甘泉，遂起兵残伐残义渠。于是秦有陇西、北地、上郡，筑长城以拒胡^②。《秦本纪》：惠文君十一年，县义渠。既秦并天下，是为北地郡。汉为泥阳县之地，亦为北地、上郡二郡之地。后汉兼属安定。按顾野王《舆地志》云：汉末，北地郡但有泥阳、富平二县，魏、晋亦然。西晋愍帝时，陷入刘聪，郡县之名，所不详悉。按《后魏书》《地形志》云：皇兴二年于今州郭置华州。至太和十一年改为班州。以班师振旅取其郡名；十四年改为邠州；二十年改邠为豳，取古地名也。至废帝三年改邠州为宁州，以安宁取称也。后周分置赵兴。隋初如之，至炀帝又改为豳州，寻废豳州，改赵兴郡为北地郡。义宁元年领定安、罗川、襄乐、彭原、新平、三水六县；二年分安定置归义县。以新平、三水属新平郡。唐武德元年改北地郡为宁州；其年以彭原县属彭州；三年分彭原县置丰义县，属彭州。又分定安置定平县。贞观元年废彭州，以彭原、丰义二县来属，仍于宁州置都督府；十七年废归义县。天宝元年改为彭原郡。乾元元年复为宁州。

注：①变于西戎：变，底本作竄，《库》本同，据万本及《史记》卷一一〇《匈奴列传》《汉书》卷九四《匈奴传》上改。②筑长城以拒胡：拒，底本作备，《库》本同，据万本及《史记》《匈奴列传》改。《汉书》《匈奴传》上作距，与拒通。

元领县六。今五：定安，彭原，贞宁，襄乐，彭阳。

一县割出：定平。入邠州。

州境：东西二百十六里。南北一百五十四里。

四至八到：东南至东京一千八百里。东南至西京一千三百一十四里。东南至长安四百五十三里。南至邠州一百四十二里。东至坊州三百二十五里。西至泾州一百七十三里。北至庆州一百二十七里。东南至坊州三百三十里。西南至泾州一百八十里。西北至泾州临泾县二百三十三里。东北至鄜州直罗县三百八十九里。

户：唐开元户三万二百二十八^①。皇朝户主一万一千一百四十八，客六千八百三十三。

风俗：同邠州。

物：无。

土产：亦同邠州，尤有草荳蔻，白蜜，防风。充贡。

注：①唐开元户三万二百二十八：二十八，万本、《库》本同，中大本作三十六。按《元和郡县图志》卷三宁州：开元户三万二百二十六。此八疑为六字之误。

安定县。旧九乡，今八乡。本汉泥阳县地，后汉为富平县。后魏太武真君二年置定安县，在今县理西北三里。隋开皇三年移于今理，仍旧属宁州。

扶苏冢。秦太子冢，在嵩城原。

洛水。按《水经注》云：“一名马岭川水。酈道元《水经注》云：洛水又南经栒邑故城北，与栒阳合。”

九陵水。在庆州华池县界子午山^①，川中有九堆似陵，故谓之九陵水。

注：①在庆州华池县界子午山：在，万本作出，《库》本同，《嘉庆重修一统志》卷二六一庆阳府引本书作源出，无界字。

函宁。在郡西。班叔皮赋云：至于函宁。

彭原县。西北一百里。旧二乡。今五乡。本汉彭阳县地，后汉又为富平县地。后魏破赫连定后，于此复为富平县，废帝改为彭阳县，属西北地郡。隋开皇三年罢郡，以县属宁州；十八年改为彭原县，因彭池原为名，原在郡西。

富平故城。后汉富平县，今废。

天固堡。隋置，在县南，甚险固。

真宁县。东南八十里。元四乡。本汉阳周县地，属上郡，陈余与章邯书曰：蒙恬为秦将，北逐戎人，开榆中地数千里，竟斩阳周。谓此县也。后魏置泥阳、惠涉二防军^①，孝文复置阳周县。隋改为罗川县，因县南罗水

为名,属宁州。天宝元年改为真宁县。

注:①惠涉:涉,底本作陟,据万本、《库》本、傅校及《元和郡县图志》宁州真宁县改。

桥山。一名子午山,在县东八十里。

黄帝冢。在桥山上。《汉志》:上郡阳周县,桥山有黄帝冢。《皇览》《冢墓记》:黄帝葬桥山。《史记》:汉武帝北巡朔方,勒兵十余万,还祭黄帝于桥山,上曰:吾闻黄帝不死,今有冢,何也?或对曰:黄帝已仙上天,群臣葬其衣冠于此。

罗川水。自彭原县界流入。又曰罗山水,出罗山。

大陵水。《水经注》云:大陵、小陵水出巡和南、殊川西,南经宁阳城。故《鹵》诗曰:夹其皇涧。陵水,即皇涧也。

通圣观。唐开元二十三年八月,元宗梦群仙现于罗底,乃诏访焉。于彭原罗川县东王堡村底家庄,有一老人引使者至洞口,见一白兔入穴,遂掘得二十七仙并玉石之象,各题名姓得道去处,并老人亦一仙之数,以应二十八宿,仍于本县置观曰通圣,别塑真容,改县曰真宁。

要册湫。皇朝太平兴国二年封真宁县界要册湫普济王为显圣王。

襄乐县。东八十里。旧二乡,今四乡。汉襄乐县地,属上郡。后魏孝文改洛为乐,县城本后魏燕州城也。《周地图记》云:文帝大统十六年置燕州,因筑此城,后周属北地郡。隋废周而县属宁州。

大延水。《水经注》云:大延、小延水,出油水南延溪,西南流经襄乐县南,于延城西二水合流。

油水。《水经注》云:油水,与追语川水并出东翟道山。亦襄乐界。

彭阳县。西八十里。旧二乡,今三乡。本汉彭阳县地,后魏于县理置云州,周武帝保定二年废州为防,隋文帝废防为丰义城。唐武德二年分彭原县为丰义县,属彭州。贞观元年废州,以县属宁州,其城即后魏云州城也。开元八年四月割隶泾州,寻复属宁州。皇朝开宝九年改为彭阳县。

秦州。天水郡。旧理上邽县,今理成纪县。《禹贡》雍州之域,所谓西倾、朱圉、鸟鼠至于太华是也。周以前为西戎之地,至孝王时,其地始为

秦邑。按《秦本纪》云：造父之后有非子，好马，善养息之。孝王召使主马于汧、渭之间，马大蕃息。孝王曰：昔伯翳为舜主畜，畜多息，故有土，赐姓嬴。今其后亦为朕息马，朕其分土为附庸，邑之秦，使续嬴氏祀。按徐广云：今天水陇西县秦亭是也。至厉王时，西戎叛王室，杀非子之曾孙秦仲。其长子曰庄公，伐西戎，破之。宣王乃复秦仲为西垂大夫。及幽王为西戎所杀，庄公子襄公将兵救周，有功。平王赐襄公岐、丰以西之地，故春秋时为秦国。始皇分天下为三十六郡，此为陇西郡。汉武帝分陇西置天水郡，为六郡之一也。王莽末，隗嚣据其地，初即据平襄，后即保冀县，皆此地。建武中平之，后更名天水为汉阳郡。故《地道记》云：汉阳有大坂，名曰陇坻，亦曰陇山是也。至灵帝中平五年分獮道立南安郡。魏黄初中分陇右为秦州，因秦初封也。兼立凉州，领郡国十，理于此，以为重镇。明帝时，诸葛武侯引兵至，南安、汉阳皆应亮是也。西晋又分其城为天水、略阳二郡之地。后魏亦为略阳郡。至隋开皇初废郡为州。炀帝初废州为郡。唐武德二年平薛举，改置秦州，仍立总管府，管秦、渭、岷、洮、叠、文、武、成、康、兰、宕、扶等十二州，秦州领上邽、成纪、秦岭、清水四县；四年分清水置邽州。六年废邽州，以清水来属；八年废文州，以陇城来属；其年又废伏州，以伏羌来属；九年于伏羌废城置盐泉县。贞观元年改盐泉县为夷宾，二年省夷宾县，六年省长川县，十四年督秦、城、渭、武四州，治上邽，十七年废秦岭县。开元二十二年缘地震，移治所于成纪县之敬亲川。天宝元年改为天水郡，依旧都督府，督天水、陇西、同谷三郡，其年复还治上邽。乾元元年复为秦州。禄山反后，陷入吐蕃。大中三年八月，凤翔节度使李玘收复。今理于成纪县，成纪元在旧州南一百里。皇朝为雄武军节度使。

元领县五。今六，并四寨。成纪，陇城，清水，天水，新置、长道，成州割出。大潭。本良恭、大潭二镇，合为一县。

二县废：上邽，废为镇。伏羌，为寨。

州境：东西四百二十里^①。南北一百九十里。

注：①东西四百二十里：二，万本、中大本、《库》本皆作一，傅校改

同,当是。

四至八到:东至东京二千一百里。东至南京一千六百六十里。东至长安八百里。东至陇州三百里西至渭州三百里。南至成州四百三十里。北至原州五百里。东南至凤州五百三十里。西南至成州三百里。东北至原州四百七十五里。西北至会州五百一十里。

户:唐开元户二万四千八百二十七。皇朝户主一万九千一百四十四,客二万四千百七十七。

风俗:天水。陇西六郡良家子以才力选焉。君子有勇而无义即为乱,小人有勇而无义,即为盗。故此陇右数郡,人俗质木,不耻寇盗。

姓氏:天水郡七姓:权、赵、尹、庄、龙、狄、姜。

人物:李广,陇西成纪人。孙陵,赵充国,段会宗,薛夏,杨阜。姜维,天水冀人^①。为蜀大将军。唐狄仁杰,天水人。相则天,追封梁公。李适,字子至,陇西成纪人^②。权德舆,天水人。相德宗。李程,陇西人。李逢吉,陇西人。李石。陇西人。相文宗。

土产:麝香,龙须席,芎藭,马^③,石斛。

注:①狄仁杰天水人:按《旧唐书》卷八九,《新唐书》卷一一五《狄仁杰传》皆谓并州太原人,此恐误。②李适字子至陇西成纪人:按《旧唐书》卷一九〇中《文苑传》中、《新唐书》卷二〇二《文艺传》中皆谓李适京兆万年人,此恐误。③马:底本马下有,据万本《库》万本及《嘉庆重修一统志》卷二七五秦州引本书删。

成纪县。旧六乡,今三乡。本汉旧县也,属天水郡。《续汉书》《郡国志》云成纪属汉阳郡,汉阳即天水郡也。古帝庖牺氏所生之地。

瓦亭川水。源出县东瓦亭山。《水经注》云:西南流历僵人岐。

显亲故城。汉为县,废城在县东南。

罗谷水。从大岳山流来,今分流入于州^①,合入夕阳河。

注:①今分流入于州:今,《库》本同,万本及《嘉庆重修一统志》卷二七四秦州引本书皆无,盖衍。

陇城县。东北一百二十六里。旧五乡,今四乡。本汉陇县,即略阳道,

属天水郡。后汉改天水曰汉阳。《续汉书》《郡国志》：略阳道属汉阳郡，有街泉亭，是也。按《十三州志》：略阳在郡东六十里，即故冀城也。魏黄初中改为陇城。

瓦亭山。在县东北二百里。即汉末隗嚣使将牛邯所守之地。其山亦入今平凉郡界。有水经成纪县过。

大陇山。亦曰陇首山，在县东一百里。

汉略阳道废城，在今县西北。

河阳县故城。汉置县，亦在河之西北，故曰河阳。

街泉亭。俗名汉街城，在县东北六十里。汉立街泉县，以属天水郡。即三国时蜀将马谡为张郃所败之处。

大阳山。在县东北五十里。有银冶务。

清水县。东北一百二十五里。旧五乡，今三乡。本汉旧县地，属天水郡。《晋太康地志》云：清水属略阳郡。按其地，即秦仲始所封为附庸于此地。又《周地图记》云：成帝和平五年分略阳置清水郡，寻废。至永安三年移于天水城^①。唐武德四年置邽州于清水，六年废邽州，以县来属。禄山乱，陷入吐蕃。至大中二年始收复，勅此县缘郡城未置，权隶凤翔府。后唐长兴元年移置于上邽镇，即今理所也。

注：①永安三年移于清水城：清水，万本同，《库》本作天水，据本书所载乃指清水，作天水疑非。

小陇山。经邑界。陇山之事具在陇州。

箭竿谷。妯娒水出焉，去县六十里。下合白沙川，入天河。

废上邽县，旧十六乡。本邽戎地，秦伐邽戎而置县，属陇西郡，后属汉阳郡。《晋太康记》属天水郡。后魏以避太武帝，改为上邽。隋开皇初复为上邽县。唐天宝末陷入吐蕃。大中初收复为镇。今为清水县理所。

蟠冢山。《山海经》云，蟠冢之山，汉水出焉，而东南流注于江^①。经嘉陵，故有嘉陵江之称。经阆中，故有阆中江之号。郭璞云，蟠冢山，在武都氏道县南。《梁州记》云，汉水发源陇西之氏道县蟠冢山南。《汉志》云，西县《禹贡》蟠冢山，西汉水所出。《后汉书》亦云，西县有蟠冢山。《郡国志》

云：上有异草花名骨容^②，若食之无子。

注：①而东南流注于江：江，《山海经》《西山经》作沔，按当做沔，此江字误。②骨容：容，底本作客，据万本《库》本及《太平御览》卷四〇引《河图·括地象》改。《山海经·西山经》作菁蓉。

渭水。西自伏羌县界流入。《水经注》云：渭水又东出岑峡，入新阳川，迳新阳下城南，溪谷，赤蒿二水，并出南山，东北入渭。渭水又东与新阳崖水合，即陇水也，东北出大陇山。

段谷水。源出县东南山下。《蜀志》：姜维为邓艾所破于段谷，星散流离，死者甚众。即此谷也。

马池水。源出县西南蟠冢山。《开山图》云：陇西神马山有渊池，龙马所生。《水经注》：马池水出上邽西南六十里，谓之龙渊水，言神马出水，事同徐吾来渊之异，故有池马之号。昔刺史张彝得马头骨，长三尺即此也。

始昌城，一名西城。按城即汉为西县地也。今废，在县西南。

天水县。西七十里。三乡^①。古县也。《秦川记》：郡前湖水，冬夏无增减，天水取此名县。唐末废。后唐长兴三年以南冶县镇置。县界无山，有水一派，北流入长道县界。

注：①三乡：三，万本、《库》本皆作七。

长道县。西一百二十七里。旧四乡，今二乡，本汉上禄县地，后魏分上禄置长道县，于县置天水郡。隋开皇十八年改天水为汉阳郡，又改汉阳县为长道县，属成州。按《成州图经》：旧有长道、汉阳、上禄等四县，以吐蕃侵扰，百姓流移，并废为镇。唐咸通十三年以成州奏人户归复，土田渐濶却置长道县。今属秦州。

祁山。在县东十里。上有城，极严固。按《开山图》云：汉阳西南有祁山。九州之名阻，天下之奇峻。《蜀志》后主建兴六年，诸葛亮身率诸军攻祁山，即此也。山上有高楼、武涉二神^①，每岁郡邑祠之。

注：①山上有高楼武二神：按《太平御览》卷四四引《九州志》作山上有高楼、武陟二神祠，此涉疑为陟字之误，神下疑脱祠字。

南岬北岬。二岬万有余家。诸葛武侯自《表》言：祁山县去沮五百里，有人万户，瞻其邱墟，信为殷矣。即谓此。《周地图记》：其城，汉时所筑也。

盐官水。在县北一里。自天水县界流来。

石堡城。在县南十八里。高一百丈，上有石城，中有一石井，深一丈，四时水湛然。故老传云：昔人避难居此，开其井，饮之不竭。敌人却漏其水，左右穿鉴，不得其水脉。

大潭县。西一百二十八里。元二乡。本良恭、大潭两镇，皇朝乾德元年合二镇立大潭县于上木竹谷，即今理。

伎两山。在县西南六十里，连成州界。

十八盘山，在县南一百二十里。今有十八盘路在。

浊水。从长道县界大潭旧镇^①，入阶州。

注：①从长道县界穿大潭旧镇：穿，万本、《库》本皆无，未知是否。

清水。在县南七十里。从蕃界流来合浊水，入阶州。

人头崖。在良恭旧镇南五里，去县九十五里。其崖象人头。

废伏羌县。本周冀戎之地，秦伐冀戎而置县焉。《汉书》《地理志》云冀县属天水郡。西晋大始元年，分雍州陇西南安天水略阳武都、凉州之金城、梁州之阴平七郡立为秦州于冀县是。后魏移于上邽，改此为当亭县。隋大业二年改当亭为冀城县。唐武德初立为伏州，仍于伏羌城置伏羌县；八年罢伏州，以伏羌县来属。唐天宝元年后陷吐蕃。皇朝建隆三年，秦州上言吐蕃尚波于等进约伏羌县地，因以旧城置寨。

朱圉山。在县西。俗名曰岩山^①。《汉书》《地理志》云：天水冀县有朱圉山，在县南梧中聚。《土地十三州志》云：朱圉有石鼓，不击自鸣，鸣则有兵起。

注：①俗名白岩山：白，底本作曰，《库》本同，据万本及《通典》《州郡》四改。

邽山。在县东南。

落门谷水。在今县西。

龙马泉。源出县西北平水地，水下渥洼沙作龙马之状。故老相传：每春夜放牝马，饮此泉水^①，自然怀孕生驹，初无毛，不能起，以毡裹之，经数月内生毛，不至三岁，与大宛马略同。

注：①饮此泉水：泉水，底本作水泉，据万本《库》本及《嘉庆重修一统志》卷二五五巩昌府引本书乙正。

平襄城。汉县也，属汉阳郡，在今县南一百三十里。故襄戎之邑也。

大像。在废县东一里。石崖上有大像一，躯长八尺。自山顶至山下一千二百三十丈，有阁道可登。

成州

成州，同谷郡。今理同谷县。《禹贡》梁州之域。古西夷地。周省梁州，故入雍，至战国，千亩^①，戎、羌、氏居之，后为白马氏国。又按《史记·西南夷传》云：自州以东北，君长以什数，冉駹最大。在蜀之西，自冉駹以东北，今州南八十里有山曰仇池，其地险固，即白马氏之处。又按范曄《后汉书》云：河池，方百顷，左右悉白马氏。秦逐西戎，遂统有其地，昭王二十八年置陇西郡。晋孝武帝时，氏豪杨定拥众仇池，称藩于晋，求割天水之西县、武都之上禄为仇池郡，置于历城，其地遂为杨氏所据。至后魏废帝元年改武都为南秦州。西魏改为成州。至隋末州废，置汉阳郡。唐武德元年复置成州，领上禄、长道、潭水三县。贞观元年以潭水属岩州，又割废康州之同谷县来属。州治即杨难当所筑建安城也。天宝元年改为同谷郡。乾元元年复为成州。自至德之后，为吐蕃侵扰，百姓流散，诸县并废为镇。咸通十三年，人户渐复，却置成州并县，又割长道县属秦州，梁开平初改为汶州。后唐同光初复旧，仍于栗镇亭置栗亭镇县。今理同谷县。

注：①千亩：文义不明，此处疑有误脱。

元领县三。今二：同谷，栗亭。新置。一县割出：长道。入秦州。一县旧废：上禄。

州境：东西九十里。南北一百四十里。

四至八到:东至东京二千二百八十里。东至西京一千八百六十里。东至长安一千里。东至凤翔府驿马四百五十里。西南至良恭县至岩州五百八十里。南至武州三百三十里。北至秦州四百三十二里。东南至兴州三百四十七里。西南至武州三百四十五里。东北至秦州三百里。西南至渭州三百八十六里。

户:唐开元户四千七百二十七。皇朝户主三千七百六十,客五千八百八十。

风俗:与凤州同。每耕耘之时,即鸣鼓唱歌以乐之^①。

人物:无。

土产:麝香,羚羊角,狨皮。

同谷县。旧三乡,今三乡。本汉下辨道地^①,属武都郡。后魏定仇池,正始中于此置广业郡,领白石、栗亭二县。恭帝后元元年改为同谷县。

注:①每耕耘之时即鸣鼓唱歌以乐之:《库》本同,万本无此十三字。②本汉下辨道地:底本地上衍也字据万本、《库》本及《元和郡县图志》卷二二成州同谷县序删。

凤凰山。《水经注》云:广业郡南凤凰溪^①,中有二石双高,其形若阙,汉世有凤凰栖其上,故谓之凤凰台。其山盖亦因此为名。

注:①凤凰溪:按《水经》《漾水注》作风溪,此凰疑为衍字。

同谷川。州理之地。

栗亭县。东五十里。二乡。本栗亭镇地,后唐清泰三年六月于秦州奏置栗亭县。

栗亭川。县理之地。

废上禄县,本汉旧县,属武都郡。东晋属仇池郡。宋分西山五羌为十二部,由是郡邑成焉。隋初为苍泉县,炀帝改苍泉为上禄,复汉旧名也。

仇池山。辛氏《三秦记》云:仇池山上有顷地,平如砥。其南北有山路,东西绝壁万仞,上有数万家,一人守道,万人莫向。山势自然,有楼櫓却敌之状。东西二门^①,盘道可七里,上有冈阜泉源。《史记》谓秦得百二之固也。西晋末,为氐杨茂搜所据,立宫室困仓,皆为板屋,乃氐之所治

于此。今谓之洛道是也。

注：①东西二门：门，底本脱，万本、《库》本同，据中大本及《太平御览》引辛氏《三秦记》补。

雷牛山。泥公山。

五仙山，其三山历邑界。

仪州

仪州，理华亭县。本西戎之界，秦、陇之地，凤翔之边镇，后魏普泰二年筑城置镇，以扼蕃戎之路。唐为神策军。后唐同光元年改为义州。周显德六年置华亭县于州郭。皇朝乾德二年割秦、陇三镇之地置安化县。太平兴国二年改为仪州，避御名。

领县二：华亭，安化。

州境：东西五十五里。南北七十五里。

四至八到：东至东京一千八百里。东至西京一千四百五十里。东至长安六百里。东至凤翔府崇信县九十里。东南至陇州九十里。北至渭州九十里。西南至秦州约五百里，隔陇山，原无直路。东北至泾州一百四十里，内隔凤翔崇县及宫坂岭^①。西北至长安镇四十里^②，次至新置胜关城。

户：旧户无籍。

风俗：人以骑射为事。

人物：无。

土产：弩弦麻^③。地接陇山，节气常晚，至仲夏，花木始开。不产丝蚕，惟与西戎博易为利。

注：①官坂领：官，万本、《库》本皆作官。②西北至长安镇四十里：西北，万本、《库》本皆作北，未知是否。③弩弦，麻：万本同，《库》本弩弦上有贡赋二字，未知是否。

华亭县。四乡，周显德六年置，以华亭乡为名。

陇山。在县西二十五里。

望仙山。在县西北二十里。

烂柯山。在县北一十五里。

秦胡亥陵。在县东南三十里干湫原上。

秦长城。在州城内。有蒙恬防冢。

安化县。西九十里。元五乡。皇朝乾德二年割秦、陇三镇之地置。西北蕃十里。

龙马山，在县东一十里。陇山，在县西十里。接蕃界，及连崆峒山。

太平监。秦州之境内，原有银冶八务，皇朝太平兴国三年升为太平监，冶大贾务。门外并不辖乡里，无四至八到。分三务为监管官之冶所。

元领务八，今领十九。

大贾务。监所冶，都监官主之，管五务：大贾务，白石上务，白石下务，夹箭务，里谷务。

临金务。北至监一百里。分监官一员主之，管八务：临金务，寨南务，碎石务，黄蘗务，床谷务，子路务，青阳务，筐园子务。

小泉务。正南去镇九十里，北至蕃界一里。分临监官一员主之管六务：小泉务，董城务，牛池务，西谷务，椀子堡务，隔澗务。

户：皇朝管诸务郭内主客一千三百九十七。

课利：每年收钱银共三万二千八百四十八贯两。

渭州

渭州，陇西郡。旧理襄武县，今理于平凉县。《禹贡》导渭自鸟鼠同穴，即此地也。鸟鼠同穴山，今谓之青雀山是也。土地所属与成州同。洎春秋以来，为羌戎杂居。《史记》云：秦昭王伐义渠戎，始置陇西郡。郡有大坂，名曰陇坻，郡处坻西，故曰陇西，即此地也。《汉》《地理志》曰：陇西郡领狄道等十一县，以属凉州。汉末，隗嚣所据。建武十年，嚣降，陇右平，仍旧为郡。灵帝分立南安郡。三国时，魏置镇守在此。故邓艾谋曰：蜀师来而为一，我分为四。谓狄道、陇西、南安、岐山四处，以为犄角。至嘉

平五年，蜀将姜维围南安、襄武，不克，是也，至晋不改南安、陇西二郡之名。洎后魏永安三年并为陇西郡，又置渭州，因渭水为名。后周武帝又立南安郡^①。隋初废郡立州，至炀帝州废而复立为郡。唐武德元年复为渭州。天宝元年改为陇西郡。乾元元年复为渭州。鄯州都督郭英又奏请以渭州、洮州为都督府，后废。广德元年，西戎犯边，洮、兰、秦、渭尽为虜境。元和三年，泾原节度使朱忠亮奏移原州以临泾县，置行渭州于平凉县。

注：①后周武帝又立南安郡：万本，《库》本皆作后周建德元年复为南安郡，此武帝盖脱建德元年四字。

元领县四。今二：平凉，原州割到。潘原，泾州割到。旧四县废：襄武，陇西，鄯县，渭源。

州境：东西五十五里。南北六十五里。

四至八到：东至东京一千八百里。东至西京一千四百里。东至长安六百四十里。东至泾州一百二十六里。西至安国镇接连蕃。界三十二里。南至仪州九十里。北至原州一百一十五里。南至良源县一百一十里。西南至仪州界一百里。东北至原州六十五里。西北至耀武镇四十里。

户：唐开元户六千四百二十五。皇朝管户主一千二百三十一，客一千二百九十二。

风俗：同秦州。

姓氏：陇西郡八姓：李、牛、彭、辛、闻、蹇、艾、盖。

人物：无。

土产：青虫，鸚鵡，龙须席，麝香。

彼谚有曰：郎枢女枢，十马九驹，安阳大角，十牛九犊，即谓其地宜于畜牧也。

平凉县。依旧四乡。本汉朝那县地，后魏为长城县地，因秦长城为名。后周建德元年割泾州朝那县于今县复置朝那县。至隋大业二年改为平凉县。唐元和四年以渭州陷蕃，权置行渭州于此。天福五年割属渭州。

可蓝山。一名都卢山，皆泾水源，与笄头山连亘。赫连定胜光二年畋

于凉州，登可蓝山望统万城，泣曰：先帝若以朕承大业，岂有今日乎？在平凉县，接百泉界。又云定据平凉，登此山，有群狐绕之而鸣，射之竟不得一。定乃叹曰：咄咄，此亦怪事也。

泾阳故城。汉为县，废城在今县南。

马屯山。在县西南。姚萇与苻登战于高平，登败，奔于马屯山，即此也。

会盟坛。在县西北五里。唐贞元三年五月，浑瑊与吐蕃防盟处。

右甲积谷。在州东南二十里。

大杀谷、小杀谷。二谷在州东南一十里。

雕窠峡。在州南三十里，与华亭县连接。

泾水。从原州弹箜峡口过八州北一里。

白岩河。从华亭县来，经望家山硤口，过州西十里。

潘原县。东三十六里。旧一十乡，今三乡。汉阴槃县地。《地理志》云属安定郡。后汉末移县，属京兆郡。郭缘生《述征记》云：阴槃县旧属安定郡，遇乱徙于新丰。《帝王记》云：赫连定以胜光二年又自京兆移此，属平凉郡也。后魏于此兼置平凉郡。天宝元年八月改为潘原县，以县东有潘口谷为名。旧县城在泾水北。广德元年陷于蕃。至贞元十年置行县于彭信堡。周显德五年废新武州入。

铜城山。在县西南三十五里。《水经》云：潘源县有铜城山，水出历白石城。

泾川水。在县南一里。从平凉县界流入。

阁川水。在县东南四十五里，西从义州华亭县流入。《汉志》云：乌水出西北都卢山，有西乌水，又东北经乌氏县，东注于泾，渭之阁州水。然泾水间有石岩，东会两川水也。

潘谷水。在县东三十里，从平凉县流入。

秦太子扶苏陵。在县东五里。

废武州，旧里萧关即此。按其地，即汉朝那县古萧关之地，汉文帝时，匈奴入萧关，即此也。今界内瓦亭关，是后汉隗嚣使将牛邯所守之处。在隋以来为镇，以戍边防。又按萧关镇自武德以来，尤为边陲重镇，

后因禄山乱，陷入蕃界。大中三年七月，邠州节度张君绪奏，今月十三日收复萧关。至大中五年七月十四日敕宜赐名武州，仍为中州，属邠宁道。又萧关镇，其地所宜六畜，贞观时常置监牧，使百姓免诸征役。在原州西北一百八十里。萧关一县，周显德五年六月废入潘原县，属渭州。

唐广德以前渭州旧县，今并废。

襄武县，四乡。本汉旧县也，属陇西郡。西不还一百里，即先零遗种居之。有五溪聚，即杨盛分羌为部以五溪，为一聚，于是有五溪之名。

六泉。《十六国春秋》云：乞伏国仁建义三年率骑兵三万袭鲜卑大人密贵、裕苟、提伦等三部于六泉。即此水也。

锦镜峡。《陇西记》云：襄武有锦镜峡，即黑水所经。其峡四望，花木明媚，照影其中，因以称之。

陇西县，东南六十里。元四乡。本汉獠道县。后汉末于此置南安郡。后魏改南安为南阳郡属渭州。隋开皇十八年改为武阳，寻为陇西县。

落门水。出县东南。

鄯县。西南六十里。今五乡。县本后汉立，属陇西郡。自永嘉南徙之后，县遂废焉。后魏景明三年分武阳复置鄯县，因水为名焉。

漳水。《水经注》云：出西南溪下，东北至鄯县南。万年川水出南山，东北流注之。

渭源县。西微北九十里。四乡。本汉首阳县地，属陇西郡。后魏大统十七年分陇西置渭源郡，因渭水为名，又改首阳为渭源县。唐上元二年改为首阳县，仍于渭源故城分置渭源县。仪凤二年废首阳入渭源县也^①。

注：①仪凤二年：二年，《旧唐书》卷四〇《地理志》三、《新唐书》卷四〇《地理志》四皆作三年，疑此误。

鸟鼠山。山有鸟与鼠同穴。隋炀帝时献之，吏部尚书牛弘曰：尔雅谓其鸟为𪚩，其防为𪚩。渭水源出此山也。今谓之青雀山是也。

渭水。源出鸟鼠山，入关为八水之一。

鄯州

鄯州，西平郡。今理湟水县。《禹贡》雍州之域。古西戎地。按《后汉》《西羌传》曰：无弋爰剑者，为秦所执^①，后亡藏于岩穴中。秦国人焚之，有景象如虎，为其蔽火，得免。遂亡入三河间。诸羌以为神，共畏事之，以推为豪。至爰剑曾孙忍季父印畏秦之威^②，后遂得其附落而南，出赐支河曲西数千里，与众羌绝还，不复交通。子孙分别，各自为种。忍及弟舞独留湟中。忍生九种，舞生十七种。羌之兴，从此起矣。湟中月氏胡。其先大月氏之别也。及霍去病破匈奴，取西河地，开湟中，筑令居塞，以其地属金城郡，于是月氏来降，与汉人错居。后汉建安中置西平郡，晋因之。自永嘉之后，南凉秃发乌孤以后魏天兴元年自称武威王，徙居于此。乌孤卒，弟利鹿孤嗣位，复都此为西平王，即从此又迁于姑臧。后魏为镇，孝昌二年改镇为鄯州。后周又为乐都郡。隋初郡废，置鄯州。炀帝初州废，置西平郡。唐武德二年平薛举，置鄯州，理故乐都城。贞观中置都督府。天宝元年改为西平郡。乾元元年复为鄯州。上元二年为吐蕃所陷，遂废。所管鄯州等三县，入河州管。

注：①为秦所执：底本为下衍强字，据万本、《库》本及《后汉书》卷八七《西羌传》删。②印：底本作邛，万本、《库》本同，据《后汉书》《西羌传》改。

元领县三^①：湟水，龙支，鄯城。

州境：东西三百五里。南北二百一十五里。

四至八到：东南至东京三千一百六十九里。东南至西京二千七百四十九里。东至长安一千九百九十三里。东至兰州广武县一百一十三里。南至廓州一百八十里西至绥戎峡旧吐谷浑界一十里。西至青海三百七十里。北至凉州昌松县南界一百四十三里。东至河州凤林县故城二百八十里。西南至廓州广威县承风风吐谷浑界一百九十五里。东北至兰州广武县故长城界二百一十七里。

注：①元领县三：元，底本无，据万本、《库》本及傅校补。

户：唐天宝户五千三百八十九。

风俗：深入羌胡习俗，全是吐谷浑可汗子孙，其先是狼种，今旌旗皆有狼形，备卫，人亦称附离，即彼谓狼也。夷言谓左任，射裤不开当，为寒故也。

人物：元。

土产：特犀、獬羊、驰、马。

湟水县。三乡。本汉破羌县地，属金城郡。汉破匈奴，取西河地，开湟中，处月氏，即此。湟水，俗呼湟河，又名乐都水。南凉秃发乌孤始都此。后魏于此置鄯州，改破羌为西都县。隋改为湟水县。

四望山。有水出其阳，一名湟河，亦谓乐都水，西自吐谷浑界入。《汉书》《地理志》临羌县：西北至塞外，有西王母石室、仙海、盐池。北则湟水所出，东至允吾入河。谓此水也。

土楼山。无石而高，在县南。

养女岭。彼羌多祷而祈女。

牛心堆。在湟水源，山名也。

鸡田。在州西。涉千里无草木，其中为突厥藪泽。

浩亶水。在县西北，亦谓之阁门水。西自吐谷浑界流入。《汉书》《地理志》云：浩亶水出西塞外，东允吾入湟水。

破羌故城。汉为县，故城在今县西。

龙支县。南一百三十五里。五乡。本汉允吾县之地，属金城郡。后汉为龙耆县。后魏武帝改为金城县^①。至废帝二年又改为龙支县，取县西龙支堆为名。

注：①后魏武帝改为金城县：按《隋书》《地理志》上云后魏曰北金城，与次异。

积石山。在县南。《尚书》谓导河积石，谓此山也。

唐述窟。在县西龙支谷。彼人亦罕有至者，其窟有物若似今书卷，因谓之精岩。岩内时见神人往还，盖古仙所居耳。羌胡惧而莫敢近。又谓为唐述，故指此为唐述窟。窟高四十丈。

鄯城县。西一百二十里。元四乡。本汉西平郡之地，后汉末陷羌，故此郡废。仪凤二年奄有河湟之地，因立鄯城县，取郡以名邑。

平西郡城。汉为郡所，故城在今县西一百三十二里是也。

兰州

兰州，金城郡。今理五泉县。《禹贡》雍州之域。古西羌地。秦并天下，为陇西郡地。《后汉书·西羌传》曰：羌无弋爰剑曾孙忍及忍子研，最豪健，故羌中号其后为研种。秦始皇时，务并六国，兵不西行，故种人得繁息。及秦既并天下，筑长城以界之，众羌不复南渡。至汉兴，匈奴冒顿兵强，破东胡，走月氏，臣伏诸羌。景帝时，研种留何率种人求守陇西塞，于是徙留何等于狄道安故城。今州西南有狄道、安故城，即其地也。汉属陇西郡。平帝元始四年，金城塞外羌献鱼盐之地，乞内属。汉遂得西王母石室，以为西海郡。后汉光武省金城入陇西郡。魏、晋因之，以为重镇。故蜀姜维以兵攻狄道不克，即此也。前凉张寔置为广武郡，至张骏又分立武始郡。西秦乞伏乾归苑川徙都焉，十六国南凉秃发乌孤都广武。皆此也。后魏、后周并为武始郡。隋开皇九年废武始郡，立为兰州，盖取皋兰山以为名。炀帝初州废，置金城郡。隋末，陷于薛举。唐武德二年平贼，复置兰州；八年，置都督府，督兰、河、鄯、廓四州。贞观六年又督西盐州，十二年又督凉州。后督兰、鄯、儒、淳四州，兰州领金城、狄道、广武三县。显庆元年罢都督府。天宝元年改为金城郡，二载割狄道县置狄道郡。乾元元年复为兰州。

元领县三^①：五泉、广武，狄道。

州境：东西二百一十七里，南北六百一十里。

四至八到：东南至东京二千四百四十里。东南至西京二千二十里。东南至长安一千四百六十里。东至会州四百二十里。南至渭州四百里。西至鄯州四百九十里。北至凉州五百七十里^②。西北至凉州五百四十里。东北至会州四百二十里。

户：唐天宝户五千三百八十九。

风俗：同秦、渭二州。

人物：无。

土产：麸金、香子。

注：①元领县：元，底本无，据万本《库》本及傅校补。②东南至渭州四百五里：万本《库》本皆作四百，无五字。

五泉县。七乡。本汉金城郡县地，属金城郡，昭帝始元元年置。隋置五泉县。唐咸亨二年复为金城。天宝元年复为五泉县。

崦嵫山。亦名可狼山，俗名蕪薄汗山，在县南一百四十里。即西秦乞伏乾归太子炽盘招结诸部兵民二万七千，筑城于崦嵫山以据之。即此山也。

金城关。在郡西南^①，临河。

苑川城。在郡西。即乞伏国仁所都，后至乞伏慕末为赫连定所灭。

狄道、安故城。在县西南。昔研羌留河所聚之处。

长城。亦经此郡之南。

汉榆中县故城。在今县东。后汉时群羌乱，隃麋相曹凤上言：西羌为害，自建武以来，居大、小榆谷，贯以土地肥美，又近塞内，北阻大河，因以为固。缘山滨水，以广田畜，故能强大，常雄诸种。是谓此地。

注：①在郡西南：郡，万本，《库》本皆作县。

广武县。北防西二百二十里。五乡。本汉枝阳县地，前凉张骏三年分晋兴于此置广武郡。又为南凉秃发乌孤所都，至儻檀，为乞伏炽盘所灭于此。隋开皇三年罢郡置广武县，属兰州。

琵琶山。在县西。峻嶮曲折，有似琵琶首。

浩亶故城。汉县，废城在今县西南。有河所经，今俗呼此水为阊门河，疾盖言耳。县因水以为名。

允吾故城。亦汉时为县，废城在县西南也。

狄道县。南一百九十里。今四乡。本秦旧县也。其地故西戎别种所居，秦取以为县。《汉书》《地理志》曰：狄道属陇西。惠帝时改为武始郡，以狄

道为降狄道。《十三州志》云：降狄道，今曰武始。按《唐贞元十道录》云：自武德以后，此邑为临州，管狄道、安乐二县。后安乐寻废，州额亦停。

白石山。有梁泉。昔梁暉者，后周之将，为羣羌所围，无水。暉以所执鞭卓地，而飞泉涌出，兵士由此而济，今号梁泉，其上榆木成林。

凉州

凉州，武威郡。今理姑臧县。古雍州之域。即西戎之地。《禹贡》谓：析支、渠搜，西戎即叙。析支在大宛之北，即今郡也。六国至秦为月支居焉。秦并天下，西北雄有陇西、北地二郡。汉初为匈奴右地，以属凉州部。至武帝开西边，始置天水、武都、武威、张掖、酒泉、安定、敦煌七郡，多以关中报冤悖逆无赖之人徙于彼以实之。改雍州曰凉州，而三辅悉属司隶。昭帝更置金城郡。按《释名》云：西方寒凉，或谓河西土田亦薄，故曰凉。亦云武帝以其地为昆邪王五属国，至宣帝以张掖、酒泉、敦煌、武威、金城谓之西河五郡，以断匈奴右臂。故《地理志》云：敦煌广至县^①，宜禾都尉理昆仑障。按昆仑障，即古谓昆仑戎地也。又西羌者，自赐支以西，滨河首左右，居今河关西，可千余里，有河曲羌，谓之赐支，即古析支也。又《汉书》，凉州之天水曰汉阳。凉州部，郡国十二，县、道、侯官九十八，刺史理汉阳之陇县。至献帝，以此地数有乱，河西五郡去州隔远，自求立州。兴平元年分凉州河西四郡为雍州，所谓建安十八年正月（复《禹贡》九州是也。）又云自建武初大扰，而河西独安，姑臧称为富邑，以通羌故也。晋惠帝末，张轨求为凉州刺史，于是大城此地，为一会府以据之，号前凉。后苻秦末，吕光破凉州刺史梁熙，复为后凉，都于此郡。北凉沮渠蒙逊亦都于此，至茂虏为后魏所灭，后魏立为武威郡。隋初为州，炀帝初复为郡。唐武德二年平李轨，复置凉州总管府，管凉、甘、肃、瓜四州、凉州领姑臧、昌松、番和三县；三年又置神乌县，七年又改为都督府，督凉、肃、甘、沙、伊、芳、文八州。贞观元年废神乌县。总章元年复置。咸亨元年升为大都督府，督凉、甘、肃、伊、沙、瓜、雄七州。上元二年为中都督府。

景云二年，贺拔延嗣除凉州都督，充西河节度使，自此上郡有节度之号。天宝元年改为武威郡，督凉、甘、肃三州。乾元元年复为凉州。按刘昫《敦煌实录》云：晋安帝隆安元年五月，凉州牧李暠微服出城，逢一虎在道边，因化为人，遥呼暠为西凉君。暠因弯弧待之，又遥呼暠曰：汝无疑也。暠知其异，乃投弓于地。虎又仍前谓暠曰：敦煌空虚，不是福地，君之子孙，王于西凉，不如迁徙酒泉。言讫乃失。未几，暠乃移都酒泉，建国号西凉，王七级城。即郡城也。内有沮渠蒙逊所造七级木浮图，故城因是而名之。

注：①广至县：至，底本作置，万本同，据《库》本及《汉书》卷二八《地理志》下《续汉书》《郡国志》五改。

元领县六：姑臧，神乌，昌松，番和，武威，嘉麟。

州境：东西四百里。南北八百三十里。

四至八到：东南至东京三千二百九十里。东南至西京二千八百七十里。东南至长安取秦州关路一千八百里。东南至防州乌兰关四百里，从关东南至州一百二十里。西至甘州五百里。南至鄯州浩亶河二百六十里。北至突厥界即安盖泉五百八十里。东南至兰州五百四十里^①。正南微西至鄯州五百八十里。西南至甘州张掖县界陈北烽三百七十里。西北至甘州六十里。东北至会州乌兰县界白鹿峰三百五十里。

注：①东南至兰州五百四十里：东，底本脱，据万本《库》本、傅校及《通典》《州郡》四补。

户：唐天宝户三万二千四百六十二。

风俗：州之分野，上应白虎之宿，金气坚刚，人事慷慨。

姓氏：平西郡二姓：申屠、曹。武陵郡六姓：贾、阴、索、安、曹、石。

人物：贾诩。字文和，姑臧人，诩有良、平之奇谋，魏为大中大夫。

土产：野马皮，龙须席，毯，芎藭。

姑臧县。元十乡。本汉旧县也。《地理志》云：属武威郡，南山，谷水所出，北至武威入海，行七百九十里。王隐《晋书》云：此城匈奴所筑。旧名盖臧城，后人语讹为姑臧城。

第五山。夏函霜雪，有清泉茂林，悬崖修竹。自古多为隐士所居，尤

多窟室。

姑臧南山。一名雪山。无冬夏，多积雪^①，故曰雪山。

青岩山。下有湫甚广，人触之立有风雹暴至，如代州之五台龙池之验耳。

白亭海。白亭水色洁白，因以为名，又东有达狄回海。

五涧谷水。自番和县界北流入白海。

野潏泽。在今县北，即《书》谓至于潏野。

灵泉池。在县南城中。《十六国春秋》云：张玄靓五年，有大鸟青白色，舒翼二丈余，集于灵泉池。后凉吕光太安三年，宴群僚于灵泉池，酒酣，语及政理。时刑法峻重，参军段业进曰：严刑重宪，非明王之义也。光曰：商鞅之法至峻，而兼诸侯；吴起之术无亲，而荆蛮以霸，何也？业曰：秦用苛法，禄祚不永。吴起任酷政，取灭会稽。大王受天明命，方君临四海，景行尧舜，犹恐有弊，奈何欲以申、商之末法，临道义之神州，岂此州士女所望于大王哉！光改容谢之。

七星涧。在县东七里。

卧龙城。即城异名也。其城檀道济筑土以成之，有若盘龙，形四方，有头尾两翅，一名鸟城，一名翅城。

龙夷城。在县西。即汉戊己校尉所理之地，言在内以统御四方。王莽时，以其城为西海郡，即此城也。一名宴然城。

休屠城。即汉休屠王所理之地，汉亦为县。

鹑阴城。在县东。鹑，水名。俗名正阴城，是汉鹑阴城县，今废城存。

祖厉城。名马城。汉立祖厉县焉。

神乌县。十七乡。本汉鸾鸟县地，属武威郡。后魏平凉中改神乌。县周证圣元年改为武威县，取废武威之额以名之。唐神龙元年复旧为神乌县，仍于汉鸾鸟古城置。

昌松县。东南二百三十里。元六乡。本汉苍松县，属武威郡。《十六国春秋》云：后凉吕光麟嘉四年以郭麐。^②言讖，改为昌松，县兼于此立东张掖郡。至后周废郡，县仍旧隶凉州。

注：①皆积雪：皆，万本、《库》本皆作多，傅校改同。②麝香：万本、《库》本皆无此二字，傅校删，盖非乐史原文。

金山。在县南，丽水出焉。

白岭山。在县西南。山顶冬夏积雪，望之皓然，乃谓之白岭山。寒气异于余处，深冬人绝行路，鸟飞不下。

乌逆水，一名逆水，今名丽水。源出县南金山。《汉书》《地理志》云：金城郡允吾县，乌亭逆水出参街谷，东流至枝阳入湟。是此水也。

鸾鸟城。前凉张轨时有五色鸟集于此，遂筑城以美之。后魏武帝改为神鸟城。

金吕城。晋将马隆所筑。依于金山筑之，城因山以立名。其山有鸟，形似雀，见人即以嘴啄石，自图其形以示人。

魏安城。在郡东。汉扑县，后为魏安，隋省。

允^①。街故城，汉县，今废城在今县东南。城临丽水，一名丽水城。按其城地势极峻，即沮渠防逊增筑，以为防戍之所，迄今尚坚完如新。

注：①允音沿：底本错于下文鹿水城下，《库》本同，据万本乙正。

番和县。西一百八十里。元五乡。汉旧县，属张掖郡。后魏立张掖郡于此，寻废。唐咸亨元年于县置雄州。调露元年废雄州。天宝三年三月以界内天宝山出醴泉并石花，遂改为天宝县，至长庆中仍旧改为番和县。

南山。一名天山，一名雪山。山阔千余里，其高称是，连亘数郡界。美水丰草，尤宜畜牧。故葱岭以东，无高于此山。亦出赤鹿，足短而形大如牛，肉千斤。

土弥干川。即今为匈奴放牧之地。鲜卑语髓为吐弥干，言此川土肥美如髓，故以名之。

青涧水。《周地图记》云，青涧源与五涧水合流是也。

武威县。汉县，《地理志》属武威郡。在番和县西北三百里。后魏以来废之，唐世时，或立之，废置不定。

嘉麟县。西北七十里。今五乡。唐神龙二年于汉鸾鸟古城置。景龙二年废。先天二年复置。

甘州

甘州，张掖郡。今理张掖县。《禹贡》雍州之域。《书》谓导弱水至于合黎。余波入于流沙，是此也。六国至秦为月氏居焉。汉初为匈奴右地。又《西域传》：月氏本居祁连、敦煌间。按《霍去病传》曰：济居延，臻小月氏，攻祁连。即路从此也。故武帝开之，因置张掖郡。后至魏、晋，凉州至。沮渠防逊始都于此，号为北凉也。后魏太武平凉，以为张掖军，至太和十一年改军为郡。大统十二年分凉州，以居张掖之地为西凉州。废帝二年更名甘州，因东甘峻山以为名也。后周又为张掖郡。隋因之。唐武德二年平李轨，置甘州。天宝元年改为张掖郡。乾元元年复为甘州。

元领县二：张掖，山丹。

州境：东西四百一十六里。南北一千三百七里。

四至八到：东南至东京三千七百八十里。东南至西京三千三百六十里。南至长安二千五百里。东至凉州五百里。南至大雪山以南吐谷浑分界三百三十里。西至肃州四百二十里北至张掖河屈曲过同城镇，至峡口烽总三千七十八里。东南至凉州六百里。西南至肃州福禄县界赤柳涧三百三十里。西北至肃州福禄县界咸池烽张掖三百五里。东北至凉州番和县石峡峰三百七十里。

户：唐天宝户六千二百八十四。

风俗：同凉州。

人物：金日防，字翁叔，匈奴休屠王太子。魏庞涓，字子异^①，酒泉人。为西海太守。唐赵彦昭。甘州张掖人也。相中宗。

土产：香子，驼褐，布，野马皮。

注：①子异：异，底本作冀，万本同，据《库》本，傅校及《三国志》卷一八《魏书》《庞涓传》改。

张掖县。十四乡。本汉觿得县，属张掖郡。《西河旧事》云：此地本匈奴觿得王所居，因以名县。隋置为张掖县。

祁连山。在县西南二百里。东西二百里，南北一百里。《汉书》：霍去病攻祁连山，得首三万余级。《西河旧事》云：祁连山在张掖、酒泉二郡界之上，有松柏五木，美水茂草。山中冬温夏凉，宜放牧，牛羊充肥，乳酪浓好，夏防酪不用器物，刈草著其上不散，作酥特好，一斛酪得酥斗余。又有仙树^①，人行山中，饥渴者食之则饱，不得持去，平居时亦不可见。

注：①仙树：按《太平御览》卷五〇引《凉州记》作仙人树，此疑脱人字。

临松山。一名青松山，又名马蹄山，又云丹岭山，在县南一百二十八里。《十六国春秋》：晋元嘉元年，张掖临松山有石如张掖字，后掖字渐灭，而张字分明。又有文曰：初祚天下，四方安万年。后魏太和中置临松郡，故城在此山下。吐蕃赞普，即其郡丞异称也。

故望山。有神，每祀之时，但闻音声，不见其形。

甘峻山。一名绀峻山。《水经注》云：弱水利甘峻山南，与张掖河合，即鲜水也。

合黎水。一名羌谷，鲜水一名覆袁水，今名副授河，亦名张掖河，南自吐谷浑界流入。《禹贡》：遵弱水，至于合黎。孔安国注云：合黎，水名。在流沙东，即谓此也。在今州西北二百九十里。《礼记》《王制》自西河至流沙，千里而遥，即此也。

居延海。在县东北一千六百里，即古之流沙泽也。

盐池。周百步许。多少随人力以自增减。

墨水。出县界鸡山，亦名悬圃。^②昔娥氏女简狄浴于元邱之水，即黑水也。

弱水。东自删丹县界流入，在州北二十三里。

大柳谷水。《魏氏春秋》：明帝青龙三年，张掖郡删丹县金山有玄川溢涌，宝石出焉，有石马，魏为晋代之符也。

袁氏故城。汉县，废城在今县西北。或谓昭武城。

张掖郡城。亦在今县西北四十里，汉为郡之所。

遮虏障。汉将路博德之所筑。李陵败，与士众期至遮虏，即此也。

居延城。汉为县，废城在今县东北。即本匈奴中地名也，亦曰居延塞。

驛馬戍。傳云：昔有驛馬二匹，為匈奴掠去。數載自歸。以其地為邊防，因此以立戍名也。

千秋城、萬歲地。皆光武將竇融所筑，以扼邊夷。

山丹縣。東一百二十里。元二鄉。本漢旧縣也，屬張掖郡。後漢興平二年分置西郡，以山丹縣屬焉。晉分山丹置蘭池、萬歲，仙堤三縣。隋煬帝并三縣之縣復改立山丹縣焉。

焉支山。一名山丹山，東西百余里，南北二十里。《西河旧事》云：焉支山東西百余里，南北二十里。亦有松柏五木。其水草美茂，宜畜牧，與祁連山同。匈奴失祁連山、焉支山二山，歌曰：亡我祁連山，使我六畜不繁息。失我焉支山，使我婦女無顏色。

日勒城。漢為日勒縣，故城在今縣東南。

肅州

肅州，酒泉郡。今理酒泉縣。《禹貢》雍州之域，與甘州同。昔月氏之地，為匈奴所滅，匈奴令休屠、昆雅王守之。漢武帝時，昆雅以眾來降，以其地為武威、酒泉郡。酒泉者，蓋城下金泉，味如醴，故以名之。按郡即羌胡通譯之路，入月氏、大夏，皆由此也。漢以公主妻烏孫都之，以分匈奴西方之擾。後漢至晉，亦因之不改。前涼張軌、西涼李暠、北涼沮渠蒙遜，并都之。後魏太武平沮渠茂虔，乃以酒泉為軍，隸敦煌，後改鎮為瓜州，復立郡于此。大統十年以酒泉郡屬甘州。隋仁壽二年分甘州福祿縣置肅州，以隸涼州總管府。煬帝初州廢，以其地入張掖郡。唐武德二年分張掖郡復置肅州，八年至都督府，督肅、瓜、沙三州。貞觀元年罷都督府，廢玉門縣。天寶元年改為酒泉郡。乾元元年復為肅州。《河西旧事》云：福祿城，因謝艾所筑，城下有金泉，味如酒，故曰酒泉。

元領縣三：酒泉，福祿，玉門。

州境：東西五百六十四里。南北五百四十里。四至八到：東南至東京四千一百八十里。東南至西京三千七百六十里。東南至長安二千九百

里。东南至甘州四百二十里。南至吐蕃界二百里。南至雪岭二百五十里。西至。州五百二十六里。北至回纥界伏谷泉三百里，又至葭芦泉五百里。东南至甘州界赤柳涧二百里。西南至州界安乐烽三百四十里。西南至瓜州三百四十里。东北至甘州张掖县咸池烽二百三十二里^①。

户：唐天宝户二千二百三十。

风俗：同凉州。

人物：马访，酒泉人。为右将军。祁嘉^②。字孔宾，酒泉人。夜忽闻窗中有声呼云：祁孔宾，隐去来。

土产：野马皮，肉苁蓉柏脉根。

酒泉县，六乡。本汉之福禄县地，《地理志》属酒泉郡。隋仁寿二年又置酒泉县，以郡郭焉。

注：①咸池烽：咸，底本作盐，据万本、中大本、《库》本及《通典》《州郡》四改。②祁嘉：祈，底本作祁，万本、《库》本同，据《晋书》卷九四《隐逸转》祈嘉改。

昆仑山。在县西南八十里。《十六国春秋》云：后魏昭成帝建国十七年，前凉张骏酒泉太守马岌上言：酒泉南山，即昆仑之体也。昔周穆王见西王母，乐而忘归，即谓此山。有石室玉堂，珠玑镂饰，焕若神宫。删丹西河名曰弱水，《禹贡》昆仑在临羌之西，即此明矣。宜立西王母祠，以裨朝廷无疆之福。骏从之。

九陇山。在县南百里。《周地图记》云：昔有神人，坐张掖西方山上，西射酒泉郡西金山之白神，射得九筹，画此山上，遂成九陇，因以为名。

石漆。延寿城中有山，出泉注地，其水肥如牛汁，燃之如油，极明，但不可食。此方人谓石漆，得水愈炽也。

鸿鹭山。《穆天子传》云：天子循黑水，至于璧玉之山。谓此也。今为鸿鹭所栖得名。

独登山。岩石之间出石盐，其味尤美于海盐也。

呼蚕水。一名潜水，亦名羌谷水，俗又谓福禄河。西南自吐谷浑界流入。《汉书地理志》云呼蚕水出南羌中，东北至会水入羌谷是也。

会水。一名白亭海，在县东北三十里^①。《十三州志》云：众羌之水所会，故曰会水。北有白亭，俗因谓之白亭水也。

注：①在县东北三十里：按《元和郡县图志》肃州载：白亭海，在酒泉县东北一百四十里。此里数恐误。

故长城。汉书谓之遮虏障，在县北。

金城塞。汉平帝时，金城塞外羌献鱼盐之地，遂得西王母石室，以为西海郡，路由此塞通也，后为吐谷浑之国。隋破吐谷浑，又于其地置西海郡。按汉帝常置郡，在今州直北一千二百里是也。

刘师祠。在县南。师姓刘，字萨诃。沮渠时，西求仙，回至此，死骨化为珠，血化为丹，门人因立庙于此。今人至心者谒之，往往获珠丹焉。

福祿县。东一百里。三乡。汉福祿县，属酒泉郡。今县即汉乐涇^①。县地，属酒泉郡。唐武德二年于乐涇古城置福祿县，复汉旧名。

注：①音官：万本、《库》本皆无此二字。

崆峒山。在县东南六十里。《史记·五帝本纪》云：黄帝披山通道，未常宁居。东至于海，登丸山，及岱宗，西至于崆峒山是也。按《九州要记》云：凉州，古武威郡有天山，黄帝授金液神丹于此。山近崆峒山，顶有魏太祖塿焉。

玉门县。西二百里。一乡。本汉旧县也，属酒泉郡。《十三州志》云：玉门县置长三百里，石门周匝山间，裁经二十里，众泉北流入延兴海。汉罢玉门关屯，徙其人于此。故曰玉门县。唐贞观中废。

金山。《九州要记》云：山有赤弹木，堪为漆用。

玉石障。按《十三州志》云：延寿县在郡西，金山在其东，至玉石障，是亦汉遮虏障也。

沙州

沙州，敦煌郡。今理敦煌县。《禹贡》雍州之域。亦西戎所居，古流沙之地，黑水所经。《尚书》所谓舜甯三苗于三危，三危既宅，即此地。其后子孙为羌戎，代有其地。《左传》谓允姓之戎是也。昔范宣子数戎子驹支

曰：昔秦人迫逐乃祖吾离于瓜州，蒙荆棘以来归我先君，（我先君）惠公有不腆之田，与汝剖分而食之。即此地也。按《十三州志》云：瓜州戎为月氏所逐，秦并六国，筑长城，西不过临洮，则秦未有此地。汉武帝后元六年分酒泉之地置敦煌郡，徙边人以实之。应邵云：敦，大也；煌，盛也。故以名之。后魏天兴三年，凉武昭王立于敦煌，以子让为之郡守。分敦煌之凉兴乌泽、晋昌之宜禾三县置凉兴郡焉。昭王五年自敦煌迁于酒泉，后为北凉所并，其地属沮渠蒙逊。后魏平北凉，敦煌仍旧不改。隋初废郡，置瓜州。炀帝初废州，后为敦煌郡。唐武德三年置瓜州^①，五年改为西沙州。贞观七年去西字，只为沙州。天宝元年改燉煌郡。乾元元年复为沙州。自天宝末陷西戎，至大中五年七月，刺史张义潮遣兄义谭将本道图经户籍来献州归顺；其年十一月，制除义潮检校吏部尚书，兼金吾大将军，充归义军节度使，河、沙、甘、肃、伊、西等十一州管内观察处置等使，仍许于京中置邸舍，地当乾位，华夷表所交，实一都会之府也。周显德二年，甘州可汗、沙州节度观察使留后曹元忠，各遣使进方物；其外瓜州团练拾仍久隶沙洲，以归义军节度观察留后曹元忠为节度使，以知瓜州军事曹元恭为瓜州团练使，仍各铸印以赐之，皆旌来王之意也。

注：①唐武德三年置瓜州：三年，《元和郡县图志》卷四〇、《旧唐书》卷四〇《地理志》三沙州总序皆作二年。

元领县二：敦煌，寿昌。

州境：东西。（缺）。南北。（缺）。

四至八到：东南至东京五千二十九里。东南至西京四千六百九里。东南至长安三千八百五十九里。东至瓜州二百八十里。东南至瓜州界三百五十里。南至寿昌废县中界五十里，以破石亭为界去鄯善国一千五百里。南至故南口烽三百五十里，烽以南即吐谷浑界。北至故咸泉戍三百三十六里，与伊州分界。西南至郡废寿昌县界二百九十里。西北至河苍烽二百四十二里，与废寿昌县分界。东北至伊州界三百八十六里。

户：唐天宝户四千二百六十。

风俗：与甘、肃州同。人物尤繁富。

人物:索靖,字幼安,敦煌人,官族累荣,草书绝人,号得张芝肉。为尚书郎。郭瑀,字元瑜,敦煌人。少有超俗之志,好谈论。

土产:黄矾,棋子,名马,麝香。

敦煌县。十二乡。本汉旧县,属敦煌郡。后周保定三年改敦煌为鸣沙县,以县界鸣沙山为名。隋帝初复为敦煌县。

三危山。其山有三峰,故曰三危。俗亦名为升雨山。在县东南二十里。《尚书》所谓舜窜三苗于三危,是此山。又云:遵黑水,至于三危,入于南海。盖黑水自北而南,经三危,过梁州,入南海。《山海经》云:三危之山,青鸟居之。三青鸟主为西王母取食者,别自栖息于此山也。又按段国《沙州记》云:山有鸟鼠同穴者,鸟如家雀而小白,鼠小黄而无尾。凡同穴之地皆肥沃,壤尽软熟如人耕,多生黄花紫草。

鸣沙山。一名沙角山,亦名神沙山,在县南七里。辛氏《三秦记》云:河西有沙角山,峰嵒危峻,逾于石山,其沙粒粗黄,有如干防。又山之阳有一泉,云是沙井,绵历今古,沙不填之。人欲登峰,必步下石穴,即有鼓角之音,震动人足。又《河西旧事》云:沙州天气晴朗,即沙鸣,闻于城内。又云:人游沙山,结侣少,或未曾游,即生怖惧,莫敢前。其沙或随人足自顿下,经宿却自还山上。

羊膊山。多岩石,少树木,甚似鲁国南邹山。山北行三十里远眺顾瞻百里,但见山岭巉岩,无尺木把草。

王母樗蒲山。山有盐池,在县西南。

悬泉水,一名神泉,在县东一百三十里。出龙勒山复。按《凉州异物志》云:汉贰师将军李广利伐大宛还,士众渴乏。广利乃引佩刀刺山,飞泉涌出,三军赖此以获济。今有祠甚严,郡侯岁谒。

渥洼水。汉元鼎中,南阳新野人暴利长遭刑,屯田于此水边。见群野马来饮,中有奇者,乃作土人持勒鞞立,后马因玩久之。利长乃用人代土人,收得马以献。帝异之,云从水中出,遂作《天马歌》。故《汉书》谓大宛出名马,亦相近也。

雌黄洲。其土出雌黄、丹砂极妙,因产物以为名也。

寿昌县。西南一百五十里。三乡。本汉龙勒县地，《地理志》云：属敦煌郡，以县东南有龙勒山以名县。后魏正光三年改为寿昌县，取县界寿昌泽为名。

三陇。《河西旧事》云：流沙积，在玉门关外，有三断石极大，呼为三陇。

白龙堆。按皇甫谧《郡国志》云：敦煌正西外，有白龙堆。

北塞山。《河西旧事》云：汉武遣贰师将军伐大宛，得天马。马感西风思归，遂顿羈絆，骹首而驰，晨发京城，食时至敦煌北塞山下，嘶鸣而去。因名此处为侯马亭。今晋昌及大武马蹄谷石上有马蹄践之迹犹存。

玉门故关。在县西北一百一十八里。昔匈奴冒顿质于月氏亡归，乃射杀其父头曼，举兵西击走月氏。后为霍去病所破，因开玉门关，通西道七十余国。《汉书·地理志》云：龙勒县有玉门关，都尉治。《西域传》云：东则接汉，扼以玉门、阳关。又后汉班超上书：愿入玉门关。是此处。

寿昌泽。在邑界，因名之。

阳关。在县西六里。以居玉门关南，故曰阳关。关之西三百余里，有蒲昌海，一名盐泽，广袤三百余里，即葱岭、于阗两河之所注。

瓜州

瓜州，晋昌郡。今理晋昌县。《禹贡》雍州之域。古西戎地。战国时为乌孙、月氏居焉。汉初为匈奴右地，武帝拓开边封，立为敦煌郡，后又为武威、酒泉二郡之地。历汉至魏亦然。晋惠帝始分置晋昌郡，领冥安等八县。至苻坚时，徙江汉流入万余户于敦煌，又徙中州不辟田畴民七十余户于此。至凉武昭王遂以南人置防稽郡。以中州人置广夏郡。至后周初并之，复为晋昌郡。至武帝改晋昌为永兴郡。隋初罢郡，立瓜州。炀帝初废之，以其地并入敦煌。至唐武德五年复立为瓜州，按其地出美瓜，故曰瓜州。今犹有大瓜，长者，狐入其中，食之，不见首尾。仍置总管府，管西沙、肃三州，^①八年罢都督府。天宝元年改为晋昌郡。乾元元年复为瓜州。

注：①管西沙肃三州：按《新旧唐书合抄》卷五九《地理志》管下有瓜字，此盖脱。

元领县二：晋昌，常乐。

州境：东西三百九十三里。南北六百八十四里。

四至八到：东南至东京四千七百二十六里。东南至西京四千三百六十里。东南至长安三千三百八十四里。南至新乡县镇一百八十里。南至大雪山二百三十里。西至沙州二百八十里。北至豹门守捉四百五十里。东南至肃州界三百四十里。西南至沙州一百六十里。西至伊州界吐蕃儿山四百五十里。东北至酒泉郡三百四十里。西北至伊州九百里^①。

注：①西北至伊州九百里：九，《通典》《州郡》四作五。

户：唐天宝户四百七十七，至长庆一千二百。

风俗：同凉州。

人物：张焕。字然明，敦煌人。

土产：野马皮，革鼓子。

晋昌县。二乡。本汉冥安县，《地理志》属敦煌郡。冥水名也。晋置晋昌郡及冥安县。隋初改为常乐县。唐武德四年又改为晋昌县。

籍端水。一名冥水。《地理志》云：冥安县，南籍（端）水出南羌中，西北入冥泽是也。

白水。有昆仑障在其阳。

宜禾故城。汉宜禾都尉所居，城在县西北界。乃后魏明帝正光元年侨立会稽郡于此。

伊吾故城。今在县北。

常乐县。西百五十一里。二乡。本汉广至县地，属燉煌郡。魏分广至置宜禾县。《十六国春秋》云：凉武昭王元年分敦煌之凉兴乌泽、晋昌之宜禾三县置凉兴郡。隋废，于三危山东置常乐镇。唐武德五年改镇为常乐县也。

汉广至故城。在县西北。恒以大石栈之，稍开即有风暴至伤人。

河州

河州，安乐郡。今理枹罕县。亦雍州之域。古西羌地。《禹贡》导河积石，山在金城西南之所经，秦为陇西郡地。汉武帝分陇西置天水、张掖二郡。昭帝立金城郡，今州即金城郡之枹罕县也。元属凉州部，至汉灵帝时，陇西宋建据此，自称河首平汉王，聚众枹罕，改元，置百官，三十余年。魏夏侯渊讨平之。晋元康中立枹罕护军，秩二千石，居之狄道县。张骏二十一年以州界辽远，分晋兴等六郡置河州，即今州是也。西秦乞伏乾归又据于此。后魏亦为河州。后周置枹罕郡。隋文帝废郡，复为河州。至炀帝废州，又为郡。唐武德二年平李轨，置河州，领枹罕、大夏二县。贞观元年废大夏；五年复置；十年省米州，置米川县，来属；十一年废乌州，以其城置安乡县，来属。天宝元年改为安乡郡。乾元元年复为河州。

元领县三^①：枹罕，大夏，凤林。

州境：东西二百二十八里。南北三百七里。

四至八到：东南至东京二千七百四十里^②。东南至西京二千三百二十里。东南至长安一千四百六十里。东至兰州三百里。南至洮州三百一十七里。西北至鄯州龙支县一百八十六里。东北至兰州三百里。

注：①元领县三：元，底本无，据万本，《库》本及傅校补。后洮州同。

②东南至东京二千七百四十里：七、四，万本、《库》本皆作四、七。

户：唐天宝户五千七百八十二。

风俗：同洮州。

人物：无。

土产：与洮州同。

枹罕县。八乡。本汉旧县，属金城郡。按《周地记》云：枹罕，即故罕羌侯邑也。后魏至唐，州皆治于此。

积石山。一名唐述山^①，今名小积石山，在县西北七十里。《禹贡》曰：浮于积石，至于龙门西河。《西域传》曰：河东注蒲昌海。潜行地下，南出

于积石,为中国河。《续汉书·郡国志》:陇西河关县,积石山西南,河水出焉。

注:①唐述山:述,底本作石,《库》本同,据万本及《水经》《河水注》《元和郡县图志》河州改。

大河源。《西河旧事》云:葱岭在敦煌西八千里,其山高大,上悉生葱,故曰葱岭。河潜发其岭,分为二水。《凉州异物志》云:葱岭水分东西,西入大海,东为河源。张骞使大宛而穷河源,谓极于此,不达昆仑也。

离水。《汉书·地理志》云:金城白石县,离水出西塞外,东至枹罕入河。

渝城溪、乌头川。皆在郡东。

大夏县。东南七十里。元四乡。本汉旧县,属陇西郡。《十六国春秋》:张骏十八年分武始、晋兴、广武置大夏郡及县,取县西大夏水为名。

金剑山。在县西二十里。亦有金剑故城,一号金柳城,即前凉曾为金剑县于其中。

大夏水。一名白水,出县西南大谷中。

凤林县。西南八十里。元九乡。本汉白石县地,属金城郡,前凉张骏八年改白石为永固县。唐贞观十年分河州于此置乌州,十一年废乌州,置安乡县,属河州。天宝元年改为凤林县。

凤林关。在黄河侧。

石门山。郦道元《水经注》云:漓水又东北径石门口,山高险绝,对崖如门,峡故得名,疑即皋兰山门也。汉武元狩三年,骠骑将军霍去病出陇西,至皋兰。今是山去河不远,应谓此。

阶州

阶州,武都郡。旧理将利县,今理福津县。土地所属与成州同,亦白马氏之地。《汉书·西南夷传》曰:汉诛且兰、邛君,并杀苻侯,冉骘皆震恐,请臣置吏。以广汉西白马武都郡。后汉因之。魏黄初中徙武都于美

阳,在今京兆好畤界武都故城是也,其时以故地为武都西部都尉理。蜀汉建兴七年,诸葛武侯遣陈戎攻武都、阴平二郡^①,始入蜀。后属晋,复为郡。至愍帝末,刘曜入长安,氐羌相率降伏。其后有氐豪茂搜、勇健为羣氐所推,王于武都之地。自茂搜之玄孙盛立,乃分诸氐羌为二十部护军,各为镇戍,不置郡县,至子难当,为宋所灭。其后杨氏苗裔复拥众据武都之仇池山。至后魏又平之,因筑城于仙陵山东置武都镇。后入西魏,始改置武州。后周又为武都郡。隋初废郡,大业初复为郡,唐武德元年置武州,领将利、建威、覆津、盘堤四县。贞观元年省建威入将利。天宝元年改为武都郡。乾元元年复为武州。大历二年亦同秦州陷入吐蕃。至大中三年收萧关,至五年七月复立武州,即今州是也。景福元年改为阶州。后唐长兴三年移就故武州为理。晋末,契丹猾夏,秦、成、阶三州叛入蜀,周显德二年,阶州归顺。

注:①陈戒:《资治通鉴》卷七一魏太和三年同,《三国志》卷三三《蜀书》《后主传》作陈式。

元领县三。今二:福津,将利。

一县废:盘隄。防蕃废。

州境:东西四百八十里。南北三百二十里。

四至八到:东北至东京二千四百八十里。东北至西京二千六十里。北至长安一千二百里东至成州三百里。南至文州二百四十里。西至蕃州界二百里。北至秦州五百六十里。东南至兴州四百三十里。西南至符州蕃界三百五十里。东北亦连接秦州成州界三百里。西北亦连接蕃界一百八十里。

户:唐天宝户二千九百二十三。皇朝户主一千六十九,客四千六百二十。

风俗:文王为西伯,理化西羌。文王薨后,羌人感文王之化,妇人为孝髻角,至今不泯。

人物:无。

土产:蜜。旧贡。麝香,今贡。马,出花椒,大黄,巴戟,石盐,水银,碌

矾,狨皮。

福津县。旧四乡,今三乡。本汉河池县地,在后魏为武阶郡。按《魏志》:大统五年于今县东北三十里故万郡城置覆津县,属武阶郡。隋废武阶郡,县属武都郡。自唐景福元年再置县,改为福字。后唐长兴三年移州于此。

白江水。从西蕃界东流到州,流入文州,合嘉陵江。

将利县。东二百十里。元六乡,本汉之氐、羌地^①,汉置武都郡并县。后魏平仇池羌属,因改武都为石门县。周闵帝元年改为将利县。旧为州理,今为外邑。

注:①本汉之氐羌地:氐,底本脱,据万本、《库》本补。本书阶州总序云:亦白马氐之地,是也。

沮水。按《郡国志》云武都沮水之西,有角弩谷,即蜀将姜维剿五部氐、羌之所。天池大泽,在郡西。

紫水。《陇右记》云:武都紫水有泥,其色赤紫,而粘贡之封玺书,故诏诰有紫泥之美。

废盘堤县。在州南一百三十五里,亦汉河池县地,后魏废帝前二年于此置武阳郡,领盘堤县。后恭帝元年于今县东南一百四十二里移盘隄县于故城以置县,因山名也。自武州陷复废。

盘堤山。在县西。

洮州

洮州,临洮郡。今理临洮县。《禹贡》雍州之域,谓西倾、朱圉、鸟鼠。山在今州西南吐谷浑之界内。秦、汉及魏、晋,皆诸羌所居,后又后为吐谷浑侵据其地。后周明帝元年逐吐谷浑,始得其地,因置洮阳防,武帝保定初立为洮州。其郡城本名洮阳城,在洮水之北,乃吐谷浑所筑。南临洮水,极险。今谓之洪和城是也。隋初州如故,至炀帝废州为郡。唐武德二年置洮州。贞观四年移州治于洪和城,后复移还洮阳城,今州治也。永徽元年置都督府。开元十七年废并入岷州,临潭县置临州,二十七年又改

为洮州。天宝元年改为临洮郡，管密恭县，党项部落也，寄治州界。乾元元年复为洮州。后唐长兴四年升为保顺军节度使。

元领县二：临潭，美相。

州境：东西五百五十里，南北二百二十里。

四至八到：东至东京二千八百一十六里。东至西京二千三百九十六里。东至长安一千五百六十里。东至岷州一百七十六里。南至叠州一百七十九里。西至黄河六百里。西至野，更无郡县。北至河州三百一十七里。东南至吐谷浑界。西北至千旭戍界一百八十里。东北至河州三百一十七里。

户：按《十道录》云：开元以前未计户口，长庆户二千八百，口一万五千。

风俗：同岷州。

人物：董卓，陇西临洮人。唐李晟，陇右临洮人^①。封西平郡王。德宗朝以陇右未复，请附贯万年县。

注：①陇右临洮人：《旧唐书》卷一三三《李晟传》同，《新唐书》卷一五四《李晟传》作洮州临潭人。

土产：同岷州。

临潭县。七乡。本土谷浑之镇，谓之洪和城。后周改为美相县，属洮州。唐贞观四年移洮州理于此；五年置临潭县，属旭州；八年废旭州，县来属；其年复移还洮阳城，今州治也。仍于洪和县置美相县，隶洮州。天宝中废美相并入。

崆峒山。亦经郡界。《尔雅》谓崆峒之人武。

洮水。源出西倾山，亦曰强台山，在县西南三百三十六里，即吐谷浑界。《汉书·地理志》云：洮水出西羌中，北至枹罕东入河。又《沙州记》云：洮水与垫江水俱出西强台山，山南即垫江源，山东则洮水源也。

柏水。亦是吐谷浑界流经邑。

秦长城。《史记》云：东至碣石^①。西至临洮是也。

鸣鹤城、镇念城、三足城。皆吐谷浑昔有此地时所筑，今属郡地。

美相县。东七十里。一乡。本后周之洪和郡也。周明帝武成元年置洪

和郡并当夷县,以郡属岷州。武帝时,郡省,以县属同和郡。

岷州

岷州,和政郡。今理溢乐县。《禹贡》雍州之域。六国时为秦地,至始皇初置三十六郡,此即陇西郡之临洮县地。按秦筑长城起临洮郡,长城今州西二十里,起崆峒山,自山傍洮水而东,是知秦之临洮在此矣。秦末至汉、魏、晋并为陇西郡地,至后魏大统十年于此置同和郡及岷州,以南有岷山,因以为名。隋文帝初废郡,复为州。至炀帝初州废,并其地入临洮郡。唐武德初复为岷州,置总管府,管岷、宕、洮、叠、旭五州,七年加督芳州,九年又督文、武、扶三州。贞观元年督岷、宕、洮、旭四州,六年督桥、意二州,十二年废都督府。神龙元年废当夷县。天宝元年改为和政郡。乾元元年复为岷州。

元领县四^②:温乐,祐川,和政,当夷。

州境:东西一百六十三里。南北三百六十七里。

四至八到:东北至东京二千六百四十里。东北至西京二千二百二十里。东北至长安一千三百七十八里。东至渭州三百里。南至宕州二百五十里。西至洮州一百七十六里。北至兰州狄道县五百三十四里。南至宕州良恭县一百一十三里。西南至洮州一百七十六里。西北至河州大夏县三百六十三里。东北至渭州二百五十四里。

注:①东至碣石:底本东下衍南字,据万本、《库》本删。②元领县四:元,底本无,据万本、《库》本补。下郭洲、叠州、宕州同。

户:唐天宝户四千三百二十五。

风俗:贵于妇人。

人物:无。

土产:麝香、龙须席。

溢乐县。六乡。本秦之临洮县,《汉书·地理志》云:属陇西郡,后魏大统中置同和郡,仍改临洮县为温乐县。隋复改为临洮。唐武德初改为溢

乐，神龙元年度当夷县人。

岷山。在县南一里。山黑无树木，其西有天女神，洮水经其下。即夏禹见长人受黑玉书处。

崆峒山，在县西二十里。

步和川。羌人谓之天泉。

长城。在县南一里，蒙恬所筑。

祐川县。东北七十里。元四乡。本后周基城县，明帝武成元年置，属洮城郡。唐先天元年改为佑川县，避玄宗名也。

和政县。东北三十里^①。元四乡。本后周之洮城郡，保定元年置和政县。隋初废郡，县属岷州。

注：①东北三十里：三十，《库》本同，万本作三十二，同《元和郡县图志》岷州。

金通山。在县南一里。

索西故城。后汉明帝时，金城、陇西羌反于临洮，道峻，车骑不得方挽，车骑将军马防设奇兵破之，因筑此城以屯戍军士。在今县东，亦名临洮东城，亦谓之赤城。

当夷县。周武城元年更修置今通戍，其城即吐谷浑所筑。唐贞观二年置当夷县于此，县额寻废。

叠州

叠州，合川郡。今理合川县。《禹贡》梁州之域。历代为羌胡之境，因诸羌保据。后周建德六年，西逐诸戎，始有其地，因置恒香郡，寻改为叠州，盖取其地多山重叠以名郡也。隋初省州，以其地并隶同昌郡。大业末陷入吐蕃。唐武德二年复置叠州，领合川、乐川、叠川三县；五年又置安化、和同二县^①，以处党项，寻省。贞观二年省叠川、乐川县，十三年置都督府，督叠、岷、洮、宕、津、序、壹、柘、嶂、玉、盖、立、桥等州^②。永徽元年罢都督府。上元元年。吐蕃入寇，密恭、丹岭二县杀掠并尽，于是废二县。神龙元年度芳州为常芬县来属。天宝元年改为合川郡。乾元元年复

为叠州。

注：①和同：同，底本脱，万本、《库》本同，据傅校及《旧唐书》《地理志》三、《新唐书》《地理志》四补。②督叠岷洮宕津序壹柘嶂玉盖立桥等州：柘、玉，《旧唐书》《地理志》三作枯、王。

元领县二：合川，常芳。

州境：东西二百六十五里，南北一百二十九里。

四至八到：东至东京二千九百八十里。东至西京二千五百六十里。东至长安一千七百里。东南至沿江至宕州二百五十里。南至吐蕃界三十里。北至黄河上党项序州二百八十里。北至洮州一百八十里。东南至扶州三百三十九里。西南至吐蕃界七十里。又去故芳城一百四十里。西北至吐蕃界七十里。东北至岷州四百五十里。

户：唐天宝领县二，户一千二百七十五。

风俗：同松州，近蕃界。

人物：无。

土产：麝香，羊，马。

合川县。六乡。后周武成中于此置合川县，以大江所合为名，属西强郡。隋开皇初郡废，其他属叠州，旧治吐谷浑马牧城，唐武德三年移治文城戍。

石镜山。在县西北四十五里。其山有石，明莹皎洁，照之莫不备见其形体，故谓之石镜山。山下又有铜窟，隋开皇中于此置监，鼓铸钱刀焉。

常芬县。东南一百二十里。五乡。其地后魏所得，寻又为吐谷浑所据。后周武成元年，西逐诸羌，始统有其地，乃于三交口筑城，置甘松防，又为三川县以隶恒香郡。至建德元年改三川为常芬县，仍立芳州，以邑隶焉，取其地多甘松芳草为名。隋初废州而县存。唐武德二年又置州于常乐城内为理。贞观三年又移松州于芳州城，即常乐城也。神龙元年废芳州为常芬县，仍隶叠州。又按《贞元十道图》云：叠、宕、武、成四州，自分十道后，并属陇右道。自上元年没入蕃，成、叠、宕、城武四州并置在白江之侧。

白江。即古羌之水，其江南流至利州益昌县，嘉陵江合。其成州在益昌嘉陵之东、马池岭之南，据山川形势，其五州并立合属山南道，因是而定焉。

宕州

宕州，怀道郡。今理怀道县。《禹贡》梁州之域。古羌地。周省梁入雍，又为雍州之域。秦、汉、魏、晋时，诸羌处之。后魏招抚四夷，始统有其地。《后魏书》梁弥忽者，宕昌羌也，其先常为羌豪祖勒，自称宕昌王。弥忽，世祖表求内附，世祖嘉之，拜弥忽为宕昌王，其后遂相传袭，称藩于魏，因封其地为宕昌蕃。周置宕昌国，武帝改为州。按《隋图经集记》云：周天和元年改为蕃置为宕州。隋为宕昌郡。唐武德元年置宕州，领怀道、良恭、和戎三县。贞观三年省和戎入怀道。天宝元年改为怀道郡。乾元元年复为宕州。

元领县二：怀道，良恭。

州境：东西三百六十五里。南北四百二十九里。

四至八到：东北至东京二千六百七十里。东北至西京二千三百四十里。东北至长安一千四百七十里。东北至武州二百七十五里。东北至扶州四百一十里。西至叠州二百五十里。北至岷州二百四十里。东南至武州二百五十里。西南至扶州二百五十里。东北至成州上禄县界三百二十里。西北至岷州二百五十里。

户：唐天宝户一千一百九十。

风俗：大类陇右，语杂羌、蜀^①。

人物：无。

土产：麸金、散麝香。

怀道县。四乡。后周天和元年置。唐贞观元年移于此，因立郡。

良恭县。北二百里。二乡。本周阳宕县，后周天和五年置宕昌郡。隋文帝开皇三年属宕州，十八年改为良恭县也。

注：①语杂羌蜀：蜀，万本作胡，《庠》本作人。

《元丰九域志》(宋)王存等

陕西路

中府,庆州,安化郡,军事。(唐定安军节度。后唐降军事。皇朝建隆元年升团练,四年复降军事。治安化县)。

地里。(东京一千九百里。东至本州界一百六十里,自界首至鄜州一百九十里。西至本州界九十里,自界首至原州九十里。南至本州界七十里,自界首至宁州六十里。北至安州三百六十里。东南至本州界九十里,自界首至宁州三十里。西南至本州界一百里,自界首至原州八十里。东北至宥州四百六十里。西北至本州界五十五里,自界首至环州一百二十五里)。

户。主一万二千六百三十八,客六千三百八十三。土贡。(紫茸毡四领,毡二十领,麝三两,蜡三十斤)。

县三。(乾德二年改顺化县为安化,省同川县入焉。熙宁三年以宁州彭原县隶州,四年省华池、乐蟠二县置合水县)。中,安化。(四乡。淮安、业乐、五交、景山四镇。大顺一城。东谷、西谷、柔远、大顺、安疆五寨。虐泥、美泥二堡。有马领山、延庆水)。望,合水。(州东南四十五里。七乡。金柜、凤川、华池三镇。华池一寨。荔原一堡。有子午山)。紧,彭原。(州西南八十里。六乡。董志、萧、赤城、宁羌四镇。有彭原池、睦阳川)。

望,宁州,彭原郡,军事。治定安县。

地里。(东京一千八百里。东至本州界一百二十五里,自界首至坊州一百二十五里。西至本州界五十里,自界首至泾州七十里。南至本州界七十五里,自界首至邠州四十五里。北至本州界六十里,自界首至庆州六十里。东南至本州界一百七十里,自界首至坊州一百四十里。西南至

本州界四十里,自界首至邠州一百里。东北至本州界一百二十五里,自界首至鄜州一百七十五里。西北至本州界四十里,自界首至原州一百五里)。户。(主三万三千二百六十八,客四千一百六)。

土贡。(荆齐、菴间各一十斤,席一十领,砚一十枚)。

县四。(太平兴国元年改丰义县为彭阳。至道三年以彭阳县隶原州。熙宁三年以彭原县隶庆州,五年以邠州定平县隶州)。

紧,定安。(七乡。交城、枣社二镇。有洛水、九陵水)。

紧,定平。(州南六十里。八乡。永昌一镇。有泾水)。

上,襄乐。(州东五十里。四乡。泥阳一镇。有延川水)。

上,真宁。(州东南七十里。三乡。山河、显圣二镇。有子午山、罗川水、要册湫)。

下,环州,军事。(唐灵州方渠镇。晋置威州。周改环州,后降通远军。皇朝淳化五年复为环州。治通远县)。

地里。(东京二千一百里。东至宥州三百五十五里。西至本州界一百三十里,自界首至原州七十里。南至本州界一百二十五里,自界首至庆州五十五里。北至韦州三百八十里。东南至本州界六十五里,自界首至庆州一百五十里。西南至本州界一百三十五里,自界首至原州七十里。东北至盐州三百七十五里。西北至灵州四百六十五里)。

户。(主四千一百九十九,客二千三百八十四)。

土贡。(甘草一百斤)。

县一。(天圣元年改通远县为方渠,景佑元年复为通远)。

上,通远。(三乡。木波、马岭、石昌、合道四镇。乌仑、肃远、洪德、永和、平远、定边、团堡、安塞八寨。有咸河、马岭坡)。

下府,秦州,天水郡,雄武军节度。(治成纪县)。

地里。(东京二千三十里。东至本州界一百一十五里,自界首至陇州九十三里。西至本州界一百五里,自界首至通远军一百五十五里。南至本州界一百八十里,自界首至凤州二百一十里。北至本州界一百五十九里,自界首至德顺军一百四十里。东南至本州界一百五十里,自界首至

凤州二百七十里。西南至本州界一百九十五里，自界首至成州七十里。东北至本州界一百八十里，自界首至陇州九十里。西北至曹司堡二百二十九里)。

户。(主四万三千二百三十六，客二万三千八百八)。

土贡。(席二十领，芎蒭三十斤)。

县四。(建隆三年以良恭、大潭二镇置大潭县。熙宁七年以长道、大潭二县隶岷州)。

上，成纪。(二乡。董城、道口务、夕阳三镇。有朱圉山、邽山、渭水、瓦亭川)。

上，天水。(州西七十里。二乡。铁冶、艾蒿、米谷三镇。有龙马泉)。

中，陇城。(州东三十五里。二乡。陇城、安夷二镇。有大陇山、瓦亭山、渭水)。

中，清水。(州东九十里。二乡。白沙、百家、清水三镇。有小陇山、清水)。

监一。(开宝初于清水县置银冶，太平兴国三年升为监，隶州)。

太平。(州东七十里)。

城二。(建隆二年置伏羌寨。熙宁元年置甘谷城，三年以伏羌寨为城)。

伏羌。(州西九十里。领得胜、榆林、大像、菜园、探长、新水、柹林、丙龙、石人、驼项、旧水一十一堡)。

甘谷。(州西北一百八十五里。领陇阳、大甘、吹藏、陇诺、尖竿五堡)。

寨七。(建隆二年置定西。开宝元年置三阳。太平兴国三年置弓门，四年置静戎。天禧二年置安远。庆历五年置陇城。治平四年置鸡川)。

定西。(州西北四十五里。领宁西、牛鞍、上碛、下碛、注鹿、圆川六堡)。

三阳。(州北四十里。领渭滨、武安、上下蜗牛、闻喜、伏归、碛口、照川、土门、四顾、平戎、赤崖湫，西青、远近湫一十四堡)。

弓门。(州东一百六十五里。领东鞍、安人、斫鞍、上下铁窟、坐交、得铁七堡)。

静戎。(州东北四十里。领白榆林、长山、郭马、静塞、定平、永固、邦蹉、宁塞、长焦九堡)。

安远。(州西北一百二十五里)。

陇城。(州东一百二十里)。

鸡川。(州北二百里)。

堡三。(开宝九年置床穰寨。太平兴国四年置冶坊寨。庆历五年置达隆。熙宁五年改冶坊，八年改床穰并为堡)。

床穰。(州东八十里。领白石、古道、中城、东城、定戎、定安、西城、雄边、临川、德威、广武、定川、挟河、镇边一十四堡)。

冶坊。(州东北一百二十里。领桥子、古道、永安、博望、威塞、李子六堡)。

达隆。(州西北一百五十五里)。

上，泾州，安定郡，彰化军节度。(唐彰义军节度。皇朝太平兴国元年改彰化军。治保定县)。

地里。(东京一千七百里。东至本州界六十五里，自界首至邠州一百一十里。西至本州界三十里，自界首至渭州一百三十里。南至本州界一百里，自界首至凤翔府一百一十里。北至本州界三十五里，自界首至原州四十里。东南至本州界一百四十里，自界首至凤翔府一百里。西南至本州界九十里，自界首至陇州一百五十里。东北至本州界四十里，自界首至原州四十里。西北至本州界三十里，自界首至原州五十里)。

户。(主一万八千二百一十八，客七千七百七十二)。

土贡。(紫茸，毛氍一十段)。

县三。(咸平四年升长武镇为县，五年省为寨)。

望，保定。(一十乡。长武一寨。有回山、泾水、汭水)。

上，灵台。(州东九十里。五乡。百里一镇。有汭水、细水)。

上，良原。(州西南六十里。五乡。有汭水)。

上,熙州,临洮郡,镇洮军节度。(唐临州之地,后陷吐蕃,号武胜军。皇朝熙宁五年收复置。治狄道县。)

地里。(东京二千五百二十五里。东至本州界一百五里,自界首至通远军六十八里。西至本州界六十里,自界首至河州一百里。南至本州界九十里,自界首至岷州一百四里。北至本州界六十里,自界首至兰州一百一十六里。东南至本州界一百五里,自界首至通远军六十八里。西南至洮州三百六十里。东北至马衔山四十里。西北至本州界六十里,自界首至河州一百里)。

户。(主一百九十九,客一千一百五十七)。

土贡。(毛氈一十段,麝三两)。

县一。(熙宁五年收复置县,九年省。元丰二年复置)。

中下,狄道。(有白石山、洮水、浩亶河)。

寨一。(熙宁六年置)。

康乐。(州西三十六里)。

堡八。(熙宁五年置庆平、通谷、渭源,六年置南川、当川,七年置结河)。

通谷。(州东二十二里)。

庆平。(州东六十七里)。

渭源。(州东九十二里)。

结河。(州北二十里)。

南川。(州南三十里)。

当川。(州西四十里)。

南关。(州南二十里)。

北关。(州北二十里)。

中下,成州,同谷郡,团练。(开宝六年升团练。治同谷县)。

地里。(东京二千五十五里。东至本州界五十五里,自界首至凤州一百六十五里。西至本州界一百五里,自界首至岷州三百九十里。南至本州界五十里,自界首至兴州一百四十五里。北至本州界七十里,自界首

至秦州一百九十五里。东南至本州界五十里，自界首至兴州一百四十五里。西南至本州界四十里，自界首至阶州二百一十里。东北至本州界一百里，自界首至凤州二百五里。西北至本州界一百里，自界首至岷州三百九十里)。

户。(主一万二千，客二千六百五十九)。

土贡。(蜡烛一百条，鹿茸一对)。

县二。

上，同谷。(二乡。府城、西安二镇。有仇池山、凤凰山、凤皇潭、下辩水)。

中，栗亭。(州东五十里。二乡。泥阳一镇。有雷牛山、栗亭川)。

下，凤州，河池郡，团练。(伪蜀武兴军节度。后唐降防御。皇朝建隆四年降团练。治梁泉县)。

地里。(东京一千八百六十二里。东至本州界二百五十里，自界首至凤翔府一百四十五里。西至本州界二百里，自界首至成州七十里。南至本州界一百五十八里，自界首至兴元府一百五十五里。北至本州界一百八十里，自界首至陇州一百九十里。东南至本州界二百八十四里，自界首至洋州四百七十里。西南至本州界二百一十里，自界首至兴州一百七十里。东北至本州界一百里，自界首至凤翔府一百一十里。西北至本州界二百七十里，自界首至秦州一百八十里)。

户。(主二万二百九十四，客一万七千九百)。

土贡。(蜜、蜡各三十斤，蜡烛一百条)。

县三。(建隆三年于两当县置银冶，开宝五年升为监。治平元年罢置官，以监隶两当县)。

上，梁泉。(三乡。黄花、保安、方石、东河桥、白涧、卤土、武休七镇。有龙安山、三松山、嘉陵江)。

紧，河池。(州西一百五十五里。二乡。河池、高桥、固三镇。水银一务。有固道水、河池戍)。

上，两当。(州西八十五里。二乡。开宝一监。两当、广乡二镇。有鸞鷟

山、嘉陵江、两当水)。

下,岷州,和政郡,团练。(唐岷州,后废。皇朝熙宁六年收复,仍旧置)。

地里。(东京二千六百四十里。东至本州界三百六十里,自界首至秦州九十里。西至洮州一百九十一里。南至本州界一百八十里,自界首至阶州一百六十里。北至本州界一百三十里,自界首至熙州九十里。东南至本州界三百九十里,自界首至成州一百里。西南至叠州二百八十里。东北至本州界一百二十五里,自界首至通远军八十五里。西北至本州界一百二十里,自界首至河州一百四十三里)。

户。(主二万九千九百六十,客七千七百六十一)。

土贡。(甘草一十斤)。

县二。(熙宁六年以秦州大潭、长道二县隶州)。

中,大潭。(州东南三百里。一乡。良恭、滔山二镇。有朱圉山、清水)。

紧,长道。(州东三百三十里。二乡。长道、故城、白石、盐官、骨谷、崖石、平泉、马务八镇。有祁山、盐官水)。

寨五。(雍熙二年置临江寨隶秦州,熙宁六年隶州,仍置荔川,七年置床川、间川、宕昌)。

临江。(州南一百四十里)。

荔川。(州东八十里)。

床川。(州东二十里)。

间川。(州东一百二十里)。

宕昌。(州南一百二十里)。

堡三。(熙宁七年置遮羊、谷藏,十年置铁城)。

遮羊。(州东一百里)。

谷藏。(州西四十里)。

铁城。(州东八十里)。

监一。(熙宁九年置,铸铁钱)。

滔山。(州西一百五十步)。

下府，渭州，陇西郡军事。(治平凉县)。

地里。(东京一千八百里。东至本州界九十里，自界首至泾州三十里。西至本州界九十七里，自界首至镇戎军四十八里。南至本州界一百二十三里，自界首至陇州三十二里。北至本州界四十三里，自界首至陇州三十二里。自界首至原州一百八里。东南至本州界一百一十里，自界首至泾州五十里。西南至本州界一百五里，自界首至德顺军一十六里。东北至本州界六十里，自界首至原州五十里。西北至本州界五十里，自界首至原州一百一十九里)。

户。(主二万六千六百四十，客一万九百九十六)。

土贡。(绢一十匹，蕤蓉五十斤)。

县五。熙宁五年废仪州，以安化、崇信、华亭三县隶州。

中，平凉。(四乡。安国、耀武二镇。瓦亭一寨。有笄头山、马屯山、泾水)。

中，潘原。(州东三十六里。二乡。有鸟鼠山、铜城山、泾水、阁川水)。

中，安化。(州西南七十里。三乡。安化、白岩河二镇。有陇山、白岩河)。

中，崇信。(州东南八十五里。四乡。西赤城一镇。有阁川水)。

中下，华亭。(州南七十里。四乡。黄石河一镇。一铜场。一铁冶。一茶场。一盐场。有小陇山)。

望，原州，平凉郡，军事。(治临泾县)。

地里。(东京一千七百九十里。东至本州界一百五里，自界首至宁州四十里。西至本州界九十五里，自界首至镇戎军六十三里。南至本州界七十里，自界首至渭州六十里。北至本州界七十里，自界首至环州一百五十里。东南至本州界四十五里，自界首至泾州三十五里。西南至本州界九十五里，自界首至德顺军一百三十里。东北至本州界八十里，自界首至庆州五十五里。西北至界壕一百六十里)。

户。(主一万六千八百四十，客五千五百六十一)。

土贡。(甘草三十斤)。

县二。(至道三年以宁州彭阳县隶州)。

中,临泾。(四乡。有阳晋水、朝那水)。

中,彭阳。(州东六十里。三乡。萧一镇。有大胡河、蒲川河。)

镇二。(乾兴元年以庆州柳泉、新城二镇并隶州。熙宁三年废截原寨入新城)。

新城。(州西五十里)。

柳泉。(州西北七十里。领耳朵城一堡)。

寨五。(端拱元年置西壕。咸平元年置开边。天圣五年置平安。庆历四年置绥宁,五年置靖安。熙宁三年废新门寨入开边)。

西壕。(州北四十里)。

开边。(州西二十里)。

平安。(州西八十里)。

绥宁。(州西北一百三十里。领羌城、南山、颠倒三堡)。

靖安。(州西北一百六十里。领中郭普、吃罗岔、张岩、常理、新勒、鸡川、立马城、杀獐川九堡)。

中下,阶州,武都郡,军事。(治福津县)。

地里。(东京二千五百二十里。东至本州界三百里,自界首至兴州一百三十里。西至宕州二百四十里。南至本州界一百五十里,自界首至文州九十里。北至本州界二百六十里,自界首至成州四十里。东南至本州界三百五十里,自界首至利州四百里。西南至本州界三百五十里,自界首至文州一百里。东北至本州界二百七十里,自界首至成州三十里。西北至本州界一百七十里,自界首至岷州一百八十里)。

户。(主二万三千九百三十六,客一万七千七百二十五)。

土贡。(羚羊角一十对,蜡烛五十条)。

县二。中下,福津。(三乡。安化、利亭、石门、角弓、河口、故城六镇。峰贴硖、武平、沙滩三寨。有盘鞬山、白江水、福津水)。中下,将利。(州东二百一十五里。四乡。兰帛、平落、新安、故城四镇。有沮水、紫水)。

上,河州,安乡郡,军事。(唐河州,后废。皇朝熙宁六年收复,仍

旧置)。

地里。(东京二千三百二里。东至本州界九十里,自界首至熙州五十里。西至青塘城四百八十里。南至洮州一百九十五里。北至黄河四十里。东南至本州界九十里,自界首至岷州二百一十五里。西南至一公城一百六十里。东北至吹龙城一百一十里。西北至黄河四十里)。

户。(主二百九十五,客二百九十六)。

土贡。(麝五两)。

城一。(熙宁七年置)。

定羌。(州东七十里)。

寨二。(熙宁六年以唐枹罕县地置枹罕县,七年置南川、宁河二寨,九年省枹罕县)。

南川。(州南四十里)。

宁河。(州东南四十五里)。

堡二。(熙宁七年置东谷,八年置阔精)。

东谷。(州东南一十五里)。

阔精。(州西南一十五里)。

关一。(熙宁七年置)。

通会。(州东南七十里)。

下,兰州,金城郡,军事。(唐兰州,后废。皇朝元丰四年收复,仍旧置)。

地里。(东京二千七百一里。东至屈令支山五十里。西至本州界一百四十里,自界首至河州一百三十里。南至帛兰山四里。北至黄河一里。东南至本州界一百五十二里,自界首至通远军一百四十五里。西南至本州界一百七十五里,自界首至熙州三十五里。东北至黄河三里。西北至黄河三里)。

户。(主四百一十九,客二百二十四)。

土贡。(甘草三十斤)。

寨一。(元丰四年置)。

龕谷。(州东九十四里)。

堡四。(元丰四年置东关、帛兰,五年废胜如、质孤,六年置阿干、西关)。

东关。(州东一十八里)。

帛兰。(州西南九十五里。有帛兰山、兰泉)。

阿干。(州西南四十里。有阿干水)。

西关。(州西二十里)。

同下州,镇戎军。(至道元年以原州故平高县地置军)。

地里。(东京二千四十里。东至本军界八十五里,自界首至原州九十五里。西至会州三百三十五里。南至本军界三十里,自界首至秦州四百三十里。北至灵州五百三十五里。东南至本军界五十里,自界首至渭州九十里。西南至本军界五十里,自界首至德顺军四十里。东北至本军界八十里,自界首至庆州三百四十里。西北至灵州四百二十五里)。

户。(主一千四百三十四,客二千六百九十六)。

土贡。(白毡二十领)。

城一。(咸平六年置)。

彭阳。(军界八十五里)。

寨七。(咸平二年置东山。乾兴元年置乾兴。天圣元年置天圣,八年置三川。庆历二年置高平、定川。熙宁元年置熙宁)。

东山。(军东四十五里)。

乾兴。(军东北九十里)。

天圣。(军东北六十里)。

三川。(军西三十五里)。

高平。(军北二十五里)。

定川。(军西北二十五里)。

熙宁。(军北三十五里)。

堡二。(咸平元年置开远。熙宁四年废安边堡入开远,五年置张义)。

开远。(军东南三十里)。

张义。(军西南五十里)。

同下州,德顺军。(庆历三年以渭州陇竿城置军)。

地里。(东京一千九百一十里。东至本军界二十里,自界首至渭州九十里。西至本军界一百三十里,自界首至通远军一百九十里。南至本军界二十里,自界首至陇州一百七十里。北至本军界三十里,自界首至镇戎军六十里。东南至本军界二十里,自界首至渭州八十里。西南至本军界一百二十里,自界首至秦州一百四十里。东北至本军界二十里,自界首至原州一百九十里。西北至本军开远堡一百六十里)。

户。(主七千五百八十九,客九千一百五十二)。

土贡。(甘草五十斤)。

城一。(庆历四年置)。

水洛。(军西南一百里。领王家一城,石门一堡)。

寨五。(天禧元年置羊牧隆城,二年置静边。天圣六年置得胜。庆历三年改羊牧隆城为隆德寨,八年置通边。治平四年置治平)。

静边。(军西七十里)。

得胜。(军西北八十里。领开远一堡)。

隆德。(军西六十里)。

通边。(军西南五十五里)。

治平。(军西一百四十里。领牧龙一堡)。

堡一。(庆历三年置)。

中安。(军西三十五里)。

同下州,通远军。(皇佑四年以渭州地置古渭寨,熙宁五年建军)。地里。(东京二千五百四十里。东至本军界六十里,自界首至秦州二百四十五里。西至本军界六十里,自界首至岷州一百六十里。南至本军界一百二十里,自界首至秦州一百二十里。北至生户地四十一里。东南至本军界一百二十里,自界首至岷州四百一十二里。西南至本军界五十里,自界首至岷州一百六十里。东北至生户地四十一里。西北至本军界四十里,自界首至熙州二百三十二里)。

户。(主一千三百九十二,客三千三百三十七)。

土贡。(麝五两)。

镇一。(大中祥符七年置威远寨,熙宁八年改为镇)。

威远。(军东南一百里)。

城一。(元丰四年置)。

定西。(军北一百二十里)。

寨六。(建隆二年置永宁。天禧元年置来远,三年置宁远。熙宁元年置通渭、熟羊,六年置盐川。元丰六年以兰州通西寨隶军,七年废来远寨)。

永宁。(军南一百二十里)。

宁远。(军东南七十七里。领广吴、哑儿二堡)。

通渭。(军东七十里。领七麻一堡)。

熟羊。(军北四十里)。

盐川。(军西五十里)。

通西。(军北八十里)。

堡一。(熙宁四年置)。

三岔。(军北二十五里)。

《读史方輿纪要》(清)顾祖禹

卷五十七

庆阳府。东至延安府鄜州三百三十里，南至西安府邠州二百七十里，西南至凤翔府三百五十里，西至平京府三百里，西北至宁夏卫七百七十里。自府治至布政司五百七十里，至江南江宁府三千六百里，至京师三千七百里。

《禹贡》雍州地，周之先不窋所居亦曰北豳。春秋时为义渠戎国。秦灭义渠，以其地属北地郡。汉初属雍国，后仍属北地郡。后汉因之。晋为雍州徼外地。西魏置朔州。后周废。隋开皇十六年，置庆州宋白曰：“隋初，置合川镇于此。”大业初改弘化郡。唐复为庆州，武德六年置总管府，七年改都督府。自是常置都督府于此。天宝初曰安化郡。至德初曰顺化郡。乾元初，复为庆州。唐末，李茂贞升为安定军。五代梁改武静军。宋仍曰庆州，亦曰安化郡。治平以后环庆路治此。政和七年升庆阳军节度。宣和七年又改为庆阳府。金、元因之。金初改军名曰安国。后又改曰定安。又皇统二年置庆原路总管治于此。元仍为庆阳府。明亦曰庆阳府，领州一、县四。今仍曰庆阳府。

府南卫关辅，北御羌、戎，秦置北地郡以隔阂匈奴，汉人所谓缘边诸郡也。其地山川险阻，风俗劲勇。汉武拓境开边，北地良家子奏功尝最。晋弃其地，关辅日以多事。及氐羌运终，赫连奋臂，冯陵之祸，多在斯土。岂非以岭塞高印，下临三辅，有建瓴之势欤？贾耽曰：“庆州以北地形曼衍，直抵沙漠，寇入最易。”唐时以邠宁为重镇。宋亦以环庆为极冲。每西北发难，控扼之备未尝不在庆州也。宋太宗时何亮尝言：“环庆至灵武几千里，居绝域之外，请于其间筑溥乐、耀德二城以通河西粮运。”不果。继

而夏人发难，郡首被其祸。明自河套有事，花马池尝为重地。敌入灵、韦，掠环、庆，犯平固，皆以花马池为捷径。故恒以重兵驻守。又西为小盐池，则庆阳至宁夏之要道也。《輿程记》：“府北百六十五里为木钵递运所，又四十五里为环县。环县北行二百二十里而至小盐池，又一百七十里至灵州。自灵州渡河又百里而至宁夏。”由庆阳环县而北，无居民，亦无树木，水草皆绝少，至灵州始有之。中间地势荒瘠，屯戍者每患无所资以为固。此庆阳之患，比他郡为倍亟也。夫庆阳有警，而邠宁以南祸切剥肤矣。形援可或缓哉？

安化县，附郭。汉北地郡郁郅县地，后汉废。隋为合水县。唐武德六年移弘化县与合水并为州治。是年，改合水为合川。贞观元年，省合川入弘化。神龙元年，改曰安化。宋因之。元省。明初，复置。今编户三十二里。

郁郅城，在府城东，当白马岭两川交口。汉置县于此。《水经注》谓之尉李城，音讹也。《通典》曰，即古不窋城。《续通典》，不窋城在郡城东南三里。郡城今名尉李城，亦曰不窋城，城周七里有奇。又合川城，在今府城西南。隋开皇十六年，置合水县于此，为庆州治。唐武德六年，改为合川县。贞观元年，省入弘化。今府城，即唐庆州城也。明屡经修筑。周七里有奇，门四，东安远，南永春，西平定，北德胜。负山阻水，屹然险固。

延庆城，府东北三十里。本汉郁郅县地。后魏尝置延庆县，旋废。刘昫曰：“唐武德六年，分合水县置白马县。天宝元年，改为延庆县，宝历初，废。”归德城，府东北百里，汉县，属北地郡。后汉更始初，封岑彭为归德侯，是也。寻废。后魏复置归德县。西魏置恒州于此。后周废州。隋开皇初，县属庆州。唐初，废。

洛源城，府东北二百七十里。本汉归德县地。隋大业初，置洛源县。十二年，为胡贼所破，遂废。唐贞观二年，复置。四年，于延州金城县，移北永州治此。八年，州废，县仍属庆州。宋废为洛源堡。金城，见延安府安塞县废敷政城。怀安城，在府东北百八十里。《通典》，本隋柳谷城。武德六年，置县。《唐志》，开元十年，括逃户连党项蕃落置。又有芳池州都督府，寄理怀安县界，管小州十，曰静、獯、王、濮、林、尹、位、长、宝、宁并党

项野利氏种落。至德以后，芳池州废。宋并废县为怀安镇，属安化县。《金志》，合水县有怀安镇。今为怀安巡司。

彭原城，府西南八十里。本汉彭阳县地，属安定郡。后汉灵帝时，以北地郡富平县寄治此。后魏亦为富平县，属西北地郡。后周县废。隋为彭原县地。唐武德元年，于宁州彭原置彭州，州旋废。宋改彭原为彭阳，属原州，又分置彭原县，属宁州。熙宁二年，又改隶庆州。金亦属庆阳府。元废。同川城，在府西八十里。《唐志》，隋义宁二年，分宁州彭原县地置三泉县，治故三泉城。武德三年，移治同川城，改为同川县，属庆州。宝历初，废。

参峦城，在州西北。汉安定郡属县。《汉志》注，主骑都尉治此。后汉属北地郡。顺帝安汉中，烧何种羌据参峦，护羌校尉赵冲等击破之。是也。魏晋间，县废。周槃城，在府南百二十里。后魏置东槃县，属赵平郡。后周改曰周槃，寻废。隋开皇二年，遣虞庆则屯弘化以备突厥，行军总管达奚长孺别道出击，与突厥遇于周槃，力战得脱，即此城也。

白豹城，府西北百九十里。宋时为西夏地。范仲淹建议取之。《宋史》，康定元年，韩琦使任福攻白豹城，部分诸将，王怀政攻其西，断神树岷来路。范全攻其东，断金汤之路。谈嘉震攻其北，断叶市之路。王庆、石全攻其南，武英入城门斗敌。福以大将驻于城下策应，遂克之。是也。城东四十里接金汤城，今见延安府保安县。《通志》，白豹城在府东七十里。似误。

大顺城，府西北百五十里。《宋史》，城本名马铺寨，当后桥川口，在夏人腹中。庆历元年，范仲淹知庆州，谓延安西、庆阳东、中有金汤、白豹、后桥三寨，取可攻之地，其在于此。因以计城后桥川赐名大顺。大顺成而白豹、金汤皆不敢犯，自是寇患益少。又治平三年，夏人寇大顺城，为宋军所败，徒寇柔远，又退屯金汤。《金志》，安化有白豹、大顺二城。元废。

定边城，府北二百六十里。宋元符二年置。寻建定边军，领定边一县。金皇统六年，以其地赐夏人。寻废为定边寨，属环州。元因之。今有官军及巡司戍守。

镇安城，在府东北三百里。宋置。《志》云，城东三十里接鄜延路之通庆城。金废。又府境有安定废州。《唐志》，安定州都督府寄在庆州界，管小州七，曰党州、桥州、乌州、西戎州、野利州、米州、还州。又有安化州都督府，亦寄在庆州界。管小州七，曰永利州、威州、旭州、莫州、西沧州、儒州、琮州，俱党项部落也。赵珣《聚米图经》，党项在庆州者，号东山部；在夏州者，号平夏部；在灵、盐以南山谷中者，号南山部。至德以后，羁属诸州俱废。

景山，府西百里。山绵延深远，中多奇木怪石及獐鹿猿獠之属。又太白山，在府北百五十里。黑水河发源于此。又有斩断山，在府城南三里。

寡妇山，在府北。《五代旧史》，庆州北十五里有寡妇山，蕃部野鸡族居焉。周广顺二年反，命环、庆二州及府州帅折从阮讨平之。或云寡妇山，即射姑山也。《续汉书》，射姑山在北地郡。顺帝时，且冻羌叛，征西将军马贤与战于射姑山，败没。

包山在府北。五代周广顺三年，党项为庆州将所扰，野鸡等族因拒命，诏邠、宁二州兵击之。宁州刺史张建武败野鸡族，乘胜戕虐。别部杀牛等族诱建武军过包山度险，共击之，建武大败。

马岭，在府北二十五里。一名箭箬岭。左右有川，相传汉畜牧地也。旧多居民，有果实猿鸟，岩洞幽邃，莫穷所止。唐置马岭县，盖以山名。

乌岭，在府西北。或云即青山也。一云乌岭。西北有青山。后汉建武二十一年，安定属国胡叛，屯聚青山。遣将兵长史陈沂讨平之。又晋泰始七年，鲜卑树机能、北地胡共围凉州刺史牵弘于青山，弘败没。《续汉志》，北地参朮属国都尉治有青山。谢沉《书》：“属国降羌、胡数千人居山田蓄。”岭盖郡境之大山也。

节义峰，在府西北。北宋景祐元年，庆州柔远寨番将攻夏人后桥诸堡，破之。夏人旋寇庆州，以报后桥之役，伏兵节义峰，擒宋将齐宗矩。即此。

大昌原，在府南。宋绍定元年，蒙古入大昌原，金将完颜陈和尚大败

之。二年，蒙古入大昌原，金将移刺蒲阿败之，庆阳围解。《金志》，宁州平定县有大昌镇。原盖接宁州东南也。

洛河，在府东北二百五十里。源出合水县白于山，东北流，经废洛源县，又东入延安府保安县境。一云洛川南经尉李城东北，合马领水，号白马水。似误。今详见大川洛水。

东河，在府城东。来自沙漠。至城北，合怀安川及灵沟水，南流至合水县界，为马莲河。又西河，在府城西。来自环县。流经城下，合杨集涧水、谷沟、下马汀诸水，繇西转南而会于东河。《志》云，府北三十里有下马汀。水滨地平，经行者多憩于此，因名。盖即东西两河之滨也。

黑水河，府西百二十里。源出太白山。西南流，入环县境，复折而南，经府西，又东南流，入宁州境。会于九龙川，复分流而东南，入邠州长武县界，下流合于泾河。《志》云，府南有蒲川水，流合于黑水河。

北岔河，在府东七十里。来自白豹寨。南流至合水县，会于建水。又三合水，在府西南百三十里，亦东流至合水县，入马莲河。又府东北二百里有白塔水，亦南流入合水县界，会于建水。

白马川，府西百二十里。南流注于东河。又府北五十里有灵沟水，下流亦入于东河。白豹川，在府北二百里，与境内西阳川、洪水川合，东南流，入延安府保安县之洛河。

大乐涧，府南五十里。东流入宁州界，会于九龙川。又西澳，在府西。近代官军败贼于此。府境又有桑落坝，亦官军败贼处。

牛圈，府西北三百余里。四旁皆石碛，中有圈渚水，人马给饮。宋时夏人入寇，章窠置毒于此，夏人饮者辄毙。又鹅池，在府治东，暗通西河。宋庆历中，经略使王浚所凿。《一统志》云：“经略使施昌言所浚也。”

驿马关，府西南九十里。唐置。与镇原县接界。兴元初，朱泚败走，自泾州北趣驿马关。宁州刺史夏侯英拒之，是也。明初，张良臣据庆阳未下，徐达攻之。元将王保保遣兵陷原州，为庆阳声援。徐达等议以关当原州之冲，今先据关以扼之，贼计无复施矣。于是遣冯宗异等守关，又分兵备灵州、邠州、彭原以遏其奔突。庆阳旋下。今有驿马关驿，兼设巡司戍守。

横山寨，府北二百三十里。宋元符初筑。其东六十里接东谷寨，其西七十里为宁羌寨，其南三十里为通寨堡，北三十里则定边军也。金废。绥远寨，在横山寨北十五里。本名骆驼巷。其北三十里有神堂寨，南十四里有鸡嘴堡，其东二十里接定边军。宋元符初所置。又观化堡，在鸡嘴堡西二十里。又南二十里为通化堡。以上俱宋置。金废。又威边寨，在横山寨东三十五里，亦宋置。金废。

柔远寨，府西北百四十里。北距白豹城五十里，东北至大顺城四十里。宋仁宗时，夏人入寇，巡简杨承吉拒战于此。又范仲淹城大顺，引兵至柔远，版筑皆具。是也。金亦为柔远寨。元废。怀威寨，府东北二百七十里。其西四十里为矜戎堡，其南二十里为威宁寨，其东十五里即鄜延路之通庆城也。《宋志》，威宁寨，在定边军东十五里。本名衡家堡。政和六年展筑，改名威宁。金时俱废。

东谷寨，在白豹城西三十里。又安疆寨，在白豹城东南四十里。胜羌寨，在白豹城北五十里。宋时与金汤、柔远诸寨，并为控扼要地。金仍置安疆寨。元废。

天固堡，在彭原废县南。隋开皇中所置。以天然险固而名。闹讹堡，在府北三百里。宋熙宁中，夏人筑闹讹堡。庆州兵击之，败还。

荔原堡，府东北二百五十里。宋治平四年，蔡挺所筑。熙宁三年，夏人来攻，不能陷而去。金仍为荔原堡。元废。《金志》，荔原堡，西白豹城，南七十五里有第二将营。《一统志》，府东百二十里有第二将城，宋置。谬甚。九阳堡，在镇安城西二十里。又有麦川堡，在镇安南十里。又南二十里为威远堡。府境又有金村、定戎等堡，俱宋置。金废。《通志》，今府治北有弘化驿。

合水县，府东七十里。东至延安府甘泉县二百六十里，东南至鄜州中部县二百五十里。汉北地郡归德县地。西魏为华池县地。隋末为合水县地。唐武德六年，分合水置蟠交县。天宝初，改蟠交曰合水。五代周省入乐蟠县。宋熙宁四年，复置，属庆州。今县城周三里有奇，编户十八里。

乐蟠城，县西南七十里。后魏时为彭阳县之落蟠城。西魏置蔚州于

此。后周废。隋义宁初，分合水县置乐蟠县。唐因之，属庆州。宋熙宁四年，省为镇。《通典》，汉北地郡略畔道故城，在乐蟠县东北五里。又安定郡月氏道故城，在乐蟠县北。

华池城，在县东北百二十里。汉归德县地。西魏置华池县。后周废。隋仁寿初，置华池县，属庆州。大业末，属于梁师都。武德三年，梁师都将刘旻以城来降，因置林州。五年，梁师都将辛獠引突厥寇林州，是也。贞观元年，州废，县仍属庆州。宋初因之。熙宁中，废为华池镇。七年，改为华池寨。其相近者，又有东西二华池寨。金因之。元废。今设华池巡司于此。库多汗城，宋白曰：“在华池城东北二里。”隋置华池县，盖治于此。

弘化城，在县西南。后周时，置长城镇。隋初为弘化县。开皇二年，遣虞敬则屯弘化，以备突厥，是也。十八年，置弘州。大业初，州废。唐初武德六年，移县入庆州城，为附郭县。又弘德废县，在州北。隋大业初置。唐废。

子午山，县东五十里。亦曰子午岭，即桥山也。沮水源出于此。亦谓之桥门，又名翟道山。一名鸡山，有乌鸡水出焉，北注于洛。详见名山桥山。

白于山，《太平寰宇记》，在县北二十里。一名女郎山。洛水出焉。《山海经》，白于山，洛水出其阳，东流以注于渭。是也。又有南山，在县治南一里，皆子午山之支阜矣。长厚原，在县西南七十里。又县西九十里有汉城原。

建水，在县治东。源出子午山，西南流。府东境之九岔河流合焉，谓之合水。西南流入马莲河。《地理志》，华池县有二渊。二川合流，因名。即此水也。马莲河，在县西南四十里。自安化县流入境，合冉家河，南流入直宁县界，又南会于九龙川。

华池水，县东北七十里。自延安府保安县流入境。合豹子川、平戎川、苗村沟诸水，流入延安府鄜州界。华池县因以名。玉梅川，在县东，与延鸪川俱出子午山，东流入华池水。又凤川，在县东北，源出子午山，亦东流入华池水。

平戎川，在县东北。源出延安府保安县界，南流入华池水。唐贞元二年，吐蕃尚结赞入寇岐、陇，寻自宁庆北去，军于合水之北。邠宁帅韩游

瑰遣将夜击其营，败之。吐蕃来追，游环陈于平川，潜使人鼓于西山，寇惊遁。即平戎川也。清水沟，在县治南。源出县西田家里，南流入合水。

凤川寨，县东北五十里。亦曰凤川镇。宋范仲淹所置。又平戎寨，在县东北八十里，近平戎川。亦范仲淹所置。崇冈镇，在县西北。唐武德八年，突厥寇原州，入大震关。将还，弘州总管宇文歆邀击之于崇冈镇，大破之。

宋庄驿，县东六十里。又东南七十里为邵庄驿，东达鄜州之通道也。《通志》，邵庄驿在县东百里。又县西六十里为华池驿。又宋庄驿亦在县西。似误。

环县，府西北二百里。北至宁夏卫灵州所五百里。汉北地郡富平县地。后魏为灵武郡地。后周为怀远郡怀远县地。隋开皇三年，郡废，县属灵州。唐置方渠县，属庆州。此为方渠县地。五代晋天福四年，移置威州于方渠县。周广顺二年，改曰环州。显德四年，降为通远军。宋淳化五年，复置环州，治通远县，亦曰通远军。金因之。元以通远县省入州。明改州为县。今城周五里有奇，编户四里。

通远废县，即今治。本方渠县地。五代晋置通远县。宋为环州附郭县。元省。

方渠城，在县南七十里。本汉县，属北地郡。后汉废。隋为庆州马岭县地。唐景龙元年，分置方渠县。贞元十三年，以方渠当吐蕃要路，命邠宁帅杨朝晟城之。元和十四年，吐蕃寇庆州，营于方渠。即此。五代晋徙威州治此。宋省为方渠寨，属通远县。

马岭城，县南一百三十里。汉置马领县，为北地郡治。师古曰：“有川形似马领，因名。”杜佑曰：“汉旧牧地也。”后汉县废。隋大业初，置马领县，治天家堡。唐初因之。贞观八年，移理新城。或云：县西有马岭坂，县因以名。后废。贞元十三年，杨朝晟筑方渠三城。引还，吐蕃追之至马领。朝晟拒却之，遂城其地。五代晋末，废为马岭镇。《金人疆域图》，通远县有马岭镇，是也。

乌仑城，县北三十里。宋置乌仑寨，以乌仑山而名，为戍守要地。金

为乌仑寨。元因之。今亦设兵防卫于此。其城东面圯于环河。需源城，在县北四十里。宋置。其城北面圯于环河。又洪德城，在县北六十里。宋置。咸平六年，赵保吉入寇洪德寨，是也。熙宁中章粲遣折可适破夏人于洪德城。即此。木波城，县南四十五里。唐为木波堡。贞元九年，杨朝晟为宁州刺史，诏城盐州。朝晟分统土马屯木波堡。十三年，城其地。亦谓之木波镇。后又升为县。《五代史》，石晋置威州于方渠县，割庆州马领、木波二县隶之。是也。县旋废。《金志》，通远县有木波镇。

安边城，县西北百二十里。本名徐丁台。宋崇宁初，筑城于此，赐名安边。金亦曰安边寨。元废。细腰城，在县西。《宋史》，种世衡知环州。环、原之间，明珠、灭臧、康奴三族最大。其北有二川，交通西界。庆历五年，范仲淹议筑细腰城断其路，命世衡董其事。城成，自环州改隶原州。即此城也。

兴平城，县东北八十里。地名灰家嘴。灰，一作“炭”。宋元符初，筑城于此，赐名兴平。金亦为兴平堡。又县北有清远城。宋元丰四年，高遵裕伐夏，出环庆，复清远军，是也。

曲子城，县南九十里。今为曲子驿。又县南百五十里有灵祐城，今为灵祐驿。二城俱永乐初征西将军何福所筑。《通志》，县北九十里有红城儿，成化八年所修也。《一统志》，今县北三里有秦长城，秦蒙恬所筑。宋白曰：“方渠县北一里有长城。”

乌仑山，县北三十里。山甚高峻，顶阔根狭，难于登陟，为险要之所。又县北境有木盘山。唐开元九年，方渠降支康愿子反，掠牧马，西涉河出塞。张说击擒之于木盘山。或曰，山盖在榆林西境。尖山，在县东百里。其山高耸，因名。又县南九十里有天池原。

青冈峡，在县北。亦曰青冈岭。唐开元四年，单于副都护张知运，击突厥叛户于青冈岭，兵败，为所擒。又后唐天成四年，朔方节度使唐福赴镇，至方渠。羌戎出兵邀福。福击走之。至青冈峡，遇吐蕃野利、大虫二族，大破之，遂至灵州。宋至道二年，李继隆等讨李继迁于平夏，分道并进，期抵乌白池。时继隆应出环州，违命繇青冈峡，与庆州路将范廷召合

兵趣平夏，行十日，无所见而还。胡氏曰：“自方渠橐驼路出青冈峡，过早海至灵州。”赵珣《聚米图经》，环州弘德寨有归德、青刚两川。归德川在弘德东，透入盐州。青刚川在洪德西北，本灵州大路。自此过美利寨，入浦乐河，至耀德清边镇入灵州。自过美利寨后，渐入平夏，经早海中难得水泉，是也。乌白池，即宁夏后卫之盐池。浦乐河，在宁夏灵州所。

板谷，在县南。唐大历十二年，吐蕃入寇，军于原州北长泽涧，进破方渠，入板谷。郭子仪遣将李怀光救却之。又石台谷，在方渠废县界。唐贞元十三年，杨朝晟筑方渠三城，发军次石台谷。盖庆州之要道也。

环河，县北七十里。源出青冈峡。亦曰环江。流经县城西，委曲环抱，石桥交跨，小港分流，南入安化县界，而为西河。

黑水河，县南百里。自府境西南流经此，复折而南，入府西界。《通志》，黑水出县西百五十里牛家山，流经县南，入澧水。

咸河，在方渠废县境。《唐志》，咸河从土桥、归德川、同家谷三处发源，咸苦不可食。又有甜河，在城西三里。从蕃部鼻家族北界来，供人饮食，亦曰甜水沟。流注环河。又石泉河，在县南五里，亦流注环河。

合道川，县西八十里。东流注于环河。七里沟，在县东七里。鸳鸯沟，在县西十八里。水波沟，在县南四十里。又佛堂沟，在县西九十五里。俱流入环河。

葫芦泉，《志》云，在环县西、镇戎之东北，旧有蕃部居此。范仲淹曰：“葫芦泉一带蕃部与明灭臧相接，一处城寨平定，更图一处，实为据守之策。”是也。又应圣泉，在方渠废县。唐贞元十三年，杨朝晟请城方渠三城。从之。师次方渠，乏水，有青蛇降岩下走，视其迹，水从而流，筑防环之，遂为停渊。诏名其泉曰应圣。

清平关，在县西北百十里。其地旧名之字平。宋元符初，筑为关。今有清平驿，在县西北六十五里。《輿程记》，县北六十里曰清平驿，又北六十里为山城驿，驿皆有仓。又九十里接宁夏界之萌城驿，为往来通道，套寇入犯之冲也。《宋志》，县有龙平关，元符二年置。

安化寨，县东七十里。又县东北有安塞寨。又定边、平远、安边等寨，

俱在县境，皆宋置。罗沟堡，在县东北百四十里。其南二十里即绥远寨也。又堡南四十里为阿原堡，四十五里为朱台堡，皆宋政和三年置。金废。

木瓜堡，县东北百十里。宋置。金因之。《志》云，旁有木瓜山，因名。明正德四年，寇入花马池，总兵马昂与亦孛末战于木瓜山诸处，颇有斩获。即此。其西五十里为归德堡，亦宋置。金因之。元废。通归堡，在县东北七十里。西至兴平城三十余里。又流井堡，在兴平城西北四十里。定戎堡，在清平关南十里，东至归德堡三十里。俱宋置，金废。

惠丁堡，县东北九十里。其西三十里为麝香堡。其南三十五里即安塞寨也。俱宋置。金废。《宋志》，惠丁堡东南至宁羌寨四十里。”

百家堡，在县南废马岭县旁。唐武德七年，庆州都督杨文幹反，进陷宁州，驱掠吏民，出据百家堡，即此。后废。又县西有肃远寨。宋咸平六年，赐环州本名乾川新寨曰肃远寨，是也。元符以后，改属镇戎军。盖其地与镇原县接界。灵武台，在县东北三里。《志》云，旧属灵武境内，相传唐肃宗即立于此。恐误。《通志》，今县北六十里有红德城仓。又县治南有灵武驿。

附见：

庆阳卫，在府城内。洪武四年建。又守御环县千户所，在环县城内。本庆阳卫前千户所守御于此，与卫同置。

宁州，府南百五十里。南至西安府邠州百四十三里，东北至延安府鄜州二百十里，西至平凉府泾州百七十里。古公刘邑。春秋为义渠戎国。秦属北地郡。汉为北地郡及上郡地。后汉兼属安定郡。晋亦为北地郡。后魏初，亦属北地郡。皇兴二年，置华州。太和十一年，改班州。十四年，改邠州。二十年，又改豳州，兼置赵兴等郡。西魏始曰宁州。后周亦置赵兴郡。隋开皇初，郡废。大业初，改宁州为豳州，旋又改北地郡。唐复曰宁州。天宝初，亦曰彭原郡。乾元初，复故。宋仍曰宁州亦为彭原郡。宣和初，赐军号曰兴宁。金因之。《金志》，皇统二年，降为兴宁军。又为西宁州。天德二年，复曰宁州。元仍曰宁州，以州治安定县省入。明初，改属庆阳府，亦曰宁州编户四十八里，领县一。今仍曰宁州。

州连络关陇，襟带邠、岐，川谷高深，地形险固。岭北有事，州每当其冲。秦并义渠，渐启榆中之塞；唐保幽宁，卒挫吐蕃之锋。《志》所称易守而难犯者欤？

定安废县，今州治。秦义渠县地。汉为北地郡泥阳县地。后汉因之。晋亦为泥阳县地。后魏太平真君二年，始置定安县，属赵兴郡。西魏为宁州治。隋以后，州郡皆治焉。金大定七年，更为安定县。元初因之，至元七年，废。今城周三里有奇，门四。

义渠城，在州西北。春秋时为义渠国。秦厉公十六年，伐义渠，获其王。惠文君十一年，县义渠。汉置义渠道，属北地郡。后汉建武六年，冯异进军义渠，击破卢芳将贾览及匈奴于此。县寻废。晋咸和四年，刘胤攻长安，石虎驰救，大破胤于义渠。即此城也。《一统志》，州治西为公刘邑，秦时为义渠国云。

泥阳城，在州东南五十里。本秦邑。汉初，酈商破雍将苏朮军于泥阳。即此。汉亦曰泥阳县，属北地郡。后汉因之。晋为郡治。后魏仍属北地郡，后废。杜佑曰：“即今之定平城。”是也。

襄乐城，州东六十里。汉曰襄洛县，属上郡。后汉废。后魏置县曰襄乐，兼置襄乐郡。西魏又置燕州于此。后周州郡俱废，以县属宁州。隋唐因之。宋亦属宁州。建炎二年，金人陷延安，曲端以泾原军驻淳化，而遣其将吴玠复华州，寻自邠之三水与玠会于襄乐。即此。金亦属宁州。元至元七年，废。淳化三水，今邠州属县。《通志》，今州东北六十里有襄乐巡司。

定平城，州南六十里。本定安县地。唐武德二年，析置定平县，属邠州，寻属宁州。贞元中，以神策军分屯京畿。定平其一也，谓之定平镇。大中间，置衍州于此。五代梁开平三年，遣康怀贞等侵李茂贞，克宁州及衍州，降庆州，游兵侵掠至泾州境内，是也。后周显德五年，废衍州为定平镇，隶邠州。宋初，为定平县，属宁州。政和七年，改属邠州。金属宁州。元省。又有废归义县，唐武德二年析定安县置。贞观十七年，废入定平县。

大要城在州城东。汉县，属北地郡。东汉初，邓禹别攻上郡诸县，征兵引谷，归至大要，是也。县寻废。《金志》，真宁县有要关镇。或以为即古

大要城。弋居城，在州南。汉县，属北地郡。后汉因之。晋废，寻复置。后魏因之，仍属北地郡。后周废。

横岭，州东百里，即子午山之别阜。岭北即真宁县。《汉志》注所云：桥山在阳周南也。又安定岩，在州西五十里。岩壑如黛，石可镌砚。彭池原，在州北。《唐书》，宁州有彭池。《金志》彭原县有彭池原。原盖因地而名。晋太元十一年，苻丕遣邓景据彭池，击姚萇于长安。胡氏曰：“此彭池当作漉池，非宁州之彭池也。”

九龙川，州东百二十里。一名九陵川，以川中有堆阜凡九似陵也。自横岭流至州西南，合奢延川，又南流入泾河。其水清莹，即真宁河矣。亦曰宁江，又曰宁河。

奢延川，州东百里。一名大延川。自横岭流至襄乐故城，又西流，绕至城南，合九龙川。《唐志》，长安三年，宁州大雨，水漂二千余家，溺死千余人。盖即诸川溢流也。珊瑚川，在州西十五里，下流亦会九龙川。一云珊瑚谷水，东南至枸邑入洛。枸邑，今见邠州三水县。

黑水河，在州西北。自府境流入，至州南，会于九龙川。复分流而东南出，入邠州长武县界，合于泾水。白羊水，在州东百里。一名白谷川。源出白羊溪，流经横岭西北，入奢延川。

政平驿，州东南六十里。邠、宁往来之通道也。又彭原驿，《通志》云，在州南。州东又有交城镇，金天德二年置。

真宁县，州东百里。西北至府城二百里。汉上郡阳周县地。后魏置泥阳、护涉二护军，后为阳周县。隋改为罗川县，属宁州。唐天宝初，获玉真人像于此，因改为真宁。今县城周二里有奇，编户二十一里。

阳周城，县北三十五里。本秦县，属上郡。始皇死，胡亥矫诏赐蒙恬死。恬不肯死，使者以属吏，系之阳周。《史记》，陈余与章邯书：蒙恬为秦将，北逐匈奴，开榆中地数千里，竟斩阳周。是也。汉亦为阳周县。后汉废。后魏复置阳周县。太平真君二年，置赵兴郡治焉。西魏又置显州于此。后周州郡俱废。隋开皇中，并入罗川县。《唐史》，会昌以后，回鹘败散。乾符二年，其余众始还至罗川，遣使贡献。此罗川，盖塞外回鹘旧

地。胡氏以为即阳周，误也。

泥源城，在县东北。《汉志》注，泥阳有泥水，出郁郅北蛮中。城盖近泥水上流而名也。魏收曰：“阳周有泥阳城。即此矣。”晋太元十二年，姚萇攻苻师奴于敷陆，军于泥源。是也。敷陆，见鄜州洛川县。

抚琴山，在县治南。山畔有洞，风来作声，仿佛若琴韵，因名。又县东二十里有罗山。《寰宇记》：“罗川水出罗山下，隋以此名县。”其西南为旧宁阳城，有大陵、小陵二水，至城南合流。《诗》：“夹其皇涧”。注云：“即陵水矣。”

雕岭，县东五十里。绵延高耸，亦即子午山之别阜矣。上有秦时驰道，今有雕岭巡司，在县东百里。

马莲河，在县西。自合水县流入，下流会于九龙川。又县南有大陵、小陵二水，即九龙川之上源矣。《通志》，县南十里有真宁河，源出横岭，西流入宁州界。

于庄沟，在县东二十里。其水南流入邠州、淳化县，会于清水。又要册湫，在县东六十里桥山之尾。周围九亩，上有龙祠。

卷五八

平凉府，东至西安府邠州三百里，南至凤翔府陇州二百八十里，西南至巩昌府秦州三百四十五里，西北至宁夏中卫四百六十里，东北至庆阳府三百里。自府治至布政司六百五十里，至江南江宁府三千二百八十里，至京师三千四百里。

《禹贡》雍州地。春秋时属秦。秦并天下，属北地郡。汉置安定郡。后汉因之。汉郡治高平，后汉移治临泾。永初五年，羌乱，郡寄治美阳。永建四年，复旧。美阳，今见乾州武功县，晋亦曰安定郡仍治临泾。后魏为安定、高平诸郡地。后周分属泾、原二州。隋初因之。炀帝时，属平凉、安定二郡。唐初亦属泾州。天宝初，属平凉、安定二郡。元和四年，始置行渭州治此渭州，今巩昌也。时陷于吐蕃，既而行渭州复为吐蕃所陷。中和四年，

复置渭州。五代因之。宋亦曰渭州亦曰陇西郡。庆历初，为泾原路经略安抚使治所。政和五年，升为平凉军节度。金为平凉府。元因之。明仍曰平凉府，领州三、县七。今仍曰平凉府。

府山川险阻，控扼边陲，屹为要会。汉以安定名郡。说者曰，郡外阻河朔，内当陇口，襟带秦、凉，拥卫辅辅。关中安定，系于此也。元魏主修永熙中，时贺拔岳为雍州刺史。宇文泰说岳曰：“今灵夏、河西各拥部众，未知所属。公引军近陇，扼其要害，收其士马，以资吾军。西辑氐、羌，北抚沙漠，还军长安，匡辅魏室。此桓文、之策也。”岳因引兵西屯平凉。诸州镇多附于岳，同会平凉受节度。今府西南平凉故城，是也。既而岳至高平，为秦州刺史侯莫陈悦所贼杀。悦还屯水洛。岳众散还平凉，共迎宇文泰于夏州。泰集宾佐议所向，皆以为水洛去平凉不远，宜且留以观变。泰曰：“悦既害元帅，自应乘势直据平凉，而退还水洛，吾知其无能为也。”即驰赴平凉，引兵上陇，为岳报仇，抚定关右。盖宇文霸业集于平凉也。唐自广德以后，西陲尽为异域，而泾原之备日棘。贞元七年，诏以平凉当要会之冲，居北地之要，命泾原节度刘昌筑平凉故城，扼弹箜峡口。浹旬而毕，廓地二百里即今郡城。此平凉置州列郡之权舆也。说者曰：陇口之要在平凉，而平凉之要尤在原州。今镇原县。《唐史》：大历八年，吐蕃数入寇。元载尝为西州刺史，知河西陇右山川形势，因言于上曰，四镇、北庭既理泾州，时马璘为四镇、北庭节度使，治泾州，无险要可守。陇山高峻，南连秦岭，北抵大河。今国家西境尽潘原，而吐蕃戍摧沙堡，原州居其中间，当陇山之口。其西皆监牧故地，草肥水美，平凉在其东，独耕一县，可给军食。故垒尚存，吐蕃弃而不居。每岁盛夏，吐蕃畜牧青海，去塞甚远。若乘间筑之，二旬可毕。移京西军戍原州，移子仪军戍泾州，为之根本，分守石门、木峡，渐开陇右，稍置鸣沙戍见宁夏中卫丰安军见灵州所为羽翼，北带灵武五城为形势，进达安西，据吐蕃腹心，则朝廷可安枕矣。议格不用。时载并图地形以献，会载罢相，不果。建中初，杨炎为相，复议城之，亦不果。贞元三年，吐蕃城故原州而屯之，陇右沦于异域者殆五十年。宋咸平四年，陕西漕臣刘综言：“镇戎军为古原州，地沃衍，岁输

刍粮四十五万石,请置屯田务。”因开田五百余顷。王氏曰:“原州当陇道之要,汉光武取陇右,先降高峻,而后可以蹙隗嚣。赫连勃勃据高平,乘间以窥陇东、岭北,得以病姚兴。宇文泰军于高平,因而规定关陇。诚要害之地也。”

平凉县,附郭。汉朝那、泾阳二县地,属安定郡。东汉省泾阳入朝那。晋因之。后魏废为长城县地。后周复置朝那县,又析置平凉县。唐省朝那入平凉,属原州。宋为渭州治。金为平凉府治。今编户二十三里。

平凉故城,在府西南四十里。苻秦时所置,兼置平凉郡治焉。晋太元十七年,苻登与姚萇相攻,登保据平凉。十八年,姚兴袭平凉,大获而还。十九年,苻登为姚兴所败,平凉入于后秦。义熙六年,赫连勃勃遣兵攻秦平凉,姚兴击却之。明年,复寇平凉,寻没于勃勃。后魏主焘神䴥元年,夏主昌自上邽屯平凉,与魏争安定,昌败。赫连定复称帝于平凉。三年,魏主焘围平凉,克之。其后置泾州于此。熙平二年,城泾州所,治平凉。即此。正光五年,秦州贼莫折天生陷岐州,使其党卜胡寇泾州,败薛峦于平凉东。永安三年,尔朱天光败高平贼万俟丑奴于安定。丑奴欲趣高平,天光遣贺拔岳等追及于平凉,擒之。永熙三年,侯莫陈悦杀贺拔岳于河曲。岳众散还平凉。众共推夏州刺史宇文泰统岳众,泰因驰入平凉。西魏末,置平凉县,属原州。隋因之。大业初,属平凉郡。唐亦为平凉县。《唐书》:县旧治阳音川。开元五年,移治古塞城。广德以后,没于吐蕃。贞元七年,泾原节度刘昌筑平凉城,移治于此。十九年,以原州移治平凉。元和四年,改置行渭州治焉。自是常为州郡治。《五代史》:后唐清泰三年,以故平凉县之安国、耀武两镇置平凉县,属泾州。”似误。今府城周六里,有东西二城。《通志》:元末,李思齐将袁亨分筑南北二城。明朝洪武六年,修复如故。门四:东和阳,南万安,西来远,北定北。周九里有奇。

鹑阴城,在府西南九十里。本汉安定郡属县,在今靖远卫境。后魏移置于此,为平凉郡治。魏收《志》,鹑阴有故平凉城,即苻秦所置故城也。魏因置平凉郡于此。后周并入平凉县。

朝那城,在府东南。春秋时地名也,为秦之北境。汉置县,属安定郡。

《史记》：汉初，匈奴强，复收蒙恬所夺匈奴故地，南至朝那、肤施。文帝十四年。匈奴入犯朝那萧关，杀北地都尉，遂至彭阳，使奇兵入烧回中宫，侯骑至雍甘泉。孔氏曰：“朝那故城，在今百泉县西七十里。曰朝那萧关者，萧关属朝那也。”胡氏曰：“朝那故城，在原州花石川。”后汉仍属安定郡。晋因之。后魏亦属安定郡。后周改置于故城东南二百余里，属泾州。隋因之。大业初，属安定郡。义宁初，废。雍，见前凤翔县。甘泉，见泾阳县。时侯骑或至雍，或至甘泉，故曰雍、甘泉。

泾阳城，在府西南。周宣王时，猋狁内侵，至于泾阳。谓此地也。汉置县，属安定郡。后汉建武二年，隗嚣自陇坻追败赤眉于此，县寻废。灵帝初，段熲破叛羌至泾阳。晋元康六年，秦、雍氏、羌悉反，立氏帅齐万年为帝，围泾阳。即此城也。咸和四年，石赵取长安，分安定郡置陇东郡，治泾阳县。太元十二年，后秦将姚硕德为苻秦故将杨定所逼，自上邽退守泾阳，即此。又姚萇尝侨置天水郡于泾阳。太元十五年，苻登攻故秦天水太守张业生于陇东，不克，是也。后魏亦为陇东郡治，又析汉之咸阳县地，置泾阳县。后周陇东郡及泾阳县俱废，而泾阳遂移于渭北。

潘原城，在府东四十里。本汉阴盘县，属安定郡。后汉因之。建武七年，隗嚣将步骑侵安定至阴盘，冯异等拒却之。晋时县移治新丰，属京兆郡。宋元嘉六年，夏赫连定保平凉，畋于阴盘。即此。后魏置平原郡，治阴盘。后周因之。隋初郡废，县属泾州。唐初因之。天宝初，改曰潘原。大历八年，马磷自泾州袭吐蕃辘重于潘原，败之。贞元二年，吐蕃将劫盟。骆元光先奉诏屯潘原，以潘原距盟所七十里，缓急不相知，因进兵距盟所三十里而屯。《会要》：大历后以潘原省入良原县，改故县为彰信堡。贞元四年，陇右节度李元谅复筑潘原城。十一年，节度刘昌奏请于临泾界保定城置阴盘县，敕改为潘原。复置于彰信堡，寻又省入良原县。元和中，节度朱忠亮复筑潘原城。王潜又筑归化、潘原二垒，请复城原州，不果。中和四年，武州侨治于潘原，复立为县。五代周显德中，州废，县属渭州。宋因之。金亦曰潘原县，仍属渭州。元省入平凉县。

百泉城，府西北八十里。本姚秦时之黄石固。赫连夏置长城护军于

此。后魏因置长城郡，治黄石县。西魏改黄石为长城县。隋初，郡废，县属原州。大业初，又改长城县为百泉。唐因之，仍属原州。贞元二年，吐蕃诈浑瑊盟于平凉川。韩游瑰奉诏军洛口，遣五百骑伏□营侧，令曰：“若有变，汝曹西趣百泉以分其势。”是也。五代初，县废。

安丘城，在府东。魏收《志》，阴盘有安丘城。晋太元十四年，姚萇遣将姚崇袭苻登辎重于大界。登邀败崇于安丘。是也。胡氏曰：“大界在新平、安定间。”又有安武城，在府东北。本汉县，属安定郡。后汉废。”晋太元十三年，苻登与姚萇相拒，登军朝那，萇军武都。武都盖因安武而名。后魏亦为安武县，属西北地郡。西魏又置安武郡，治此。隋开皇三年，俱废入朝那。魏收《志》，阴盘有安武城。

可蓝山，府西南二十里。一名都卢山，亦曰苛蓝山。刘宋元嘉六年，夏主赫连定保平凉，畋于阴盘，登苛蓝山，望统万城泣曰：“先帝若以朕承大业者，岂复有今日之事！”盖是时为魏所败也。其相接者，曰大统山，亦高峻。又西接于崆峒山。天坛山，在府北五里。一名卧虎山，上有朝天宫。山之西为会盟坛。唐贞元二年，吐蕃诈请盟，因筑坛于此。使浑瑊与吐蕃会盟处也。《志》云，坛在今城西北五里。

崆峒山，府西三十里。《唐十道志》：“陇右名山之一也。”相传即广成子所居。黄帝尝学道于此。山之东岩，有广成子洞、皂鹤洞。西岩有西岩泉及琉璃泉，味俱甘冽。峰之最高者曰翠屏峰，顶有圆石，累累若珠。一名垂珠峰，俗名屏风山。峰顶又有青龙洞，雨后将晴，云辄归洞中。亦谓之归云洞。其相对者为香炉峰，亦名香炉台。两峰间有巨石横亘，谓之石桥。山下有撒宝寨，秦始皇游崆峒至此。又汉武帝逾陇西，登崆峒，山下有问道宫，亦以黄帝问道广成子而名。历代皆修葺焉。山之西北为望家山，亦峻耸。《志》云，崆峒西连笄头，东连大统，西北接望家山。是也。

笄头山，在府西四十里崆峒山西。亦曰笄头山，以形似名。《史记》：“黄帝西至于崆峒，登笄头之山。”酈道元曰：“笄头山，大陇之异名也。”或谓之鸡头山。秦始皇二十七年，巡陇西北地，至鸡头。后汉建武七年，隗嚣攻来歙于略阳，使其将王孟塞鸡头道。晋咸和七年，后赵石生起兵长安，

讨石虎不克，匿于鸡头山。隋开皇二年，突厥入寇，韩增寿破之于鸡头山，是也。亦谓之牵屯山。北魏永安三年，尔知天光讨万俟丑奴于高平。其党万俟道洛帅其众西入牵屯山，据险自守，为天光所败，走入陇，归略阳贼帅王庆云。西魏末，宇文泰北巡，度北河，还至牵屯，是也。班固曰：“杆头山，在泾阳县西。”孔颖达曰：“笄头山，一名空峒山，在高平西百里。有泾谷，泾水所出。杜佑曰：“笄头山，亦讹为牵屯山。杆，又讹为牵也。”盖山界于泾阳、高平两县间，恃为险阻。

雕窠峡，府南三十里。两山深险，群雕出入其中，因名。金佛峡，在府西六十里。峡长二十里，峭壁层峙，不见天日。嘉靖十九年，于峡口筑城，复建清水、红沙二石墩于山上，以增戍守。

弹箏峡，府西百里。《九域志》：渭州都卢峡，即弹箏峡。《水经注》云，都卢山峡之内，常有弹箏声，一名弦歌之山。峡口水流风吹，樵响如音韵也。宋元嘉五年，魏主焘遣将奚斤击夏。赫连定设伏陇山弹箏谷以邀之。即此。后魏永熙三年，宇文泰在夏州，闻贺拔岳为侯莫陈悦所害，遂驰赴平凉，令杜朔周先据弹箏峡。唐武德八年，突厥入犯，诏李艺屯华亭县及弹箏峡以备之。建中三年，凤翔陇右节度与吐蕃盟，以泾州西至弹箏峡西为唐界。贞元三年，吐蕃入寇华亭及连云堡，陷之，掠人畜万计，置之弹箏峡西。七年，刘昌城平凉，开地三百里，扼弹箏峡口，是也。

孙丘谷，在府东南。晋太元十一年，苻秦平凉太守金熙、安定都尉没奕干等，与姚秦将姚方成战于孙丘谷，败之。即此。又苟头原，在县东。晋太元十四年，苻登攻后秦平凉城，克之。进据苟头原，逼姚萇于安定，不克是也。

泾河，在府北一里。源出笄头山。经华亭县境至府西五里有泾河桥。又东经城北，至府东五里，为利民渠。又东入泾州界。《志》云，利民渠引泾水，连亘二百里至泾州东，分渠六十二，灌田三千余顷。今多堙废。《图经》：泾河自府西南白岩发源，下流入于泾州。详见大川泾水。

横河，府西三十里。自华亭县流入境，下流注于泾河。又府东三里有湫峪河，又东十里有大岔河，又府南二里有南峪河，俱流入于泾河。

依力川,在府西。晋义熙五年,赫连勃勃掠后秦平凉,进屯依力川。王氏曰:“依力川在平凉故城东南。”又东流入于泾河。今涸。柳湖,在府北三十里,旧时湖畔栽柳数千株,因名。

通梢关,在府东五里,有平凉卫军戍守。关盖明初所置。

群牧监,旧在府西。《唐书》:天宝末,太子自奉天至平凉,阅牧马,得数万匹。盖府境宜畜牧也。明洪武三十年,于府治东建陕西行大仆寺。永乐四年,又于府治东建陕西苑马寺,领长乐、灵武、威远、同川、熙春、顺宁六监,开城、安定、弼隆、广宁、清平、万安、庆阳、定边、武安、陇阳、保川、泰和、天兴、永康、嘉靖、安胜、康乐、凤林、香泉、会宁、云骥、升平、延宁、永昌二十四苑,俱在府境及庆阳、巩昌境内。正统三年,又并甘肃苑马寺入焉。

密造堡,在府西南。晋太元十四年,苻登攻安定羌密造堡,克之。即此。敕奇堡,在府西北。晋义熙五年,赫连勃勃攻秦敕奇堡、黄石固、我罗城,皆拔之。黄石固,即百泉废县也。我罗城,又在黄石之东。

朝谷堡,在府西。《唐志》:在平凉故城西三十五里。贞元七年,泾原节度使刘昌筑平凉故城,又筑朝谷堡。诏更为彰信堡。《实录》:朝谷作“胡谷”,彰信作“彰义”。按潘原已为彰信堡,则此当做彰义。归化堡,亦在府西。唐贞元十四年,归化堡军乱,泾原节度使刘昌讨定之。后堡废。元和中,节度王潜复筑归化垒于此。

峡石镇,在府西北。唐元和中泾原节度王潜自原州逾硖石,败吐蕃军,筑归化、潘原二垒是也。时原州治今镇原县之废临泾县。安国镇,在府西四十里。宋置。今为递运所。又府东九十里有家家庄递运所。《通志》:府东二里为平凉递运所,五十里为上鄜,现递运所。又有高平驿,在府东南。

崇信县,府东南八十里。东北至泾州七十里。本平凉县地。唐贞元年间,陇右节度使李元谅始筑城屯军,名曰崇信。亦为神策军分屯之所。宋初始置县,属凤翔府。淳化初,改属仪州。熙宁中,州废,以县属渭州。金属平凉府。今县城周三里有奇,编户五里。

赤城,县西南五十里。宋置。赵元昊谋攻鄜延,约诸番自德靖、塞门、

赤城三道并进。所谓赤城即此城也。金为西赤城镇。德靖、塞门，见延安府保安、安塞二县。铜城，在县西四十里。其西有铜城山，宋因置铜城军。《宋志》：庆历四年，陕西漕臣张奎采仪州黄铜，置博济监。盖在此。花山，在城南。又城北五里为殿子坡，襟带近郊，恃为形胜。五马山，在县西南四十里。状如五马。又有迎驾坡，在县西南三十里。《通志》：县西四十里有断万山，险绝难登。相近又有文笔山，亦秀削。

湫峪，在县西北二里。湫峪水发源于此。北流入平凉县境，注于泾水。《志》云，县西十五里有左峪。又西二十五里为石佛峪。又十里为黄花峪。皆昔时防守之地。

纳水，在城北。源出陇州弦蒲藪。历华亭县，又东北流经此，复东入泾州界。《志》云，县西北四十里有峡口，纳水自华亭县境分南北二流，复会于此，并出峡中而绕流达于城下云。今源流附见大川泾水。

赤城川在县西南六十里。流经灵台县东北，会白石川，入邠州长武县境。至县东四十里亭口镇，入于泾水。白石川，在县南六十里。东流入灵台县境，合于赤城川。

华亭县，府南百二十里。南至凤翔府陇州百六十里。汉右扶风县地。后魏普泰二年，立华亭镇以扼蕃戎。隋大业初，置县，属安定郡。义宁二年，分置陇州于此。唐改属陇州。垂拱二年，改为亭川县。神龙初，复故。大历八年，置义宁军于此。九年，吐蕃入寇，凤翔节度李抱玉破之于义宁，是也。元和三年，省县沔源。贞元三年，吐蕃大掠沔阳、吴山、华亭，即故城也。五代唐又改置义州。后周显德中，复置华亭县，为州治。宋改为仪州。熙宁五年，州废，以县属渭州。属平凉府。今县城周五里有奇，编户八里。

化平城，在县西北百里。宋初置安化县，属渭州，在今县西。熙宁五年，废原州制胜关，移县于关地，以旧县为安化镇，县仍属渭州。金初因之。大定七年，改为化平县，属平凉府。元省。永信城，在县北。唐贞元十三年，筑永信城于平戎川，置军以备御吐蕃。《志》以为即此城也。

阳城，在县西南。后汉初，隗嚣败赤眉于乌氏、泾阳间。赤眉复进至

阳城，入番须中，逢大雪，士多冻死。道元曰：“阳城在安民县。”汉成帝永始二年，罢安定呼他苑为安民县。后汉废。安民应在县界，今《汉志》不载。乌氏，见泾州。番须，见陇州。

陇山，县西三十里，即陇山之东麓也。崇隆绵亘，界于平凉、巩昌、凤翔诸郡间，为关中之屏障。其在县境者，亦曰小陇山。今详见名山陇坻。瓦亭山，在县西北百六十里。瓦亭关在其西麓。又有朝那山，在县西七十里。汉朝那县以此名。县境诸山，皆陇山之别阜矣。

义山，在县东二里。唐以此名军。又县西北二里有铍尖山，以形似名也。又有飞凤山，在县西北百里。桦岭山，在县东五十里，山多桦树。又有湫头山，在县北六十里。

支磨原，在县东北郭。《汾阳家传》：大历十年，吐蕃略潘原，西至小石门、白草川，又下朝那川，至百里城支磨原而入华亭。子仪遣浑瑊破走之于故平凉县小石门。或曰在平凉县西。百里城，今见灵台县。

泾河，县西北八十里。自开头山发源，流经此，与平凉县分界。《志》云：县北十里有武村水，又北二十里为策底水，下流俱入于泾河。又有燕脂川，在县西北百里，亦东流入于泾河。

汭水，在城东南三里。自陇州流入境，又东北流入崇信县。《志》云：汭水绕流域下，有惠民渠，汭引水经城中而西北出，以溉高印之田。

瓦亭关，县西北百八十里。魏收《志》，鹑阴有凡亭。后汉灵帝时，段熲破东羌于此。即瓦亭之讹矣。亦谓之东瓦亭。唐贞观二十年，逾陇山至西瓦亭观牧马。此巩昌秦州秦安县之瓦亭山也。至德元载肃宗幸灵武，牧马于瓦亭。此东瓦亭也。宋建炎四年，金人陷泾原，经略使刘锜退屯瓦亭，金人遂取渭州镇戎军。亦此瓦亭。胡氏曰：“瓦亭川出陇山东北，西南流。关在瓦亭川之首，故名。”金为瓦亭寨。今有巡司戍守。《通志》：有瓦亭驿及递运所，而瓦亭巡司则在县北百八十里。三乡镇，在县西八十里。有三乡川，置巡司于此。《志》云，县又有马铺岭巡司，今革。

镇原县，府北百三十里。西南至巩昌府秦州四百六十里，西北至宁夏卫灵州所五百四十里，东北至庆阳府四百三十里。汉临泾县地，属安

定郡。隋大业初，置秋谷县于此，寻改曰临泾，属安定郡。唐初，仍属泾州及原州，陷吐蕃。元和三年，徙原州治临泾。大中三年，州还治高平。广明后，又侨治临泾。宋、金皆因之。元初，改今州曰镇原州，属巩昌路。至元七年，省州治临泾县入。明初，改州为县，又改今属。今城周不及二里，编户二十里。

高平城，在县西二里。汉置县为安定郡。后汉建武初，冯愷以恂邑叛，引兵西向天水。隗嚣逆击，败之于高平。其东有城曰第一城。建武八年，光武讨隗嚣，进至高平第一城。嚣将高峻拥兵据高平第一城。耿弇等围之，一岁不拔。寇恂奉命往降之，至第一城。峻遣其军帅皇甫文出谒，恂诛之，峻降。其城险固，故曰第一城也。晋省。《括地志》，晋省高平，刘曜复置为朔州治所。苻秦又置牧官都尉于其地。姚秦时，为鲜卑别部帅没奕干所据。晋元兴初，拓跋珪袭高平，没奕干走上邽，寻复还高平。义熙三年，赫连勃勃以朔方叛秦，伪畋于高平川，因袭杀没奕干而并其众。诸将皆谓高平山川险固，土田饶沃，可以定都。勃勃不从。后魏初，谓之高平川。太延二年，置高平镇。正光五年，镇民赫连恩等反，推敕勒酋长胡琛为高平王，攻高平镇，以应破六韩拔陵。魏遣将卢祖迁击走之，改置原州。既而秦州贼莫折大提遣其党卜胡袭高平，陷之。寻复为胡琛、万俟丑奴等所据。永安三年，尔朱天光击平之。西魏大统十四年，宇文泰奉太子钦巡西境，登陇至原州，历北长城。盖繇高平而北至秦所筑长城也。自隋以后，为原州治。唐广德后，陷于吐蕃。自是邠、泾之间，御寇不给。大中三年，原州复治高平。广明中，又弃不守。宋至道中，改置镇戎军于今治。咸平六年，筑军城为重镇。明初，始改为县。今城虽周不及二里，而险固有余。

临泾城，在县东六十里。《括地志》，临泾南去泾州八十里。汉置县，属安定郡。更始末，方望等立前定安公婴为天子，居临泾。更始遣李松等击灭之。后汉移安定郡治此。建安十六年，曹操自长安围安定，杨秋以城降。晋仍为郡治。后魏因之，又为泾州治。后周改置州郡于安定，县寻废。隋大业初，改置湫谷县，属安定郡，旋改为临泾。唐属泾州。大历九年，吐

蕃寇临泾。即此。《唐志》，广德初，原州陷于吐蕃。节度马璘表置行原州于灵台县之百里城。贞元十九年，刘昌城平凉，原州徙治焉。元和三年，始徙治临泾。《郝玘传》，玘为临泾镇将，以临泾地险要，水草肥美，吐蕃将入寇，必屯其地。因言于节度马璘曰：“临泾扼洛口，川原饶衍，利畜牧；西走戎道，旷数百里，皆流沙，无水草，愿城之为休养便地。”璘不听。及段祐代为节度，玘复请。从之。因置行原州，以玘为刺史。自是吐蕃不敢过临泾，泾原获安。”大中三年，原州还旧治。广明中，复治临泾。宋原州亦治焉。金因之。元至元七年，省入镇原州。

彭阳城，县东八十三里。《括地志》，城西去临泾二十里。汉置县，属安定郡。文帝十二年，匈奴入犯，至彭阳。后汉灵帝初，段熲讨叛羌，自彭阳直指高平，是也。晋废。后魏破赫连定于此，复置彭阳县，又置西北地郡治焉。隋开皇初，郡废。十八年，改县曰彭原，属宁州。大业中，为北地郡。唐武德元年，置彭州治此。八年，突厥寇彭州，是也。贞观元年，州废，以县属宁州。宋复为彭阳县，属原州。庆历中，元昊入寇，种世衡将景泰遇于彭阳城，依山为阵处也。金仍为彭阳县。元至元七年，省入镇原州。

丰义城，在县东彭阳废县界。旧有丰城，西魏时置云州于此。后周保定二年，废州为防。隋开皇中，废防为丰义城。唐武德三年，分彭原县置丰义县，属彭州，以故丰城为名。贞观初，改属宁州。贞元三年，吐蕃寇丰义城，前锋至大回原，邠宁节度韩游瑰击却之。四年，游瑰请筑丰义城，二坂而溃，遂不果城。五代时，县废。大回原，或云近泾州境。三水县在县东北百里。汉置三水县，属安定郡，属国都尉治焉。后汉仍属安定郡。刘昭曰：“县有左谷，即卢芳所居。”晋废。《水经注》，肥水出牵屯山，东北流，注高平川。川东有三水县故城。东汉初，三水人卢芳据城叛。即此。廉城，在县东北。汉置廉县，属北地郡。后汉因之。晋废。《水经注》，高平川东北流径廉城东，又东北径三水县西。是也。

他楼城，县北百里。本高平县地。晋太元十六年，乞伏乾归击鲜卑部帅没奕干，没奕干奔他楼城。即此。唐贞观六年，置他楼县，又以突厥降户置缘州治焉。神龙初，州县俱废。侯尼城，在县东北百五里。宋元嘉六

年，赫连定保平凉，欲复取统万，引兵东至侯尼城，不敢进而还。

萧关城，县西北百四十里，即汉之萧关也。《旧唐书》，高宗时，于萧关置地鞬县，属原州。神龙元年废，改置萧关县。广德后没于吐蕃。大中五年，复置武州治此。中和四年，武州侨治潘原，萧关县属焉。五代周显德中，废武州，并废萧关县，是也。又有白草军城，在萧关北、蔚茹水西。唐开元中，置军于此，属朔方节度。

平夏城，县西八十里。本唐石门关之地，亦曰石门城。宋绍圣四年，夏人入寇，知渭州章□请城葫芦河川，据形胜以逼夏人。诏从之。遂出葫芦河川，筑二寨于石门峡江口好水河之阴。夏人来争，击却之。赐名曰平夏城、灵平寨，寻升平夏城为怀德军。《宋志》，怀德城，初亦名威德军。其东十五里为结沟堡，西十八里为石门堡，南十二里为灵平寨，北十八里为通峡寨。是也。又明景泰中，知平凉府张镛请修葫芦峡口古城。议者谓不击要害，罢之。马文升曰：“葫芦峡为宁夏韦州南出静宁之要路。”盖即平夏城故址也。

保定城，在县东。唐贞元七年，泾原节度使刘昌筑保定城，捍青石岭。十年，又请于临泾界保定城置阴盘县，是也。靖夏城，或云在县东北。宋置。政和六年，夏人大举攻泾原靖夏城，城陷，屠之而去。

陇山，县西七十里，即陇山北麓也。对华亭小陇山而言，亦曰大陇山。有若水谷，高平川出焉。《水经注》，汉建武八年，世祖征隗嚣，从高平第一城若水谷入。即此谷也。若水，当做“苦水”。

雉头山，县西三十里。又西二十里为鸡头山，本一山而异名耳。《通典》：笄头山在高平县，一名崆峒山。盖山陇绵延，接于县西也。《志》云，县东二里有东山，极高峻。又东八里有玉山，多白石。

逢义山，在县北。东汉建安初，段颍讨先零叛羌，自彭阳直指高平，战于逢义山，大破之。杜佑曰：“高平县有逢义山。”是也。三观山，或云在县北。唐武德五年，突厥寇原州，陷大震关。既而交州刺史权士通、弘州总管宇文歆、灵州总管杨师道，击突厥于三观山，破之。

高平川，在县治南。源出大陇山。一名苦水，下流合于胡卢河。汉段

颍为护羌校尉，于安定高平若水讨先零羌，斩首八千级于是水之上。若水，即苦水之讹矣。晋隆安五年，后魏拓跋遵等袭破没奕干于高平，亦即是川也。《水经注》，高平川，北入于河，西南去安定三百四十里。

胡卢河，在萧关东十五里。《志》云，县西南有颓沙山，河流出焉。曲折流，经县西北，亦名蔚茹水，北注于黄河。支流折而东南，入平凉县界，注于泾河。《唐志》，萧关县有蔚茹水，水西即白草军。太和五年，牛僧儒主义以维州还吐蕃，曰：“吐蕃若养马蔚茹川，上平凉阪、犯回中，不三日至咸阳桥，何有西南数千里外之维州哉？”盖蔚茹川多水草，宜畜牧也。宋治平中，蔡挺知渭州，夏人集胡卢河。挺出奇兵迎击，夏人奔溃。《金志》谓之大胡河。又屈野河，亦在县北，下流合于胡卢河。或曰，即胡卢河之异名也。宋咸平四年，陕西漕臣刘琮言：“镇戎军本古原州，请于军前后置堡寨，且耕且战。”祥符二年，始置横阳、神堂、缘城三寨，皆在屈野河东。天圣以后，没于西夏。

三川，县西北三十里。《水经》谓之次水。其源本一，流而为三，入高平川。又有三水，在县东北六十里。水流三派，会归一川，流入泾州界，入于泾水。汉三水县以此名。阳晋水，在县西。自西蕃界流入，又东南流，经平凉县北，至泾州境，合于泾水。

石门水，县西八十里。其地有石门口，亦曰石门关。《水经注》：其水五源，俱导东北乱流，左会三川，参差相得，同为一川，又东北注于高平川。”肥水，在县西北四十里。又西北有自延水。又蒲水，在县北五十里，出县北境之南蒲谷。《金志》谓之蒲川河，下流俱入于高平川。

长泽川，在县西北。南流合于高平川。唐大历十一年，吐蕃寇原州石门，入长泽川。十二年，复入寇，军于原州北长泽监，进破方渠。时盖置马监于此。又寿渠川，在县北。晋义熙六年，赫连勃勃寇略阳，徙其民于大城。姚兴自安定追之，至寿渠川，不及而还。胡氏曰：“寿渠川，在安定西北。”安定，今泾州也。大城，见榆林卫。六泉，在县西北。晋太元十二年，乞伏国仁袭鲜卑三部大人于六泉，三部皆降于国仁。胡氏曰：“六泉在高平境内。”

萧关，在县西北百四十里。自秦、汉以来，为华戎之大限。唐置萧关县于此。《宋志》，萧关西三十里有绥戎堡。关北十八里有临川堡。又有通关、山西二堡，与临川堡俱隶于萧关。金亦为萧关镇。今详见重险萧关。

木峡关，在县西南，亦陇山之口也。元魏永熙三年，宇文泰讨侯莫陈悦于水洛城。至原州，众军毕集，遂引兵上陇，出木峡关，是也。隋开皇二年，突厥纵兵出木峡、石门两道入寇，武威、天水、金城、上郡、弘化、延安六畜咸尽。唐为原州七关之一。

石门关，在县西九十八里，亦曰石门峡。隋开皇二年，突厥自石门分道入寇。唐为原州七关之一。元和三年，沙陀朱邪执宜自甘州谋归唐，循乌德鞬山而东。吐蕃追之，沙陀自洮水转战至石门，诣灵州降。宋绍圣二年，以其地置平夏城。元符初，又筑石门堡于此。又石峡关，在县西七十里，当陇山之口。其南又有驿藏、木靖二关。唐时原州七关，在县境者凡五。或以木靖为七关之一，而萧关不与焉。

定川寨，县西北二十五里。宋置。庆历二年，赵元昊寇镇戎军。渭州将葛怀敏御之于此。贼毁桥，断其归路，四面围之。怀敏突围走，至长城，濠路已断，死焉。元昊遂乘胜直抵渭州。《宋志》，定川与高平寨相接。又荡羌寨，在县西北六十里，宋元符初置。其东十八里曰通峡寨，又东八里曰东河湾堡。《宋志》，镇戎军北八十里有胜羌寨，西北五十里有通远寨，西南百二十里又有九羊寨，其地名九羊谷也。金人多因宋旧。灵平寨，在县西南百十里。宋置。本名好水寨。绍圣四年，改名灵平。其南二十八里有熙宁寨，以宋熙宁中所置而名。又县境有乾兴、飞泉等寨，亦宋置。金因之。元废。

高平寨，在县北二十五里。宋庆历二年，置寨于此。旁有故寨堡，宋元符四年置。金废。龙泉堡，在县西北。《宋志》，通远寨东三十里为龙泉堡。

摧沙堡，在县西北。唐置。广德二年，仆固怀恩合回纥、吐蕃自朔方南犯。河西节度使杨志烈遣监军柏文达攻灵武以救京师。文达击摧沙堡、灵武县，皆下之，进攻灵州。怀恩闻之，引还朔方。大历中元载言：“吐

蕃戍摧沙堡。”盖原州要地也。贞元二年，李晟遣将野诗良辅，自凤翔袭破吐蕃于此。

土梨树堡，在县东。唐贞元二年，吐蕃将劫盟，先请盟于土梨树。神策将马有麟奏：“土梨树多险阻，恐吐蕃设伏兵，不如平凉川坦夷。”因定盟所于平凉川，是也。

善和镇，在县西南。唐武德六年，突厥陷原州善和镇，遂侵渭州。又新城镇，在县西五十里。柳泉镇，在县西北七十里，俱宋置。金人疆域图：原州有新城、柳泉二镇。西城屯，在县东南九十里。唐兴元初，李晟复西京，朱泚自泾州北走，至彭原西城屯。其将梁庭芬等杀之，趣泾州降。《通志》，县南九十里白水驿。又县北有安平寨巡司。

附见：

平凉卫，在府城内。洪武三年建，初置于府治东。永乐六年，移于府治东南，辖千户所五。又安东中护卫，在府治东。洪熙元年，为韩府置。

泾州，府东百五十里。东南至邠州百五十里，东北至庆阳府百二十里，东至宁州百七十里，南至凤翔府二百六十里。

春秋时秦地，始皇时，属北地郡。汉属安定郡。后汉因之。魏、晋亦曰安定郡。苻秦初，置雍州于此。其后姚秦亦置焉，恃为重镇。后魏改置泾州，取泾水为名。魏收《志》，州治临泾县，领安定、平凉、北地、新平、陇东诸城镇，所谓岭北五郡也。隋初，亦曰泾州。大业初，又改为安定郡治安定县。唐复为泾州。天宝初，亦曰安定郡。至德初，改曰保定郡。乾元初，复曰泾州，寻置泾宁节度于此。大顺初，改曰彰义军。宋仍曰泾州亦曰安定郡。太平兴国初，复曰彰化军节度。金改属平凉府。元因之。元至元中，改属巩昌府，寻复旧。后又以州直隶行省。明亦曰泾州，属平凉府，以州治泾川县省入编户十七里，领县一。今仍曰泾州。

州山川环带，水陆流通。岭北有事，州实为之孔道。晋太元中，姚萇起于岭北，以安定为根本。其后遂为重镇。梁喜谓：“若无安定，戎马必至于郿。”是也。赫连勃勃因刘裕灭秦，先据安定，尽收岭北郡县。及裕东还，南下长安，势若建瓴矣。夏人之衰，安定亦降于魏。赫连定复举安定，

遂长驱而入长安，魏人力与之争，然后关中复定。唐自至德以后，吐蕃内侵，恒以泾州为节镇，遮蔽邠、岐。宋以夏人跳梁，泾州亦为重地。庆历中，范仲淹请驻泾州，斩复横山以断贼臂横山，即桥山之北麓。寻命韩琦、范仲淹开府泾州，总四路之事，为攻讨声援。盖泾州联络中外，翼带东西，诚关中之襟要也。

泾川废县，即州治。汉置安定县，属安定郡。后汉省。晋末复置。苻秦为雍州治。姚氏因之。宋元嘉五年，魏将奚斤等军安定。夏主昌自平凉进攻，为魏将安颉所擒。既而魏将丘堆弃安定南走，赫连定复取之。后魏为安定郡治。正光末，高平贼胡琛遣其党万俟丑奴等寇泾州。萧宝寅等军于安定，丑奴军于安定西北七里。别将崔延伯自安定缘原北上。贼覆背来击，延伯败绩。后周时，为泾州治。隋初因之。大业初，为安定郡治。唐亦为泾州治。天宝末，改县为保定县。宋因之。金大定七年，改县曰泾川。明初省。《志》云，泾川城，旧在州北五里，泾州治焉。洪武三年，县废，州移今治。今城周六里有奇，惟南北二门。

乌氏城，《括地志》，在安定县东三十三里。周之故地，后入于戎。秦惠王取之，置乌氏县。氏，音支。汉因之，属安定郡。后汉建武初，隗嚣追破赤眉于乌氏、泾阳间，是也。《后汉书》亦作“乌枝”。晋仍为乌氏县。后魏皆因之。西魏时，废，后为乌氏驿。唐武德九年，突厥屯河南，入寨，围乌城，即乌氏也。肃宗初，自马嵬北行，至乌氏。亦即此。奚得城，在州东南。汉置县，属安定郡。后汉废。后魏复置，属新平郡。后周废。

圻墟城，州东北十四里。亦曰薛举城。唐初薛举尝据此，因名。举卒，子仁果立于圻墟城，寻为世民所败，降于唐。杜佑作“析墟城”。析，思历反。墟，章恕反。故县城，在州南。汉安定县初治此。后汉省，因名故县。晋太元十年，后秦姚萇自故县如新平，是也。

抚夷城，在州东北。汉置县，属安定郡。后汉省。魏收《志》乌氏县有抚夷故城，是也。后魏复置抚夷县，属陇东郡。后周废。或曰，后魏盖徙治于平凉西。

回中山，在州西五里。上有王母宫。《一统志》以为汉武帝通回中道盖

在此，似误。笔峰山，州南五里，山峰耸秀。又东有三峰峭拔，俗名为米面山。

青石岭，州西北七十里。宋白曰：“泾州西北九十里，有临泾城，其界有青石岭，亦曰青石原。”后汉元初四年，马贤讨羌，败于安定青石岸，即此。晋义熙三年，赫连勃勃败姚秦将张佛生于青石原。六年，勃勃又南攻安定，破姚秦将杨佛嵩于青石北原，进攻东乡，下之。东乡盖在青石岭东也。唐大历七年，吐蕃下青石岭，军于那城。郭子仪谕却之。又十二年，吐蕃下青石岭，逼泾州。子仪复击却之。那城，盖朝那城之误也。

青溪岭，在州西南。宋建炎二年，金娄宿犯泾原。经略使曲端遣将吴玠逆击于青溪岭，败之。绍兴中，撒离喝自凤翔趣邠州，泾州将田盛遣兵击之于此，寇引去。

马鞍阪，州西百里。晋义熙十二年，后秦姚绍自安定击赫连勃勃于马鞍阪，破之，追至朝那，不及而还，是也。又州西北有彭坑谷。《后魏书》，孝昌元年，万俟丑奴置营泾州城北七十里当原城。崔延伯缘原北上，战败，保泾州。又从泾州西进，去贼彭坑谷七里，战没。当原城，盖近朝那。安仁谷，《志》云，在州东南四十里，中有长城寨。宋范仲淹尝遣宋良等控守于此。

泾河，在州北。自平凉县流入境，又东南流入邠州长武县界。泇水，在州北二里。上有泇桥。自崇信县流入境，又东南流，入邠州长武县界，合于泾水。

阁川河，州西南三里。州西山谷诸水，会流成河，下流入于泾河。

百泉，州西三十五里。泉眼极多，四时不涸，州人引以溉田。其下流入于泾河。又共池，在州北五里。《诗》，侵阮徂共。郑氏曰：“阮，国名，今之共池是也。”

盐仓，在州西。唐大历八年，泾原节度马璘与吐蕃战于盐仓，败绩。盖是时运盐储此，以供军，故有盐仓之名。

平亭，在州北。元魏永安三年，高平贼万俟丑奴为贺拔岳所败，弃岐州北走安定，置栅于平亭。既而尔朱天光进下安定，丑奴弃平亭北遁。又

彭坑，在州西北。元魏正光末，高平贼帅万俟丑奴等屯安定西彭坑。崔延伯击之，自安定西进，去贼七里结营，直前袭贼，败死。

连云堡，在州西界。宋祁曰：“泾西要地也。三垂峭绝，北据高岸，敌兵进退，烽火易通。”唐贞元三年，吐蕃陷连云堡，泾州恃堡为斥侯。连云既陷，西门不开，门外皆为敌境矣。四年，戍将刘昌始复筑之。路承堡在州东南。晋太元十六年，姚萇败苻登于安定东。登退据路承堡。路承，人姓名。丧乱时创筑此堡，因以为名。

马家凹，州东四十里。今有递运所。又东有金家凹，置巡司戍守。瓦亭驿，在州东六十里，邠泾之通道也。《通志》：州治西北有安定驿。

灵台县，州南九十里。南至凤翔府麟游县七十里，东南至邠州六十里。古密须国。汉为鹑觚县，属北地郡。后汉属安定郡。晋因之。后魏置赵平郡治此。后周郡废，县属泾州。隋初因之。大业初，析置灵台县，取文王伐密作灵台之义。明年，废入鹑觚。唐天宝元年，改鹑觚为灵台县，仍属泾州。宋因之。元省入泾川，寻复置。今城周三里有奇，编户二十里。

鹑觚城，即今县。或曰汉县治，在今县东南接邠州长武县之鹑觚原。秦蒙恬筑长城，以觚爵奠祭。有鹑集觚上，县因以名。今城本隋所置灵台县，后以县并入鹑觚，遂移鹑觚县治此。

阴密城，县西五十里。《志》云：古密国也。周文王伐密，《诗》所称“密人不恭”，此矣。《左传》，密须之鼓与其大辂文，所以大蒐也。《国语》：周共王游泾上，密康公从。盖即密国之后矣。秦始名阴密。昭王五十年，武安君白起有罪，为士伍，迁阴密。汉为阴密县，属安定郡。后汉废。晋复置。大兴二年，晋王保使其将张显等据阴密，为刘曜所陷。三年，巴西句渠知举兵拒刘曜，保于阴密，曜将游子远击灭之。太元十二年，苻登将杨定等攻后秦姚硕德于泾阳。姚萇自阴密赴救。义熙十二年，赫连勃勃攻拔后秦阴密，置雍州镇焉。寻复为秦所取。后魏主焘延和三年，休屠金当川围魏阴密。魏将拓跋嘉击斩之。即此城也。后魏仍为阴密县，属平凉郡。后周废。

良原城，县西北九十里。《九域志》，在泾州西南六十里。本鹑觚县

地。隋大业初，析置良原县，以县西南有良原而名。唐属泾州。贞元二年，为吐蕃所破。四年，陇右节度使李元谅筑良原故城而镇之。开美田数千里，劝士垦辟，岁入菽粟数十万斛。自是常以神策军分屯于此，谓之良原镇。朱梁贞明六年，蜀将王宗俦等攻岐，出故关，壁于咸宜，入良原，是也。宋仍属泾州。元省入灵台县。胡氏曰：咸宜，今见陇州。

百里城，在县东。《元和志》，灵台县有百里城，亦曰百城。唐大历八年，吐蕃入寇，郭子仪使浑瑊将兵趣朝那。吐蕃至百城而还。瑊邀之于隘，尽得其所掠。十年，马磷复破吐蕃于此。又磷以原州陷于吐蕃，表置行原州治焉。贞元三年，吐蕃入寇，诏唐朝臣戍百里城，是也。《九域志》，灵台县有百里镇。

苍山，县南二里。以林木苍翠而名。又隐形山，在县东北二里。以地形深奥而名也。台山，在县东北十里。山多奇木异禽，甘泉秀石，顶平如台，因名。一作书台山。

保岩山，县东三十里。山势峭拔，回旋百折，巅有经台，登之望见百里外。其下常有云雾。又有温、冷二泉出焉。兼山，在县西九十里。其山两重，因名。《一统志》云，泾州之主山也。

白石原，在县西北。《志》云，白石原首起废良原县西南三十里。东下三十里分为两原：一更名良原，一更名杜原。或曰，即灵台西原也。唐永泰初，回纥、吐蕃入寇，郭子仪以回纥兵破吐蕃于灵台西原。刘昫曰：“破吐蕃处在灵台县西五十里，地名赤山岭。”望儿原，在废良原县东三十里。今县东十里又有卧龙原。

三香水，在县东北五里。源出凤翔府麟游县东，亦名三交川。下流入邠州界，合泾水。《志》云，在县东十五里。达溪川，在县南二里，流达于泾河。《志》云，源出陇州五马山，至邠州梁山脚下，入于泾水。旧《志》：县西七十里，有姐己川。相传姐己产于此。盖即达溪之讹矣。

细川水，在县东北。源出麟游废普润县之细川，东北流，入县境，又东北合于三交川。北魏永安三年，高平贼万俟丑奴屯安定，闻魏军未进，乃散众耕于细川。唐初，泾州镇将刘感自高塘引还泾州。薛仁杲自南原

驰下，与感战于百里细川，感为所擒。百里、细川地盖相近。胡氏曰：“灵台百里镇，即古细川地。”

草壁戍。胡氏曰：“在阴密东。”晋大兴二年，屠各路松多起兵附晋王保，据草壁。刘曜攻拔之，松多奔陇城。《水经注》，陇山西南故陇城北有松多川。盖因松多据此为名。栖凤桥，在县西五十五里，细川水经其下，南接麟游县境。

静宁州，府西二百三十里。南至巩昌府秦州二百五十里，东北至固原州百六十里，西北至靖边卫四百二十里。

汉安定郡地。唐属原州。宋为渭州之陇干城。庆历中，置德顺军，属秦凤路。金皇统二年，改为德顺州。贞祐四年，又升为陇安节度。元初因之，寻改为静宁州，以州治陇干县省入，属巩昌路。明初改今属，仍曰静宁州。编户十一里，领县二。今亦曰静宁州。

州陇坂环峙，河、渭萦流。宋天禧中，曹玮筑陇干城曰：“异时泾、渭有警，此必争之地。”隆兴中，吴玠复秦、陇诸州，朝议弃还金人。虞允文言：“恢复莫先陕西，陕西新复州郡系德顺之存亡，一旦弃之，则窥蜀之路愈多。西和、阶、成，利害至重，不可不审。”盖静宁为陇口要地，自陇以西，保据所当先也。

陇干废县，今州治。宋元祐八年，以外底堡置陇干县，为德顺军治。金因之。元省。今州城周七里有奇。有登高台置于城最高处，为瞭望之所。

水洛城，州西南百里。《水经注》，水洛亭在陇山之西，近略阳县界。是也。晋义熙七年，西秦乞伏乾归攻姚秦南平太守王憬于水洛城，克之。北魏永安末，贼帅万俟道洛为尔朱天光所败，自高平走降略阳贼帅王庆云。庆云遂称帝于水洛城。天光追击之，帅诸军入陇，至水洛城。庆云、道洛出战而败，拔其东城。贼并兵趣西城，西城无水，为天光所擒。是水洛有二城也。永熙三年，贺拔岳自平凉召秦州刺史侯莫陈悦会于高平，共讨曹泥于灵州，为悦所害。悦还入陇，屯水洛城。既而宇文泰讨之，引兵上陇。悦留兵守水洛，退保略阳。泰至，水洛即降。隋为陇城县地。唐因

之。宋咸平中，曹玮尝经营此。范仲淹曰：“朝那之西、秦亭之东为水洛城。”郑戩曰：“水洛城西占陇坻，通秦州往来路。陇之二水，环城西流，绕带渭河，川平土沃，广数百里，又有水轮银铜之利。”庆历三年，刘沪密使城主铎斯那内附，戩即遣沪筑之以捍西夏。金升为县。元并入陇干。

治平城，州南八十里。宋治平四年所置寨。因名。吴璘尝遣王中正败金人于此。金升为治平县，属德顺州。元废。

威戎城，在州西南四十里。宋为堡，属德顺军。金升为县。元省。城下有威戎川。

陇山，州南百五十里，即故陇坻之隘也。或谓之石门山，亦曰石门峡。崖石如门，山路斩截，当陇山北垂。宋刘沪尝破羌裔于此。《志》云：陇山亘南北数州，石门出入径道也。镇原之石门、石峡皆因此而名矣。余详见名山陇坻。

横山，州北十里。山连绵横亘，旧为蕃部所居。又翠屏山，在州南五里。下为白土盆。又东七里有马迹岔，州西南六十里有牡丹盆，皆陇山之支麓也。

旗鼓山，在水洛故城南一里。又州南七十里为武山，西南八十里有宋家山。又有孙家山、主山，俱在州南百五十里，与陇山冈脉相接。

水洛川，在州南。《水经注》，川导源陇山，西得奴棣川口。奴棣川，亦出陇山，流合水洛川，又西经水洛亭，又西南径石门峡，亦谓之石门水。又西南入秦州界，注略阳川。《元和志》，瓦亭川东北有水洛口，亦谓之洛口。唐贞元二年，吐蕃将劫盟，韩游瑰奉诏屯洛口。即水洛口矣。《志》云，唐人亦以平凉川、蔚茹川、洛门川为三川。大中十一年，吐蕃降将尚延心谓秦成防御使李承勋曰：“唐人多内徙三川，吐蕃皆远遁于叠宕之西。所谓洛门川，即水洛川也。”

苦水河，在州西五里。水味苦，因名。即高平川之上源也。出陇山中，曲折流，入庄浪县境，又东北达于镇原县界。《志》云，州东百五十里又有通遍川，以道路四通而名。

靖边寨，州西七十里。《志》云，寨西南去略阳二百里。宋天禧中，置

寨于此，为戍守要地，属德顺军。金人尝改为静边县，寻复为寨，属隆德县。元省。

得胜寨，州东南五十里。《宋志》，寨东去怀远城三十里，曹玮所置，领开边等堡。赵元昊寇渭州，薄怀远城。韩琦使任福将兵自怀远趣得胜寨，至羊牧隆城，出敌后，是也。又高家堡在州西四十里，旧为戍守处。

庄浪县，州东南九十里。东北至府城百七十里。本华亭县地。元置庄浪路。大德八年，改为州。明洪武八年，又改为县，属静宁州。今城周一里有奇，编户七里。

莲花城，在县东北百里。宋天圣中置。郑戩为经略使，率军士按边至此，天寒，与将佐置酒会饮。日暮尘起，有报敌骑至者，戩曰：“此必三川将按边回，非敌骑也。”已而果然。亦谓之莲花堡。

盘龙山，在县南四十里。山势回伏，状如盘龙。又樱桃原，在县西三十里。

苦水川，县西二十里。自静宁州流入境，又北流入镇原县界，为高平川。县北三十里又有曹务川。川旁旧有姓曹名务者居之，因名。又县西南七十里为阳三川。《志》云，山阳有川，三道合流，因名。

达合堡，《通志》云，在州东二十里。县西三十里有张川堡。俱昔戍守处。

隆德县，州东九十里。东北至固原州五十里。本平凉县地。宋天禧初，置羊牧隆城寨。庆历中，改曰隆德寨。金改为县，属德顺州。今城周九里有奇，编户五里。

怀远城，在县东南四十里。《宋志》，明道三年，镇戎军新修赤藁城，赐名怀远。是也。庆历初，赵元昊寇渭州，趣怀远城。金为怀远寨。元省。《宋志》，怀远寨，北去镇羌寨二十七里。

隆德城，县西北九十里。《一统志》云，县旧治于此，后迁今治。又有红土城，在县北四十里，亦宋金时戍守处。

襟山，县南十里。山势延远，状似衣襟，因名。又美高山，在县东南二十里。山形耸秀，底堡水出于此。

六盘山，在县东二十里，与固原州接界。今详见固原境内。又莺架山，在县西南三十里。

好水，县东二里。源出固原州界六盘山，西南流，合于庄浪县之苦水。宋庆历初，任福败夏人于张家堡南，轻进，屯好水川。其别将屯笼络川，相距五里。贼兵屯川口。福等循好水西行，出六盘山，距羊牧隆城五里。贼伏丛，皆败没。即此处也。底堡水，在县西二里。源出美高山，下流合于好水。

武延川，县西北七十里。昔有武延者居此川旁，因名。宋曹玮知渭州，与陈兴、秦翰破党项章悝族于武延川，是也。又有孤树川，在县北三十里。马兰川，在县西北六十里。其下流俱合于好水。

捺龙川在县东南。下流入苦水川。宋庆历元年，任福趣怀远捺龙川，与贼战于张家堡南。贼佯北，福恃胜轻进处也。六盘关在县东二十五里。唐置。今与固原州分界。又神林堡，在县西四十里，亦旧戍守处也。今有神林堡递运所。又隆城驿，在今县治西。

固原州，府西北百十里。东至庆阳府三百五十里，西北至宁夏中卫三百六十里，西至靖边卫四百五十里。

秦北地郡地。汉初，安定郡治此。晋为雍州徼外地。后魏置高平郡，兼置原州。隋改平凉郡。唐仍为原州。宋置镇戎军。金改镇戎州。元改开成路。至治中，降为州。明初，复废为县。弘治十五年，改置固原州固，本作故。时以此城为故原州城，讳故为固，后遂以名州。是时套河有事，因建为州。又增置固原卫，且以靖、兰、甘三卫隶焉。后又以洮、河、岷三卫隶焉。寻建为重镇州编户九里，属平凉府。今仍曰固原州。

州据八郡之肩背，绾三镇之要膂。元《开成志》云，左控五原，右带兰、会，黄流绕北，崆峒阻南，称为形胜。”今自州以东则翼庆、延，自州以西则卫临、巩，自州而南则瞰三辅矣。乃其边境则东接榆林，西连甘肃，北负宁夏，延袤盖千有余里。三镇者，其固原之门墙，固原者，其三镇之堂奥欤。成化八年，抚臣马文升言：“平巩为关、陕藩篱，而固原为平、巩屏蔽。平、巩有警，则关、陕震惊，而固原一带尤不可无备。弘治十五年，

制臣秦纮言：“御戎之道，以守备为本。平凉北四百余里，旧有豫望城，固、靖北（靖，当作静，谓静宁州。）三百余里旧有石峡口及双峰、台城三处，皆入寇总路。修完戍守，东接环庆，北接韦州，此第一隘也；稍南有西安州镇戎所、海刺都、打刺赤，见靖边卫。黑水口、乾盐池、亦见靖边卫。撒都城，（城一作‘川’），犬牙参错，此第二隘也；又南有固原卫、靖边卫、平滩堡、一条城、东山城、白杨城或曰即阳武城，分布守御，此第三隘也；又进而益南，则有火龙沟、虎山沟二沟当在平凉县西北、金佛峡见平凉县、麻张沟、海子口此二沟当在庆阳府环县西南，乃深入腹里之路。缘山傍溪，筑墙立营，分兵防护，一夫守险，百人莫过，此第四隘也。路径虽多，如此处置，曲折艰远，贼劳我逸，贼难我易，庶几得守备之策云。”嘉靖十五年，制臣刘天和言：“固原为套部深入之冲。前尚书秦纮修筑边墙，延袤千里。然而大举入寇，尚不能支。及杨一清筑白马城堡，而后东路之寇不至。王琼筑下马房关，而后中路之患得免。惟西路自徐斌水至黄河岸六百余里，地势辽远，终难保障。今红寺堡东南起徐斌水至鸣沙州，河岸可二百二十里。总兵任杰议于此地修筑新边一道，迁红寺堡于边内，撤旧墩军士使守新边，舍六百里平漫之地，守二百二十里易据之险，又占水泉数十处，断彼马饮牧之区，而召军佃种，可省馈饷，计无便于此。议者以旧边不可弃，遂格不行。”许论等亦尝言：“固原旧边，繇徐斌水西南至靖边卫黄河岸，凡六百五十里。其间有青沙峴者凡八十里，随风流走，不可筑墙。寇若窃发，必假途于此。”由青沙峴以北，红寺堡以南，周环旷阻，有地数百里，水泉四十五处，草木繁茂，寇至每驻牧马，呼为小河套。红寺堡虽当其冲，而堡势孤悬，且外高内下，四面受敌，又去水甚远，取汲必于堡西之梁家泉。彼若据水头驻守，则立毙矣。诚筑新边于徐斌水东北，直接鸣沙州黄河岸，所筑不满三百里，土坚易守，内包梁家泉等水泉数十处，又有林木之饶，耕屯可数百顷，惟至河冻，则复守旧边，此为固原西路计利至厚也。而议者以弃地扰民沮之，误矣。又花马池一带，固原与宁夏分险处也。往者套内充斥，尝为固原门户之祸。故防维戍守，于此急焉。”要以固原一镇，控扼要领，联属指臂，张皇诘毖，有由

来矣。岂区区为一隅计哉？

开成废县，州西南四十里。汉安定郡高平县地。唐亦为高平县地，属原州。宋置开远堡，属镇戎军。元置开成路及开成县于此，寻降为州。明初，改为县。景泰中议者言开成东北四十里有固原州城，修筑置戍，足以固边折寇。乃命修筑。成化三年，寇破开成，因徙县于固原。弘治中，改置固原州，而以开成县省入焉。今州城周十三里有奇，有门四。

广安城，州东南六二十里。旧《志》云，在开成县东四十五里。宋咸平中，置东山寨。金升为县，隶镇戎州。元至元七年，并入镇原州。寻改置广安县，又升为州，隶开成路。明初，仍废为东山寨。又阳武城，在旧县东南百里。或曰：西魏时尝置阳武县于此。后周废。

三川城，州东南百里。宋天圣中置三川寨。康定初，赵元昊寇三川寨，连陷乾沟、乾福、赵福等三堡。时韩琦帅环庆遣将任福夜趣七十里，至白豹城，败其兵，夏人引却。是也。金置三川县于此，属镇戎川。元至元七年，省入镇原州。

豫望城，在州东二百里。宋时与西夏分界处也。弘治十七年，总制秦纘言：“固原迤北，地名豫望城。骠子川、狮子川、石峡口及宁夏之韦州，延袤千里，可垦田土，无虑数十万顷，请筑屯堡、议耕种。又固原北三百余里旧有石峡口及双峰台城，宜以次修筑。”石峡口城，盖即平夏故城矣。今有预望新仓。

石城，州西北百五十里。在乱山中，甚峭险。其西山顶平，可容数千人。城中有石池可汲。四围有石墙，高二丈余。盖昔人避兵之所。明天顺中，土达满四据此作乱。成化四年，抚臣项忠讨平之。今为石城堡。其旁有青山洞、彗帚山，皆贼巢也。

古长城，亦在州西北。相传即秦所筑。成化三年，寇犯套，官军与战于西山长城，不克。

六盘山，在州西南三十里。曲折险峻，盘旋有六。蒙古自和林有事陕、蜀，恒屯兵于此。《宋史》，绍定三年，蒙古主铁木真殂于六盘山。宝祐六年，蒙古主蒙哥侵宋，次于六盘。开庆元年，蒙哥入蜀，使浑都海守六

盘。景定元年，忽必烈立浑都海以六盘军叛，走甘州，廉希宪使汪良臣击平之。元元贞二年，自六盘至黄河，立屯田，置兵万人，是也。上有清暑楼，元安西王所建。明初，徐达定关中，屡败敌兵于六盘。盖州境之险要。

马屯山，在州西南四十里。本作马毛山。晋太元十九年，苻登为姚萇所败，奔平凉，收集遗众，入马毛山。既而姚兴自安定如泾阳，与登战山南，执登杀之。宋元嘉五年，魏将奚斤军安定，追赫连定于平凉。别将娥清欲循水而往，斤不从，自北道邀其走路，至马髦岭，为所擒。胡氏曰：“马毛山，盖平凉之险要。”

天都山，州西北百五十里。宋元丰四年，宦者李宪帅陕西河东五路之师伐夏，宪自熙河趣兴灵，复兰州，进营于天都山，焚夏人南牟内殿，次胡卢河，不至灵州而还。又元祐二年，夏人与西羌相结，聚兵天都山。即此也。《志》云，山在西安所东南三十六里。兴灵，谓兴州、灵州也。胡卢河，见宁夏镇。

炮架山，在州西北百二十里石城堡前，极险峻。州北九十里又有须弥山。又扫竹岭，在州西北百里。山陇迂回峻阻，亦州境之险也。

清水河，在州城东北。源出六盘山，东北流。镇原县之胡卢河亦流会焉。又北入宁夏卫界。亦名胡卢河。又西北入于黄河。

大黑水，在州北五十里。北流经宁夏境入黄河。又州北百二十里有小黑水流入焉。宋游师雄判德顺军，鄜延将刘瑄欲自延安入安定。师雄料贼有伏，请由他道。已而谍报黑水傍尽伏精骑，始信其言。即此黑水也。

海子河，在州西南三十里。《志》云，州西北又有撒都儿川，须灭都河、硝河俱流入大黑水云。南川有二：一在州东六十里，曰大南川；一在州东南五十里，曰小南川。又有乾川在州东南百六十里。

朝那湫，有二：一在旧县东十五里；一在旧县东北三十里。俱出山间，土人谓之东海、西海。二水相合，方四十里，水停不流，冬夏不增减，两岸不生草木。《封禅书》，湫渊祠朝那。即此。《水经注》，湫水西北流，出长城北，与次水会，径魏行宫故殿西，又东注若水。若水，亦作“苦水”。《通志》，今湫水一在州东南四十里，一在州西南四十里。似误。

六盘关，在六盘山上。关路险阻。唐为原州七关之一。今与隆德县接界。制胜关，在州东南。亦唐原州七关之一，控带陇山以西之路，旧号大振门，管沿坡小寨二十五处。宋熙宁中，关废，改置安化县于其地。元初，废。今关与华亭县接境。

下马房关，州北二百四十里。南至平远千户所四十里。嘉靖初，总制王琼筑此，而后固原中路之患得免。

天圣寨，州东北百里。宋天圣中置，属镇戎军。金亦为天圣寨，元废。又临羌寨，在州北百里。又有定戎堡，在州西北二十里。俱宋元符初置。又天都寨，在州西北西安所东二十六里，南去天都山十里，亦宋元符初置寨，金废。

镇羌寨，在州东南。《宋志》，寨东至三川城二十一里。绍圣四年所置也。

宁安寨，在州境西安所西南三十里。宋崇宁五年置，西至通安寨六十一里。今与靖边卫接界。

张义堡，在州西南六十里。《宋志》，张义堡本名安边堡。熙宁四年，废入开远堡。五年，改置张义堡，仍属镇戎军。金为张义寨。元省。

白马堡，在州东北百三十里。有城，置仓于此。《志》云，堡西去镇戎所百里。正德中，总制杨一清筑。自是固原东路之患渐少。又彭阳城堡，在州东百二十里。宋置。金因之。今亦为戍守处。

黑水苑堡，在州西北百里。亦谓之黑水口，有仓。《志》云，堡东去镇戎所四十里。嘉靖十九年，套寇至固原引还。边将周尚文邀败之于黑水苑堡。即此。

海刺都堡，州北二百十里。亦曰海刺都营，西去西安所四十里。成化中，敌犯固原，由此西入会宁、靖宁之道也。今有海刺都营仓。其相近者曰庙山堡。弘治间，敌尝犯此。

红古城堡，在西安所北百里。今有兵戍守。其西南十里有印子山，亦高峻，《通志》，城西门外有甜水，味甘可饮。中有红古城堡仓。又通会堡，在西安所西五十五里。宋置。

啰没宁堡，在西安所北三十五里。其东又有横岭堡。俱宋置，今废。

徐斌水堡，在西安所北百余里。旧边在堡西南，新边在堡东北，为固原西路之要。其西北又有红寺堡，入灵州西界。

乾盐池堡，在西安所西北，与靖远卫分界，为州境设险处。

甜水堡，在平远所东北八十里，属环县守备戍守。《舆程记》，堡北接宁夏中卫界。是也。嘉靖四十五年，甜水等堡有事，总兵郭江等战死。

响石沟堡，在下马关东。其北为萌城驿，与宁夏境韦州盐池接界，乃固原东路之门户也。

李俊堡，在州西北百七十里。其地亦曰李俊沟，亦曰酸枣沟。天顺中，官军讨满四时，分道进兵处也。州西北又有莽金佛沟及木头沟，亦官军讨满四时，分道进兵处。

羊房堡，在州西北百二十里。其地亦名驴母川。官军讨满四时分道处也。黑城子，在州西北。或谓之红城子。官军由此讨满四。弘治十四年，敌常犯此，官军败绩。《通志》，州东南有永宁驿，并置仓于此。又州西北有板井堡仓，又州东百二十里有彭阳城堡仓。

附见：

固原卫，在州城内。弘治十五年建，辖千户所五。

甘州群牧所，州西北二百里。明置监牧于此，属行太仆寺。成化三年，敌犯固原，官军拒之不克。敌遂屯牧所城外，进陷开城县，杀掠甚众。

西安千户所，州西北二百三十里。本夏人南牟会新城。宋元符元年，得其地，建西安州于此，仍属渭州。金皇统间，地入于夏。元省。明置今所。弘治中，改属固原卫。

镇戎千户所，州北百二十里。本镇原县地。弘治中置所于此，属固原卫。

平远千户所，州北二百里。弘治中置，属固原卫。

甘州千户所，州西北三百余里。亦弘治中置，属甘州中护卫。

卷五九

巩昌府，东至凤翔府陇州六百六十里，南至汉中府宁羌州一千一百六十里，西南至岷州卫二百四十里，西至临洮府二百里，西北至临洮府兰州四百二十里，东北至平凉府固原州六百里。自府治至京师三千六百二十里，至南京二千六百三十里，至布政司一千六十里。

《禹贡》雍州地。春秋时，羌戎所居。《括地志》，自陇以西为冀戎、獯戎、氐、羌之地。秦置陇西郡，以在陇坻之西也。汉因之。东汉灵帝时，分立南安郡。三国魏亦为陇西、南安郡，陇西治襄武。南安治獯道。晋因之。后魏为陇西、南安、安阳三郡地，兼置渭州。后周并为南安郡。隋初郡废。炀帝又废州，复置陇西郡。唐仍曰渭州。天宝初，亦曰陇西郡。乾元初，复故。宝应以后，陷于吐蕃。大中五年，收复景福初，属于李茂贞。五代时为羈縻之地。宋初因之。皇祐中置古渭寨。熙宁五年，升为通远军。崇宁三年，改为巩州。金因之。皇统三年，亦置通远军节度。元初始置巩昌府，寻为巩昌路。明初洪武三年，改为府，领州三、县十四。今仍为巩昌府。

府翼蔽秦、陇，控扼羌、戎。东汉初，隗嚣据陇西，动摇三辅。诸葛武侯伐魏，欲先取陇右，结连羌夷以图关中。魏亦以为重镇。邓艾尝云：“狄道（今临洮）、陇西、南安、祁山，各当有守。”盖其地山谷纠纷，川原回绕。其俗尚气力、修战备、好田猎、勤稼穡，自古用武之国也。诚于此且耕且屯、以守以战。东上秦、陇而雍岐之肩背疏，南下阶成而梁、益之咽喉坏，西指兰会而河湟之要领举。巩昌非无事之地矣。是故，唐初入长安，即遣军安抚陇右。而秦、凉之藩篱秦谓薛举，凉谓李轨，以次摧坏。天宝以后，吐蕃窃有其地，窥伺畿辅，大为唐患。宋人议复河湟，置通远军以经略之，而熙河遂为内地。蒙古并有巩昌，南窥蜀口，而宋之西边，遂不支矣。夫欲保关中，先固陇右，欲固陇右，巩昌岂非都会之所哉？

陇西县，（附郭）。汉獯道县地。后汉中平五年，析置中陶县，属南安

郡。晋因之。后魏属南安阳郡。隋开皇初，郡废，改县曰内陶，寻又改曰武阳。十年，又改为陇西县，属渭州。唐因之。宝应以后，没于吐蕃。宋为古渭寨，属秦州。熙宁中为通远军治。元祐三年，复置陇西县为巩州治。金因之。元为巩昌府治。今编户三十二里。襄武城，府东南五里。汉置县，属陇西郡。后汉因之。魏为陇西郡治。蜀汉延熙十六年，姜维围魏襄武，不克。晋陇西郡亦治此。后魏因之。又于县置渭州，以水为名也。隋亦为渭州治。大业初，为陇西郡治。唐因之。宝应以后，没于吐蕃，县废。宋巩州移于今治。今郡城周九里有奇，门四：东永安、南武安、西静安、北靖安。环城有濠，称为险固。

獾道城，府东南二十五里。应劭曰：“戎邑也。”《史记》，秦孝公元年，西斩戎之獾王。汉置县，属天水郡，骑都尉治此。东汉属汉阳郡。灵帝时为南安郡治。魏因之。蜀汉延熙十六年，姜维围魏南安，不克。晋南安郡亦治此。西秦乞伏氏时，尝置东秦州治焉，亦曰南安郡。宋元嘉三年，夏赫连昌遣其叔韦代攻西秦南安，拔之。既而复为秦所据。八年，赫连定复遣韦代攻秦王暮末于南安，暮末穷蹙出降。后魏时，改郡曰南安阳郡，县亦曰桓道县。隋郡废。又省县入陇西。

新兴城，在府西南二十里。亦汉獾道县地。后汉中平五年，析置新兴县，属南安郡。魏晋因之。后魏属广宁郡。后周郡废。隋并县入陇西。杜佑曰：“汉灵帝析汉阳郡置南安郡，领獾道、中陶、新兴三县。皆今陇西县地。”是也。

仁寿山，在府城南。逶迤二百里。又南十五里为赤髯山，山下旧有赤髯镇。马鹿山，在府南八十里。四围石崖甚险，戍守要区也。又莲峰山，亦在府东南八十里，与马鹿山并峙，有五峰分列。《通志》以为即马鹿山。

赤亭山，在府西五十里。以近赤亭川而名。又府西四十里有首阳山。山当往来通道，有关在其上。又有三岩山，在县西北十里。其上宽平可耕。《通志》作三品石山，谓山腹有三巨石，列如品字。八角山，在县北八十里。以山三岩层峙而名。

武城山，在府东南。姜维攻祁山不克，自董亭趣南安。邓艾拒之于武

城山。即此。《水经注》，渭水过源道县南，又东径武城县西，武城川水入焉，盖以山名县也。武城县，盖后魏置，旋废。故《志》不载。桃花山，在府东三十里。

薄寒山，在府西南。唐会昌二年，吐蕃将论恐热举兵自洛门川至渭州，击其国相尚思罗于薄寒山。思罗西奔松州。四年，论恐热攻鄯州，为镇将尚婢婢所败，走保薄寒山。或曰，山盖近岷州境。松州，今四川松潘卫也。

高田谷，在府东。宋元嘉七年，西秦暮末为河西王蒙逊所逼，请迎于魏，东如上邽。至高田谷，为夏人所拒，留保南安。即此。或以为即城东三十里之妙娥谷云。

渭水，在城西一里。自临洮府渭源县流入境，经城北，又东历通渭、宁远、伏羌县界而入秦州境。《志》云，渭水入城，分东西南北四池，前后浚引，以资汲取。又城西十五里有头渠城。西里许有二渠。城东有三渠。皆引渭水分注，下流仍入渭。宋熙宁八年，秦凤提点郑民宪自通远军熟羊寨导渭河至军溉田，是也。今详大川渭水。

赤亭水，府东五里。源出府东十五里之东山赤谷，西流经府北，又南入于渭。亦谓之赤亭川。晋永嘉末，姚弋仲起于此，所谓赤亭羌也。太元十一年，姚硕德起兵应姚萇，分据冀城、陇城及南安之赤亭，亦谓之赤水。义熙十一年，西秦王炽磐遣兵击南羌弥沮康薄于赤水，降之，以王孟保为略阳太守，镇赤水。宋元嘉四年，炽磐置梁州于此。既而仇池杨玄遣其党苻白作围秦梁州刺史，出连辅政于赤水，破之。

广阳水，出府西南九十里之西山，东北流，注于渭。又有漓水，出府西南四十里之石门山，下流亦入于渭。又洛门水，章怀太子贤曰：“在陇西县西南。”东流入漳县，又东入伏羌县界，下流入于渭水。

南河，府南二十里。源出荆谷中，北流入渭。六泉，在府东南五里。《地记》，东晋太元十一年，西秦乞伏国仁帅骑兵袭鲜卑三部大人密贵等于六泉。即此处也。胡氏曰：“六泉，当在高平境内。”

首阳关，在府西首阳山上。又府南有赤水三关，又西南有后川、药铺

二关。

布隘，在府北六十里。其地有锦布峪，因名。境内又有沙湾口、截道澜、安乌隆等隘。

董亭，在府西南。三国魏甘露元年，姜维出祁山，闻邓艾有备，乃回从董亭趣南安，是也。又宋元嘉十二年，仇池杨难当使兄子保宗镇董亭。董，或作童。

熟羊寨，府北四十里。又府北二十五里有三岔堡，俱宋置。

五溪聚，在府东。《后汉志》注，襄武有五溪聚。建武十年，来歙破羌于五溪，是也。《陇西记》，襄武有五溪，杨盛分羌为五部，错居溪旁。每溪为五聚，于是有五溪之号。

山岔驿，府西南九十里。《舆程记》，自山岔驿而西南七十里，为酒店子驿。又八十里，即岷州卫矣。又甸子川递运所，在府北四十里。又二十里为锦布峪递运所。《通志》，府治东北有通远驿，城北二里为北关递运所。

安定县，府北百八十里。西至兰州二百四十里，北至靖虜卫三百里。本唐渭州西市贸马之所。宋元丰中，筑定西城，属通远军。金大定中，改为定西县，属巩州。贞祐中，升为定西州。元因之，后改为安定州。明初，改为县。今城周九里有奇，编户十九里。

定西城，在今县南。宋元丰四年，以兰州西使城为定西城。南去通远军百二十里。明年，并入通远军，复以汝遮堡为定西城。七年，夏人围定西城，熙河将秦贵败却之。即今县治。

安西城，在县北二十七里。宋绍圣三年，章粦进筑汝遮堡地，赐名安西城，为戍守处。金贞祐中，升为安西县，属定西州。元省。通西城，在县南四十八里。本宋之通西寨。金升为县，属定西州。元省。

兴原山，在城东二里。又东三里为照城山。其支曰兴云山。绕城东北，又东回一里，曰凤凰山。西岩山，在城西二里。城南一里有南安山，以地旧属南安郡而名，俗呼庙坡山。以上群山，皆相连接，蜿蜒甚远。

双峪岭，县南五十里。又南四十里为胡麻岭。相传张骞自西域还，种

胡麻于此而名。《志》云，县北百里有北乱山。其山形势百出，稠叠难状，因名。

车道岷，在县北百余里。又有沉儿峪，在其南。明初，徐达败王保保于此。青岚峪，在县东三十里。又县西十里有锦鸡原。

西河，在县西二十里。县西北六十里有甸子川。西河源于此，流绕城西。又东河出县南四十里。麻子川流绕城东。东河味苦，亦曰苦水。西河味甘，亦曰甘水。二水交流，东西二十里，南北三十里。其间物产繁盛，实为民利。西河上有桥，曰西土桥。

暖水，在县西五十里。隆冬不凝。俗呼横河。县西南三十里有得罗川，土脉肥饶，约有千顷。

崦口关，城北五十里。路通甘肃，今有饒口巡司。《志》云，县北八十里，地名关川，西通兰州，北通靖边，实为要区。乌龙关，在县南东西两河间，亦宋置，南接陇西县。今亦曰乌龙阨。《通志》，县境有崦岚峪口、大西口、双峪口、峡口，凡四隘。

平西寨，县北六十里。本名青石峡。宋绍圣四年，进筑、赐名。北至会宁关四十四里。金亦为平西寨，属会州。元因之。明初洪武二年，元故将扩廓袭兰巩境内。三年，遣徐达等御之，达至平西，扩郭退屯车道岷，既而明军为所败。《宋志》，平西寨北四十里，即会宁关。今关见靖边卫。

渚水驿，县西北百二十里。《輿程记》，自县西北六十里至秤钩湾驿。又六十里至渚水驿。又七十里为定远驿。又西北五十里而至兰州。《通志》，县治北有延寿驿，东六十里有西巩驿，南七十里为通安驿。又好地掌递运所，在县南四十里。

会宁县，府北二百二十里。西南至安定县五十里，北至靖边卫二百七十里。本陇西县地。金人尝于此置西宁县，兼置西宁州。州旋废，以县属会州。元徙州治此，寻以县并入州。明初为会宁县。今城周五里，编户十二里。

西宁城，即今县。金人置县于此。《志》云，县东二十五里又有西宁城。城有三，俗呼为西宁连城。宋宣和中，尝置刺羌城于此。

桃花山，县东南五里。土石皆赤如桃花。又城南十里有白土峰。又南十里有青土峰。《物产志》，县产五色土，可资藻绘。《志》云，县东二里有鸦岔山。

铁木山，县西北百里。又县东北百里有屈胡山，皆高险，为县境之屏障。

响河，在县东百里。水出悬崖下，潺急触石，声闻数里，北流入于黄河。

南河，在县城南。本名床盆河。床，读麋。又城东三十里有松树岔河。皆东流合于响河。

什字河，在县东五十里。源出县东之隐山谷。又米峡河，出县南六十里之蒸饼山谷中。今同寺牧场也。《志》云，县境之水，悉北流，经靖边卫境，入于大河。

青家关，县东九十里。有巡司戍守。并置递运所及青家驿于此。又县东四十五里有翟家嘴递运所，为往来必由之道。《通志》，县治东有保安驿，县北九十里为乾沟驿。又北九十里为郭城驿。

通渭县，府东北六十里。西北至安定县百五十里，东南至宁远县六十里。本唐陇西县地。宋元丰中，置通渭县。崇宁五年，废为寨。金复升为县，属巩州。今编户十六里。

甘谷城，在县东五十里。宋熙宁初，曹玮置城于此，为戍守处。金于此置甘谷县，属秦州。元废入通渭县。《元丰志》，城在秦州西百八十五里。

甘泉城，在县东北九十五里。宋元丰中，置城于此，为戍守要地。又有堡川城，在县东北八十里。东至甘泉城十八里。宋政和六年置。金废。

照城山，在县城北渭水上。城西南二里有发云山，其高俯瞰城中。《志》云，县南二里有屏风山。山阴有洞，深数百丈，可以保守。上有东岳庙，俗名庙山。又十八盘山，在县西南五十里。山路险阻，经十八盘乃得上云。笔架山，在县东北二百里。《志》云，山连延甚远，几二三百里。有五峰峯嶽，县之主山也。又艾蒿山，在县东北五十里。又东四十里有斗底山，其形如斗。《志》云，县东南八十里有蔺家峡，水经其下，有二十四渡。

渭水，在城北。自陇西县流入境，又折而东南，入宁远县界。

华川水，县西八十里。东流经城南，入于渭。其间四围平坦，草茂水清。明置安定苑，为牧圉之所，隶苑马寺。又有海子川，在城东三十里。中川，在城西十五里。俱合华川水流入于渭。

甜水河，城西北七里。出甘谷，流入城，借以取汲。又西十三里为锦鸡峡水，其下流俱入于渭河。

华川关，在县南华川水上。又县境有石门关、闭门关。

兰峪隘，在县东南八十里。其地有兰家峡也。又县境有田家碛、砥石碛、谈家碛、石嘴碛、袁家碛、金带碛，凡七隘。

漳县，府南七十里。西南至岷州卫一百八十里，汉襄武县地。后汉置障县，仍属陇西郡。永元初，封耿秉为侯邑。晋属南安郡。西秦暮末置广宁郡。后魏改为彰县，广宁郡治焉。西魏又改郡为广安郡。后周郡废。隋复为障县，属渭州。唐因之。天授二年，改为武阳县。神龙初，复故。广德后，陷于吐蕃。宋熙宁六年，置盐川寨于此，后改为镇。金亦为盐川镇，属巩州。元至元十七年，置漳县。今编户六里。

鄯县故城，县西南五里。后汉置鄯县，本治此。后魏亦为彰县治。唐没于吐蕃。元因改置漳县，讹鄯为漳也。

盐川城，即今县治。宋熙宁六年，置盐川寨于此。开禧二年金人分道入寇，使石抹仲出盐川。又嘉定十三年，四川宣抚司安丙分遣王仕信等会夏人之兵伐金。仕信自宕昌进克盐川镇，会夏人于巩州，是也。宕昌，见岷州卫。

西倾山，县西北八十里。山势绵延，西倾水出焉。或以为《禹贡》之西倾山，非也。箭口山，在县西南三十里。山有两峰，高险插天，因名。又县南三十五里有三岔山。县西北十里有马铺山。《志》云，马铺山在县西北十五里。四围石崖，居民避兵处。

漳水，县南三里。本曰鄯川。《水经注》谓之彰川，从后魏县名也。源出县西木寨坡。西倾山之西倾水，自县西北注之。箭箬山之东匝谷水，自县西南注之。并流而东北，以入于渭。洛门谷水，在县东北。自陇西县东

南流，经县境，又东北流而入伏羌县界。

盐井，在县城内。旧有井煮水成盐，宋因置盐川寨。

宁远县，府东九十里。唐陇西县地。宋元祐中，置宁远寨。崇宁三年，升为县。金仍废为寨。元至元中，复置宁远县。今城周不及二里，编户十七里。

三岔驿，县西三十里。明初置。

广吴山，县西二十里。山下有广吴堡故城，宋所置也。又马宗城山，在县南五十里。山下旧有庙儿镇。石门山，在县东北五十里。四围皆峡，仅容一门，曰石门，山口为要隘处。山下有洞，光映如月，名夜月洞。

箭竿山，县西南四十五里。以山峰挺峙而名。又西南二十里为瓜牛山，高五百余丈，周■四里。上有日月空，日月未出，其光先照云。又柏林山，亦在县西南六十里，与瓜牛山相望。又西南十里曰水溪山。太阳山，在县南百二十里。有隘可守，曰太阳山口。山出铁，旧置铁冶场于此。

桃花碛，在县北五里。两山夹峙，渭水经其中。又有砚石峡，在县东南四十里。有砚石峡口，亦为设险处。

渭水，在城北。自通渭县流入县境。又东南流入伏羌县界。《志》云，县东路有红峪等新旧十三渠，西路有乐善等新旧十四渠，皆引渭溉田，民资其利。又县北五里有桃花峡水，县城南有古流泉水，皆资民溉汲。

广吴水，在县西二十五里。《志》云，源自岷州，流绕广吴山下，因名。又有山丹水，亦来自岷州，流经县西十五里山丹铺，因名山丹河。二水并流，北注于渭。

来远镇，县西南三十里。宋置寨，隶秦州。熙宁五年，改属通远军。元丰七年，废为来远镇，属宁远县。开禧二年，金人以韩侂胄败盟，分道入寇，使其将完颜麟出来远。又嘉定十三年，安丙遣将宋质俊出下城，克来远镇，是也。元以来远镇省入宁远县。下城，今见岷州卫。

鲁班山口，在县北四十里。以在鲁班山下而名。县东北又有花崖山、木林峡二口。《志》云，县境鲁班山口而下，有石门、太阳及砚石峡，凡六隘。又有大木树关、马务关、水关、文盈关，凡四。

伏羌县，府东百八十里。东至秦州九十里，东南至西和县一百七十里。古冀戎地。秦武公十年，置冀县。汉属天水郡。东汉为汉阳郡治。晋亦属天水郡。乱废。后魏太平真君八年，改置当亭县，仍属天水郡。后周复曰冀城县，寻废。隋大业初，复置，亦属天水郡。唐武德三年，改为伏羌县，仍置伏州。八年，州废，县属秦州。广德以后，没于吐蕃，县废。宋建隆二年，置伏羌寨。祥符九年，知秦州曹玮败吐蕃于此。熙宁三年，升为伏羌城。金因之。元至元十三年，升为县。今城周三里，编户十二里。

冀城，在今县东。汉县治此。后汉初，隗嚣据冀。汉将来歙等共攻嚣。嚣卒，子纯复据冀。来歙破落门，纯降。永初二年，叛羌败邓骘军于冀西。又光和末，群盗边章等围凉州刺史左昌于冀，汉阳长史盖勋救却之。建安十七年，马超率羌胡击下陇上诸郡，惟冀城、奉州郡固守，久之乃下。既而郡将赵昂等共谋击超，超败走。晋仍为冀县。大宁初，凉州张茂将韩璞东略陇西、南安之地，保冀城。刘曜遣将攻璞，璞拒却之。寻废。宋白曰：“古冀城即唐之陇城县云。”又当亭城，在县西南。旧《志》，在秦州西百三十里。今为县境。后魏太平真君八年，以故冀县地改置当亭县。后周废。《水经注》，籍水出上邽当亭西山，东历当亭川是也。

黄瓜城，在县东南四十里。汉陇西郡上邽县地。后魏析置黄瓜县，属汉阳郡。后周因之。隋又以冀城县省入。大业初，复置冀城县，以黄瓜县省入焉。《水经注》，黄瓜水发源黄瓜谷西。东流径黄瓜县北，又东归于籍水。籍水又东径上邽城南，是也。

平襄城，在县西南三十里。汉置天水郡治于此。阚骃曰：“古襄戎邑也。”王莽改天水曰镇戎，仍治平襄。更始初，成纪隗崔等起兵应汉，攻平襄，杀镇戎大尹李商。又隗嚣初据平襄，后据冀，是矣。后汉属汉阳郡。永初二年，邓骘遣任尚等讨叛羌，大败于平襄。《献帝起居注》，初平四年，分上郡，汉阳置永阳郡，领平襄、清水、略阳等县。曹魏改曰广魏郡。晋属略阳郡。太元十三年，乞伏国仁破鲜卑越质赤利于平襄，获其子诘归。十五年，诘归据平襄，乞伏乾归击之，复降。皆是城也。后魏省。《志》云，伏羌西南有废城。或以为故平襄城也。唐武德九年，于废城置盐泉县，属秦

州。贞观元年，改为仪宾县。二年，废。永宁城，在县西四十里。宋雍熙中，置永宁寨。崇宁三年，升为县，属巩州。金复为永宁寨。元省。

朱圉山，县西南三里，即《禹贡》所载之朱圉也。俗名白崖山。又天门山，在县南三里。山有两穴如门，亦谓之天门山口。有事时，置戍于此。《志》云，县西南五里有大像山，颇高耸，缘阁道以登，上有隗嚣歇凉台。锦缆山，在县西南三十里。渭水经其下。又有石鼓山，在县南五十里。《志》云，山有石鼓，不击自鸣，鸣则兵起。

狐盘谷，在县东。汉灵帝光和末，汉阳长史盖勋以叛羌围夏育于畜官，驰救至狐盘，为羌所败。又秦苻生葬姚弋仲于此。《载记》，狐盘，在天水冀县。畜官，盖畜牧所在，在扶风郡界。

三都谷，在县西。《水经注》，渭水又东，洛门水与三府谷水注之。三府谷，后讹为三都谷。宋祥符九年，西番宗哥族与唃廝囉等人寇伏羌寨，知秦州曹玮败之于三都谷，因城伏羌南市是也。又有吴谷口。天禧元年，宗哥番族来寇，韦复破走之于此。或云，吴谷，在宁远县广吴山下。

渭水，在县北三里。自宁远县流经县界，又东流入秦安县境。永宁河，在县西南四十里，源出南山中。又有沙沟河，亦在县西南三十里。俱北流入渭。

散渡河，在县东北五里。源出通渭县之十八盘山，曲折流入县界，至此入于渭。

洛门川，在县西二十里。自陇西县东南流经漳县境，又东北注于渭水。汉洛门聚以此名。或讹为木梅川。《志》云，县西有陆田、通济、广济、惠民四渠，溉田数十里。

洛门聚，在县西十里，亦曰落门镇。后汉建武十年，隗嚣据冀。冯异攻其落门，未拔而卒。来歙复攻拔之，纯降。《郡国志》冀县有雒门聚，是也。三国汉延熙十三年，姜维攻狄道。陈泰自上邽驰救，进至洛门。维粮尽引还。洛门，即落门矣。唐广德以后，吐蕃得其地，置兵守之。会昌二年，吐蕃国乱，洛门川讨击使论恐热举兵入渭州，侵掠鄯、廓以西。大中五年入朝，遣还，恐热复归洛门川，聚众欲为边患。会久雨乏粮食，乃奔

廓州。

定边寨，在县东北。宋建隆中置，属秦州。熙宁八年，废为镇，改属陇州。寻复为寨，仍属秦州。嘉定十二年，四川帅安丙遣将宋质俊克来远镇，进败金人于定边城。即定边寨矣。又相近有绥远寨，亦宋初置。熙宁八年，废为镇，属陇州。寻复故。《通志》，县有槐树关。

西和县，府东南四百里。北至秦州百二十里，东南至宁羌州略阳县三百五十里。汉为天水郡绵诸道地。后魏太平真君二年，置水南县，寻置天水郡治焉，亦曰南天水郡。西魏改郡曰汉阳，又析置长道县为郡治。后周郡废，改县曰汉阳，属成州。隋因之。开皇十八年，复改县曰长道。大业中，属汉阳郡。唐仍属成州。咸通中，改属秦州。宋熙宁七年，改属岷州。建炎五年，岷州徙治县之白石镇，改曰西和州，以长道县为附郭。元至元七年，县并入州。明初，改州为县。今城周四里，编户七里。

长道城，在县西北二十里。西魏置县治此。隋因之。唐天宝末，尝废，后复置。宋建炎中，五路之师败，吴玠以李永琪守岷州，移州治于白石镇。及金人请和，改岷州为西和州。以淮南有和州，故此为西也。《志》云，白石镇城在今县西三里，即汉时有星陨地成白石处。唐宣宗时，始筑镇城于此。宗绍兴三年，王彦败刘豫将郭振于白石镇，复秦州，是也。县旧治此，洪武初始移今治。今县城周四里有奇。

绵诸城，在县东北五十里。《史记》，秦自陇以西，有绵诸之戎。《汉书》天水郡有绵诸道。惠帝三年，陨石于绵诸，是也。后汉省。晋太兴初，南阳王保将陈安据绵诸，即故城矣。后魏复置绵诸县，属略阳郡。西魏省入长道县。《水经注》，绵诸水径绵诸城北，又东入于清水。

大潭城，县西南三百里。西魏置潭水郡，治潭水县。后周郡废，县属成州。隋因之。唐贞观初，改属岩州。广德后，废。宋建隆三年，复置大潭县，属秦州。熙宁七年，改属岷州。建炎中，五路之师败，关师古聚熙河兵守岷州大潭，是也。宋末废。

水南城，在县西南二十里。后魏太平真君二年，置水南县于此，为天水郡治。后周郡废，并废县入长道县。

盐官城，在县东三十里。《志》云，有盐井水与岸齐，味甘美。汉时尝置盐官于此。唐亦谓之盐官镇。又《城冢记》云，县南十八里有石堡城，高百丈，上有石城。城中有石井，深一丈，水色湛然。相传昔人避难于此，开水以饮。敌欲漏其水，左右穿凿不见水脉。

祁山，在县北七里。后汉末，置城山上，为戍守处，城极严固。建安十八年，马超据冀。郡将赵昂等据祁山，以击超。超奔张鲁，引兵还围姜叙于祁山。夏侯渊驰救，超败走。其后诸葛武侯六出祁山，皆攻此城。魏明帝所云“西固祁山，贼来辄破”者也。城南三里有武侯垒，西汉水经其南。《开山图》，汉阳西南有祁山，蹊径逶迤，山高岩险，九州之名岨，天下之奇峻也。汉建兴五年，丞相亮率大军攻祁山。九年，复围祁山，制木牛马以馈运。今武侯垒旁多丰草，犹是时所植。武侯《表》云：“祁山去沮五百里，有人万户，瞻其丘墟，信为殷矣。”今山西南有南北二岨。古语：“南岨北岨，万有余家。”武侯出祁山，祁山万户出租五百石供军，是也。延熙十九年，姜维复出祁山。时邓艾已先为之备，维引却。景耀六年，魏将诸葛绪督军，自祁山趣武卫桥头，以截姜维自沓中还蜀之路，不果。晋大兴初，南阳王保称晋王于上邽，寻以饥困，退保祁山。义熙八年，仇池杨盛叛秦，侵扰祁山。十二年，盛拔后秦祁山，进逼秦州。宋元嘉十九年，平仇池。魏人来争，遣古弼督陇右诸军，自祁山南入。复遣别将督关中军，自散关西入，俱会仇池。祁山自昔为陇右襟要矣。县北四十里有屏风峡。宋郭中正以此为祁山之正峰也。

宝泉山，县北二十里。上有湫池。又鸡峰山，在县东北十五里。山形如圭，亦名圭峰。

通灵山，《志》云，在县西百四十里。四山环合，二水萦流，有清泉自岩窦飞落，如玉绳云。

黑谷山，县南百里，与秦州及成县接境。《志》云，黑谷大山乔木，雄跨数郡，上有黑谷关。宋绍兴中，郡守程俊置。开禧二年，吴曦叛，导金将蒲察贞破和尚原，犯西和州。曦将王喜等方力战，曦忽令退军黑谷，军遂溃，贞入成州。

独头岭,在县东南三百里。宋开禧三年,时叛帅吴曦以西和等州降金。兴州将李好义、杨巨源共讨诛曦,谓新帅安丙曰:“关外西和、阶、成、凤四州,为蜀要害,盍乘势攻取之。”丙即遣好义复西和州。好义进兵独头岭,会忠义及民兵夹击金人,大败之,七日而至西和。金将完颜钦遁去,遂复其城。关外,谓仙人关外也。塞峡。在县西北。宋元嘉十九年,裴方明败仇池,杨难当别将鲁尚期逐北至塞峡。即此。

西汉水,在县北一里。自秦州废天水县流入境,亦谓之盐官水,以县境旧置盐官也。西南流,入成县境。《水经注》,汉水西南径祁山军南,西流与建安川水会。是也。

浊水,在县西南五十里,即白水江也。自岷州流入境,又南流入成县界,又东南入略阳县及宁羌州界,复折而西南,入阶州境。旧《志》云,浊水从长道县穿大潭入阶州。误也。

盐井,在县东北八十里。煮水成盐,民资其利。九龙泉,在县西八里。四时湛然,水旱如一,夏凉冬温,居民引以灌溉。

石营,在县西北二百里。三国汉延熙十六年,姜维自武都出石营,围狄道。又十九年,姜维围祁山,不克,出石营,经董亭,趣南安。即此。

鄯公营,在县西南三里。唐初鄯国公窦轨抚定陇右,尝营于此,因名。

柏关寨,在县城内。宋南渡时,置寨于此,以保蜀口。屏风峡口,在县北九十里。又县有青阳峡、木桥厄,皆为设险处。

成县,府东南六百里。东至汉中府凤县二百七十里,东南至略阳县二百十五里,西南至阶州四百六十里。古西戎地。战国时,白马氏居此。秦属陇西郡。汉为武都郡下辨道地。后汉为武都郡治。晋因之。后魏太平真君七年,改置仇池镇。太和十二年,兼置渠州。正始初,改为南秦州。西魏曰成州。隋初,郡废,州存。大业初,改州为汉阳郡。唐亦曰成州。天宝初曰同谷郡。乾元初复故。皆治上禄县。大历后,没于吐蕃。咸通中,复置成州,治同谷县。五代梁初,改曰汶州,李茂贞为朱温父讳也。贞明初,地入于蜀。后唐复曰成州。宋因之。宝庆初,以尝为潜邸升为同庆府。元仍曰成州,以州治同谷县省入。明初,改州为县。今城周五里有奇,编户四里。

同谷废县，即今县治。秦下辨邑也。汉初，曹参攻下辨，即此。寻曰下辨道。后汉移武都郡治焉。建安二十五年，先主进兵汉中，遣张飞、马超屯下辨。曹操遣曹洪拒之。既而先主有其地，亦谓之武街城。景曜末，魏司马昭使诸葛绪出武街以侵汉。《水经注》，武街，下辨县治也。晋太宁初，成晋寿守将李稚攻仇池氏杨难敌于武街，败死。后魏亦为下辨县，属修城郡。又析下辨地置广业郡，领白石等县。西魏改县曰同谷。后周又置康州治焉。隋初，郡废。大业初，州废，县属河池郡。唐武德初，置西康州于此。贞观初，州废，县改属成州。咸通中，始为州治。宋因之。元省。杜佑曰：“同谷城，一名武街城，即古下辨也。”后魏时，置下辨县，又改曰下阪。盖在今略阳县废修城县之境。王应麟曰：“成州内保蜀口，外接秦、陇，山川险阻，尝为襟要。”

上禄废县，县西百二十里。汉置县，属武都郡。后汉因之。晋县废。永嘉末，其地没于杨茂搜。后魏取其地置仇池郡。魏收《志》，太和四年，置仓泉县，仇池郡治焉。正光末，秦州贼莫折念生遣其党杨鲜攻仇池郡。东益州刺史魏子建击败之，即此。《隋志》，后魏置仓泉县，又析置阶陵、丰川、建平、城阶四县。后周以阶陵四县悉并入仓泉县。隋初，废仇池郡。移成州治仓泉。大业初，改县曰上禄，为汉阳郡治。唐亦为成州治。大历后，没于吐蕃。太和中，寄治骆谷城。咸通末，州改治同谷，县废。

骆谷城，县西八十里。晋永嘉末，仇池氏杨茂搜所置。宋元嘉四年，仇池杨玄遣其将苻白作围西秦梁州刺史出连辅政于赤水城中，粮尽，民执辅政以降，至骆谷，辅政逃还。十九年，魏取仇池，立杨玄之子保宗为武都王，使拓跋齐与保宗对镇骆谷。保宗谋叛魏，齐诱执之。魏收《志》，正始初，改置南秦州，治骆谷城，领天水等郡。是也。后废。唐太和初，以上禄没于吐蕃，诏修筑骆谷城，为县治。咸通中，废。

仇池城，在县西北百里仇池山上。辛氏《三秦记》，山在仓、洛二谷间，常为水所冲激，故下石而上土，形如覆壶，上有池百顷。池左右悉白马氏。惟东西二门盘道可七里。上则冈阜低昂，泉源交灌，煮土成盐，居人盖以万数。《水经注》，仇池山，一名瞿堆。汉水东南流，径瞿堆西，又屈

径瞿堆南。绝壁峭峙，孤险云高，登其巅二十余里，羊肠盘道，三十六回。《开山图》谓之仇夷，所谓积石嵯峨，嵌岑隐阿者也。上有平田百顷，煮土成盐，因以百顷为号。山上丰水泉，所谓清泉涌沸，润气上流者也。汉武元鼎六年，开置武都郡，治武都县。说者谓天池、大泽在县之西，故谓之都。常璩、范晔云：“郡居河池，一名仇池。”献帝建安中，有天水氏杨腾者，世居陇右。子驹勇健多计，徙居仇池。其孙千万附魏，魏封为百顷王。千万孙飞龙浸强盛，徙略阳。飞龙以其甥令狐茂搜为子。晋元康六年，茂搜复自略阳率部落四千家还保仇池，宫室困仓，皆立板屋，自是益强。太宁初，刘曜遣将侵杨难敌，难敌南奔汉中，曜置益州刺史镇仇池。既而难敌复据武都，袭取仇池。永和三年，杨初称藩于晋，因置仇池郡，后又兼置北秦州授之。太和五年，杨纂与其叔统争立，苻秦因遣兵攻之，纂败降秦。置南秦州，改命统为刺史，以其先降于秦也。太元十年，杨定复据仇池，称仇池公，称藩于晋，寻取天水、略阳地自称陇西王。苻丕以定为雍州牧，定寻徙历城，置储蓄于百顷，定故陇右氏也。既而定兼有上邽，自称秦州牧陇西王，使其叔之子盛守仇池。十九年，定为乞伏乾归所败死。盛复称秦州刺史仇池公，分氏羌为二十部护军，各为镇戍，不置郡县。宋元嘉二年，盛卒，子玄继之，仍附于宋。宋以玄为北秦州刺史，镇武都。说者谓时武都移置仇池也。六年，玄卒。弟难当篡立，寻叛宋，侵扰梁、益二州。十九年，遣将裴方明讨之，仇池平。二十年，仇池没于魏，亦置仇池郡，寻又为仇池镇。升明初，氏帅杨文度遣其弟文弘袭陷魏仇池。魏将皮欢喜击却之。《地形志》，真君七年，置仇池镇。太和十二年，为梁州。正始初，改置南秦川，治洛谷城，仍领仇池郡。西魏郡废。后周并废州。《元和志》，仇池因山筑城，四面壁立，峭绝险固，石角外向，自然有楼櫓却敌状。上有平地，方二十余里，田百顷，泉九十九源。自晋杨茂搜据仇池百顷，其后浸盛，尽有汉武都地，北侵陇西、天水，南侵汉中，然亦称藩于南北间。后拓跋魏取其武都仇池之地，而杨氏始衰，仅据武兴。正始二年，杨集起等复叛魏，奉其兄子绍先为帝。时魏已尽有汉中，三年遂击杨氏而灭之。事在梁天监五年。盖仇池之兴，始终凡二百一十一年。

建安城，在县西。《水经注》云，城在西县界，去仇池百二十里。《通典》曰：在同谷郡西七里，去仇池九十里。《魏书》，太和元年，杨鼠窃据仇池，皮豹子讨平之。诏曰：‘仇池，国之要藩。从前骆谷置镇，奸贼息心；近由徙就建安，致有往役。可速于骆谷置城。’盖仇池与建安远，与骆谷近也。唐同谷郡治上禄也，本名历城。宋白曰：“晋元康中，置仇池郡治此。”又北有鹵城，在故冀县西县之间。马超据冀，郡将姜叙自历城举兵击之，进入鹵城。或云，鹵城即西城之讹矣。又苻秦将杨定自陇右徙治历城，亦即是城也。其后改曰建安城。后魏置建平县于此，属仇池郡。后周废。

武都城，在县西北。或曰在故仇池城东南。汉武都郡县俱治此。后汉曰武都道，属武都郡。晋仍曰武都县。后魏置落丛郡于此。西魏郡县俱废。白马城，在县西南。本白马氏羌所居，因置城于此。晋太和二年，略阳羌敛岐叛秦，王猛击之，克略阳。敛岐奔白马，猛遣将追擒之。太元十年，西秦乞伏国仁得其地，置白马郡治焉。后魏废。

栗亭城，县东五十里。后魏置兰仓县，属汉阳郡。西魏废。唐为同谷县地。五代唐置栗亭县，属成州。宋因之。元初县直隶行省，寻废。钟提城，在县西北。三国汉延熙十八年，姜维围狄道，不克，退驻钟提。明年，维屯钟提，进攻祁山。胡氏曰：“钟提当在羌中蜀之凉州界也。”又乐乡城，在县东北。宋元嘉二十年，魏人争仇池，遣其将皮豹子等自散关而西，至乐乡。宋将王奂之御之，败没，遂入仇池。

宝井山，县东南十里。宋石洵直《城隍记》谓唐长庆初，迁郡治于宝井。《新唐志》，咸通七年，复置成州，徙治宝井堡。是也。又东南为太祖山。宋李宜《记》云：“岩峦耸秀，林壑邃深，下瞰数州，历历可辨者也。”

鸡头山，县西南十五里。或以为黄帝所登之鸡头，误也。傍有五兄弟山，以五峰突起而名。泥功山，在县西二十里，县境之名山也。《南齐书》，建武二年，氐寇汉中。杨元秀收合义兵，断贼运道。贼亦遣其南梁州刺史仇池公杨灵珍据泥功山以相拒。四年，灵珍据泥功山归款。《新唐书》，成州没于吐蕃。贞元五年，于同谷西境泥公山权置行州，是也。又有兑山，在废栗亭县北。《尧典》，申命和仲，宅西曰昧谷。郑康成以西为陇西，或又以此

山为仲所宅云。又秦州西五十里有崦嵫山，或谓之昧谷，亦谓之兑山。

鹿玉山，在县东十里。蹊洞幽绝，或谓之鹿台山。朱梁贞明元年，蜀将王宗翰克固镇，趣秦州。李茂贞将郭守谦与战于泥阳川，蜀兵大败，退保鹿台山，是也。固镇，见汉中府凤县。

方山，在县东四十里。祝穆以为晋时武都氏尝据此。按屠飞啖铁据方山，盖陇州之方山原也。固山，在县东南。先主取汉中，使张飞屯下辨，军于固山。即此矣。

仇池山，县西北百里。仇池城在其上，一名百顷山。山下有飞龙峡，以杨飞龙所据而名也。黑谷山，在县北百里，与西和县接界处也。

鹫峡，在仇池山北，亦谓之塞峡。晋太和六年，苻坚遣苻雅等伐仇池，至鹫峡，与杨纂战于峡中，纂兵大败。又义熙六年，仇池杨盛叛姚秦，侵扰祁山。秦王兴遣将军姚恢出鹫峡，秦州刺史姚嵩出羊头峡，右卫将军胡翼度出汧城以击盛。又后魏太和二十一年，氏帅杨灵珍以武兴降齐。魏将李崇讨之。灵珍遣其从弟建屯龙门，自帅兵屯鹫峡以拒崇。崇遣别将由他路袭破龙门，自攻鹫峡，灵珍败走，遂进克武兴。或云灵珍在武兴，则鹫峡当是武兴之鹫峡。胡氏曰：“《水经注》仇池东北有龙门戍，而鹫峡在龙门之西南、仇池之北，意灵珍已得仇池也。”羊头峡，或云在仇池东。汧城，今陇州。武兴，见汉中略阳县。

龙峡，在县南十里。峡南半山有洞，曰雷洞。宋绍兴初，金人南侵，郭执中集乡豪守此以拒之。

鱼窍峡，在县西二十里。又县东北有观音洞。两山壁立，洞在山半，至为高险。

西汉水，在县东南百余里。自西和县西南流，经县西南，接阶州界，复东南流，经县南入略阳县界。《后汉书·虞诩传》，诩为武都太守，按行川谷，自沮至下辨数十里中，皆烧石剪木，开漕船道，于是水运通利。沮，今汉中略阳县也。《续汉志》，下辨东三十余里有峡，中当水泉生大石，障塞流水，至春夏辄溢。诩使人烧石以水溉之，石皆裂，因镌去石，遂无泛溢之害。

浊水，在县西南，即白水也。自西和县西南流，历县界，接阶州北境，复折而东南流，经县西南，又东入略阳县境。《水经注》，浊水经武街城南。今去城甚远。

东河，在县治东。源出秦州南入龙峡，又东南至略阳县境，入嘉陵江。即唐元和中山南节度使严砺通运道、餉成州戍卒处也。又有南河，一名下辨水，出县西南青渠堡，会东河入于龙峡。

六汉水，在县西北六十里。源出西和县境，流经县之六汉堡，又西入西汉水。建安川，在县西百里，自阶州流入境，又东合于西汉水。故建安城以此名。又洛谷川，亦出县西山谷中，经骆谷城下，下流亦入于西汉水。

泥阳川，在县东五十里。祝穆云：“水自天水谷发源，东南流，至泥阳镇与栗亭水合，东南入徽州界，注嘉陵江。”《隋志》，后魏置泥阳县，西魏废入同谷。即此处也。宋梁贞明初，蜀将王宗翰与李茂贞将郭守谦战于泥阳，蜀兵败退，保鹿台山。

万丈潭，在县东南七里。相传鲁有黑龙自潭飞出。一名凤凰潭。县西二十里有黄龙潭，西十里有白龙潭。又裴公湖，在县治西南，唐刺史裴守真所创。旧为一郡之胜，有堤曰云锦堤。

黄渚关，在县北百里，有巡司戍守。《志》云，县东北二百二十里有白环堡，近陇州之白环谷，因名。又堡南十里，有止店堡。

赤亭，在县西北。《续汉志》下辨有赤亭。后汉元初二年，虞诩为武都守，羌众攻围赤亭，诩击退之。宋元嘉十八年，遣裴方明伐仇池，破斩杨难当将苻弘祖于浊水。难当弟和退走，方明追至赤亭，又破之。

兰皋戍，在县南。萧子显曰：“武兴西北有兰皋戍，去仇池二百里。”宋元嘉十九年，遣裴方明等伐仇池，杨难当遣其将苻弘祖守兰皋，是也。《元丰九域志》阶州将利县有兰皋镇。

浊水戍，在县境，亦曰浊水城。《五代志》，城在上禄县东南、武阶城西北。宋元嘉十九年，裴方明伐仇池，与杨难当将苻弘祖战于浊水，破斩之。二十年，北秦州刺史胡崇之守仇池，与魏人战于浊水，为魏所擒。又是年，宋将姜道盛与仇池杨文德攻魏浊水戍，道盛败死。

龙门戍，《水经注》云：在仇池东北。后魏李崇讨叛氏杨灵珍。灵珍于龙门北数十里中伐树塞路，以拒魏兵。崇命别将慕容炬从他路袭破之。今县东有龙门镇，或曰即故龙门戍，苻秦所置。又有西安镇，在县西，宋置。

附见：

巩昌卫，在府城内。洪武三年建，辖左、右、中、前、后、五千户所。又安边守御千户所，在成县城内，嘉靖初建。

秦州，府东三百里。东至凤翔府陇州三百五十里，东南至汉中府凤县三百二十里，南至成县二百六十五里，东北至平凉府三百四十五里。

古西戎地。秦始封于此，周孝王封秦非子为附庸。今秦亭、秦谷是其处，及并天下，置为陇西郡。汉析置天水郡，武帝元鼎三年置，治平襄。王莽末，隗嚣据其地，建武中讨平之。永平十七年，更为汉阳郡。治冀。三国魏增置秦州，治上邽。晋因之，又改汉阳为天水郡，亦治上邽，其后为氐羌所据。后魏仍为天水郡，亦置秦州。仍治上邽。隋初，郡废。炀帝又改州为天水郡。隋末，薛举据其地。唐复曰秦州。天宝初，曰天水郡。乾元初，复故初治上邽，后移成纪。大历初，没于吐蕃。大中三年，收复。咸通四年，置天雄节度治此。景福初，为李茂贞所据。五代初，没于蜀，亦置天雄军。后唐平蜀，改为雄武节度。汉初，又为后蜀所取。周显德二年，收复。宋仍曰秦州，亦曰天水郡、雄武军节度。金因之。又改军曰镇远军。元仍为秦州，寻以州治成纪县省入。明亦曰秦州。编户四十九里，领县三。今仍曰秦州。

州当关、陇之会，介雍、凉之间，屹为重镇。秦人始基于此，奄有丰岐。东汉初，隗嚣据之，妄欲希踪西伯也。其后，武侯及姜维皆规此以联结羌、胡，震动关辅。蜀汉延熙十八年，姜维破魏雍州刺史王经于洮西，进围狄道。魏征西将军陈泰曰：“维若以战克之威，进兵东向，据略阳积谷之实略阳，见秦安县，招纳羌、胡，东争关、陇，此我所恶也。而乃以乘胜之威挫坚城之下，是我破敌之时矣。”盖关中要会，常在秦州。争秦州，则自陇以东皆震矣。晋元康以后，关中多事，秦州每为棋劫之势。唐初，薛举据秦州，与唐争关中。举不速亡，则三辅未必能一日无事也。大历以

后，秦州没于吐蕃，雍岐之境，烽火相接矣。李茂贞兼有秦州，关中诸镇，岐为最强。其后蜀人得此，数争岐陇。周世宗克秦州，而孟蜀之亡兆已见于此矣。宋人南渡以后，以梁、益为东南上游，拮据蜀口，尝在秦陇间。宋卒弃秦州，五路遂不可复。绍兴十年，吴玠复秦州，和议成，割以畀敌。三十一年，吴玠复秦州，旋弃之，以坚和议。虞允文曰：“关中天下之上游，陇右关中之上游，而秦州其关陇之喉舌欤。”

成纪废县，今州治。《帝王世纪》：“伏羲生于成纪。”汉置县，属天水郡。后汉属汉阳郡。魏晋仍属天水郡。后魏因之，寻废。后周复置县，属秦州。隋、唐仍旧。《唐志》，秦州本治上邽，开元二十二年，地震，移州治于成纪县之显亲川。天宝初，复还旧治。大中初，又移于成纪。宋因之。南宋以后，始移天水军治天水县。金仍置秦州于成纪。元末县省。又韩公城，即秦州东西关也。宋庆历二年，守臣韩琦以州东西居民军营，皆附城旁，因请筑外城，凡十一里，与内城联合为一。秦民德之，称为韩公城。今城周四里有奇，门四。

上邽城在州西六十里。古邽戎邑。秦武公十年伐邽戎，置县。即此。汉曰上邽县，属陇西郡。后汉建武八年，隗嚣别将保上邽。帝自将征嚣，幸上邽，既而东还，使耿种、盖延围上邽。嚣平，改属汉阳郡。三国魏为秦州治。蜀汉建兴九年，武侯出祁山，魏司马懿御之，留兵守上邽，余众悉出，西救祁山。武侯自逆懿于上邽，败上邽守将郭淮等，与懿遇于上邽东。懿敛兵依险，兵不得交，武侯引还，懿等寻汉军后至卤城。卤城，即西城之讹也。又魏正元二年，陈泰屯于上邽，以备姜维。晋亦为秦州治。永嘉末，南阳王保保上邽。太宁初，保故将陈安，亦据此以拒刘曜，为曜所败。咸和三年，曜败于石勒，曜子熙及胤弃长安，走上邽，寻为石虎所败。义熙十二年，赫连勃勃攻姚秦上邽，拔之，毁其城。明年，上邽为西秦所取。宋永初元年，夏人复取之。元嘉四年，夏主昌为魏所攻，自统万奔上邽。七年，夏主定败于平凉，亦走保上邽。八年，上邽为仇池杨难当所取。十三年，入于后魏，亦为秦州治。太平真君七年，金城边固等据上邽东城，攻略西城，秦益二州刺史封敕文击平之。时上邽有东西二城也。《地

形志》亦作上封县，避魏主珪嫌名耳。隋复曰上邽，仍为秦州治。唐因之。后没于吐蕃。大中三年收复，县仍属秦州。朱梁贞明六年，蜀将王宗俦等伐岐还，分屯上邽是也。宋省入成纪。

天水城，州西南七十里。汉上邽县地。唐初析置天水县，旋废。宋复置，属秦州。绍兴初，州没于金，分置南北二天水县，南天水县隶成州，北天水县亦羁附焉。嘉定初，并为天水军。九年，移于天水县旧治。《志》云，天水城南去成县二百二十里。是也。元废。

显亲城，在州东南十里，本成纪县地。后汉建武中，分置显亲侯国，以封竇融弟友，属汉阳郡。建安十九年，韩遂屯于此。曹操将夏侯渊袭攻遂，遂败走。晋为显新县，属天水郡。太元十七年，休官权千成据显亲，自称秦州牧，降于乞伏乾归。休官，盖杂夷部落也。后魏仍为显新县，亦属天水郡。孝昌二年，天水民吕伯度叛，其党莫折念生据显亲川以拒之，既而降魏。后周县废。刘昫曰：“成纪县旧治小坑川，开元中移治敬亲川，即显亲川也。”王氏曰：“成纪城，在今县北三十里。今县即显亲故城云。”

西县城，州西南百二十里。秦县。汉初，周勃、樊噲击破西丞，是也。汉亦曰西县，属陇西郡。后汉建武八年，来歙攻隗嚣，入略阳，嚣引军攻之。既而败奔西城，诏冯异、彭岑等围之。彭拥谷水灌西城，城未没丈余，嚣将王元将蜀兵赴救，乘高卒至，力战入城，迎嚣归冀是也。永平以后，县属汉阳郡。晋改为始昌县，属天水郡。后魏时，改置杨廉县。后周废。

戎丘城，在西城西。《水经注》，戎丘城在西城西北。戎溪水径其南。建武八年，吴汉围西城。隗嚣将王捷别在戎丘，登城呼汉军亟退，因自刎以明死守处也。蜀汉建兴六年，武侯使马谡与张郃战于街亭，亲引大军屯于戎丘。即此。

望垣城，在州西南。汉县，属天水郡。后汉属汉阳郡。中平二年，张温使董卓讨先零羌。羌人围卓于望垣北，卓走还扶风。即此。陈寿曰：“其地有望垣峡，晋废。”

罕干城，在州南汉县，属天水郡。罕干，本金城南二种羌也。”师古曰：“汉破罕干之羌，处其人于此，因以名县。”后汉省。

蟠冢山，州西南九十里，此西汉水所出之蟠冢也。其旁有神马山，马池水出焉。《开山图》，陇西神马山有渊池，龙马所生。一名龙渊水，昔人尝于此得马头骨，长三尺，其旁地因名马头。晋义熙十二年，西秦乞伏炽磐遣将镇马头，以逼秦之上邦。即此。

麦积山，州东南九十里。状如麦积，为秦地林泉之冠。中又有豆积山，一名麦积崖。北魏正光末，陇右叛乱，东侵岷、岐。李苗请固守陇东，命偏将出麦积崖以袭其后。又西魏大统六年，乙弗后自杀于秦州，凿麦积崖而葬之，号曰寂陵。山之北有雕窠谷。相传隗嚣曾据此，有避暑宫。

黑谷山，在县西南百里。山盘纡数百里，接西和、成县之间。保秦陇者，以黑谷为要隘。今亦见西和及成县。

吴寨山，在县东八十五里。相传绍兴末，吴璘复秦陇，尝置寨于此，山因以名。

孤山，在州西北。魏正始三年，秦州贼吕苟儿屯孤山，围逼秦州。元丽击破之。别将李韶复掩击孤山，覆其巢穴，苟儿遂降。胡氏曰：“时秦州治上邦，山盖在上邦界。”

大寒岭，在州西。晋太元二十年，西秦将乞伏益州击苻秦故将姜乳于上邦，乳败之于大寒岭。胡氏曰：“岭在上邦县西。竹岭，在州西南二百里。”《水经注》，竹岭水出南山竹岭，东北入籍水。晋元兴三年，西秦乞伏乾归与仇池杨盛战于竹岭，为盛所败。义熙十二年，杨盛逼后秦。秦州上邦守将姚嵩拒却之，追盛，战于竹岭，败死。竹岭之南盖近仇池。胡氏曰：“上邦西南有南山竹岭。”

射虎谷，在州西。东汉建宁二年，段颍讨叛羌于凡亭山，羌众溃奔。既而复聚于射虎谷，分兵守谷上下门。颍于西县结木为栅遮之，分兵夹东西山奋击，大破之。凡亭山，杜佑曰：“瓦亭山之讹也。”射虎谷，盖在西县之东北。

木门谷，在州西南九十里。蜀汉建兴九年，武侯围祁山，以粮尽退军。司马懿遣张郃追之。郃进至木门，蜀人乘高布伏，郃中飞矢而卒。《水经注》，木门谷水出南山，北流入籍水，以注于渭。胡氏曰：“谷在天水县

南十里。”

金沙谷，在州东南。朱梁贞明元年，蜀将王宗绶败李茂贞秦州兵于金沙谷，乘胜趣秦州，至上染坊，秦州迎降。上染坊，旧《志》云，在州南三十二里。

赤谷，在州西南七里，有赤谷川。宋嘉定十一年，利州统制王逸复大散关及皂郊堡，进攻秦州，至赤谷口。沔州都统刘昌祖遽命退师，遂溃还。

狐奴阜，在上邽故城西。晋太元十一年，苻登攻姚秦将姚硕德于上邽。苻驰救，登与战于狐奴阜，大败苻兵处也。

铁堂峡，在天水废县东五里。汉姜维世居此。峡有铁堂庄，四山环抱。

渭水，在州北二十五里。自秦安县东流入境，循陇山之麓，折而东南，入凤翔府陇州境。今州东五十里有渭水渡。又秦水，在州东六十里。源出小陇山，西入于渭。

西汉水，出嶓冢山西南，流入西和县境。其下流合于宁羌州之嘉陵江。马池水，在州西南嶓冢山下。南流合于西汉水，即所谓龙渊水也。

西谷水，在废西县城北。《水经注》，水出西谷，众川泻流，合成一川。东南流，径故西城北，又东南流注西汉水。冯异攻西县，引此水以灌城。或谓之白水，下流入西和县境。亦曰浊水。汉初，樊哙别击西丞于白水北，是也。又谓之杨廉川，隗嚣将杨广守西城，因以名水。

籍水，在州南。《志》云，源出州西南九十里刑马山，东流入于渭。《水经注》，籍水出当亭西山，东历当亭川，又东经上邽县南，下流入于渭。是也。杜佑曰：“籍水，一名洋水，又名峰水。”

段谷水，在州西南。《水经注》，上邽南有段溪水。水出西南马门溪，东北流，合籍水。杜佑曰：“上邽有段谷泉。”蜀汉延熙十九年，姜维与邓艾争武城山，不克。夜渡渭东行，缘山趣上邽，邓艾与战于段谷，姜维大败处也。

长离水，在州东。《水经注》，瓦亭水南经成纪县东，历长离川，谓之长离水。汉末，烧当羌据之。夏侯渊击长离诸羌，韩遂来救，渊击破之。即此。

三阳川，在州北二十里，东流入渭。宋三阳寨以此名。

天水湖，在州南七里。《秦州记》，郡前有湖，冬夏无增减，故有天水之名。

马跑泉，在州西南四十里。相传唐初尉迟敬德与番将金牙战于此，士卒罢渴，敬德马忽驰，泉遂涌出，因名。明初，徐达定关陇，引兵向秦州，至马跑泉，其守将弃城遁去。

石榴关，州南九十里。又南十里有现子关，当陇川吴山之大路。

白水关，在州西南。《公孙述传》，白水关，在汉阳西县。盖州境亦有白水关。

定西寨，在州西北，宋置，领宁西、牛鞞等堡。三阳寨，在州北四十里。亦宋置。领渭滨、武安、蜗牛诸堡，皆与西夏拒守处也。

安远寨，在州西。宋嘉定十三年，四川帅安丙遣将会夏人攻巩州，不克。夏人自安远退师，宋将程信邀之共攻秦州，不从。信亦自伏羌引还。《宋志》，州境有安阳、保安诸寨。

皂郊堡，州西南三十里，宋置，有皂祁搏马务。嘉定十年，金人犯皂郊堡，破天水军。明年，又焚大散关，破皂郊堡。既而利州统制帅官军复之。未几，金人合长安凤翔之众，复攻皂郊堡，遂趣西和州。宋守将弃城遁，金人复犯大散关。盖陇右之要区也。刘沟堡，在州北。宋置。熙宁二年，夏人寇秦州，陷刘沟堡。即此。

刘家圈，在州东北。宋绍兴十一年，吴璘拔秦州。金将胡盖屯刘家圈，据险自固，前临峻岭，后控腊家城。璘进次刘家湾，遣姚仲、王彦珩枚渡河，涉峻岭截坡上。既至，万炬齐发，敌骇愕出战，大败，退保腊家城。攻围垂破，朝廷主和议，乃班师还。

樗泉营，在州西北。后汉永初五年，汉阳人杜琦等据上邽以叛。琦死，其党杜季贡等将其众据樗泉营，既而败降于滇零羌，是也。

柔凶坞，在州西南。晋永嘉末，凉州刺史张轨遣其子等将兵诣长安，尊辅秦王业。秦州刺史裴苞据险拒之，为寔所败，奔柔凶坞。

诸葛垒，州东二里。俗谓之下募城。旁有司马懿垒，俗谓之上募城。

汉建兴中，武侯攻天水，司马懿拒之。此其对垒处也。

地纲，在州西南故天水及长道二县境。宋绍兴中，吴璘以地势平衍，敌骑入犯纵横无碍，乃建地纲于平田间，纵横凿为渠。每渠阔八尺，深丈余，连绵不断如网。后金人来犯，骑兵始不得肆。

新店，在州西。宋建炎二年，金将娄宿陷秦州、犯熙河，经略使刘维辅逆败之于新店。即此。

高桥，在县南一百二十里接成县境，今有巡司戍守。

秦安县，州西北九十里。东北至平凉府静宁州百八十里。汉陇县地，属天水郡。晋为新阳县地。后魏为略阳县地。隋为陇城县地。唐因之。宋为纳甲城。金正隆中，置秦安县，属秦州。元因之。今县城周三里有奇，编户十里。

陇城废县，在县东九十里。汉陇县，属天水郡。后汉属汉阳郡，为凉州刺史治。晋县废。太宁初，南阳王保故将陈安保陇城，刘曜攻拔之。即此。后魏置陇城县，为略阳郡治。后周以阿阳县并入，又改县曰略阳。隋开皇二年，郡废，改县曰阿阳。六年，复为陇城县，属秦州。唐武德二年，改属交州。八年，州废，仍属秦州。宋因之。元至元七年，省。颜师古曰：“汉陇县即唐之陇城县。”宋白曰：“陇城，汉之冀县，魏黄初中，改曰陇城。”谬矣。今有陇城巡司置于此。

略阳城，在县东北六十里。汉曰略阳道，属天水郡。其地当陇口之要。后汉建武八年，隗嚣据陇右。汉来歙从番须回中径袭略阳，斩其守将。嚣惊曰：“何其神也。”帝闻得略阳，甚喜，曰：“略阳，嚣所依阻，心腹已坏，则制其肢体易矣。”嚣尽锐争之，斩山筑堤，激水灌城，不能下。汉军救略阳，嚣走西城。永平中，县属汉阳郡。晋属略阳郡。晋乱，县废。后魏置陇城县，略阳并入焉。永安三年，尔朱天光击平略阳贼帅王庆云于水洛城，顿兵略阳。永熙三年，宇文泰击破侯莫陈悦于水洛，悦退保略阳。泰遣轻骑趣略阳，悦复退保上邽。即略阳故城也。或曰，时仍置略阳郡于故城中。章怀太子贤曰：“略阳城，在陇城西北。是也。”

临渭城，在县东南八十里。本陇县地。三国魏析置临渭县，置广魏郡

治焉。晋泰始中，改郡为略阳郡，治临渭县。后魏并入陇城县。又安戎城，在今县东百二十里。魏收曰：“汉天水郡之戎邑道也。后汉省。后魏置安戎县，属略阳郡。”后周废。

阿阳城，《通典》曰，在陇城县西北。汉县，属天水郡。吕后六年，匈奴寇狄道攻阿阳，即此。后汉属汉阳郡。汉安二年，赵冲等击破叛羌于阿阳。又光和七年，北地羌胡与边章侵陇右，汉阳长史盖勋屯阿阳以拒贼，是也。晋省入略阳。后魏复置阿阳县，属略阳郡。后周省入陇城。

新阳城，在县西。汉略阳县地。三国魏析置新阳县，属汉阳郡。晋属天水郡。大兴初，凉州张郃救南阳王保于秦州，遣军至新阳，是也。后废。《水经注》，渭水过冀县，又东出岑峡，入新阳川。新阳县盖置于此。

兴国城，在县西北。后汉初平中，略阳氏筑城于此，号为兴国城。氏酋阿贵据其城，自称兴国氏王处也。建安十八年，马超据冀，氏王万应超，屯兴国。既而夏侯渊击超于祁山，超败走。渊因袭韩遂于显亲，遂亦走，追至略阳城，去遂三十里。或言当攻兴国氏。渊以遂兵精、兴国城固，乃转击长离诸羌致遂。遂来救，渊破走之，进围兴国，氏王千万遁去。千万，盖清水氏种也。其后群氏恒保聚于此。晋太元中，乞伏乾归西徙羌众，以兄子阿柴为兴国太守。盖即故城置郡也。后魏废。

街泉城，在县东北。汉置县，属天水郡。后汉省。刘昭曰：“略阳县有街泉亭，故县也。”三国汉建兴六年，武侯出祁山，使马谡与张郃战于街亭，败绩。杜佑曰：“陇城县有街泉亭，即马谡败处。”时武侯军于西县，以街亭师败，进无所据，乃拔西县千余家还汉中。《郡县志》西县有街亭山。似误。

长川城，在县西北。后魏置安阳县，为安阳郡治，兼领乌水县。西魏兼置北秦州，寻改交州。隋开皇三年，郡废。十八年，改州曰纪州，又改安阳县曰长川县。大业初，州废，并废乌水入长川县，属陇西郡。唐武德二年，置交州于此。五年，交州刺史权士通分道击突厥，是也。八年，州废。贞观三年，又并长川入陇城县。

鸡川城，在县西北三十里。宋治平中，置鸡川寨。金升置鸡川县。贞

祐四年，改属西宁州，寻还属秦州。元省入秦安县。《志》云，其地有鸡川谷，鸡川水出焉。又有牛骆水注之，俗谓之水洛口也。

大陇山，在县东六十里，即陇坻之险也。其东二十里曰断山，当略阳南北之冲，截然中止，不与诸山连属，为县境之要口，曰断山隘。九龙山，在县东一里。九峰相拱，状若龙翔，磅礴百里。《志》云，县南二里有长山，延亘百里。即大陇之支阜。瓦亭山，县东北二百里，所谓西瓦亭也。后汉建武七年，隗嚣攻围略阳，使牛邯军瓦亭，以拒汉援军。建宁二年，段颍败东羌于瓦亭山，羌众溃走。晋太元十二年，苻登与姚萇相持，军于瓦亭。元兴初，魏主珪遣拓跋遵袭没奕干于高平。没奕干奔秦州。魏军追之，至瓦亭而还。唐贞观二十年，逾陇山至瓦亭观马牧。宋绍兴末，吴璘遣将攻德顺军，使其子挺与敌战于瓦亭，大败之，敌悉趣德顺。璘自往督师，先壁于险，且治夹河战地。敌出战，复败走，遂克其城。盖瓦亭去德顺军，道里至近，且据险以临之也。太子贤曰：“安定乌氏县有瓦亭故关。”杜佑曰：“瓦亭在原州萧关。”误矣。

八龙山，在县西六十里。山阜有八，回合如龙，其势如羈如御，亦谓之把龙山。又曜紫山，在县西北四十里，高峻甲于群山。南安隘在县南。胡氏曰：“南安隘在陇城县界。”晋太宁初，陈安保陇城，刘曜自将围之。安突围奔峡中，曜将平先追杀之。隆安四年，后秦将姚硕德伐西秦，入自南安峡，乞伏乾归拒之于陇西，是也。

小长安岭，在县西北百有五里。山势修长，亦曰长安山。宋时置长安寨于此。

渭水，在县城南。自伏羌县流入境，又东南入秦州界。

陇水，在县城西。源出陇山，西北流，经瓦亭山南，又西南流，合于瓦亭川，又西南注于渭水。又略阳川，在县东，亦出陇山谷中，西南流入陇水，经略阳城北。隗嚣闻略阳陷，悉众攻围，拥水灌城。即此水也。其下流同注于渭。杜氏曰：“略阳水，在县东九十里，即陇水别名云。”

瓦亭川在县东北。源出陇坂，西流经瓦亭山北，又西南流，合陇水而注于渭。《志》云，瓦亭川下流，即长离水也。《秦州记》曰，瓦亭水出陇山

东北，斜趣西南流，经成纪、略阳、显亲界，又东南出新阳峡而入于渭。

莲花川，在县东七十里，亦东流入于陇水。

松多川，在县东。源出陇山，西南流，径故陇城北，又南注于秦州东境之秦水。晋建兴末，南阳王保尝遣其将屠各路松多屯此，因名。北魏主焘太平真君七年，略阳人王元达聚众屯松多川。魏秦、益二州刺史封敕文击平之，是也。鸣蝉堡在县北。《志》云，秦州废陇城县有安阳城，其相近有鸣蝉堡。晋太元十六年，苻秦鲜卑别部帅没奕干与乞伏乾归攻鲜卑大兜于鸣蝉堡，即此。《载记》，时大兜盖据安阳城。

长山堡，在县西南。宋置。以近长山而名。又有静戎、永固、平定等堡，皆在县境。

鹞子岭隘，在县西北四十里。《志》云，县境又有神仙岭、碓儿峡二隘，皆山谷峻险，恃为襟要，与断山口为四隘。《通志》，县有卧马、躔夷移、马颊三关。

清水县，州东百五十里。东至凤翔府陇州二百里。汉县，属天水郡。公孙述初为清水令，是也。后汉省。晋复置，属略阳郡。后魏因之。西魏于此置清水郡。隋初，郡废，县属秦州。唐武德四年，置邽州治此。六年，州废，县仍属秦州。大历后，陷于吐蕃。大中二年，收复。五代唐移治于上邽镇。今城周四里有奇，编户六里。

清水故城，在县西。《括地志》，县本秦城，非子始封。汉置县于此，后皆因之。五代唐移置今治。《九域志》，清水故县，在秦州东九十里。县北又有冶坊废县，本宋冶坊寨。熙宁五年，改为镇。金升为县，属秦州。元省入清水县。

秦岭城，在县西南百三十里。后魏置柏阳县，属天水郡。隋开皇中，改曰秦岭。唐贞观十七年，并入清水县。

绵诸城，《括地志》，在秦岭县北五十六里，即汉之绵诸道。今见西和县。

白石城，在县西。《志》云，清水县西有白石城及白崖堡、白沙镇。晋义熙六年，赫连勃勃寇后秦陇右，破白崖堡，遂趣清水。略阳太守姚寿都

弃城走。九年，西秦乞伏炽磐遣兵攻休官奚权小郎等于白石川，大破之，进据白石城。显亲休官权小成等据白阮，不服，复攻斩之。其地盖与秦州废显亲县相近。宋亦为白石堡。金废。

陇山，在县东百里。《寰宇记》：“大陇山在县境。亦曰邽山，亦曰关山，连绵凡百余里。”又亭乐山，在县东三十里。又东二十里为盘龙山，山势回环，亦谓之南山。

小陇山，在县西南三十五里。有小陇山口，为县境之要隘。俗名坂坡峡。又有牛头山，在县西十里，亦高险。宝盖山，在县北百五十里。顶平如盖，因名。其地东连关山，北抵静宁。有川曰牛头河，自山之青崖洞发源，又西径牛头山下，注秦川，入于渭。

柏阳谷，在县西南。《水经注》，伯阳水出伯阳谷，在董亭东。又东有伯阳城，城南谓之伯阳川。盖李耳尝经此也。后讹为柏阳。晋隆安四年，姚兴伐西秦，乞伏乾归使一军屯柏阳，一军屯侯辰谷。义熙七年，乾归攻姚秦略阳太守姚龙于柏阳堡，克之。胡氏曰：“侯辰谷与柏阳相近，后魏柏阳县亦因以名。”

安化峡，在县东，陇山峡口也。唐贞元三年，吐蕃入寇，掠沔阳、吴山。华亭丁壮，悉送安化峡西。或以为陇州沔阳县之安化镇。误也。

渭水，在县西。自秦州流经此，又东南流入凤翔府陇州界。《舆程记》，县西九十里为涉水屏，又西五十里而至秦州。《秦州记》，州东五十里有东阿谷桥。盖跨渭水上，与清水县接界。秦水在县东北。《水经注》，秦水出陇山秦谷，西历秦亭，即秦仲所封也。过清水城，西南流，注于清水。又西入秦州，共注于渭水，亦谓之秦川。

清水，在县南。源出小陇山，西流合秦水注于渭。

大震关，县东五十里，即陇关也。凭高据险，襟带华戎，自古为关中之襟要。

轩辕谷口，在县东南七十里。《志》云，县境有玉屏山、小陇山、坂坡峡、石牛峡，与轩辕谷为五隘。又有盘岭巡司，在县东七十里。

弓川寨，在县东。五代汉乾祐初，王景崇以凤翔降蜀，汉兵围之。蜀

遣山南西道帅安思谦出散关赴救，复遣秦州帅韩保贞引军出 阳，以分汉兵之势。保贞寻出新关，屯陇州。会思谦以食尽引退，保贞亦退保弓川寨。《九域志》，弓川寨，在秦州东一百六十五里。宋曰弓门寨。又有永安、威塞、西顾等堡，皆在县境。金废。

床穰寨在县西北。宋置寨，兼领白石等堡。《宋志》云，熙宁三年，改穰为镇，是也。金亦为床穰镇。元废。

礼县，州西南二百二十里。东至西和县百六十里。本西和县地。元置礼店县。明初，改为千户所。成化九年，改置。今县城周三里有奇，编户十九里。

红土山，在县东三里。又东四里曰翠峰山，俱以土石彩色而名。雷王山，在县南四十里。又南十里为蔡华山。又西南十里曰金紫山。

四角山，在县东北十里。以山分四向，截然挺峙而名。又二十里有飞凤山，亦以形似名也。

圣湫山，在县北六十里。又有没遮栏山，在县西百六十里。山高广，与岷州卫接界。

平泉河，在县北二十里。县城东二里为捭城河，以近城而名也。西江水，在县西二十里。又圣泉水，在县南。其下流俱入于白水江。

漩水镇，在县西百八十里，有漩水巡司。又县东百三十里，有板桥山巡司。《通志》，县有洮平、牛脊、野麻、尖岔、木树等五关。

附见：

秦州卫，在州城内。洪武十五年建，辖千户所五。又礼县守御千户所，在礼县城内。洪武十五年建，隶秦州卫。

阶州，府西南八百里。东至汉中略阳县五百八十里，东北至成县四百六十里，南至四川龙安府五百四十里，北至岷州卫六百三十里。

古白马氏之国，西戎别种也。汉武帝始置武都郡治武都县。《括地志》，初为武都道，属陇西，后改为郡。后汉因之治下辨道。三国时，属于蜀汉。晋亦为武都郡，后没于杨茂搜。后魏亦为武都郡亦曰武都镇。西魏兼置武州。后周亦为武都郡，又改永都郡。隋初，废郡，而武州如故。炀帝

又改为武都郡。唐复曰武州皆治将利县。天宝初，曰武都郡。乾元初，复故。大历初，没于吐蕃。大中三年，收复。景福初，改曰阶州。宋因之。元以州治福津县省入。明仍曰阶州。编户二十一里，领县一。今因之。

州接壤羌、戎，通道陇蜀，山川险阻，自古为用武之地。后汉虞诩为武都太守，占相地势，筑营垒百八十所，以制羌裔。诸葛武侯图兼关陇，先取武都，为北伐之道。晋之衰也，仇池氏杨氏窃据武都，北侵陇西、天水，南扰汉中，纵横且百余年。盖虽僻在西陲，而控扼噤要，用之得其道，未始不可以有为也。若其制两川之命，为入蜀径路者，则曰阴平道。

阴平道，入蜀之间道也。汉武开西南夷置阴平道，《志》云，邑有蛮夷曰道，非路也，属广汉郡，设北部都尉治焉。以其地隔碍雍、梁，实为险塞也。即今之文县矣。诸葛武侯于建兴七年，平定阴平，北至武都，谓“全蜀之防，当在阴平”。其后，钟会、邓艾入寇。姜维闻之，请亟护阴平桥头，以防未然。后主不省。及维与会相拒于剑阁，邓艾密言于司马昭曰：“请从阴平，由邪径经汉德阳亭见四川龙安府趣涪今四川绵州，出剑阁西百里，去成都三百余里，以奇兵冲其腹心，敌必不知所备。”昭从之。艾遂自阴平步道，悬车束马，径油江，出绵竹今四川有江油、绵竹二县，以灭蜀也。南北朝时，阴平之地，恒互相窥伺。后唐时，孟知祥据蜀，唐兵克其剑州。知祥遣兵趣龙州，守要害龙州，即龙安府。唐兵果出文州来袭，败还。明初，傅友德奉命征四川，阳言出金牛见汉中府金牛道，而使人覘青川、杲阳俱见四川龙安府皆空虚。阶、文虽有兵垒，而守备单寡。遂由陈仓攀援山谷，间行而进，克阶州，进拔文州，遂引兵出青川、杲阳，直趣绵州。此即邓艾阴平故道也。今自阶州经龙安至绵州，几千余里。《輿程记》，自阶州至文县二百十里。由文县而南，至四川龙安府三百三十里。又东至青川所百二十里。又东南至江油县百九十里。折而西南至成都府之绵州一百八十里。其间皆重岩复涧，阁道险仄，仅而得达。夫攻蜀者，不可不知阴平。守蜀者，固可不知阴平乎？

福津废县，在州东八十里。汉武都县地。后魏太平真君中，置玩当县，为武阶郡治。魏收《志》，武阶郡治北部县，领赤方县。似北部寻改玩

当也。太和四年，置赤万郡，寻又改为县，属武阶郡。西魏又于郡城东北三十里置覆津县，为赤万郡治。后周废赤万郡及玩当县，以武阶郡治覆津。隋初，又废武阶郡，以县属武州。大业初，属武都郡。唐仍属武州。景福元年，改为福津县。宋阶州治此。元移州治于柳树城，以福津县省入焉。即今州治也。《隋志》，西魏置万郡，统赤万、接难、五部三县。后周悉并入覆津县。今州城周二里有奇，门四。

将利城，在州北三百十里。后魏太平真君九年，置石门县，为武都郡治。西魏改曰安育。后周改曰将利，武都郡仍治此。隋亦为武州治。唐因之。宋属阶州。元至元七年省。又州北境有东平城，亦后魏真君七年置县，属武都郡。后周并入将利县。

羌道城，在州北。汉县，属陇西郡。后汉属武都郡。晋省。魏收《志》石门县有羌道故城，是也。

盘堤城，在州东北。后魏太和四年，置南五部郡，寻改为县，属武阶郡。西魏又改为盘堤县。隋因之，属武州。唐废。旧《志》云，在福津县旧治南一百三十五里。恐误。

赤土城，在州东。魏收《志》，武阶郡有赤土城。魏太和二十一年，氏帅杨灵珍以武兴降齐。魏主诏李崇讨之。崇槎山分道，出氏不意，表里袭之，进据赤土，是也。武兴，今见略阳县。

葭芦城，旧《志》云，在将利故城东南七十里。三国时，姜维与邓艾相持于此，置葭芦戍，亦曰葭芦城，后为仇池氏所据。宋元嘉十九年，平仇池。明年，仇池为魏所取。仇池王杨玄之子文德寻叛魏，围仇池，不克，屯据葭芦城。二十五年，魏取之。二十七年，宋取阴平郡地，以文德从祖兄头戍葭芦。孝建二年，雍州刺史王言谟言，头守葭芦，能藩捍汉川，若葭芦不守，汉川亦无立理者也。泰始二年，武都王杨元和治白水，弃国奔魏。其从弟僧嗣复自立，屯葭芦。诏以僧嗣为北秦州刺史武都王。元徽初，僧嗣弟文度代立为武兴王，遣使降魏，魏因以为武兴镇将。升明初，文度复叛魏。魏将皮欢喜拔葭芦，斩文度，以杨难当族子广香为阴平公葭芦戍主。齐建元初，葭芦镇主杨广香请降。以为沙州刺史。葭芦自是没

于魏，置葭芦县及武阳郡治焉。后周废郡县并入盘堤。沙州，见四川昭化县。

建威城，在州东北三百六十里。后汉末所置戍守处也。蜀汉建兴七年，诸葛武侯遣兵攻武都阴平。魏雍州刺史郭淮引兵救之。武侯自出至建威，淮退走，武侯遂取二郡。延熙中，姜维请置建威诸围戍，即此。炎兴初，张翼、董厥以钟会来侵汉中，将兵诣阳安关口。至阴平，闻魏将诸葛绪将向建威，留住月余待之，后为仇池氏所据。后魏太平真君九年，于此置白水郡，寻改为县，属武都郡。既而宋取其地。泰始二年，武都王杨元和治白水，弃国奔魏，是也。西魏复置白水郡，又改为绥戎郡。后周郡废，后改县曰建威，属武州。隋因之。大业初，属武都郡。唐贞观初，省入将利。

孔提城，在州东北二百里。亦仇池所置城也。后魏太平真君九年，置孔提县，属武都郡。寻入于宋，属北阴平郡。大明四年，魏人入寇北阴平，至孔提。北阴平太守杨归子击破之，是也。齐建元初，复没于魏，仍为孔提县。西魏兼置孔提郡。后周郡县俱废入建威县。又洪化废县，亦在州东。西魏置，属白水郡。后周废。

卧龙山，在州治北。一名北山。又州南三里有仙君山，本名仙陵。宋白曰：“后魏平武都，筑城于仙陵山，置武都镇。”即此。又州境有露骨、龙峡等山，俱高胜。

武都山，州西七十里。州西面之大山也。又盘堤山，在州东南七十三里。《寰宇记》：“盘堤城与此山相近，因以名县。”亦作“盘池”。

黄阶岭，在州东北。石晋天福九年，蜀兵攻阶州。秦州兵救之，出黄阶岭，败蜀兵于平西。角弩谷，《志》云，在州西八十里。《郡国志》，武都沮水之西，有角弩谷。蜀将姜维剿杀五部氐羌于此。或以为即此谷云。又州境有留谷。后周主邕天和元年，筑武都、留谷、津抗诸城，以置军士云。

峰贴峡，州西百二十里，与蕃羌地相接。宋时为戍守要地。

龙帝峡，在州西南。宋雍熙三年，福津县有大山飞来，自龙帝峡雍白水江逆流，坏民田数百里。即此。又五仙洞，在州东二十里。境白水江

南岸，溪涧幽阻。中有卧龙坪，宽广可容百十人。又有铁桥及黄卢水桥诸胜。

白水江，在州北三百二十里。自成县流入境，复东南流，经略阳县及宁羌州界，复折而西南流，经州南，去州二百余里，又南入文县境。一名白龙江，或云白水江，即洮州卫西倾山南所出之垫江，又即桓水之异名也。

犀牛江，在县东北二百四十里，即西汉水也。或谓之沮水，自成县西南流，接州界，复折而东南入汉中略阳县境。

北峪河，在州西二里。自州北境流入，有赤河水流合焉。又紫水河，在州东五十里，出紫泥。汉封玺书用武都紫泥，是也。与北峪河俱南流，注于白水江。羌水，在州西北。《汉志》，羌道有羌水，出塞外，南至阴平，入白水，过郡三，行六百里。郡三，陇西、武都、广汉也。《水经注》，羌水出陇西羌道，东南流，经宕昌城东，西北去仇泥五百余里，又经葭芦城西，下流合白水。

建安川，在州东北。《水经注》，建安水导源建威西北山，东径建威城南，又东径西县之历城南，与西汉水合。历城，今成县之建安城也。

平定关，在州西北。宋置。《志》云，宋时于福津西界置峰贴峡寨及武平寨、沙滩寨，又置团城堡、平定关以备御羌人。

望贼关，在州北百八十里，有阶州所兵戍守。《通志》，七盘关，在州东北三百五十里，有巡司。

杨家寨，在州北百里。其地有杨家崖，故仇池杨氏之苗裔保据为寨处也。临控白江，山路仅容一线，最为险阨。宋绍兴间，吴玠兄弟图保蜀口，择地为寨，因筑城守此，以犄角西人之寇。寨中素有积贮，丰于水泉，寇攻之不能陷。亦名家计寨。尖石寨，亦在州北。后唐清泰元年，郭知琼攻蜀阶州，拔尖石寨，是也。

青阁，在州东南。祝穆云：“福津有青阁、牛圈阁、赤阁、鹅鼻阁，旧为往来险道。”《通志》，州西百里有杀贼桥驿，州北二百四十里有平落驿。

文县，州南二百十里。南至四川龙安府三百三十里，东至四川广元

县四百九十里。古氐羌地。汉武开西南夷，置阴平道，属广汉郡，北部都尉治焉。更始三年，封陈牧为阴平王。后汉仍属广汉郡。安帝永初二年，改北部都尉为广汉属国。三国蜀建兴七年，克魏阴平郡。《华阳国志》，蜀克阴平，魏亦遥寄其郡，属雍州。蜀亡，始合为一，属秦州。晋永嘉六年，阴平都尉董冲逐太守王鉴，叛降李雄。太宁元年，杨难敌克阴平。宋元徽中，魏以杨广香为阴平公葭芦镇主。齐建元元年，拜为河州刺史。永明元年，以杨灵为沙州刺史阴平王。《魏纪》，太和十三年，阴平国朝贡，自后累至。西魏废帝元年，氏帅杨法深据阴平，以为黎州刺史。二年，从平蜀回，与种人相攻。赵昶分其部落，更置州郡以处之。周明帝二年，以葭芦郡置文州。永嘉末，没于杨茂搜。其后复属于晋。宋初，分置南北二阴平郡，此为北阴平郡治。萧齐因之。寻没于后魏，改置西晋寿郡，治阴平县。兵乱后，郡县俱废。西魏改置曲水县，属卢北郡。隋初，郡废，县属文州。大业初，州废，改属武都郡。义宁二年，置阴平郡治焉。唐初，又改曰文州。天宝初，复曰阴平郡。乾元初，复为文州。宋因之。宋末，州废。元仍置文州，以州治曲水县省入。明洪武四年，改州为县，属阶州。二十三年，省入阶州。二十八年，改置文县守御军民千户所，隶陕西都司。成化六年，复置文县，属阶州。今县城周二里有奇，编户三里。

曲水废县，今县治，汉之阴平道也。西魏改置曲水县。隋末，为阴平郡治。唐为文州治。《广记》，德宗时，以州城在平地，遂移于故城东四里高原上，号曰文台。即今城也。宋仍为州治。元省。其地当南北二水之曲，因名。旧《志》云，文州东接汉中，西通陇右，左山右江，控据深险。若出景谷、达江油，则又蜀地之噤喉也。

长松城，县西百里。本阴平县地。西魏析置建昌县，为卢北郡治，兼置文州于此。隋开皇初，郡废。十八年，改县曰长松，仍为州治。大业初，州废，县属武都郡。唐文州治曲水，县属焉。贞元六年，省长松县入曲水。正西废县，在县西南五十五里。西魏置，属卢北郡。隋属文州。唐因之。贞观初，省入曲水县。

安昌城，县东北三十二里，旧戍守处也。后魏尝置安昌郡于此。西魏

废帝时，遣仪同宇文昶殄阴平、邓至二蕃，尝立宁州，修筑此城，为州治云。又县西五十里有卢北城，亦昔时戍守处。《志》云，西魏有卢北郡，盖置于此。

同昌城，县西北百六十里。东北至阶州三百二十里。古西戎地。西魏逐吐谷浑，置邓州及邓宁郡，以平定邓至羌为名。隋开皇七年，改置扶州，治尚安县。大业初，曰同昌郡。唐移治同昌县，仍曰扶州。天宝初，亦曰同昌郡。乾元初，复曰扶州。广德后，没于吐蕃。大中三年，山南西道帅郑涯奏复扶州，是也。后仍为羌人所据。尚安废县，在同昌故城西。隋扶州治也。刘昫曰：“西魏于此置武进郡，又改为上安郡。隋废郡为尚安县。唐亦属扶州，旧治刺利村。长安二年，移治黑水堡。至德二载，改曰万全县。后没于吐蕃，县废。”又帖夷城，在故同昌城南。西魏置帖夷县，又置昌宁郡治焉。隋开皇三年，郡废，县寻属扶州。唐因之。万岁通天二年，改为武进县。神龙初，复故。后废于吐蕃。又钳川城，在同昌故城西南百五十里。其地有钳川山。西魏因置钳川县，属邓宁郡。隋属扶州。唐因之。后废。

邓至城，在县西南。《五代志》，邓至者，羌之别种，国于宕昌南。李延寿曰：“白水羌也，世为羌豪。自街亭以东，平武以西，汶岭以北，宕昌以南，皆是其地。”齐永明元年，以邓至、王像舒为西凉州刺史。像舒亦入贡于魏。十一年，像舒传位于其子。旧西魏王廓初，邓至、王檐桁失国奔魏。宇文泰使秦州刺史宇文导将兵纳之。既而遂并其地。按《齐书》，建元元年，西凉州刺史东羌王像舒进号。又《梁书》，天监元年，封西凉州刺史像舒彭为邓至王。像舒彭，即像舒矣。杜佑曰：“今交川郡南，通化郡北，临翼同昌等郡，皆邓至之地也。相传以邓艾尝至此，故名。”《城邑考》，今县南三里有邓至城，以县东二十二里之邓艾山而名。交川、通化、临翼，今四川松潘茂州叠溪所是也。

邓艾城，在县东白水北，或以为邓至城。《水经注》，白水径邓至城南，即邓艾所屯处。蜀汉延熙十二年，姜维引军救麴城，不克而还。魏将邓艾留屯白水北。维遣其将廖化自白水南向艾结营，而潜军东出，袭洮城。洮城在水北，去艾屯六十里。艾觉之，即夜潜发，先据洮城。维引还。

洮城，盖亦在县东北境，是时戍守要地也。《志》云，今县东七里麻关谷口，有邓艾城。相传艾入蜀时所筑。傍有姜维城，为维与邓艾相守处。鞠城，今见岷州卫。

南山，在县治南。清水江绕其下。又有天牢山，在县西北二里。相传为古羗里，文王囚于此。山上有羗里城。又龙女山，在县西南二里。横拥县城，即南山之支也。龙头山，在县西七里。其山延袤甚远，与四川之松潘卫叠溪所接界。又金珠山，在县东。《寰宇记》，唐武德元年，移文州于阴平白马水，东接金珠山。即此。

素岭山，在县西。其山高耸，冬夏积雪，因名。黑水源于此。《元和志》，山在故扶州尚安县西北。天魏山，在县西北百三十里。有天魏湫、合众山，凹为大壑，环百五十里。积水其中，水平山颡，不见畔岸，亦谓之天池。山与阶州接界。太白山，在县南二百五十里，山谷高深，霜雪经春夏不消，因名。

青唐岭，在县东南。胡氏曰：“由此入龙州，为左担路，凡一百五十里，即邓艾入蜀之道。”滴水岩，在县北。乱山矗立，划开两峰，如鸦髻对峙。有飞泉七尺，居人置槽，引以给用。又上清洞，在县北四十里。深邃不可穷。又县西有飞印洞，接天魏湫。

孔函谷，在县西北。蜀汉末，魏人来侵，姜维自沓中东还，闻诸葛绪已塞道屯桥头，乃从孔函谷入北道，欲出绪后。绪闻之，却还三十里。维还从桥头过，至阴平，是也。

白水，在县城东。县城南有清水江流合焉，东南流，入四川龙安府界。《水经注》，白水西北出临洮县东南西倾山，水色白浊，东南至阴平界。民居水上者，为白水氏。宋元徽中，晋寿民李乌奴与白水氏杨成等寇梁州，刺史范柏年说降乌奴，击成，破之，是也。或曰：“即《禹贡》之桓水，源出西倾，经西和、成县、略阳、宁羌之界，又经阶州南，而入文县境。”又南流，经城东，入四川龙安府界。又东流，至昭化县北，而合于嘉陵江。盖与西汉水并为嘉陵江之上源。晋寿，见四川广元县。

黑水，在县西。源出素岭山，下流合于白水。《水经注》，黑水出羗中，

西南径黑水城西，又西南入于白水。宋元嘉二年，西秦乞伏炽磐遣将吉毗南击黑水羌酋丘檐，大破之。即此。白马水，在县西南。出故长松县西南之白马溪，北流注于白水。

大白水，在县北三十里。即羌水也。自阶州流入境。《汉志注》，羌水出塞外，南至阴平，入白水。或以此为白龙江。明初，傅友德自阶州趣文州。州人断白龙江阻之。友德修桥以渡，破五里关，遂入文州，是也。玉垒关，县东百二十里。又县北有五里关。俱唐宋以来所置戍守处也。铁炉寨，在县南四十里。又县西八十里有阴平寨。又西为镇羌寨。又西南有哈南坝寨。俱宋置。又临江寨，在县北百二十里。其下为临江渡云。《通志》，今为临江关驿。

黑水堡，在县西黑水旁，即废尚安县也。唐贞元八年，山南西道节度使严震奏败吐蕃于芳州及黑水堡。即此处也。芳州，见洮州卫。临河镇，在废扶州境。唐置。仪凤二年，吐蕃寇扶州，陷临河镇，擒镇将杜孝升。既而得还，复帅余众拒守处也。

阴平桥，在县治东南。跨白水上，即所谓阴平桥头也。蜀景曜五年，姜维在沓中，闻有魏师，请护阴平桥头以防未然。后主不省。司马昭遣诸葛绪自祁山趣武街桥头，绝维归路。维还，闻绪已塞桥头，乃佯出北道。绪引却。维从桥头达阴平。《读书镜》云，史不言武街趣桥头，或以武街为同谷，桥头亦在焉。误矣。盖昭使绪出径道，由祁山至武街，即从武街西南走桥头也。时钟会已入汉中，邓艾方战涪川。桥头为东西要会，维还，必由阴平入蜀。故司马昭遣绪军此。绪不知兵，邓艾追维，东还至此，即定入蜀之谋矣。《水经注》，白水东经阴平故城南，又东北径桥头。即诸葛绪邀姜维处，亦不言武街桥头也。

新开桥，县西八十里。又县有保安桥。皆白水所经，波流汹涌。金窟，在县东。《一统志》，金窟在县之麻仓谷，接四川昭化县界。窟如井，有金出焉，取之甚难。

附见：

阶州，守御千户所在州城内。洪武四年建，隶秦州卫。

徽州，府东四百八十里。西北至秦州百八十里，东至汉中府凤县百五十里，南至宁羌州略阳县二百里。秦陇西郡地。汉属武都郡。后汉因之。晋仍属武都郡，后没于氐羌。后魏置广化郡。隋初，郡废，以其地属凤州。大业初，属河池郡。唐仍属凤州。五代因之。宋亦属凤州。元置南凤州于此。寻改曰徽州，又以州治河池县省入。明亦曰徽州编户六里，领县一。今仍旧。

州接壤秦、陇，俯瞰梁、益，襟带东西，称为要地。陇、蜀有事，河池其必争之所矣。公孙述之并汉中也，据河池以拒汉军。来歙克之，而蜀人大震。五代梁贞明初，岐、蜀相攻，蜀人出河池，遂兼秦凤。宋保蜀口，亦置戍河池，以绝女真窥伺之路。蒙古入蜀，河池降而凤州以南次第崩陷。河池介秦凤间，其可以散地视之欤？

河池废县，今州治。汉置，属武都郡。后汉建武初，汉中王嘉与延岑相攻于武都。公孙述遣其将侯丹取南郡，嘉自武都南击丹，不利，还军河池下辨。十一年，公孙述使王元等据河池拒汉。来歙攻破之，遂克下辨，乘胜而前，蜀人大惧。寻亦为河池县。晋因之。后魏得其地，置河池镇，寻置广化县，广化郡治焉。隋初，郡废，县属凤州。唐因之。五代梁贞明初，蜀遣将攻岐秦、凤二州。王宗绶克秦州，自河池、两当进兵，会王宗瑤攻凤州，拔之。宋亦为河池县。元析凤州增置南凤州治焉。至元初，为徽州治。七年，县并入州。今城周五里有奇。

思安废县，在州东南。后魏置，属广化郡。隋大业初，省入河池。又永宁废县，本州东永宁乡也。元初，升为县，属南凤州，寻省。

铁山，在州东南四十里。悬崖万仞，石色如铁。宋刘子羽曰：“蜀口有铁山栈道之隘。”盖谓此也。一名巾子山。又苍坪山。在州东三十里。《志》云，古黄沙驿仓也。

天池山，在州南三十里。山顶有池，流为河池水。

鸡冠山，在州西五十里。山势高耸，为州境之险。

木皮岭，在州西十里。山甚高险。唐黄巢之乱，王铎置关于此，以遮秦陇。又银桩崖，在州东北五十里，壁立万仞，石色如银。

嘉陵江，在州南七十里。自汉中府凤县西南流，经两当县南，又西南经州境，折而南，入略阳县界。又河池水，在州南五十里，出天池山。东流入两当县界，合于嘉陵江。俗亦谓之白水江。

永宁水，在州东五十里，南流入嘉陵江。又有忠义水，在州南十五里。流合于河池水。

紫金水，在州北一里。《志》云，源出州北三十里之紫金山。东南流，经嘉陵江，入凤县之武休关。至褒城县，而为山河堰。太白池州东二十里，周回数十亩，诸山环绕其旁。又州西南二十里有龙池，或以为即《汉志》所称武都天池云。

小河关，在州南。旧《志》云，小河关，昔时秦蜀咽喉也。其下有泥阳水，流入嘉陵江。今州南五十里有虞关，置巡司戍守于此。

仇鳩戍，在州西。《水经注》，浊水东南流，与仇鳩水合。水发鳩溪，南径河池县故城西，又西南流，注蜀水。蜀水又东南与河池水合。水出河池北谷，南经河池戍东，西南入蜀水，北魏正光末，秦州贼莫折念生遣其都督杨柏年攻仇鳩、河池二戍。魏东益州刺史魏子建遣将击破之。即此。《通志》，州治北有徽山驿。

两当县，州东八十里。东至汉中府凤县七十里。汉武都郡故道县地。西晋以后，陷于氐羌。后魏置两当郡及县，因两当水为名。隋初，郡废，以县属凤州。唐因之。宋徙县治于广乡镇。元改属徽州。今县城周三里，编户二里。

尚婆城，在县西南。《水经注》，两当县有尚婆城，魏故道郡治也。盖元魏时尝置郡于此。开宝废监，在县东。宋建隆二年，置银冶。开宝五年，升为监。治平元年，罢监官，以监隶两当县。元丰六年，废。

鸞峰山，在县东十五里。山峰高秀，洞壑回环，下有分水溪。又申家山，在县东北九十里，与凤县接境。旧产银。

天门山，在县南五十里。以两崖高险而名。又故道山，在县南二十里。相传故道县以此山名。董真峪，在县东南二十里，为县境之要隘。

嘉陵江，在县南十里。自凤县流入，又西南入徽州境。或谓之两当

水。《水经注》，两当水出陈仓大散岭，西南流，入故道川。或曰：故道川，亦两当之异名也。祝穆曰：“县之得名，以自此而东抵汴京，西抵益州，皆三十六程，故曰两当。”或云县西界有两山相当也。《郡邑志》，大散、嘉陵地势险隘相当，因名。又红崖河，在县东。县北又有狮子川，俱流注于嘉陵江，是也。

尚婆水，在县西南。水多盘石。本名盘石水，俗讹为尚婆川。下流亦入嘉陵江。琵琶洲，在县南三十里。有渚迂回，谓之枉渚。其下流，亦注于嘉陵江。

横山寨在县界。宋绍兴中，吴败金人于仙人关。金人遁去。玠遣张彦劫横山寨，王俊伏河池，扼其归路。金人至，又败之。《通志》，县治东有黄花驿。

卷六〇

临洮府，东至巩昌府二百里，南至洮州卫三百十里，西至河州卫百八十里，北至庄浪卫四百五十里。自府治至京师四千六十里，至南京三千八百四十里，至布政司一千二百六十里。

《禹贡》雍州地。春秋、战国时，为西羌所居。秦属陇西郡。汉属陇西金城郡。晋初因之。惠帝时，分置狄道郡。前凉张骏又改置武始郡。其后西秦、南凉，代有其地。后魏亦属武始郡。西魏又增置临洮郡。后周废临洮郡。隋初，并废武始郡，以县属兰州。炀帝时，属金城郡。唐初，亦属兰州。天宝初，属金城郡。三载，分金城郡置狄道郡。乾元初，改为临州《新唐书》，久视元年，置临洮军于临州。宝应初，陷于吐蕃，号武胜军。宋熙宁五年收复，改为镇洮军，寻改熙州治狄道县，亦曰临洮郡。《金志》云，宋又更镇洮军为德顺军。金改曰临洮府。元因之。明仍为临洮府，领州二，县三。今仍旧。

府襟带河湟，控御边裔，为西陲之襟要。蜀汉末，姜维数出狄道以挠关陇。魏人建为重镇，维不能以得志。晋之衰也，河西扰乱，大约据狄道，

则足以侵陇西，狄道失而河西有唇齿之虑矣。拓跋魏兼有秦凉，以狄道为咽喉之地，列置郡县，恃为藩蔽。唐拒吐蕃，临州其控扼之道也。临州不守，而陇右遂成荒外矣。宋承五季之辙，王官所莅，不越秦、成。熙宁以后，边功渐启。议者谓欲图西夏，必先有事熙河。及熙河路建，而湟、鄯之域，以渐收举，虽于本计似疏，而武略未尽乖也。《志》曰，郡土田膏腴，引渠灌溉，为利甚博。其民皆蕃汉杂处，好勇喜猎。故徐达亦云：“临洮西通蕃落，北界河湟。得其地，足以给军储，得其人，足以资战斗也。”

狄道县，（附郭）。汉置县，为陇西郡治。后汉因之。晋属陇西郡，惠帝改置狄道郡治此。又尝改县为降狄道，寻复旧。后魏属武始郡。隋属兰州。唐因之。天宝三载，置狄道郡治此。宝应以后，废于吐蕃。宋熙宁五年，收复。六年，仍置狄道县，为熙州治。九年省。元丰二年，复置。今编户二十五里。

狄道故城，在今府治西南。汉所置也。吕后六年，匈奴寇狄道。七年，复入寇。文帝十二年，匈奴寇狄道，即此城矣。蜀汉延熙十八年，姜维围魏王泾于狄道，不克。寻又引军出狄道，不克而还。《水经注》，亦谓之降狄道。盖县之别名也。隋、唐以来，州郡皆治此。宋改筑熙州城，即今治也。《志》云，今郡城周九里有奇，门四：东大通，南建安，西永宁，北镇远。

武始城，在府北七十里。汉狄道县地。前凉张骏以狄道置武始郡，置城于此。西秦亦为武始郡治。宋元嘉四年，武始羌叛，焜磐遣其左丞相县达招慰。羌执县达，送于夏主昌。后魏太平真君八年，改置勇田郡，寻改勇田县为属武始郡治。时又析置杨素县，与狄道并属武始郡。隋开皇初，俱废入狄道县。

临洮城，府西南二百二十里。汉县，属陇西郡，南部都尉治此。后汉因之。建初二年，羌豪布桥等围南部都尉于临洮。马防讨破之。永初三年，钟羌破临洮县。永建初，校尉马贤大破钟羌于临洮。于是凉州复安。钟羌，盖羌之别种，居临洮谷者。蜀汉延熙十七年，姜维自狄道进拔河关临洮，是也。晋亦为临洮县，属陇西郡。惠帝改属狄道郡。前凉属武始郡。后魏太平真君六年，改为临洮郡，置龙城县为郡治。后周郡县俱废。隋开

皇二年，突厥寇兰州，总管叱列长之守临洮，为所败。即此城矣。又俱城，在临洮故城西南。晋太元十一年，前凉张天锡子大豫攻姑臧，不克。自西郡入临洮，掠民五千余户，保守俱城，为吕光所败灭。即此。

安故城，府西南百六十里。汉县，属陇西郡。元鼎五年，西羌反，攻安故，围枹罕城。盖与河州接境也。后汉仍属陇西郡。晋省。惠帝复置，属临洮郡。《晋志》，张茂分武兴、金城、西平、安故四郡，置定州。盖张氏分金城、西平二郡置安故郡，即治安故县。后魏废。《水经注》，洮水自临洮县东流，又屈而北流，径安故县故城西，又北径狄道县故城西。唐初，复置安固县。武后久视初，以吉頊为安固尉是也。寻废为镇。宋白曰：“安故，在兰州南。”《一统志》，在兰州西八十里，误。唐时为安固镇。五代周广顺中，自安固镇至凉州，立三州以控扼诸羌。三州，临、河、兰也。

安乐城，在州西三十六里。唐武德中，分狄道县置安乐县，属兰州。天宝中，属狄道郡。乾元中，改为长乐县。后废。宋熙宁六年，置康乐寨于此。金升为县，属临洮府。元废。

桑城在废安故县西南。《水经注》，洮水东北经桑城东，又东径安故县西。晋大兴三年，刘曜攻拔陈仓诸城戍。晋王保惧，自秦州迁于桑城。胡氏曰：“保欲自桑城奔河西也。”亦谓之桑壁。晋永昌初，休屠王石武以桑壁降刘曜。石武，亦匈奴别种也。时据桑壁，自称休屠王。太宁初，刘曜自陇上西击凉州，遣其将呼延晏攻凉宁羌护军阴鉴于桑壁。即此。巩令城在府西南二百五十里。吐蕃所置城也。宋熙宁六年，王韶图武胜，使德顺将景思立分兵制番酋于南路，自南甲趣巩令城。或云，南甲在府南三十里。又鸣鹤城，在府西南，唐至德后，吐谷浑所筑。又有三足城，亦吐谷浑所筑也。宋废。安羌城，在府西。本名溢机堡。宋宣和中，赐名安羌城。金废。

长城，在府西北。《史记》，秦始皇遣蒙恬发兵三十万北筑长城，起自临洮。唐因置长城堡。开元二年，陇右节度使王峻等追破吐蕃于洮水，又败之于长城堡，杀获数万，是也。

岳麓山，在府城东二里。上有超然台。又东八里有滴水岩。岩东二十

里有玉井峰，以峰头有井而名。夏牟山，在府西三十里。《志》云，山下牟麦特盛，因名。其相近者曰卧龙山，山势蜿蜒，如龙偃卧。又有朱翠山，在府西五十里。

抹邦山，府南二十五里。宋熙宁五年，王韶自通远军攻西羌。羌据险自保。韶曰：“既入险地，当使险为吾有。”径趋抹邦山，压敌军而陈。羌乘高下斗，韶击败之。其相近者有岚关坪，《志》云，坪在府南二十七里。关口险隘，坪上高敞，延袤可十余里。

常家山，府西南六十里。宋元祐二年，羌酋鬼章与西夏相结，谋复故土。夏人聚兵天都山，前锋绝通远境。鬼章驻常家山，大城洮州，以待师期，为宋将游师雄所破。《志》云，山与西倾相接。又有龙湫，甚深广，衍为九曲十八湾。天都山，见前平凉府固原州。西倾山，在府西南百五十里。或以为《禹贡》之西倾，非也。盖陇右诸山，多以西倾名。

十八盘山，在府东南百里。山高险，有石级一十八盘。又莲华山，在府南百五十里。山耸数峰，宛如莲华。马寒山在府北九十里。其山绵亘数百里，势极高峻，虽炎夏，冰雪不消。亦名马衔山。又太平原，在府北三十里。其地平原百顷，可以屯军。摩云岭，在府北百五十里。雄峻参天，有摩云岭关，设巡司戍守于此。《志》云，山北去兰州六十里。

竹牛岭，在府东。宋熙宁五年，王韶知通远军，图武胜，进筑乞神平堡，引兵度竹牛岭，破番酋抹耳等兵，洮西震动。继而韶破吐蕃于抹邦山。吐蕃帅木征度洮河来援。韶戒别将繇竹牛岭路张军声，而潜师越武胜破其前军，遂城武胜，是也。锁林峡府南六十里。洮水所经。诸峰耸削，两崖悬绝，林木森郁，宛似封固，因名。又石井峡，在府北百二十里。中有泉水，四时不竭。

通谷，府西六十里。其谷东西出入，中容千百人往来。不逾数十步，上有大窍，可见天日。宋熙宁中，置堡于谷口，曰通谷堡。又赞嘉谷，在府南六十七里。中有灵湫池。

洮河，在府西南二里。自岷州卫流入府境，经西倾山、常家山、锁林峡及莲华、夏牟等山，盘束千数百里，至府城南，始豁然奔放，声如万雷。

又北经石井峡，而合湟水。唐会昌二年，吐蕃国乱，洛门川将论恐热举兵入渭州。吐蕃大将思罗发等合诸部兵保洮水，焚桥拒之，寻为恐热所并。又宋熙宁八年，提点秦凤郑民宪请于熙州南关以南，开渠堰引洮水，并东山，直北道，下至北关，是也。

东峪河，府东二里。源出渭源县西十五里之分水岭，流入境，至城东，又西南流入于洮河。宋王韶自东峪径趣武胜，克之，是也。

抹邦河，在府南三十里。源出莲华山，流经抹邦山下，因名。府北三十里有打壁河，源出石井峡，西南流。抹邦河西北流合焉，共入于洮河。

邦金川，府南六十里，西流合于洮河。宋元祐中，种谊等击鬼章，夜济邦金川，至铁城，黎明，大破之。即此。铁城，即岷州卫之铁州城也。

三岔河，在府西北十里。又府北六十里有结河，为三带水交结处，俱流入于洮河。

南关，在府城南。城北又有北关。俱宋熙宁五年置，以保障近郊。今有墙垣，与府城壕相连，俗名藩城。又三岔关，在府西三十里。又府北三十五里有打壁峪关，俱宋置。结河关，在府北六十里。宋熙宁七年，于此置堡，后改为关。又摩云岭关，在府北摩云岭，最为高险。

下衬关，在府南百里。又府南百十里有八角关。又十八盘关，在府南百二十里。诸关皆宋置，今俱属临洮卫卒戍守。临洮堡，在府北七十里。宋置。金废。

永宁桥，府西二里。宋熙宁中，熙州洮河浮梁成，赐名永通。明初，更名永宁。有关在焉。和平驿，《輿程记》，在府西六十里。又六十里至河州卫。又沙井驿，在府北九十里，又北百十里至兰州。又有柳树递运所，在府东九十里。《通志》，府治东北有洮阳驿。

渭源县，府东百二十里。东至巩昌府九十里。汉为首阳县，属陇西郡。后汉因之。晋仍属陇西郡。后魏亦曰首阳县。西魏改渭源县，仍属陇西郡。隋属渭州。唐因之。开元二年，吐蕃将岔达延等寇临洮，军兰州，至于渭原。临洮，谓今洮州也。未几，复寇渭源。至德后，遂陷于吐蕃。宋熙宁中，置渭源堡，属熙州。金因之。元升为县。今城周二里，编户四里。

武街城，在县西。《水经注》，武阶城，在汉狄道县东白石山西北。或曰，即武街也。晋惠帝置武街县，属狄道郡。前凉张骏因前赵之亡，收河南地，至于狄道，置武街、石门、侯和、灊川、甘松五屯护军，与后赵为界。晋永初二年，石虎将王棹击张重华，袭武街。即此。《唐志》，武街城为武街驿，属渭源县。开元二年，陇右防御使薛讷拒吐蕃于此。

鸟鼠山，县西二十里。俗呼为青雀山。渭水经其下。其地鸟与鼠同穴，亦曰鸟鼠同穴山。《禹贡》：“导渭自鸟鼠同穴。”《尔雅》，鸟鼠共穴，其鸟名𪚩，其鼠名𪚩。是也。

南谷山，在县西二十五里。上有高城岭。蜀汉延熙十八年，姜维败魏将王经于洮西，进围狄道。魏征西将军陈泰驰救，从陇西潜渡高城岭，至狄道东南高山上，举烽火，鸣鼓角，维遁去。唐大中三年，吐蕃叛将论恐热自落门遣兵略西鄙，鄯州将尚婢婢遣将拓跋怀光击破之于南谷。即此。旧《志》，岭上有城曰渭源城，渭水出焉。三川合注，东北径首阳县西，与别源合。酈道元云：“渭水出南谷，在鸟鼠山西北，大禹只自鸟鼠同穴导之。”是也。

七峰山，县东北五里。有七峰错峙，因名。又五竹山，在县西南三十里。山多细竹，峰峦奇秀，有岩曰秀峰岩。山下有谷，曰银沟谷。霍谷山，在县南五十里。山高峻，为南面之胜。又南百余里有白桦岭，路通岷州。岭上多白桦树，因名。

大来谷，在县西北。唐开元二年，吐蕃将岔达延等寇渭源，屯大来谷。陇右防御使薛讷军至武街，距大来谷二十里，与陇右节度使王峻军合击之，寇败走。追至洮水，复败之于长城堡，是也。

渭河，在县北二里。源出南谷山，至鸟鼠转而东流，经县北，入巩昌府界。又东经凤翔、西安府境，东流入于黄河。

清源河，出县西南之五竹山，东流入渭。其水甚清，因名。东峪河，在县西二十里。源出分水岭，西流入狄道县界，又西南入于洮河。

分水岭关，在县西十五里分水岭上。自岭以西之水，悉入洮河，以东之水，悉入渭河。置关于此，为县境之襟要。《志》云，今县西二百里石

井递运所。

乞神平堡，在县西南。《宋史》，熙宁五年，王韶知通远军，击降番部，得地二千余里，城渭源堡。又破蒙罗角，筑乞神平堡，是也。庆平镇，在县南。宋置庆平堡。金改为镇。元因之，后废。《通志》，今县治东有庆平驿。

附见：

临洮卫，在府城内，洪武三年建，辖千户所五。

兰州，府北二百十里。东南至巩昌府四百二十里，东北至靖远卫三百五十里，西北至庄浪卫二百七十里，西南至河洲卫三百二十里。

古西羌地。秦陇西郡地。汉属金城郡。后汉、魏、晋因之。前凉张寔增置广武郡又石虎时，于金城郡侨置凉州。后魏仍属金城郡。后周因之。隋初，置兰州。大业初，复曰金城郡。唐又为兰州。天宝初，亦曰金城郡。乾元初，复故。后没于吐蕃。宋元丰四年，复置兰州。金亦为兰州，以州治兰泉县省入。元因之。明初，改州为兰县。成化十四年，复升为州编户七里，领县一。今仍曰兰州。

州控河为险，隔阂羌、戎。自汉以来，河西雄郡，金城为最。岂非以介戎夏之间，居噤喉之地，河西陇右安危之机，常以金城为消息哉？晋元康而降，河、陇多事，金城左右、求一日之安，不可得也。隋、唐盛时，驰逐河湟，未尝不以兰州为关要。及广德以后，兰州没于吐蕃，而西凉不复为王土。大中间，兰州亦尝顺命，而仅同羁属矣。宋元丰四年，李宪败夏人，始复城兰州。元祐初，夏人求复得之。朝议欲割以畀敌。孙路言：“自通远至熙州，才通一径，熙之北已接夏境。今自北美濒大河，城兰州，然后可以捍蔽。若捐以与敌，则一道危矣。穆衍言：兰州弃，则熙州危，熙州危，则关中震动。唐失河湟，西边一有不顺，则警及京都。今若委兰州，悔将无及。遂不果弃。明自州以北，常为寇冲，往往设重兵驻此，保障西垂。州诚自古捍围之地矣。”

兰泉废县，今州治。本汉金城县，属金城郡。后汉及魏晋因之。后废。西魏置子城县，金城郡治焉。开皇初，郡废。大业初，复曰金城县，仍为郡治。义宁二年，改曰五泉县。唐咸亨二年，复曰金城。天宝初，又为五泉

县。后废于吐蕃。宋元丰中，收复。崇宁三年，置兰泉县，为兰州治。金废。《志》云，州城北黄河滨有石如龟，伏城垣下。今州城亦谓之石龟城，周六里有奇。

广武城，在州西百二十里。汉金城郡枝阳县地。西晋末，张寔分金城之令居、枝阳二县地，立永登县，又合三县置广武郡，盖治于此。永和二年，石赵将麻秋等攻凉金城，张重华使将裴恒拒秋于广武。太元末，南凉秃发乌孤据广武，攻后凉之金城，是也。后魏郡县俱废。隋因之。唐复置广武县，属兰州。宝应中，没于吐蕃。《水经注》，广武城在枝阳县西。今枝阳，见靖远卫。又杜佑、刘昫皆云：“广武郡，隋废为广武县，属兰州。今《隋志》不载。”令居，见西宁镇。永登，或曰亦在州西。前凉广武郡，盖治永登县云。

允吾城，在州西北二百里。汉县，始元六年，置金城郡，治允吾，是也。后汉亦为金城郡治。永平初，谒者张鸿击羌烧当滇吾于允吾，败绩。晋徙郡治榆中，县废。前凉复置，属广武郡。太元十年，后凉吕光以主簿尉祐为金城太守。祐至允吾，袭据其城以叛。光别将姜飞击破之。寻为乞伏乾归所得。隆安四年，乾归为姚兴所败，走保允吾，降于秃发利鹿孤，是也。后魏亦曰允吾县，属武威郡。西魏改为广武县，又置广武郡。隋初，郡废，县属凉州，寻改曰邑次，后又改曰广武。大业初，复曰允吾县，属武威郡。唐废。《汉志》注：“浩亶水东至允吾入湟，湟水亦东至允吾入河。”汉允吾县盖在兰州西。杜佑曰：“允吾在广武西南。”一云在今州西南五十里，是也。其在州西北者，则隋时改广武郡所置之允吾县，在枝阳故县境，与庄浪卫接界，非汉允吾县故治也。

晋兴城，在州西南百七十里。《晋志》，永宁中，张轨表请分西平界置晋兴郡，领晋兴、枹罕等县。郡盖治浩亶或曰此其故城也。张骏又分置兴晋等郡，其后屡为刘曜子虎所攻略。盖今之河州。阚骃云：“城在允吾县西四十里，亦谓之小晋兴城。”后亦讹兴晋曰晋兴。晋隆安中，乞伏乾归为姚秦所败，降于利鹿孤。利鹿孤置之于晋兴，即小晋兴城云。今见西宁卫废浩亶县及河州注。

河关城，在州西南。汉县，属金城郡。后汉属陇西郡。蜀汉延熙十七年，姜维自狄道攻拔河关，是也。晋废惠帝时，复置，属狄道郡。后废。或曰，后凉吕光三河郡，盖置于河关县。

榆中城，州西百里。汉县，属金城郡。后汉因之。中平二年，董卓破群盗边章等于美阳，章走榆中。即此。晋为金城郡治。后魏因之，寻又为建昌郡治。后周废。杜佑曰：“榆中，即故大小榆谷。”误也。《水经注》，河水过大小榆谷北，又东径河关县北，又东径允吾县北，又东过榆中县北。似为得之。又太子贤曰：“榆中在金城县东。”杜佑亦曰：“在五泉县东。”俱误也。阿干城，在州南四十五里。宋元丰中，置阿干堡。金升为县，属兰州。元因之，寻省。今置关于此。

河会城，在州西。晋太元初，苻秦遣将梁熙等伐凉张天锡，济自青石津，攻河会城，降之。《水经注》，湟河至允吾，与大河会。河会城，盖在二河之会也。西市新城，在州东南七十里，宋时夏人所置也。元丰四年，宦者李宪败夏人于此，又袭破之于女遮谷，遂复古兰州，城之。又大定城，在州北，亦夏人所置。元丰中，与宋分界处也。近代议边事者，谓复大定城，则可屯矿兵以守河北。盖其地常为寇冲云。

皋兰山，州南五里，州之主山也。山下地势平旷，可屯百万兵。《汉书》：霍去病为骠骑将军，击匈奴，屯兵皋兰山下。即此。山峡有五眼泉。相传去病屯兵时，士卒疲渴，以鞭卓地，泉涌者五。隋因以山名州，后又以五泉名县。山后又有蛾眉湾，《志》云，在今州东南三十里。又瓦埠山，在州南十里。又州西南十五里有第一原。俱皋兰之支阜矣。

龙尾山，在州南三里。山形如龙，尾落黄河之壩。《志》云，即府北马寒山之支陇也。又九州台山，在黄河北五里。山形峭拔，直上如台，登之可以望远。

白石山，州东南八十里。《汉志》注，狄道有白石山。即此山也。宇文周将梁暉引军至此，为羌所围。山无水，暉祷于山，飞泉涌出，兵士取给，因呼为梁泉。其水北与湟水合，注于河。

桦林山，在州南三十里。山高耸，与马寒、皋兰二山并峙。又天都山，

亦在州南三十里。《一统志》，宋宦者李宪遣苗绶自兰州伐夏，尝逾此山。误也。今固原西安所有天都山。

琵琶山，州西百三十里。险峻曲折，如琵琶首，因名。杜佑云：“广武县有琵琶山。”是也。又石门山，在州西南。《水经注》：“漓水东北经石门口，山高峻险绝，对岸如门。青岩山，在州西北。《隋志》允吾县有青岩山。《五代志》亦云青岩山在允吾县。山盖近河滨。苻秦将梁熙等伐凉，自青石津攻河会城。胡氏曰：“津当在青岩山下。”

崦嵫山州南百七十里。晋义熙四年，西秦太子乞伏炽磐畏姚秦之逼，筑城于崦嵫山而据之。七年，乾归置武威郡，镇崦嵫城，以其子木突干为武威太守，镇之。八年，乞伏公府弑乾归，奔崦嵫南山，炽磐讨杀之。宋元嘉三年，夏主赫连昌遣其将呼卢古败西秦将昙达于崦嵫山，进攻枹罕，是也。一名可狼山，俗呼为热薄汗山。

沃干岭在州西南。晋建兴末，刘曜等逼长安，凉州张寔遣贾骞等逾岭入援。即此岭也。咸和二年，前凉张骏遣兵攻刘曜秦州诸郡。曜遣其子胤屯狄道。骏将韩璞赴救，度沃干岭而军。既而璞遣将辛岩督运于金城。刘胤袭败之于沃干岭，进至璞营，璞众大溃，胤乘胜追奔，济河至令居。旧《志》云，岭在晋兴郡大夏县东南，洮水西北。自凉州济河，必度沃干岭，乃至狄道。令居，见西宁镇。大夏，见河州。

扞天岭，《志》云，在允吾东南。晋隆安中，乞伏乾归败降秃发利鹿孤，居于晋兴。利鹿孤闻其谋，遁去，遣其弟吐雷屯扞天岭以备之。宋元嘉六年，乞伏暮末遣将王伐送沮渠成都还北凉。蒙逊使沮渠奇珍伏兵于扞天岭，执伐以归。即此处也。

女遮谷，州东三十五里。宋李宪与苗绶城兰州，败夏人于此。又李麻谷，在州西四十里。《志》云，路通甘州。又有荔谷，在废允吾县界。后汉建初二年，烧当羌迷吾等反，败金城太守郝崇于荔谷，崇轻骑得脱，即此。东冈坡，在州东二十五里。相传唐太宗为秦王时，获褚亮于此。又州南四十五里有硃砂洞，洞产硃砂。

葵园峡，在州西。后汉灵帝中平二年，张温遣周慎追叛羌边章等于

榆中，围之。章分兵屯葵园峡，断慎运道。慎惧，弃车重而退。石硷口峡，在州东二十五里。两崖悬立，黄河经其中，东流入金县界。

黄河，在州城北。自河州流入，经州城下，洮、漓、湟三水入焉。夹河有滩，宜播五谷，引河灌溉，甚为民利，亦谓之金城河。胡氏曰：“河流径金城郡界，自允吾以西，通谓之金城河。”汉武元狩初，浑邪王降，自金城河西，西并南山至盐泽，空无匈奴。神爵元年，赵充国击西羌，至金城，欲渡河，恐为敌所遮，夜遣三校衔枚先渡，渡辄营陈，会明毕度，是也。后汉光和六年，金城河水溢出二十余里，亦即今州境矣。

洮水，在州南三十里。自狄道县界北流，入于黄河。晋咸和二年，凉将韩璞与刘曜子胤夹洮相持七十余日，是也。又漓水，在州西南十五里。源出塞外，流入州境，合洮水，又流经皋兰山下，东北入于河。即河州之大夏河矣。《志》云，皋兰水出皋兰山，在州西南三里，左右翼注漓水。

湟水，在州西一百八十里。自西宁卫大小榆谷东流入境，与浩亶河合流而注于黄河。晋太元十九年，苻登败死，登子崇奔湟中，即帝位。盖谓湟水之西也。或谓之金城河。

阿干河，州西三里。源出马寒山，至分水岭分为二：南流入金县，为阁门河；北流入兰州阿干峪，为阿干河。自峡奔流至州城，灌溉之利甚薄。今州西五里曰溥惠渠，引阿干水灌田百顷。

笋萝河，州西南六里，东流入黄河。又西南里许有黄峪沟，亦流入于河。又柳沟，在州东三十里，北流入河。州东二十里又有曲柳泉，亦东流入于大河。莲塘池，在州西七里。其地有神泉，俗呼为狮跑泉。洪武二十三年，肃藩移驻此。渚神泉为池，周回数十里，为游赏之胜。

石城津，在州西境。阡駟曰：“石城津在金城西北。”晋太元初，苻秦伐凉，军于西河，梁熙等济自青石津，苟萇等济自石城津，会攻凉缠缩城，是也。缠缩城，见庄浪卫。一云石城津，即河州之积石渡。马兰滩，在州东大河南岸。明初，扩郭围兰州。别将于光自巩昌驰救，至马兰滩，为扩郭所袭，兵败被执处也。

金城关，州北二里当黄河西北山要隘处。本汉置。阡駟《十三州记》，

金城郡有金城关。是也。后废。宋绍圣四年，复置关于此，据河山间，筑城为固。崇宁二年，王厚请移关于北境之斫龙谷。不果。今设巡司于河南岸。京玉关，在州西北四十五里。本名把楞桥。宋元符三年置关，赐今名。金因之。元废。今有卫卒戍守。又关西四十里有通川堡，又西四十里为西宁卫境之废通湟堡，俱宋置。金废。阿干镇关，在州南四十五里，即故阿干县也。明初置关，有兰州卫卒戍守。

东关堡，州东十八里。宋元丰四年置，本名巩哥关。六年，改为东关堡。金因之。明景泰初，重筑。又西关堡，在州西，亦宋元丰五年置，寻废。金复置。《金志》云，关逼临黄河，与夏人接界。元废。

皋兰堡，州西南九十五里。宋元丰四年置，六年废，寻复置。又西古城堡，在州西八十里，又西四十里为积滩堡，俱宋置。金废。质孤堡，在州东五十里。宋元丰五年置。元祐以后，废置不一。金亦为质孤堡，属兰州。元废。又盐场堡，在州北。又有把石堡，皆在黄河北岸。宋元丰中置。金废。《通志》州西北二十里有大岔堡，正统十四年置。

安宁堡，在金城关西四十里。又西三十里为沙井峡，北抵庄浪之道也。候马亭，《志》云，在州西北十五里。相传汉武遣李广利伐大宛，候龙马于此，因名。《通志》，州南一里有兰泉驿。州东五里又有兰州递运所。

镇远浮桥，旧在州西十里。明洪武十八年，移置城西北二里金城关下，用巨舟二十四，横亘黄河中。入甘肃，通西域，路皆出此，为咽喉重地。敌若据此桥，则河西隔绝，饷援难通矣。又西津桥，在州西二里，永乐中建。

金县，州东九十里。西南至府城百八十里。本宋兰州地。金为龕谷县地，属兰州，寻属会州。正大间，置金州，治龕谷县。元省县入州。明初，改州为县，又移今治，属临洮府。后又改属兰州。今县城周三里，编户十里。

龕谷城，县南二十里。本宋之龕谷寨。元丰四年置。元祐七年废。绍圣中，复修为堡。金升为县，寻置金州治此。元县废。明又改置今县。

定远城，在县西北四十里。唐置。宝应间，陷于吐蕃。宋熙宁中，种谊筑城，以屯戍兵。后废。元祐七年，复筑。政和四年，夏人攻拔之，迁其民

筑臧底河城。五年，宋将王厚等攻之，大败而还。六年，渭州将种师道攻克之。金大定中，升为县，属兰州。后改属会州。正大间，属金州。元废为镇。今为定远驿。

一条城，县东七十里。亦谓之一条城堡。相传宋狄青巡边时所筑。又平地城，《志》云，在县北四十里。唐戍兵所筑。

马衍山，在县西南三十里。山雄秀甲于郡境，即马寒山也。盘亘深远，与狄道县及兰州接界。

龕山，县南二十里。宋人置寨于此，因以为名。其下有小龕河。又有尖山，在县西南二十五里。猪嘴山，在县西北四十里。金于此置猪嘴镇。又县东南三十里有驼项山，县东四十里有鸡爪山，县南七十里又有马尾山，皆以形似名也。又县南二十里有白草原，平坦可以屯军。

乱山，在县东北八十里。其山绵延数百里，稠叠数百峰，参差远近，乱如列戟。黄河经其中。亦郡境之襟要也。黄河县北六十里。自兰州东北流，越乱山中二百余里，入靖边卫界，始泻落巨川，始瀑布然。土人沿山引水，灌田甚广。

浩亶河在县城南。源出马寒山峡中，东流入黄河。亦曰阁门河。有阁门河桥在县南门外。按《汉志》，浩亶水出塞外，东至允吾，入湟水。盖名同而实非也。

小龕河，县南十五里。源出龕山，东流与浩亶河合。又有清水河，在县东三十五里。连达沟，在县北十五里。皆由浩亶以达于黄河。

十字川堡，县北八十五里。又买子堡，在县西三十里。俱宋置。金废。《舆程记》，兰州东六十里为买子堡。又东百里为一条城。又东九十里为平滩堡。又九十里而至靖边卫。清水驿，在县东三十里。亦东出靖边之道也。《通志》，县北四十里有把石沟仓，八十九里有什字川仓，又县北百九十里积滩堡仓、一条城仓。

附见：

兰州卫，在州城内。洪武三年建。初置州治东北，后移置州东，辖千户所五。又甘州中护卫，亦在兰州治东北。旧在甘州，洪武三十二年，从

肃藩移建于此。弘治十四年，改属固原卫。

河州，府西南百八十里。南至洮州卫三百十里，西至生番界七十里，西北至西宁卫二百五十里，东北至兰州三百二十里。

古西羌地，秦属陇西郡。汉属金城、陇西二郡。后汉属陇西郡汉末，为宋建所据，称河首平汉王。曹操遣夏侯渊讨平之。晋惠帝永宁中，张轨奏置晋兴郡《晋志》，枹罕县，张轨分属晋兴郡。《十六国春秋》，晋咸康元年，张轨分兴晋郡属河州。自是河州为兴晋，非晋兴也。前秦苻坚始置河州《晋志》，张骏分晋兴、金城、武始、南安、永晋、大夏、武成、湟中等郡为河州。是河州，张骏所置。杜佑以为始于苻秦。《十六国春秋》：“苻坚建元三年，克枹罕，以彭奚念为凉州刺史，镇之。七年，以李辨为河州刺史，领兴晋太守，镇枹罕，徙凉州治金城。后为西秦乞伏乾归所据乞伏氏置北河州，镇枹罕。《十六国春秋》，乾归太初二年，枹罕羌彭奚念来归，以为北河州刺史。九年，奚念入朝，以翟瑄为兴晋太守，镇枹罕。炽磐永康元年，迁于枹罕。暮末永弘二年，焚城邑东走，故地皆入吐谷浑。后魏太平真君七年，置枹罕镇，寻改为河州宋元嘉二年，枹罕为吐谷浑所据。二十年，魏主焘伐吐谷浑，别将封敕文等取枹罕，置镇于此。寻为河州治。后周兼置枹罕郡。隋郡废，仍曰河州。炀帝又改为枹罕郡。唐复曰河州开元二十六年，置镇西军于城内。天宝初，曰安乡郡。乾元初，复为河州，寻没于吐蕃。宋熙宁六年，收复，仍置河州。金因之，亦曰平西军。元曰河州路。《元志》，吐蕃等处宣慰司亦治此。明洪武初，置河州卫。五年，设河州府辖宁河一县。七年，建陕西行都司。十年，立河州左右二卫。十二年，省行都司及河州府县，改置河州卫以左卫调洮州，改右卫为河州卫军民指挥使司，领千户所六，守御千户所一，隶陕西都司。景泰二年按：《会典》作成化九年，《通志》作七年，复分置河州编户四十里，属临洮府。今因之。

州控扼番戎，山川盘郁。自昔西垂多衅，枹罕尝为战地。盖犄角河西，肘腋陇右，州亦中外之要防矣。明初，置茶马司于此，以制番命，资国用。其后渐弛。《一统志》，洪武七年，于河州治东南立茶马司。永乐九年，于洮州治西亦立茶马司。《四裔考》，洮、河二州茶马司，盖洪武二十五年

所置。初曹国公李景隆奉使市马，以茶五千余斤，得马一万三千五百余匹。正统十四年，遣行人四人视茶政。成化二十四年，以御史一人代之。又洪武二十六年，制金牌信符颁给诸番，遇有差发，合符乃应。正统十四年，停金牌。成化十七年，给乌思藏诸番王及长河西鱼通宁远等宣慰司敕书勘合，令贡时，四川陕西验入。后因亦不刺之乱，金牌散失。嘉靖二十八年，兵部议金牌不可数给，宜给勘合，如成化故事。从之。乌思藏等，详四川诸番。弘治末，都御史杨一清言：唐时回纥入贡，即以马易茶。宋熙宁间行之，所谓摘山之产，易厩之良，无害而有利者也。我朝纳马，谓之差发，如田之有赋，身之有庸，非虐使于番。因纳马而酬茶，体尊名顺，非互市交易之比。且西番为中国藩篱，其人本非孝子顺孙，徒以资茶于我，绝之则死，故俯首服从。此制番控[夷]之上策，前代略之而我朝独得之者也。顷自金牌制废，私贩盛行，失利垂六十年，岂徒边方乏骑乘之用？将来番夷无资于我，跳梁自肆，将生意外之忧。撤藩篱之固，甚非计也。请申明旧制，使番族各供差发。盖河、洮二州，实为西番之嚆要。故茶马二司，特设于此，至今借其利云。

枹罕废县，今州治。汉县，属金城郡。后汉属陇西郡。应劭曰：“枹罕，羌侯邑也，汉因以置县。”建安十九年，曹操遣夏侯渊讨宋建于枹罕，破斩之。蜀汉延熙十八年，姜维伐魏，自枹罕趋狄道，是也。晋废。永宁中，张寔复置，属晋兴郡。张骏时，为河州治。永和三年，石虎将麻秋等来攻，不能克。苻秦亦置河州于此。义熙三年，姚秦叛将彭奚念据枹罕。五年，西秦乞伏炽磐攻拔之。后魏太平真君四年，败吐谷浑，取枹罕城。七年，置枹罕镇，寻置州。隋唐时，州郡皆治此。宋熙宁六年，置枹罕县，而州治宁河县。盖析枹罕增置也。九年，俱省入河州。崇宁四年，升宁河寨为县。金贞元二年，复置枹罕县，仍为州治。元复省。《通志》今州西七十里有枹罕废城，疑宋所置。今州城周九里有奇。

大夏城，在州东北八十里。汉县，属陇西郡。后汉因之。永元九年，烧当羌迷唐寇陇西，杀大夏长。即此。晋县废。惠帝时，张轨复置，属晋兴郡。张骏又置大夏郡治焉，取县西大夏水为名。永和二年，石虎将麻秋克

金城,进取大夏。又攻枹罕不克,退保大夏。太和二年,凉张天锡击叛将李俨,克大夏、武始二郡。俨自陇西退屯枹罕。后魏皇兴三年,亦置大夏郡于此。寻复为县,属金城郡。隋初,郡废,县属河州。唐初因之。贞观初,县废。五年,复置。广德后,没于吐蕃。会昌三年,吐蕃乱,其将论恐热屯大夏,谋并鄯州。鄯州帅尚婢婢遣将庞结心等击之,至河州南,伏兵险阻。论恐热来战,大败。宋复河州,县废。《志》云,大夏城西南二十里有金剑山及金剑城。前凉张骏时,尝置金剑县于此。《水经注》,大夏故城在枹罕西南,北临洮水。似误。叠兰城,旧《志》云,在大夏城西南。晋时,前凉张轨所置。义熙七年,乞伏乾归徙羌众于叠兰,以兄子阿柴为兴国太守,镇之。八年,乞伏公府弑乾归,走保大夏。炽磐使其弟智达讨之,公府奔叠兰城,就其弟阿柴。智达复攻拔之。后为吐谷浑所废。

白石城,在州西。汉县,属金城郡。阚骃曰:“白石城,在狄道县西北二百八十里。有白石山在其东,因名。”元帝永光二年,陇西羌乡姐旁种反。遣冯奉世率任立、韩昌到陇西,分屯三处。立为右军,屯白石。昌为前军,屯临洮。奉世为中军,屯首阳西极上。前军到降同阪,先遣校尉在前与羌争地利,又别遣校尉救民于广阳谷。兵少,皆为羌所败。乃益兵破走之。后汉白石县,属陇西郡。永元十年,刘尚等讨叛羌迷唐等,不克,征还。谒者王信、耿谭代领其兵。信屯枹罕,谭屯白石,叛羌以次降附。晋废。惠帝时,张轨复置,属晋兴郡,改为永固县。太和二年,张天锡攻叛将李俨于枹罕。俨求救于苻秦。王猛自略阳驰救,使别将姜衡屯白石。即此城也。后魏,县废。隋末,李轨复置永固县,属河州。唐贞观七年,废县,改置乌州。十一年,州废,置安乡县,仍属河州。天宝初,改为凤林县,后废于吐蕃。其地有凤林关。《唐书·吐蕃传》,咸通中,尚延心献款,高骈收凤林关。是也。乡姐,读曰究紫。

治城,在州西北百十里。晋时,前凉张氏所置城也。宋元嘉六年,西秦南安太守翟伯承等据罕□谷以叛。西秦王暮末击破之,进至治城。既而西河王蒙逊至枹罕,遣子兴国攻定连。暮末逆击兴国于治城,擒之。八年,赫连定灭西秦,畏魏人之逼,拥秦民自治城济河,欲击河西王蒙逊而夺其

地。吐谷浑王慕 使其弟慕利延等乘其半济，击之，执定以归。后魏时，分金城郡置建昌郡，治城县属焉。后又析置东泾郡于此。后周，郡县俱废。谭郊城，在治城西北。晋义熙七年，西秦乞伏乾归克秦水洛城，徙民三千余户于谭郊，因城其地。八年，徙都之。宋元嘉六年，西河王蒙逊遣子兴国攻乞伏暮末于定连。暮末击擒之于治城，追击蒙逊至谭郊，是也。

定连城，在州东南。或曰，晋时后凉吕光所筑。宋元嘉三年，西秦乞伏炽磐为夏主昌将呼卢古所攻，自枹罕迁保定连。呼卢古入枹罕南城。秦将赵寿生战却之。六年，河西王蒙逊伐秦。秦王暮末复自枹罕迁保定连。既而所署西安太守莫者幼眷据汧川以叛。暮末讨之，败还定连。七年，吐谷浑慕瓌袭秦定连，不克，寻没于吐谷浑。胡氏曰：“汧川，亦枹罕左右地也。”

列浑城，在州西南百八十里。宋永初二年，西秦乞伏炽磐遣乞伏孔子率骑击铁汗秃真于罗川，大破之。寻以乞伏是辰为西胡校尉，筑列浑城于汧罗以镇之。汧罗，即罗川矣。又武成故城，在州南。前凉所置武成郡也。西秦乞伏国仁亦置武城郡于此，后为吐谷浑所废。赤水城，在州南。晋义熙八年，西秦乞伏乾归击吐谷浑阿若干于赤水，降之。《水经注》，赤水城，亦曰临洮东城。魏收《志》，魏真君六年，改故临洮县为临洮郡，领赤水县。即此城矣。后周废。

临津城，在州西北百二十里。下临河津。晋时，前凉置临津县，属兴晋郡。后为吐谷浑所废。《水经注》，河水自浇河东流，经邯川城，又东径临津城北、白土城南，为缘河津渡之处。是也。隋曰临津关。大业五年，自将伐吐谷浑，出临津关，渡黄河至西平。即故临津城矣。浇河、邯川，俱见西宁卫。石泉城，在州西北。晋义熙十二年，西秦乞伏炽磐攻秦洮阳公彭利和于湟川，沮渠蒙逊攻石泉以救之。炽磐闻之，引还，遣兵救石泉，是也。湟川，见洮州卫。

盐泉城，在州西百八十里。唐开元二十六年，陇右节度使杜希望将鄯州之众，夺吐蕃河桥，筑盐泉城于河左，置镇西军治焉。后没于吐蕃，亦置镇西军于此。会昌三年，吐蕃乱，其洛门守将论恐热举兵谋篡，忌鄯

州镇将尚婢婢，引兵击之，至镇西。即此。天成城，在州西八十里。唐天宝十三载，于索恭川置天成城，又于州西百余里置雕窠城，为戍守处。至德初，陷于吐蕃。

宁河城，在州南六十里。吐蕃所置香子城也。宋熙宁六年，王厚攻拔香子城，遂平河州，因置宁河寨。崇宁四年，改置宁河县。金仍属河州。元因之，后废为镇。明初，复置县，寻废。又宋置宁河县，复于州东四十里置宁河寨。金废。元至元九年，复于吐蕃西界立宁河站云。安乡城，在州西北五十里，吐蕃所置城桥关也。宋熙宁中，收复。元符二年，赐名安乡关。金因之，亦曰安乡城。元升为安乡县，属河州。元末废。

定羌城，在州南九十里。本吐蕃所置阿诺城。宋熙宁六年，改曰定羌。八年，吐蕃木征复围河州。王韶自熙州驰救，诸将议趣河州。韶曰：“贼围城，恃有外援耳。”乃直趋定羌城，破西番结河川族，断夏国通路，进临宁河，分命偏将入南山。木征知援绝，拔栅去。金亦曰定羌城。元升为县，河州路尝治此。元末，废。木藏城，在州西南，吐蕃所置。宋熙宁中，王韶破吐蕃阿诺木藏城。此即木藏城也。

讲朱城，在州西南百里。本番族所置。宋熙宁中收复。元祐二年，熙河将姚兕破鬼章于此。寻复为蕃族所据。元符二年，复取之，寻弃不守。崇宁二年，复修筑讲朱城。金废。又循化城，在州西南百三十五里。本名一公城。宋元符二年收复，寻废。崇宁二年，改曰循化城。又州南有当标城，亦番族所置。元符中收复。崇宁二年，改为安疆寨。金废。《宋志》，讲朱、错凿、一公、当标四城，俱在州南。来羌城，在州西北三十里。又有怀羌城，在州西南九十里。俱宋崇宁二年王厚开边所取番地，因筑城戍守，寻俱废。

踏白城，在州北，亦吐蕃所置。宋熙宁七年，吐蕃首领鬼章诱知河州景思立、偏将王宁会于踏白城，伏发，二将俱没。八年，王韶解河州之围，复还熙州，以兵循西山，绕踏白城后，烧贼庐帐，木征穷蹙来降，是也。

平夷城，州西南四十里。唐开元二年，置平夷守捉于此。后废。又渔海城，亦在州境。郭子仪破枹罕十寨，取渔海等五县。盖吐蕃所置县也。

历精城，在州西，近西宁卫境。《宋史》，治平中，唃廝 子瞎毡居龛谷，瞎毡子长木征居河州，少瞎吴叱居银川，而唃廝 少子董毡与其母乔氏居历精城，即此。龛谷，见前金县。

积石山，州西北七十里。两山如削，黄河中流，俗所谓小积石也。

凤凰山，在州东十二里。山形若凤，故州亦有凤林之名。又牛脊山，在州南二十里。又南四十里有惊骢岭，俱以形似名也。

雪山，州西南百五十里，接洮州蕃界。四时皆有积雪，一名雪岭。又山石如骨露，一名露骨山。宋熙宁六年，王韶复河州，会洮岷降羌复叛，韶回军击之，吐蕃木征遂据河州。韶进破阿诺木藏城，穿露骨山，南入洮州境。道狭隘，释马徒行，木征复自河州尾官军，韶击走之，即此。

万顷原，在州北二里。四望宽平，居民稠密。其上又有重台原。《志》云，原东西百里，南北五十里。唐及五代俱名广大原，昔时番汉所驻牧地也。

葵谷，在州东。晋太和二年，凉张天锡击叛将李俨于陇西，别将常据败俨兵于葵谷，即此。亦谓之奴葵谷。义熙八年，西羌彭利发袭据枹罕，乞伏乾归讨之。至奴葵谷，利发弃众南走，乾归遣将追斩之于清水。清水，在今金县界。罕干谷，在州西。宋元嘉六年，河西王蒙逊伐西秦，西秦南安太守翟承伯等据罕干谷以应河西。《水经注》，陇西白石县东有罕干渡，又东则枹罕故城也。

沙阜，在州东。晋永和三年，石赵将麻秋等据大夏，略凉河南地。张重华使谢艾等拒之。别将杨阜败赵将刘宁于沙阜，宁退屯金城。

黄河，在州北。《志》云，黄河下渡，直州北六十里之刺麻川，路通庄浪，谓之刺麻川渡。黄河上渡，直州西北百二十里之积石关，路通西宁，谓之积石渡。积石渡，亦谓之石城津。晋太元初，苻秦将苟苾济白石城津，盖谓此。

大夏河，在州南三里，即漓水也。一名白水，其上源为白石川。《水经注》，白石川水，南经白石城西，而注漓水。漓水又经白石城南，东至枹罕，下流入于河，是也。今有大夏桥，在州西三里，跨水上。《志》云，大夏

川在故大夏县西，县以此名。唐会昌三年，吐蕃叛将论恐热屯大夏川，即此。洪河，在州西南二里。又州南二十里有牛脊河，州东六十里有广通河，俱合大夏河，入于黄河。

湫池，在州西北积石关西。周回三十里。池岸万木森然，雅著灵异，土人号为显神池。《一统志》，州西北六十里有龙湫，即湫池矣。又州东三十里有浅湖桥。相传上古时州地皆湖，禹疏凿入于河，湖始为陆。今州东十里有翻桥，开凿之迹犹存。王象之曰：州东有地名河川，川东西二里，南北十五里，即旧湖地云。

积石关，州西北百二十里。明初，置茶马司于河州。此为市易之处，有官军戍守。东去积石山五十里。土门关，在州西九十里。又州西北九十里是老鸦关。二关俱有官军防戍。

杀马关，州西南百二十里。《舆程记》，州西南六十里为宁河驿。又西六十里为杀马关。其林麓控搯足以守御，自此而西举足浸高。又行一日至岭西，其地益高，盖与西域相出入处。元遣都实访河源，路出于此。

鸡项关，在州西北。唐大中四年，吐蕃叛将论恐热遣兵于鸡项关南造桥，以击尚婢婢于鄯州。胡氏曰：“关在河州界。”又河蓝关，亦在州西北，近黄河岸。《唐志》，河州有河兰关。

通会关，在州东南五十里。《宋志》，熙宁七年置。《通略》云，绍圣五年置。金置寨于此。元废。又凤林关，在州西凤林废县，见上白石城。又安乡关，在州西北安乡废县。临津关，在州西北故临津城。俱见前。又州西有绥远关，亦宋崇宁三年置。金废。

曲柳戍，在州东北。前凉张氏置戍处。晋永和三年，石赵将麻秋等击凉，据大夏，攻枹罕，进军屯河南。别将刘宁、王棹，略地晋兴、广武、武街至于曲柳。胡氏曰：曲柳，在洪池岭北。似误。时赵军未渡河而北也。赤岸戍在州西北。《水经注》，河水自左南而东径赤岸北，亦谓之河夹岸。《秦州记》，枹罕有河夹岸，盖戍守要处也。晋永和三年，石赵将麻秋等克凉金城、大夏诸郡。张重华使谢艾拒之，进军临河秋，败退。既而重华使章瑁屯于河夹，麻秋袭败之。河夹，即赤岸戍也。

南川寨，州西南七十里。宋熙宁七年，置南川堡，寻改为南川寨。元符二年，羌酋鬼章城洮州以居，引兵攻宋之南川寨。即此。金仍为南川寨。元废。又回乐寨，在州南境。宋熙宁六年，吐蕃木征复入河州。王韶遣将度洮，略定南山地，筑回乐寨、结河、当川二堡，破河讷城。又城香子，尽逐南山诸羌，遂取河州，城之。河讷，即阿诺城之讹矣。

东谷堡，州东十五里。唐会昌四年，吐蕃叛将论恐热攻鄯州，为尚婢婢所拒，退保东谷。婢婢为木栅围之，绝其水源。恐热突围走保薄寒山，众皆降于婢婢，是也。宋熙宁七年，置东谷堡于此。

通津堡，州西南百六十里。本蕃境之南达堡。宋熙宁中收复。崇宁三年，改名通津堡。其东四十里，即安疆寨矣。西北至西宁卫境之大通故城，亦四十里。来同堡，在南川寨东九十里。番名甘扑堡。熙宁中收复。崇宁中，改筑，赐名来同。又临滩堡，在安乡关西四十里。堡北至黄河四十里。《宋志》：“州西南又有阎津堡，亦宋崇宁中置。《通志》，今州北百八十里有大通河堡，州西北百二十里有弘化寺堡，俱为戍守处。堡各有仓。”

银川驿，在州西六十里。旧《志》云，踏白城东有银川站，黄河所经。驿盖因旧名也。又西六十里曰长宁驿。又和政驿，在州南六十里。又南六十里有定羌城驿，与州治西南之凤林驿为五驿。

附见：

河州卫，在州治西。详见河州沿革。又河州茶马司，在卫治东南。详亦见前。

归德守御千户所，在卫城西七百里。永乐四年建，隶河州卫。

洮州卫，军民指挥使司东至岷州卫一百五十里，南至废叠州生番界一百二十里，西至生番界九十里，北至河州三百十里。自卫治至京师四千二百二十里，至南京四千里，至布政司一千六百七十里。

《禹贡》雍州地。秦汉以来，皆诸戎所居《括地志》，秦地西至临洮，即洮州也。后属吐谷浑，为沙州地李延寿曰：吐谷浑部内有黄沙，周数百里，因号沙州。晋太元中，乞伏乾归以吐谷浑视罢来降，拜为沙州牧，是也。后魏败吐谷浑，取其地置洪和郡，属河州。后复没于吐谷浑。后周武

帝逐吐谷浑，以其地置洮阳郡，寻立洮州。隋初，郡废，而州如故。大业初，改州为临洮郡。唐复为洮州。开元十七年，并入岷州，旋复置临州。二十七年，又改为洮州。《通典》，仪凤二年，置漠门军于城内，属陇右节度。天宝初，亦曰临洮郡。乾元初，复曰洮州。后没于吐蕃，号临洮城。后唐长兴四年，内附，置保顺军置军于洮州，兼领鄯州。寻复为西番所据。宋元符二年，收复，寻弃不守。大观二年，复得临洮城，仍置洮州。《宋史》，大观二年，收清臧川以为洮州。金、元因之。明洪武四年，置洮州卫军民指挥使司领千户所六，皆在卫城内，隶陕西都司。弘治中，改属固原镇。今为洮州卫。卫西控蕃戎，东蔽湟、陇，据高临深，控扼要害。明太祖尝言：“洮州，西番门户。”今卫西南两境，皆接生蕃，而人性劲悍，善凭险阻。西偏保障，有攸赖矣。

临潭城，卫西南七十里，即古洮阳城也。亦谓之鲁城。《沙州记》，犍城东北三百里有鲁城。城临洮水。汉章帝建和三年，羌攻南部都尉于临洮。帝遣马防耿恭救之，诸羌退聚洮阳。即此城也。蜀汉景曜五年，姜维伐魏，侵洮阳。即此。晋惠帝时，尝置洮阳县，属狄道郡，后为群羌所据。宋元嘉四年，洮阳羌叛，西秦乞伏炽磐使其将吉毗招慰之，为羌所败。既而吐谷浑据之。后魏太平真君中，败吐谷浑，置洪和郡，吐谷浑附属焉。太和十五年，吐谷浑王伏连筹辄修洮阳城，魏攻拔之。其后魏乱，遂有其地。后周初，贺兰祥伐吐谷浑，拔其洮阳、洪和二城，置洮阳郡，兼置洮州。隋废郡，州治美相县，以洮阳县并入。唐贞观四年，置临潭县，属旭州。八年，废旭州，以县属洮州。是年，徙州治焉。后没于吐蕃，曰临洮城。宋大观中，仍置洮州。开禧二年，金人以韩侂胄败盟，遣将分道入寇，完颜纲出临潭，亦此城也。元移州于今治，故城遂废。宋白曰：“唐临洮郡城，本名洮阳城。前临洮水，甚险固，即吐谷浑故城云。”今卫城，盖明初所修筑，周九里有奇。

美相城，在卫南，即侯和城也。《水经注》，洮水经洮阳城，又东经共和山南，城在四山中。又东经迷和城北。蜀汉景曜末，姜维侵洮阳，魏邓艾与战于侯和，维败绩。晋咸和中，凉张骏因前赵之乱，收河南之地至于

狄道，置武街、石门、侯和、灑川、甘松五屯护军，与后赵分境。侯和以下，皆在今卫境。又太和二年，苻秦将王猛讨叛羌敛岐于略阳。岐奔白马。猛遣将追之，使别将王抚守侯和。后魏太和十五年，吐谷浑王伏连筹辄修洮阳、泥和二城，置戍。枹罕镇将长孙百年攻拔之，置洪和郡，领水池、蓝川、覃川等县。后周改置美相县，属洮阳郡。按：侯和、迷和、泥和、共和，即一城也，音转耳。隋为洮州治。唐贞观八年，移州治洮阳川。仍置美相县，属洮州。天宝中，并入临潭。水池城，在卫北百六十里。后魏真君四年，伐吐谷浑，置水池郡。寻改为县，属洪和郡。神龟初，河州羌却铁忽反，自称水池王。诏源子恭讨平之。是也。西魏以覃川县省入。后周改县曰覃川。隋初，郡废，县属河州。唐废。卫北又有覃川城，后魏延兴四年置，属洪和郡。西魏废入水池县。

洮源城，在卫南。后周置金城县，并立旭州，又置通义郡治此。隋开皇初，郡废。十八年，改县为美俗。大业初，州废。又改县曰洮源，属临洮郡。唐初，亦置旭州。武德五年，吐谷浑寇洮、旭、叠三州，岷州总管李长卿击破之，是也。贞观八年，州废，县并入临潭。《后周书》，武帝置旭州于河州之鸡鸣防。即此城矣。

广恩城，卫西百六十里。后周置广恩县，并置广恩郡。隋初，郡废，县属洮州。仁寿初，改县曰洮河。大业初，又改洮阳。唐县废，置广恩镇。天宝十三载，陇右节度哥舒翰奏于所开九曲地，置洮阳、浇河二郡。洮阳郡，盖置于此。后没于吐蕃。又卫境有泛潭废县。后周置。隋开皇十一年，改曰临潭，亦属洮州。唐初，废。浇河，见西宁卫。

叠州城，卫南百八十里。历代为羌戎地。后周武成三年，逐诸羌，始置五香郡。寻又置叠州，治叠川县。隋开皇初，郡废。大业初，州废，以县属临洮郡。唐复置叠州，治合川县。天宝初，曰合川郡。乾元初，复曰叠州。《志》云，以群山重叠而名也。后没于吐蕃。合川废县，唐叠州治也。后周置叠州，治叠川县，而于合川县置西强郡。隋开皇初，郡废。唐为州治。又有乐川县，亦后周置，属叠州。隋属洮州。唐初，亦属叠州。贞观五年，又置安伏、和同二县，以处党项。寻俱省入合川县。刘昫云：“合川城，旧

治吐谷浑马牧城。武德三年，移于交戍城云。”

常芬城，在卫南。后周置，又立恒香郡治焉。隋初，郡废，以县属扶州。大业中，属同昌郡。唐武德元年，置芳州于此，兼领恒香、丹领二县。神龙初，废芳州，以常芬县隶叠州，又以恒香、丹领二县省入。后废。宋白曰：“后周武成三年，逐吐谷浑，乃于三交筑城，置甘松防，又为三川县，隶常香郡。建德三年，始改三川为常芬县，置芳州。以地多芳草而名也。”封德城，在卫境。西魏置，又置芳州及深泉郡治焉。隋初，郡废。大业初，州废，县属同昌郡。唐武德初，以县省入常芬。又理定废县，在封德故城西。西魏置。隋初，废入封德县。

甘松城，在卫西南。蜀汉景耀末，姜维败于侯和，退屯沓中。司马昭遣邓艾自狄道趣甘松沓中，以缀姜维。《志》云，甘松本生羌地，张骏置甘松护军于此。乞伏国仁时，置甘松郡。后魏以白水羌朝贡，亦尝置甘松县，以甘松岭为名。今四川松潘卫境之甘松山，是也。《新唐书》，甘松山在洮水之西。吐谷浑居山之阳。

灑川城，在卫南。晋义熙十一年，西秦炽磐攻姚秦洮阳公彭利和于灑川。元熙元年，复遣将攻之，利和奔仇池，因置益州镇灑川，是也。亦谓之南灑。宋元嘉三年，西秦征南将军吉毗镇南灑。陇西人辛澹据城逐之，澹旋奔仇池，磐磐因移置梁州于南灑。亦即此城矣。七年，没于吐谷浑，城废。

西倾山，卫西南二百五十里。此即《禹贡》之西倾也。桓水、洮水皆源此。亦曰彊台山。

东陇山，在卫城东。番人于此耕种。明洪武十二年，洮州十八族番长汪舒朵儿等叛，沐英讨之。贼遁去。筑城于东陇山南川，留兵戍之。疏闻上曰：“洮州为西番门户，城之是扼其喉矣。”命置洮州卫于此。英进讨叛酋，悉破擒之。

玉笋山，在卫北五里。《志》云，山高耸，登眺可见数百里外。

石岭山，在卫北十五里。山势峭拔，草木不生。上有关曰石岭关。又白石山，在卫西九十里。山多白石。《卫志》云，洮州形胜，白石峙其西，黑

石距于东。是也。今卫东有黑石关。

素罗汗山，在州西。《唐书》，武后万岁登封初，王孝杰、娄师德与吐蕃战于此，败绩。黑松岭，在卫东三十里。上多松树。松岭关在其上。

哥龙峪，在卫东北。宋元祐二年，种谊自洮东击鬼章，使岷州蕃将为前锋，由哥龙峪宵济，进至洮州，壁青臧峡，大败鬼章兵，遂克洮州。青臧峡，或云在卫城东。今卫城亦曰青臧城。五牟峪，或云在卫北境。宋熙宁九年，吐蕃鬼章寇五牟峪，败去。即此。又冷地峪，在卫东五十里，与岷州卫分界处也。

洮河，卫南三十五里。源出西倾山。其上源亦曰湟川，东北入岷州卫境，下流合湟水入于大河。南河，在卫城南。源出白石山，亦东北流，入于洮河。

白水江，在卫西南五百里。源出香臧族，东流经废叠州，又东入岷州境。《纪胜》云，西倾山绵亘深远，接番族中，白水江出其阳，即《禹贡》之桓水云。

朵的河，卫西三百里。源出川撒儿朵的族，南流入洮河。又纳怜河，在卫西七百里。源出哈藏族，西北流，入于黄河。野庞河，在卫西。源出西倾山，经西蕃东境，北流五百余里，入黄河。

莫何川，在西倾山北。晋义熙初，吐谷浑为乞伏乾归所败。其王大孩走死，树洛干嗣立，帅众奔莫何川，沙、湟诸戎悉附之。又宋元嘉三年，西秦乞伏炽磐为沮渠蒙逊及赫连昌所败，徙其境内老弱畜产于洮河及莫何仍寒川，是也。仍寒川，或曰在西倾西南。胡氏曰，州境又有莫何山，在西倾东北。

磨环川，在卫西。唐天宝十三载，陇右节度使哥舒翰破吐蕃于临洮西关磨环川，于其地置神策军。宋祁云：“军置于洮州西磨环川也。”《会要》云：“时置洮阳郡于此。又于郡内置神策军，去临洮郡二百里。至德中，沦于吐蕃。”沈括曰：“宋熙宁五年，王厚平河州，又出马兰川，擒木征母弟结吴叱，破洮州。”马兰，即磨环之讹矣。

度周川，旧《志》云，在临洮塞外，龙涸之西。晋隆安二年，乞伏乾归

弟益州败吐谷浑王视黑于此。视黑走保白兰山，遣子为质以请和。白兰山，见西宁卫，又后西番。

长柳川，在卫西南。晋义熙九年，乞伏炽磐击吐谷浑支旁于长柳川，破之。又击破吐谷浑别统掘逵于渴浑川。其地亦在洮州西南。又乞伏乾归破鲜卑于渴浑川，应在今靖远卫界。

泣勤川，在卫南。晋义熙九年，西秦乞伏炽磐遣兵击吐谷浑别部句旁于泣勤川，大破之。又尧杆川，在州西南。晋义熙十三年，炽磐遣其子安乐将军木奕干击吐谷浑树洛干，破其弟阿子干于尧杆川。树洛干走保白兰山。或曰：“川盖洮水支流，随地易名也。”

石岭关，在卫北石岭山上。又松岭关，在卫东黑松岭上。洮州关，在卫西南三十里。又旧桥关，在卫东南四十里。新桥关，在卫西南四十里。诸关俱有官军戍守。

黑石关，在卫东四十里。又卫东四十五里有三岔关，卫东五十里有高楼关。羊撒关，在卫北六十里。又卫北九十里有大岭关，卫北百四十里有八角关，亦俱有官军防守。

沓中戍，在卫西南。姜维与邓艾战于侯和，败绩，退住沓中。既而司马昭侵汉，遣邓艾自狄道趣甘松沓中以缀姜维。艾奉命遣王颀等攻维于沓中。胡氏曰：“沓中在诸羌中，即沙、湟之地。”晋义熙十一年，乞伏炽磐攻后秦湟川，师次沓中。即此地也。

通岷寨，卫东南四十里，宋置。又卫南有甘沟寨。定秦堡，在卫东北，吐蕃所筑。唐大历三年，凤翔帅李晟出大胜关，至临洮，破吐蕃定秦堡，是也。又札龙沟堡，在卫东南百里。明成化十年，栗林等番族常攻此。《志》云，卫东六里有鹤城镇，吐谷浑所置。

纳邻站，在卫西。洪武十二年，洮州十八族番长三副使汪舒朵儿、瘦唎子、阿卜商等叛，据纳邻七站。命沐英讨擒之。即此。

岷州卫，军民指挥使司。东北至巩昌府二百四十里，南至阶州六十里，西至洮州卫百五十里，北至临洮府百五十里。自卫治至布政司一千五百五十里，至江南江宁府四十里，至京师四千一百里。

《禹贡》雍州地。后为西羌所居。秦属陇西郡《一统志》云，为临洮县地。汉、晋因之。西魏始置岷州及同和郡其地名渠株川。《北史》，大统十六年，宕昌国乱，羌酋傍乞铁忽据渠株川。史宁讨平之，因置岷州。隋初，郡废。大业初，州废，以其地属临洮郡。义宁二年，复置岷州。唐因之。天宝初，改曰和政郡。乾元初，复曰岷州，后陷于吐蕃。宋熙宁中，收复，仍置岷州亦曰和政郡。绍兴初，没于金，置祐州。十二年收复，改置西和州徙治长道县之白石镇，即今巩昌府西和县。元复置岷州于此。明洪武十一年，置岷州卫军民指挥使司领千户所四，守御军民千户所一，隶陕西都司。弘治中，改属固原镇嘉靖二十四年，增设岷州。四十年，复故。今仍为岷州卫。卫东连秦、陇，西达河湟，北阻临、巩，南控阶、文。虽僻在一隅，而道路四通，一纵一横未易当也。岂惟形援河、洮，为西偏之翼蔽而已哉？

溢乐城，今卫治。本秦临洮县地。西魏置溢乐县，为岷州及同和郡治。隋改为临洮县。大业初，属临洮郡。义宁二年，复改为溢乐县。唐为州治。宋省入祐川县，其城遂废。明初建卫，因旧基筑城二，东西相连，周九里有奇。《志》云，今卫城即秦时临洮故城。误。

祐川城，在卫东五十里。本西魏溢乐县地。后周置祐川郡，治基城县。隋郡县俱废。唐初，复置基城县，属岷州。又置祐川府，屯兵于此。先天二年，避玄宗讳，改曰祐川。后废。宋崇宁三年，复置祐川县，为岷州治。绍兴中，属西和州。元废。和政城，在卫东八十里。后周置洮城郡，郡寻省。保定初，置和政县。隋初，属岷州。大业初，属临洮郡。唐复属岷州。后没于吐蕃。当夷城，在卫西。后周置县，又置洪和郡于此。郡寻废，以县属同和郡。隋改属岷州。炀帝初，改属临洮郡。唐仍属岷州。神龙初，并入溢乐县。又卫境有博陵城。后周置博陵郡，领博陵、宁人二县。隋初，俱省入当夷县。

宕州城，卫南百二十里。古西羌地。晋末，西羌别种保聚于此，曰宕昌国。宋元嘉初，宕昌王梁弥忽遣子弥黄入贡于魏，寻为仇池所并。九年，杨难当以兄子保宗为镇南将军，镇宕昌，是也。既而羌复有其地。升

明二年，宕昌王梁弥机初立，魏主宏遣使拜为征南大将军、梁益二州牧、河南王。齐永明初，亦拜弥机为河、梁二州刺史。三年，弥机死，国乱，魏拜弥机兄子弥承为宕昌王。六年，齐以弥承为河、凉二州刺史。梁天监四年，魏以宕昌世子梁弥博为宕昌王。既而梁亦以弥博为河、凉二州刺史、宕昌王。大同七年，宕昌王梁企定为下所杀，弟弥定立。大宝初，国乱。西魏遣将宇文贵义宁讨定之。后周保定四年，梁弥定屡寇周边。周将田弘击灭弥定。天和初，置宕州，兼置宕昌郡。隋初，郡废。大业初，复改州为宕昌郡。唐复曰宕州。天宝初，曰怀道郡，郡治怀道县。旧《志》云，怀道县亦后周置，兼置甘松郡于此。隋初，废郡，以县属宕州。唐始移宕州治此。乾元以后，没于吐蕃。宋熙宁六年，王韶拔宕州，通洮山路，吐蕃木令征以岷州降，因置宕昌堡，属岷州。时运蜀茶市马于岷。及金人据洮州，遂并番市于此，岁市马数千。今卫南百二十里有宕昌驿。《一统志》云，宋纲马憩息之所也。

阳宕城，在卫东南百十三里。后周所置，县为宕昌郡治。隋开皇初，郡废。十八年，改为良恭县。大业初，仍为郡治。唐属宕州，后没于吐蕃。大中间，收复，废县为镇。宋建隆三年，以良恭镇并入大潭。熙宁中，复为良恭镇。元废。义和戎城，在卫东南。亦后周置，属宕昌郡。隋属宕州。唐因之，后废入良恭县。阶陵城，在卫东南二百八十里，近巩昌府成县界。《后魏志》，太平真君四年，置阶陵县，属仇池郡。后周并入仓泉县。仓泉，今成县之废上禄县也。

索西城，在卫东北九十里。后汉建初二年，金城陇西羌反于临洮。车骑将军马防讨之。道险，车不得方驾，防设奇破之，索西迷吾等羌降。防乃筑索西城，徙陇西南部都尉戍之，悉复诸亭候。元和三年，迷吾乃退居河北之归义城。《水经注》，洮水自临洮县东北流，过索西城，又北出门峡，又东北径桑城东。《通典》，索西城，一名临洮东城，又名赤城。今桑城，见狄道县。

鞠城，在卫东百里。其地名翅上，亦曰乌翅。盖翅讹为鞠也。蜀汉延熙十二年，姜维出陇西伐魏，因鞠山筑二城，使其将句安等守之。魏雍州

刺史陈泰曰：“城虽固，去蜀险远，当须运粮，虽维来救，山道险远，非行兵之地也。”遂围城，断其运道及城外流水。维来救，不能达，鞠城降于魏。因置戍守于此，为拒蜀要地。后废。

铁城，在卫东北。宋熙宁六年，收复岷州。明年，置铁城堡。元置铁州于此，与岷州并属脱思麻路。后废。明太祖命李文忠讨西番，从洮州铁城取道而出，是也。《一统志》，西和州东十八里有铁城。梅川城，在卫东北三十里。今为梅川寨，兼置递运使于此。又酒店城，在卫东北四十里。今为酒店子寨，并置驿于此。又有颠角城，在卫南百三十五里。亦曰颠角寨。《一统志》，梅川、酒店与颠角为三古城。今俱有官军戍守。又下城，在卫北。宋嘉定十二年，四川帅安丙遣王仕信、宋质俊等伐金，发宕昌及下城。宋质俊自下城克来远镇，是也。来远镇，见巩昌府宁远县。

岷山，在卫城北。山黑无树木，洮水经其下，州以此名。相传禹见长人受黑玉书于此。又城南里许有金通山，山势嵯峨，亦名金童山。

崆峒山，在卫西二十里。《通典》，秦蒙恬筑长城，起于崆峒山。自山傍洮水而东，今州境有古长城云。宋祁曰：“汉武帝逾陇西，登崆峒，盖在此。”误矣。

冷落山，卫东五十里。盛夏阴晦即雨雪，因名。今有冷落山寨，为官军戍守处。又卫东百二十里有遮阳山，以日影为山所蔽也。又贵清山，在卫东百五十里。顶平衍，可耕种。

牛头山，在卫东南。魏收《志》，阶陵县有牛头山。《五代志》，牛头山在成州上禄县界，又东北即鞠山也。姜维伐魏，依鞠山筑城，使将守之。魏陈泰围鞠城。维引兵救之，出牛头山，与泰相对。泰敕诸军各坚垒勿与战，使郭淮转趋牛头，截维还路。淮进军洮水。维惧，退走，鞠城遂降于魏。胡氏曰：“牛头山在洮水南，以形似名。”

普鲁岭，卫东七十五里，为岷巩冲要处。或云，即左要岭也。宋熙河路总管关师古与刘豫兵战败于此，遂以洮岷地降。今有普鲁岭寨，官军屯戍于此。分水岭，在卫南四十五里，下有分水岭河。又摩云岭，在卫东南百五十里，下临白水江。宋有临江寨，初属秦州，熙宁中，改属岷州。寨

盖置于此。望曲谷，在卫西。后汉建初二年，马防破诸羌于临洮。其众皆降，惟封养种豪布桥等屯望曲谷不下。防复击破之。《水经注》，望曲在临洮西南，去龙桑城二百里。龙桑，或即桑城矣。

洮河，在卫城北。自洮州东北流，至此，又北流入临洮府界。叠藏河，在卫城东门外。源出分水岭，下流入于洮河。

荔川河，卫东南九十里。旧有荔川寨，以此为名。东南合于闾井河。闾井河，在卫东南百四十里。源出秦州礼县之没遮拦山，流入马淳河。宋亦置闾川寨于此。马淳河，在卫东南百八十里。合诸川之水，俱东北流入漳县境，合于漳水。又卫东南二百八十里，有良恭河。旧良恭县以此名。其下流入于白水江。

白水江，在卫南百五十里。自洮州流入境，又东北流入西和县境。邓艾屯白水，以拒姜维处也。《三国志》，姜维自牛头引去，邓艾料维且复还，郭淮因留艾屯白水北。又有洮城，去邓艾屯六十里。姜维使廖化军白水南，自引军渡白水，袭洮城。艾觉之，潜军驰据其城。维引还。今洮州城去白水甚远，或卫境更有洮城欤？张舜民的《画墁录》，自岷州趋宕州，沿水而行，稍下，行大山中，入栈路，或百十步复出，略崖险岑，不可乘骑，必步至临江寨。得白江，至阶州，复七八日。其所经，皆使传所不能达也。

石关，在卫东百五十里。或以为前凉张骏所置石门护军，即此关云。茶埠峪寨，在卫东十五里。卫东六十里有永宁堡寨。又东十五里为弄松堡寨。又鸦山寨，在卫东南三十五里。俱官军戍守处也。曹家堡在卫西十五里。又西有中寨、野狐桥、冷地峪三寨。《志》云，野狐桥在卫西四十里。又十五里为冷地峪，卫与洮州接界处也。

木昔寨，在卫西南十里。又西南有胡麻沟、鹿儿坝、柏树植、镇羌、三盆五寨，俱官军戍守处。

栗林寨卫南十五里。又南为陵兀赤、分水岭、哈答川、赏家族、脚力、高楼铺、何家铺、颠角、宕昌、老鼠川凡十寨，卫军戍守于此。水磨沟寨，在卫北五十里。又北二十里有马崖子寨，向俱设官军防守。

床川寨，在卫南。《宋志》，元丰二年，岷州之床川、荔川、闾川寨及通

远军寨，置牧养十监。是也。通远，见巩昌府。

遮阳堡，卫东百二十里。宋熙宁五年置，属岷州卫。七年，改隶巩州。元丰初，复隶岷州，以遮阳山而名。又《宋志》，岷州北有穀藏堡，亦熙宁中置。《一统志》，在西和县西十里。误。西津驿，在卫西四十里，又九十里而至洮州卫。《志》云，卫治西，今有岷山驿。

西固城军民千户所，在卫南四百里。元置汉蕃军民上千户所。明初，改今名，隶岷州卫。城周四里有奇。今仍曰西固城。

沙川，在所西十里。有桥跨其上。又所城北有三眼泉，引流而北，与沙川俱北入于白水江。

化石关，所北九十里。又所西南三十里，有平定关，皆官军戍守处。

卷六一

靖边卫，东南至固原镇四百五十里，西南至临洮府兰州三百五十里，西北由直路至庄浪卫三百里，东北至宁夏中卫二百十五里，南至巩昌府会宁县二百七十里。自卫治至京师三千六百三十里，至布政司一千二百二十里，至京师三千六百三十里。

古西羌地，秦属陇西郡。汉属金城、安定二郡。后汉属金城、武威二郡。晋为凉州徼外地。西魏置会州。后周废。隋为原州地。大业初，属平凉郡。唐初，复置会州。《旧唐书》，武德二年，以平凉郡会宁镇置西会州。九年，突厥寇西会州。是也。贞观中，改为粟州，以足食故也。寻又改为会州。天宝初，曰会宁郡。乾元初，复曰会州。广德后，没于吐蕃。大中间来归，寻复为番、戎所据。宋天圣以后，属于西夏。元符二年，收复，仍置会州。金圯于河，侨治会川城，号新会州。元又迁于巩昌北境。元迁会州治西宁，即今巩昌府会宁县也。明正统二年，复修废城置靖虏卫，领千户所四，俱在卫城内，属陕西都司。弘治九年，改属固原镇。今为靖远卫。

卫面山背河，地势险阻。《九边考》云，靖远去敌最近，北面滨河，遇冬冻合，一望平地千里。寇若从贺兰山后，踏冰驰蹕，势如风雨，未易御

也。沿河置戍，固不可缓，而徐斌水以西，旧边一带，冬防可倚也。要之折冲无术，而从事于补苴，计斯末矣。

会宁废县，今卫治。汉金城郡枝阳县地。晋废。后魏置会宁县，属高平郡。西魏置会州。后周废州，寻并废县。隋开皇十六年，复置会宁县，属原州。大业三年，属平凉郡。七年，分置西突厥部落于此。十三年，西突厥阙度设据会宁川，自称阙可汗，降于李轨，寻为轨所灭。唐武德二年，平李轨，置西会州治焉。寻为会州治，后陷于吐蕃。宋元符中，收复，仍置会州。崇宁三年，置敷文县，为州治。金改为保川县，后徙州治于会川城，县遂废。明复建卫于此。今卫城周六里有奇。

枝阳城，在卫西南。汉县，属金城郡。后汉因之。晋废。前凉张寔复置，属广武郡。隆安二年，西秦乞伏乾归遣其弟益州攻凉枝阳、鹵武、允吾三城，克之。又义熙三年，赫连勃勃击南凉秃发傜檀，至枝阳，大获而还。即此。后魏县废。允吾，见兰州。

祖厉城，在卫西南百三十里。汉县，属安定郡。后汉属武威郡。晋废。前凉张轨复置，仍属武威郡。后魏移县治于平凉县境，属陇东郡。故县久废。乌兰城，在卫南百十里。汉祖厉县地。后周置乌兰县于此。唐武德末，置乌兰县，属会州。后没于吐蕃，县废。刘昫曰：“乌兰，后周所置县也。初置于会宁关东南四里。唐天授二年，移于关东北七里。”

勇士城，在卫西南二百里。汉县，属天水郡。武帝元狩初，置天水属国治此。后汉属汉阳郡。元初二年，庞参等击叛羌兵，至勇士东，为杜季贡所败。晋县废。咸安初，秦苻坚使王统攻陇西鲜卑乞伏司繁于度坚山，司繁降，因置勇士护军于勇士川。使乞伏吐雷抚其众，寻使司繁镇之。其子国仁因苻坚之败，遂叛秦。太元十年，国仁筑勇士城而都之，是也。后魏废。亦曰健土城。颜师古曰：“隋初避太子讳也。”

苑川城，在卫西南。《水经注》，苑川水出勇士县之子城南山，北径牧师苑，故汉牧苑之地也。有东西二苑城。其城相去七里。晋咸和中，陇西鲜卑乞伏述延始居苑川。咸安初，乞伏司繁拒秦将王统于苑川，败，降秦。其后，乞伏国仁据勇士城，苻登封为苑川王。乞伏乾归复自金城迁于

西城，即苑川西城也。既又迁都苑川，盖即苑川东城云。宋元嘉三年，西秦王炽磐侵河西王蒙逊。夏主昌遣将呼卢古乘虚攻其苑川及南安，炽磐引还。后魏神䴥中，城废。

鹑阴城，在卫西。汉县，属安定郡。后汉属武威郡。晋废。宋白曰：“会宁县本鹑阴县地。河水东过勇士县北，东流即鹑阴县。汉顺帝建康初，赵冲追击叛羌于建威鹑阴河，即此。”贤曰：“凉州姑臧县东南有鹑阴县故城，县因水为名。”《续汉书》，建威，本作“武威”。又曹魏黄初二年，凉州卢水胡反。遣张既讨之，胡逆拒既于鹑阴口。胡氏曰：“鹑阴河口也。”或讹为鹑武城。晋隆安二年，西秦将乞伏益州攻凉，克鹑武，即鹑阴矣。后魏始移置县于平凉县境，旧城遂废。麦田城，在卫北。《水经注》，麦田山，在安定西北六百四十里。山东北有麦田城。又北有麦田泉，西南流，注于河。晋咸和四年，乞伏述延见赵亡，惧，自苑川迁于麦田，即此城也。

会川城，卫西南七十里。宋元符二年进筑，赐名会川，属会州。金末，侨置会州于此，谓之新会州。元废。新泉城，在卫西北三百里。唐大足初，郭元振置新泉军。初属朔方，天宝中属河西节度使。后废。《宋志》，会州城南四十里有新泉寨。宋元符初置。盖因旧城以名。金废。

德威城，在卫西。本名清水河。宋政和五年，童贯遣秦凤将刘仲武出会州，至清水河，筑城屯守而还。赐名曰德威城。西去黄河四里。《宋志》，城南二十五里为远罗谷口。政和中，置正川堡于此，隶德威城。

乌兰山，卫南百二十里。上有关。唐置乌兰县，以此山名。或谓之南山。晋义熙三年，秃发傉檀为赫连勃勃所败，自阳武下峡奔南山。胡氏曰：“枝阳之南山也，西连武威、仓松之境。”

度坚山，在卫西。晋时，陇西鲜卑乞伏氏，先自漠北南出，屯高平川，又自高平西南迁麦田山。乞伏司繁又自麦田迁度坚山。咸安初，苻秦使王统攻之。司繁拒统于苑川。统潜袭度坚山，克之。义熙五年，乞伏乾归自苑川徙都度坚山。七年，置秦兴郡治焉。胡氏云：“度坚山，在苑川之西。”

大小松山，在卫北六百里。旧时冠驻牧于此，为庄、凉、兰、靖诸边之患。万历二十六年，抚臣田乐、镇臣达云收复其地。于是，边患始少。雪

山，在卫北百二十里。山势高峻，积雪不消，套寇入犯，往往驻牧于此。又三岔山，在卫北。又有猪肝岔，在卫东北大河南岸。成化十年，寇从此内犯。

阳武下峡，在卫东北。晋隆安初，后凉吕光攻乞伏乾归于西城。遣其将梁恭等出阳武下峡，与后秦秦州刺史没奕干攻其东，不克。义熙三年，赫连勃勃击南凉，入枝阳，驱掠而还。秃发傉檀引兵追之，勃勃于阳武下峡凿凌埋车以塞路，逆击傉檀，大破之。胡氏曰：“阳武下峡，在高平西，河水所经也。”

黄河，在卫北五里。自兰州东北流，至卫境，过祖厉故城西，又经卫北，入宁夏中卫界。其间山峡险隘，垂流直下，高数十丈。又卫城北有黄河堰。唐刺史安敬忠筑此以捍河流。卫西南又有北卜渡。《元志》，自兰州而东，过北卜渡至鸣沙河，过应理州，正东行，至宁夏路。鸣沙河，即宁夏卫鸣沙山南黄河也。

祖厉河，在城东。又北注于河。其水苦恶，不可食。《水经注》，水出祖厉南山，北流经祖厉县，又北注于河。汉元鼎五年，幸雍，遂逾陇，登崆峒，西临祖厉河而还，是也。《唐史》，祖厉城西有河池，因雨生盐。《卫志》，城中无清泉，祖厉水复咸苦，汲者必涉祖厉而后达于河，取以供日用。遇雨潦，即涨溢不可渡。乃量工命役，截其上流。去卫五里地有江嘴，决而导之，使北入河。于是，故道堙平，往来便易。又亥刺河，在卫北，西流注于河。明初，边将陈德奏捷于此。

渴浑川，在废勇士县东北。晋太元十二年，乞伏国仁袭鲜卑三部于六泉。鲜卑没奕干等连兵来袭勇士，遇战于渴浑川。没奕干等大败，三部皆降于国仁。六泉，今见平凉府镇原县。

三不刺川，在卫北境。其西为五郎口。明初，孙兴祖战死于此。裴家川，在卫北黄河外。其地便于屯营，为戍守之要。隆庆六年，设永安营于此，东接宁夏中卫界。今详见中卫。

大沙沟，在卫北黄河外。嘉靖中，边臣李承勋言：“宁夏自镇远关至大沙沟，旧有台堡相接，以断北寇西行之路。”是也。又芦塘，亦在卫东北

黄河外，亦曰芦沟，宁夏、固原边接境处也。今有芦塘营。

会宁关，卫西南百三十里。旧名颠耳关。宋元符初进筑，赐名通会，寻改曰会宁关。金改为会安关。南至巩昌府安定县一百里。乌兰关，在卫南乌兰山上。《唐志》乌兰县西南有乌兰关，是也。

永安营，在卫北裴家川。又芦塘营，在卫东北芦塘上。俱卫境要地，设官军戍守于此。通安寨，在废会川县东六十里。宋崇宁五年置，属西安州。金仍曰通安寨，改属会州。元废。又有同安堡，在通安西三十里，亦宋置。金废。

怀戎堡，卫东六十里。宋崇宁二年置。《宋志》，堡北至柔狼山界堠四十里，与夏国西寿监军对境。繇枯寨谷至柔狼山，地皆险阻。又有水泉堡，在怀戎堡西二十里。静胜堡，在卫西南百八十里。《宋志》，政和六年，赐清水河新城曰静胜堡。其城在黄河南石嘴上，与河北夏国卓罗监军地分相对。又有通泉堡，在卫西南八十里黄河南岭上。亦宋置。金废。

迭烈孙堡，卫北九十里。西夏所置。元因之。明初，元将贺宗哲攻凤翔，不克，自固原之六盘山遁去。明师追之，复由迭烈孙渡河遁。后设巡司于此。每岁冬，增兵戍守。

打刺赤堡，在卫东七十里。其地本名乱麻川。天顺中满四据石城作乱，官军讨之，分道出此。又东五十里为乾盐川堡，接固原州西安所界。为北骑入寇之径道，向皆设兵戍守。又平滩堡，在卫西九十里。又西九十里，即兰州金县之一条城也，为往来之要道。《志》云，卫西四十里曰虎豹口，卫境要口也，向设官军戍守。

乌兰桥，在卫西南百里。《唐志》，在乌兰关外黄河上。其地亦名乌兰津。西魏大统初，渭州刺史可朱浑道元，帅所部西北渡乌兰桥，抵灵州。因灵州刺史曹泥资送至云州，降于高欢。唐贞元十六年，灵州兵破吐蕃于此。元和八年，吐蕃作乌兰桥，又筑月城守之。先是，吐蕃欲作桥，每先贮材于河侧。朔方常潜遣人投之于河，终不能成。至是，朔方帅王佖贪，吐蕃先厚赂之，遂并力成桥。自是朔方御寇不暇。

卷六二

甘肃镇，东至临洮府兰州黄河一千一百七十五里，南至西宁镇黄河一千五百七十五里，西至肃州卫嘉峪关五百七十里。北至亦集乃地一千五百里。自镇治至布政司二千六百四十五里，至京师五千四百里。

《禹贡》雍州地。自汉以前，为月氏国地，后为匈奴所据。《汉纪》，月支故居敦煌、祁连间，为强国。匈奴冒顿破月氏，使昆邪王居之。武帝太和元年，始开置张掖等郡，以断匈奴右臂。昭帝以后与酒泉、武威、敦煌、金城并称河西五郡。后汉因之。魏、晋仍为张掖等郡。永嘉以后，为张寔所据，称前凉。吕光继之，为后凉。沮渠蒙逊都张掖，称北凉。后魏以其地属凉州。西魏又置西凉州，寻改为甘州。后周复置张掖郡。隋初郡废。炀帝又改甘州为张掖郡。唐初为李轨所据。武德二年，复置甘州。天宝初亦曰张掖郡，寻没于吐蕃。大中间始复内属。寻又没于羌戎。宋天圣以后为西夏所据。蒙古得其地，仍置甘州。至元初。置甘肃路总管府。八年，改甘州路总管府。十八年。置甘肃等处行中书省治此，以控河西诸郡。洪武二十四年，置甘肃等卫。二十六年，置陕西行都指挥使司，领卫十二，守御千户所三。今为甘肃镇。

镇河山襟带，扼束羌、戎。汉武开河西，遏绝羌与匈奴相通之路，使不能解仇合约，为中国患。刘歆言：“武帝西伐大宛，并三十六国，结乌孙，起敦煌、酒泉、张掖，以隔婼羌，裂匈奴之右臂。”歆又云：“孝武表河曲，列四郡，开玉门，通西域，以断匈奴右臂，隔绝南羌、月氏。单于失援，由是远遁，而幕南无王庭。”盖其地跨越边塞，保险阻，定畜牧，自古称凉州之畜，为天下饶也。《汉书志》，自武威以西，本匈奴浑邪、休屠王地。武帝时攘之，初置四郡，隔绝南羌、匈奴。地广民稀，水草宜畜牧。故凉州之畜，为天下饶。保边塞二千石治之，咸以兵马为辅。昭帝时，益置金城郡，所谓河西五郡也。天下多事，群雄恒睥睨于此。更始初，窦融私谓其兄弟

曰：“天下安危未可知。河西殷富，带河为固，张掖属国，精兵万骑，一旦缓急，杜绝河津，足以自守。此遗种处也。”乃求为张掖属国都尉，卒保有五郡，挈以归汉。晋永康二年，张轨以天下方乱，阴有保据河西之志，乃出为凉州刺史。盖祖窋融故智也。遂世有凉土，保境息民，复以兵威慑服西域，雄长一隅几七十年。太元初，苻秦并凉，使梁熙为刺史。十年，关中乱，熙亦图据凉州，会吕光平西域，引兵还至宜禾，时光未至敦煌之宜禾县，当是火州之伊吾谷。高昌太守杨翰言于熙曰：“吕光新破西域，兵强气锐。闻中原丧乱，必有异图。河西地方万里，带甲十万，足以自保。若光出流沙，其势难敌。高梧谷口，见后火州，险阻之要，宜先守之而夺其水，可以坐制。如以为远，伊吾关亦可拒也见哈密卫。度此二阨，虽有子房之策，无所施矣。”熙不从，光遂据凉州。后十余年秃发、沮渠以及李暠之徒，后先角立，分裂其地，亦皆一再传而后亡。岂非以山川阨塞，负隅易固哉？北魏主焘平统万及秦、凉，以河西水草丰美，用为牧地，蓄甚蕃息，马至二百余万匹，橐驼半之，牛羊无数。隋之末也，李轨窃有其地。唐武德二年，克平之，渐有事于西域。昔人言：欲保秦、陇，必固河西；欲固河西，必斥西域。汉人由此，而羌、戎宾服者二百余年。光武以中土初定，未遑外略，闭玉门，谢贡献。明帝时复通西域，耿秉所谓“破伊吾折匈奴左角者”也。班氏父子世修其职，厥功炳焉。于是敦煌以东，风尘无警。唐初，得河西地。贞观中地益拓，置四镇。咸亨初为吐蕃所陷。长寿元年，复收四镇。议者请废之，崔融曰：“太宗践汉旧迹，并南山，抵葱岭，割裂府镇，烟火相望，吐蕃不敢内侮。高宗时，弃四镇不能有，而吐蕃遂张入焉耆之西。今若又弃之，使彼得四镇，必临西域。西域震，则威憺南羌。南羌连衡，河西必危矣。”乃复守四镇。《唐书·吐蕃传》，初，太宗平薛仁果，得陇上地；擒李轨得凉州；破吐谷浑、高昌开四镇。玄宗继收黄河、碛石、“宛秀等军，中国无斥候警者，几四十年。轮台、伊吾屯田，禾菽弥望。开远门揭候书曰“西极道九千九百里”，示戍人无万里行也。自乾元以后，河西军镇多为吐蕃所陷，而安西、北庭犹为唐守。贞元中，始陷于吐蕃。自是陇坂以西，皆为异境，畿辅震惊，烽火时至。盖河西，强兵足食之本也。”武后

时，陈子昂言：“凉州岁食六万斛，甘州所积四十万斛。观其山川，诚河西咽喉。地广粟多，户止三千，胜兵者少，屯田广野，仓庾丰衍，瓜、肃以西，皆仰其。解旬不往，士已枵饥。是河西之命，系于甘州矣。且其四十余屯，水泉良沃，不待天时，岁取二十万斛。但人力寡乏，未尽垦发。今甘州积粟万计，兵少不足以制贼。若吐蕃大入，则河西何以守？宜益屯兵，外得以防盗，内得以营农。”其后吐蕃入寇，终后世为边患。又《徐邈传》：“邈为凉州刺史，修武威、张掖、酒泉盐池，以收敌谷。又开广水田，以足边储。”宋时，河西没于夏，夏以富强。元置行省于甘肃，而西域诸国悉为附庸。明初，冯胜出兰州、略甘肃，先破元兵于别力笃山，取西凉、至永昌、下甘州。又败元兵于虎刺罕口，进拔肃州。又进至扫林山，取亦集乃路，次别驾山，抵瓜、沙州，分布戍守，扼塞关隘而还。永乐二年，建哈密等卫，领袖诸番，藩篱内地。成化以后，哈密为土鲁番残破。嘉靖中，徙其部落于肃州近境，而弃其地于吐鲁番。自是西域隔绝，嘉峪以西，声教不至矣。又西海左右，复巢逋逃；甘凉之间，孔道侵多；庄浪以东，咽喉易梗。论者为羌戎异类，联络犹难。今者南北同种，声息易达，狃狃然伺我四郊，非吾利也。尝考河西水草丰饶，训兵足赋，于屯牧为宜。昔人云：“屯修于甘，四郡半给；屯修于甘凉，四郡粗给；屯修于四郡，则内地称甦矣。夫耕屯之政，罔牧之设，旧章具在，后皆因之，可勿讲欤？诚安恃欤？”

甘州左卫，附郭。本匈奴昆邪王地。汉置张掖郡，取张国臂掖之义。后汉因之。晋仍为张掖郡。西魏置甘州，取州东甘浚山为名。隋、唐因之，亦曰张掖郡。宋时，西夏改为镇夷郡，寻曰宣化府。元初，仍曰甘州。至元初，改为甘肃路。八年，曰甘州路，寻置行中书省于此。明洪武二十四年，置甘肃卫。二十九年，分置甘州五卫，此为左卫。今卫城周十二里有奇，门四。

甘州右卫，(附郭。)建置同上。今仍设左右二卫。

甘州中卫，(附郭。)建置同上。

甘州前卫，(附郭。)建置同上。

甘州后卫，(附郭。)建置同上。

张掖废县，即今镇治。汉为麟得县，张掖郡治焉。应劭曰：“麟得，匈奴王号也。”后汉仍为郡治。晋改曰永平县。后魏因之。后周为张掖郡治。隋大业初，改为张掖县。唐因之，州郡皆治此。元省。刘昫曰：“后魏置张掖军，孝文改为张掖郡及县。”又《通典》云，张掖县西北有汉张掖郡故城。

屋兰城，在镇东北。汉置县，属张掖郡。元凤三年，匈奴犯屋兰，败去。后汉仍属张掖郡。晋因之。后废。又昭武城，在镇西北。汉县，属张掖郡。后汉因之。晋讳昭，改曰临泽，仍属张掖郡。后废。

氏池城，在镇东。汉县，属张掖郡。后汉因之。晋省。隆安五年，沮渠蒙逊自西安举兵，袭段业。至氏池，众逾一万。进逼候坞，业军皆溃，是也。旧《志》，候坞在氏池西，去张掖百里。西安城，在镇东。后凉吕光置西安郡。晋隆安二年，段业取西安，因城其地。五年，沮渠蒙逊求为西安太守，因举兵击业而代之。又宋元嘉三年，乞伏炽磐遣太子暮末伐河西王蒙逊，攻西安不克，又攻番禾是也。后魏废。

候官城，在镇北。《后汉志》，武帝置属国都尉，以主蛮夷降者。后汉安帝时，张掖属国别领五城。五城，候、左骑、千人、司马官、千人官也。”晋废。

祁连城，在镇西北百九十里。《晋志》，永兴中，前凉张祚置汉阳县，以守牧地。张玄靓改为祁连郡。吕光因之。后废。唐开元十六年，吐蕃寇甘州。凉州将杜宾客破吐蕃于祁连城下，即故城也。胡氏曰：“城在祁连山旁。”

临松城，在镇东南。《晋志》，前凉张天锡别置临松郡。太元中，吕光置中田护军，镇临松。隆安五年，南凉秃发利鹿孤遣将袭沮渠蒙逊于张掖，至万岁、临松。义熙五年，秃发傉檀遣军伐蒙逊，掠临松千余户。蒙逊因掠南凉之显美以报之。宋元嘉二年，西秦乞伏炽磐遣兵袭破临松，徙其民五千余户于枹罕。十七年，魏拔姑臧。沮渠无讳起自晋昌，复拔酒泉，围张掖，不克，退保临松。后魏亦为临松郡，领安平、和平二县。寻改郡为临松县，以二县并入。后周复省入张掖县。《五代志》，后魏临松县有

临松山。显美，见凉州卫。

建康城，镇西二百里。前凉张骏置建康郡，属凉州。后梁因之。后魏废。唐嗣圣末，王孝杰置建康军。天宝初，属河西节度使，后废于吐蕃。《名胜志》，高台所西南四十里，有故建康城。

蓼泉城，在故建康城西百二十里。晋义熙十三年，沮渠蒙逊遣张掖太守沮渠广宗诈降，以诱西凉李歆。歆发兵应之。蒙逊将兵三万，伏于蓼泉。歆觉之，引兵还。蒙逊追破之于鲜支涧，城建康，置戍而还。宋永初二年，歆东袭蒙逊，大败于怀城。勒兵复战于蓼泉，为蒙逊所杀。唐置守捉城于此。《新唐书》，祁连山北有建康军，军西百二十里有蓼泉守捉城。

弱水城，在镇西南三百里。西秦乞伏炽磐遣兵破吐谷浑觅地于弱水南，觅地降，置弱水护军是也。或云，在西宁卫境。

居延城，在镇西北千二百里。汉县，属张掖郡，郡都尉治此。元狩初，又置属国都尉治焉。其东北有居延泽，亦曰居延海。古文以为流沙。太初三年，使路博德筑遮罗障于居延泽上，是也。《汉书·武帝纪》，元狩二年夏，霍去病、公孙敖出北地二千余里，过居延。太和三年夏，路博德筑居延。天汉二年夏，诏李陵出遮罗障。陵将兵出居延北千余里。《后汉书》注，郡都尉治居延。永平十六年，耿秉等出张掖居延塞，击北匈奴。安帝时，改置张掖居延属国，别领居延一城。献帝兴平二年，武威太守张雅奏立为西海郡。晋因之，仍领居延一县。后废。后魏正光二年，柔然国乱，其王阿那瑰、婆罗门相继来降。凉州刺史袁翻请并存之，分统其民，修西海故城，以处婆罗门。且曰：“西海在酒泉北，去高车所居金山千余里，实北寇往来之冲要。土地沃衍，大宜耕稼。其北即邻大磧，野兽所聚也。”魏主从之。所谓西海，即居延矣。《括地志》，汉居延故城，在今张掖县东北千五百三十里。有遮罗障。《通典》，居延城亦曰居延塞。王应麟曰：“颜师古谓居延盖匈奴中地名，张掖所置县，以安处所获居延之人而名。”其说非也。河西之未入汉也。霍去病欲攻小月氏，则先望居延而济，乃至天山。李陵欲涉单于庭，必先自居延北出，乃至浚稽。则知居延之出匈奴，乃其要路也。汉既全得月支之地，立为四郡，则居延又为酒泉要路。故筑塞其上，

以扼其来。名以遮罗，可见其实也。《通典》既于张掖著居延塞，又于酒泉著遮罗障者，甘州之西，即肃州之东，寇之来路，亘乎两州之间。故障塞之设，亦亘两郡。李陵之军，自遮罗障北出，亦望遮罗障南入。可见寇路出入，无不由此也。居延塞，即遮罗障。《元志》，甘州北一千五百里有汉西海郡居延故城，夏人尝立威福军于此。元至元二十三年，立亦集乃路总管府。城东北有大泽，西北俱接沙碛。明初，冯胜拔肃州，进至扫林山，取亦集乃路是也。

受降城，在居延东北，谓之汉受降城。其东近汉五原县界。汉武帝太初元年，遣因杆于将军公孙敖筑塞外受降城。天汉二年，诏李陵出遮罗障。至东浚稽山南龙勒水上，徘徊观望，即无所见，还抵受降城休士。又昭帝元凤初，匈奴遣骑屯受降城以备汉。二年，匈奴复遣骑屯受降城。宣帝甘露三年，呼韩邪单于入朝。既遣归，请留居幕南光禄塞，有急保受降城是也。后魏太平真君九年，伐柔然，至受降城无所见，因积粮于城内，置戍而还。

石城，在居延城北。明正统初，蒙古阿鲁台为脱欢所败死。其部落阿台及朵儿只伯窜据亦集乃路，屡犯甘、凉。诏边帅任礼进剿，破之于石城。复追破之梧桐林，至黑泉而还。别将赵安等又破之于刀力沟，逐出塞千余里，寇众几尽。梧桐林等处，俱在今塞外。

祁连山，在镇西南百里。山甚高广，为河西之镇。亦曰“天山”。

合黎山，在镇西北四十里。《禹贡》，导弱水至于合黎。即此山也。《括地志》，合黎山，亦名兰门山。晋隆安五年，北凉沮渠蒙逊欲图段业，约其兄男成同祭兰门山。又名要涂山。一名羌谷。《广志》云，肃州废会川县东北有合黎山。人祖山，在城东北四十里。其山不毛。又东北五里为人祖山谷口，戍守处也。

甘浚山，在西南八十里。山绵亘甚远。距山丹卫三十里，中有泉，味甘冽，州以是名。一名绀峻山。临松山，在镇南一百里。前凉于此置郡。山岩有神驥足迹，亦谓之马蹄山。《一统志》，马蹄山有临松、青松、丹霞三名。

三木楼山，在镇东北塞外。后汉永平十六年，分遣耿秉、秦彭出张掖居延塞，伐北匈奴。绝幕六百里，击匈奴句林王于三木楼山。建初八年，北匈奴三木楼山部落款五原塞降。盖匈奴保聚处也。

川岩，在镇西南三百五十里。宋永初元年，北凉沮渠蒙逊欲伐西凉，引兵攻西秦浩亶，潜师还屯川岩。西凉李歆因东袭蒙逊，进入都渎涧。蒙逊击之于怀城，大败之。怀城，盖在川岩之北、都渎涧之东。大柳谷，在镇东南百里，与山丹卫接境。曹魏青龙三年，张掖柳谷水溢，宝石负图立于川西，时以为司马氏之讖也。又晋泰始二年，张掖太守焦胜言：氏池县大柳谷口水溢，有玄石之瑞。《隋志》张掖县有大柳谷。

弱水，在镇西。《禹贡》，导弱水至于合黎。《淮南子》，弱水源出穷石山。曾氏曰：“弱水出于穷谷。”《通释》，弱水出吐谷浑界穷石山，自甘州删丹县西至合黎山，与张掖河合。其水力不胜芥，然可以皮船渡。环合黎山，东北入居延泽。居延泽，即古流沙云。晋元熙元年，西秦将乞伏孔子击吐谷浑觅地于弱水南，大破之。觅地降，拜为弱水护军。其地盖在今西宁镇之西塞外。《括地志》，穷石山在删丹西南七里。此盖兰门山。余详见川渎异同。

张掖水，在镇西十里。经合黎山下，弱水入焉。《水经注》，张水历绀峻山南，与张掖河合。一名鲜水，亦谓之合黎水，又名羌谷水。自吐谷浑界流入。《一统志》，张掖河源出摆通川，经祁连山西，出合黎北，流入亦集乃界。河西岸有泉数十处，俱生芦苇，饲秣资焉。

黑水，在镇西十三里。即张掖河之别名。或曰，即张掖河之支流也。从卫西南山谷间流经此，有黑河桥跨其上。其下流仍合于张掖河。明正德九年，火鲁番部长之弟真帖木儿，尝羁寓甘州，谓甘州城南黑河可引灌城，因导叛寇满速儿谋犯边云。

沮渠川，在镇东南。或曰，即卢水也。《北史》，沮渠蒙逊世居张掖临松卢水。即此川矣。后人因谓之沮渠川。唐武德八年，凉州将安修仁破叛胡睦伽陀于沮渠川，是也。蒲离侯水，在镇北塞外。汉本始元年，分道击匈奴。范明友出张掖塞千二百余里，至蒲离侯水，即此。

居延海，在故居延城东北。亦曰居延泽。《志》云，渡张掖河，出合黎峡口，傍河东壩，屈曲行千五百里至居延海。《唐书》，居延海，在宁寇军东北。武后垂拱初，同罗、仆固等部叛，命刘敬同等出居延海讨之，同罗、仆固皆败散。宁寇城，见山丹卫。千金渠，在镇西。《汉志》注，千金渠西至乐涇入泽中，或谓之冻得渠。乐涇，见肃州卫。

阳化渠，在镇南六十里。又南十里，有阳化西渠。又有梨园堡渠，在镇南百里。旧《志》云，卫境之渠以数十计，俱有溉田之利。

赤柳涧，在镇西南三百三十里，与肃州卫分界处。《通典》，赤柳涧，在肃州东南二百里。

赤泉，在废氐池县北。晋义熙二年，秃发傉檀伐沮渠蒙逊。蒙逊婴城固守，傉檀至赤泉而还。又穷泉，在卫东南。晋义熙六年，秃发傉檀伐沮渠蒙逊，战于穷泉，大败而还。

均石戍，在镇东。晋时为张掖西郡分界处。义熙三年，南凉秃发傉檀自姑臧伐沮渠蒙逊。蒙逊与战于均石，大破之，遂克西郡，是也。

人祖山口，在镇东北四十五里。又镇西南七十里，有大小磁窑山，又西南有甘浚山口，俱戍守处。通远山口，在镇南八十里。又南十里为顺七口。又十里为宣政、阳化、和宁诸口。又十里为大慕化、小慕化及洪水等山口。诸口皆通祁连山，设兵戍守。

沙河堡，在镇西八十里。又西有甘浚、高台二堡。又小满堡，在沙河堡南。又东南有黑城堡。已上五堡，属甘州左卫，有官军戍守。

长乐堡，在镇西北。又卫南有大满、顺化二堡。西北有平源堡。俱属右卫官军戍守。镇平堡，在镇东南。又镇南有小慕化堡。西有抚夷堡。西北有平川、胭脂共五堡。向俱属甘州中卫，官兵戍守。

柳树堡，在镇西北。又镇东南有古城、洪水、东乐三堡。向俱属甘州前卫，官兵戍守。《志》云，古城堡在镇东南四十里。又东四十里为东乐城。又东五十里，即山丹卫云。

板桥堡，在镇西北二百里。向属甘州后卫，官兵戍守。嘉靖末，寇尝犯此。督臣王崇古等议移兵于高台所，以便声援，是也。又张钦堡，在镇

西南。嘉靖初，官军败吐鲁番于此。

巩笔驿，在镇西南。唐开元十五年，回纥部酋护输，袭杀河西节度使王君綬于此。仁寿驿，在镇东南十里。又西城驿，在镇西四十里。又西四十里，即沙河堡。又西四十里，即抚夷驿。又西四十里，则高台千户所也。肃州卫，镇西五百十里。西至废瓜州五百二十里，北至废亦集乃路五百里，西南至赤斤蒙古卫界五百里。

汉以前为月氏国地，后为匈奴所据。武帝太初元年，开置酒泉郡刘昫曰：“城下有金泉，其味如酒，因以为名。”后汉及魏、晋因之。西凉李暠迁都于此，后魏亦为酒泉郡。刘昫曰：“后魏初，置酒泉军。太和中，改为郡。”《通典》亦曰，后魏有酒泉郡。今魏收《志》不载也。隋初，郡废，始置肃州。炀帝初，州废，以其地属张掖郡。唐复置肃州。天宝初，亦曰酒泉郡。宋没于西夏。元为肃州路。明初，改为肃州卫。今亦设肃州卫。

卫迫临边徼，通道羌、戎，河山环带，称为要会。《边略》，甘肃边自金城至嘉峪长一千六百余里，西控西域，南迫羌界，北当要冲。而肃州地居绝塞，孤悬天末，尤为控扼之要。明洪武五年，冯胜下河西，虽直抵玉门，而嘉峪以外皆为羁縻地。嘉靖中，割弃哈密，嘉峪益为极边矣。夫弃敦煌而事酒泉，则玉门以外，声势遥隔，此蕃戎所以生心，边备所以日棘也。有远驭之略者，其亦取鉴于汉、唐之成算哉？

酒泉废县，今卫治。汉福禄县地。《通典》曰，县有古长城，汉遮罗障也。隋初，废酒泉郡，置酒泉县，为肃州治。炀帝初，州县俱省。义宁元年，复置酒泉县。唐武德二年，仍为肃州治。后没于吐蕃。今卫城周八里有奇，门三。

福禄城，卫东南五十里。汉县，为酒泉郡治。魏、晋因之。隋亦为福禄县，初属肃州。大业初，属张掖郡。唐改属酒泉郡。刘昫曰：“唐福禄县、汉乐涇县地也。武德二年，于乐涇故城置福禄县。”

乐涇城，在卫东二百五十里。汉县，属酒泉郡。后汉因之。晋仍属酒泉郡。前凉张氏分乐涇属建康郡。隆安初，沮渠蒙逊起兵临松。其从兄男成亦聚众数千屯乐涇，进攻建康，推太守段业为凉州牧，是也。义熙初，

西凉李以张体顺为建康太守，镇乐涇。后周废乐涇入福禄县。

玉门城，在卫西二百里。汉县，属酒泉郡。后汉因之。阡駟曰：“汉罢玉门关屯，徙其人于此，因名。”晋仍属酒泉郡。《五代志》，后魏尝置玉门郡于此。西魏大统十二年，凉州刺史宇文仲和据州叛。瓜州民张保据州城应之。晋昌民吕兴亦据郡应保。宇文泰遣史宁至凉州，保遣州主簿令孤整将兵救仲和。整行及玉门，还击保，先克晋昌，进击瓜州。保奔吐谷浑。所谓玉门，即此城也。《唐志》，河西节度使统玉门军，在酒泉郡西二百里，即汉故县城矣。宋白曰：“县石门周匝山间，径二十里，众流北入延兴海。唐开元十五年，吐蕃陷瓜州，进攻玉门军。五代晋天福三年，高居诲使于阗记，自肃州西渡金河百里，出天门关。又西百里出玉门关，亦即玉门城矣。”

绥弥城，在卫西。汉县，属酒泉郡。后汉改曰安弥。魏、晋因之。晋太元十年，吕光自西域还，凉州刺史梁熙遣其子胤等拒之于酒泉。光遣将彭晃等与胤战于安弥，破擒之。或讹为安珍县。义熙二年，沮渠蒙逊袭李暠于酒泉，至安珍。即安弥也。后魏废。延寿城，在卫西南。后汉置县，属酒泉郡。晋因之，后废。又驛马城，在卫西。晋置县，属酒泉郡。后废。

会水城，在卫东北。汉县，属酒泉郡。阡駟曰：“众水所会，故曰会水。”又县有偃水障，为北部都尉治。东部障，为东部都尉治。后汉因之。晋仍属酒泉郡。后废。

乾齐城，在卫西北。汉县，属酒泉郡。有西部障，西部都尉治。后汉因之。晋改属敦煌郡。后废。沙头城，在卫西二百五十里。汉县，属酒泉郡。后汉因之。晋惠帝分属晋昌郡。隆安四年，北凉酒泉太守王德叛，称沙州刺史。段业使沮渠蒙逊讨之。德奔晋昌。蒙逊追破之于沙头是也。会稽城，在玉门故城西。汉沙头县地。晋惠帝元康五年，分置会稽县，属晋昌郡。西凉李暠因置会稽郡。后魏因之。《五代志》，会稽郡在汉玉门县界。后周废郡，并会稽、新乡、延兴三县地为会稽县。隋开皇中，改为玉门县，以汉玉门县并入焉，属瓜州。唐亦为玉门县，属肃州。贞观中，县废。《通典》，苻坚徙江淮人万余户于敦煌，中州人有田畴不辟者，亦徙七千余户。

西凉武昭王遂以南人置会稽郡，中州人置广夏郡。

凉宁城，在卫东北，后凉所置郡也。晋隆安五年，沮渠蒙逊所部酒泉、凉宁二郡，叛降于西凉。魏收《志》，凉宁郡，领园池、贡泽二县。西魏废。威远城，在卫北。《唐志》，肃州有酒泉、威远二守捉城。又曲尤城，在卫西。卫北又有胭脂城，盖西夏时所置。

威虏城，在卫北百二十里。又有天仓墩、毛目等城，皆近塞，接亦集乃城。《志》云，卫东北有白烟墩等城堡，俱嘉靖间筑。又白城子，在卫东北百二十里。《元志》，在黑水河西。《五边考》，嘉靖末，嘉峪关属部落曰羔刺等族，因哈密失守，徙居肃州之白城山。即白城子矣。

金塔寺城，卫东北六十里，亦曰金佛堡。嘉靖七年，迁哈密种于此。其相近者，又有魏城及魏里城。又钵和寺，亦在卫北。嘉靖中，以钵和寺境外闲地，给哈密种人寄住，是也。

崆峒山，在卫东南六十里。《括地志》，古西戎地。司马迁谓黄帝披山通道，西至崆峒，指此山也。《九州要记》，近崆峒山顶有魏太祖塚。魏太祖，拓跋珪也。嘉峪山，在卫西六十里。山之西麓，即嘉峪关。一名玉石山，一名璧玉山。《穆天子传》，天子巡黑水，至璧玉之山。即此。

昆仑山，在卫西南二百五十里，南与甘州山连。其巔峻极，经夏积雪不消，俗呼雪山。《志》云，山有昆仑之体，因以为名。或曰，即《禹贡》之西戎昆仑也。周穆王西巡，至仑丘，见西王母于此。汉平帝时，金城塞外羌猷鱼盐之地，遂得西王母石室云。或谓之小昆仑。九龙山，在卫南二百里。《通典》，酒泉县有九龙山，是也。又有独登山，《志》云，在废玉门县北。有盐出岩石上，美于海盐。其相近者，又有神雨山。

西侯山，在卫西北塞外。汉本始元年，分道伐匈奴。赵充国出酒泉塞千八百余里，至西侯山，是也。亦作候山。黑山，在卫北。屹立沙漠中，黑水经其下，为北面之形胜。

讨来河，在卫北百里。源出雪山，东流三百里，入于镇夷所之黑河。沙河，在卫东四十里。源亦出雪山。又清水河，在卫北四十里，下流俱会于讨来河。

黑水，在卫西北十五里。自沙漠中南流，经黑山下，又南合于白水。《通典》，即《禹贡》之黑水也。出张掖郡西北境之鸡山，南流至敦煌郡，经三危山云。

白水，在卫西南二十里。源出卫北山谷中，黑水流合焉。又有红水，在卫东南三十里。源亦出卫南山谷中，西流会于白水，入西宁镇之西海。

金河，在卫西。《高居海使于阗记》，从甘州而西，始涉沙碛。又西北行五百里，至肃州，渡金河，西百里出天门关云。唐人有金河戍。

呼蚕水，在卫东，亦名福禄水。《汉志》注，呼蚕水出南羌中，东北至会水入羌谷。羌谷水，即张掖河也。《寰宇记》，呼蚕水，一名潜水。榆树泉，在嘉峪关外。嘉靖中，边臣杨博请建墩台于榆树泉，以厚边防，是也。

嘉峪关，在卫西嘉峪山下。山之西，即关口。明初，收河西地，西抵玉门，北至沙漠，而仍以嘉峪为中外巨防。弘治七年，闭嘉峪关，绝西域贡。八年，甘肃巡抚许进等出嘉峪关，入哈密。吐鲁番遁走。正德十六年，土鲁番大掠嘉峪附近诸裔。自嘉靖以后，吐鲁番侵扰益甚，嘉峪之防日急。隆庆以后，势始衰息。石关儿口，在嘉峪东。又东有新山口，去卫北八、九十里。

文殊山口，在卫西南三十五里。又西南二十余里有硫磺山口。卫东南又相近有寒水石山口、红山口、观音山口，俱卫卒戍守。

土隗口，在卫北塞外。宋大中祥符二年，契丹伐回鹘，破肃州。先是契丹将萧图玉伐回鹘，入甘肃。至是复破肃州，尽俘其民，修土隗口故城以实之。

永宁堡，在卫东。又卫南有永安、永清等堡。卫东南有永定盐池等堡。《志》云，盐池堡，在卫东百三十里。亦曰盐池驿，接镇夷千户所。临水堡，在卫东四十里。亦曰临水驿。又东四十里为河清堡。亦曰河清驿。成化中，罕东番贼尝犯此。又老鹳窠堡，在卫西。嘉靖七年，吐鲁番尝犯此。

土儿坝，在卫西境。又西为沙子坝。正德中，吐鲁番入寇，官军败绩于此。又仙人坝，亦在卫西境，番族所居也。守乐烽，在卫西南三百四十里。宋白曰：“唐肃州与瓜州分界处。”

马庙，在卫东。晋义熙六年，沮渠蒙逊伐西凉，败其世子歆于马庙。盖祭马祖之处，因名。

山丹卫，镇东南百八十里。东至永昌卫百九十里，南至番界二百七十里。

汉张掖郡地。东汉末，属西郡。晋因之。后魏仍属西郡。西魏郡废，县属甘州。大业初，仍属张掖郡。唐属甘州。宋为西夏所据，置甘肃军于此。元为山丹州。明初，改置山丹卫。今亦设山丹卫。

卫密迩张掖，联属诸城，南隔番戎，北控沙漠。甘肃有事，卫其肘腋地也。哽咽为虞，可无意外之防哉！

删丹废县，即今卫治。汉县，属张掖郡。后汉末，改属西郡。晋因之。后魏曰山丹县，仍属西郡。西魏属甘州。大业初，复曰删丹县，仍属张掖郡。唐属甘州。西夏亦为删丹县。元曰山丹州。明初，改州为卫。今卫城周七里有奇。

日勒城，在卫东南。汉县，属张掖郡。元凤三年，匈奴分三队入寇。日勒、屋兰、番和皆败去。《汉志》注，县有泽索谷，郡都尉治此。后汉因之。献帝分置西郡，治日勒县。晋亦为西郡治。《志》云，自姑臧西北出张掖，其间有大岭。度岭而西，西郡当其要岭，谓删丹岭也。隆安二年，后凉段业据建康，使沮渠蒙逊攻克西郡。于是，晋昌、敦煌诸郡皆降。后魏改置永宁县，为西郡治。西魏郡废，又改县曰弱水。后周复省县入山丹。金山废县，在卫东。后周置县，属甘州。寻省。

万岁城，在卫东南。晋置县，属西郡。南凉秃发利鹿孤遣将袭沮渠蒙逊，至万岁、临松。此即万岁城也。后废。宋白曰：“隋炀帝始并万岁县入删丹。”

焉支城，亦在卫东南。后魏置县，属番和郡。因焉支山以名。隋并入番和县。

宁寇城，在卫北。《唐志》，渡张掖河西北行，出合黎山峡口，傍河东疇，屈曲东北行千里，有宁寇军。初曰同城守捉，属删丹县。武后初，同罗、仆固等部叛。刘敬同讨破之于居延海，敕侨置安北都护府于同城，以纳降

者，即守捉城也。天宝二年，改为宁寇军。《通典》，张掖郡北界傍张掖河，屈曲过同城镇，至峡口烽，总三千七十八里。又宁寇军东北，即居延海云。胡氏曰：“宁寇军，在凉州东北千余里。”

焉支山，卫东南百二十里。旧《志》云，在番禾县界。汉元狩二年，霍去病击匈奴，过燕支山千余里。匈奴既失此山，歌曰：“失我燕支山，使我妇女无颜色。”是也。隋大业五年，炀帝伐吐谷浑，还出张掖，至燕支山。高昌、伊吾及西域二十七国皆谒于道左。唐哥舒翰尝建神祠于山麓。《西河旧事》云，焉支山，东西百余里，南北二十里。上有松柏五木，水草茂美，宜畜牧，与祁连山同。一名删丹山，亦曰删丹岭，又名丹岭。余见凉州卫洪池岭。

甘浚山卫西北三十里，连亘于甘州境内。中有三石洞，下有泉。又红寺山，在卫北二十里。其山土色多红。《志》云，卫城北三里有花门山。

葱谷，在卫东。晋隆安初，沮渠蒙逊据金山。吕光遣子纂败之于葱谷。胡氏曰：“葱谷，在删丹县境内。”是也。

南草湖，在卫城南，周回九里。又西草湖，在城西十里，周回七里，与南草湖水皆可灌田。

红盐池，在卫北五百里，池产红盐。又居延泽旁亦有池，产白盐，采之不竭。

红寺山口，卫北二十五里。《志》云，卫南百余里有静宁山、和宁山、无虞山、宁番山等四口。石峡口，在卫东八十里。两峰相对，下有石井。今石峡口堡及石峡口驿，俱置于此。又东四十里，即永昌卫之水泉儿驿。

新河堡，卫东四十里。正德中，边将张鹏等败寇于新河北山坡，即此。又东四十里，即石峡口堡也。永兴堡，在卫东南。又东南有暖泉、大黄山等堡。卫西南又有洪水山、洪水店等堡。

靖安堡，在卫西。成化中，寇尝犯此。官兵御却之。又宁远堡，在卫东二百里。本属永昌卫。隆庆中，改今属。卫境口堡，向俱设军戍守。

赤亭，在卫西北。唐开元八年，突厥将噶欲破拔悉密于北庭，还出赤亭，掠凉州羊马。唐兵邀之于删丹，为所败。《唐志》，删丹县有赤亭。

永昌卫，在镇东南三百十里。东至凉州卫百五十里，西至山丹卫一百九十里。

汉张掖、武威二郡地。后汉及魏晋因之。后魏置番和郡。后周改置番和镇。隋属凉州。大业中，属张掖郡。唐仍属凉州。宋初，为西凉府地时为西番所据，羁属于宋。景德中，没于西夏。元初，仍属西凉府。至元十五年，置永昌路以永昌王宫殿所在而名。明初，改置永昌卫卫城周七里有奇，门四。今因之。

卫唇齿姑臧，形援张掖，襟山带水，战守有资，河西一线，卫其东西孔道也。

番禾城，在卫西。汉置番禾县，属张掖郡，农都尉治此。后汉曰番和县。晋仍曰番和，改属武威郡。后凉吕光置番禾郡。后魏因之，亦曰番和郡。西魏末，突厥假道番和袭吐谷浑。隋曰番和县，属凉州。唐复曰番禾，仍属凉州。天宝三载，以山出醴泉，改为天宝县。后废于吐蕃。彰县城，亦在卫西。魏收《志》，番和郡，领彰县及焉支县。《隋志》，开皇中并力乾、安宁、广城、彰、焉支五县入番和县。

鸾鸟城，在卫西南。汉置鸾鸟县，属武威郡。后汉因之。建光初，护羌校尉马贤，自金城、令居追叛羌于鸾鸟。又永康初，段□击破西羌于鸾鸟，是也。晋县废。唐以其地置神鸟、嘉麟二县，属凉州。后没于吐蕃，县废。刘昫曰：“鸾鸟，读曰鹳雀。唐置嘉麟县。此鸾鸟故城。其神鸟县，则鸾鸟县地也。”

金山，在卫北二里。晋隆安初，沮渠蒙逊攻后凉临松郡，拔之，屯据金山。又义熙十三年，沮渠蒙逊遣其将袭乌啼部，大破之。乌啼，盖在金山之西。旧《志》，山本属山丹。《魏氏春秋》云：“删丹县金山玄川溢。”《五代志》张掖郡删丹县有金山。山盖亘于番和、山丹两县间也。

青松山，卫南八十里。一名大黄山，一名瑞兽山。一山而连跨数处。又鸾鸟山，在卫西南。汉县以此名。群山连亘，与青松、白岭诸山皆相接。白岭山，在卫西南。山顶冬夏积雪，望之皓然，寒气异于他处，鸟飞不下。其东与凉州南山相连，亦名雪山。

水磨川，卫西南二十里。一名云川。源出鸾鸟山之平羌脑儿都山口。水势汹激，能转水磨，因名。今城东有三岔河流合焉。又考水河，在卫西南六十里。东北流，入于水磨川。蹇上口渠，在卫东二十里。源出雪山，经蹇占山口，下流合水磨川，分为九渠。卫境之田借以灌溉。

恩宿川，在卫西。晋太元初，苻秦将苟苌等伐凉，至河西。遣别将马暉等西出恩宿，邀张天锡走路，期会姑臧。暉等行泽中，值水失期处也。暖泉，在卫西南三十五里。二穴涌出，四时尝温，东北流入水磨川。《通志》，卫东北有白盐池、青盐池。

水磨川关，在卫西二十里。又卫西有白石崖山。卫西南有平羌山、脑儿都山、鸾鸟山。卫南有一棵树山。卫东南有土鲁干山、长城山，凡七口。向俱设卫卒戍守。

乐善堡，在卫东。又真宁堡，在卫东二十里。真宁驿亦置于此。又东二十里，即凉州卫之沙河堡。

水磨川堡，在卫西四十里。又西五十里为水泉儿堡，有水泉儿驿，接山丹卫界。又高古堡，在卫西八十里。天启中，设守备驻守于此。又有永宁堡，在卫西北六十里。其相近又有官家堡、卫境口堡，俱官军戍守处。

苕藿戍，在卫西。旧《志》云，在汉张掖郡番禾县界。晋隆安初，后凉三河大守沮渠鞠粥以吕光猜忌，谓其兄罗仇曰：“若勒兵向西平，出苕藿，奋臂一呼，凉州不足定也。”义熙七年，南凉秃发傜檀自乐都伐北凉，五道俱进，至番和苕藿，掠五千余户而还。九年，沮渠蒙逊自姑臧西如苕藿，遣兵袭卑和等部，是也。

凉州卫，在镇东南五百里。东至靖远卫六百里，东南至临洮府兰州六百三十里，南至西宁镇三百六十里，北至镇番卫百九十里。

周时为狄地。汉初，为匈奴休屠王地。《通典》，秦兴匈奴既失甘泉，使休屠浑邪王居此。刘昫曰：“秦时月支戎所据也。”武帝太初四年，匈奴休屠王降，置武威郡。后汉因之。魏、晋时，凉州并理于此。前凉张轨、后凉吕光，皆据其地。吕光改武威太守为凉都尹。北凉沮渠蒙逊亦尝迁都于此。后魏亦曰武威郡，兼置凉州。隋初，郡废，州存。炀帝初，复改州为郡。

唐初，为李轨所据。武德二年，复置凉州景云初，置河西节度治于此。开元中，又置赤水军于城内。天宝初，曰武威郡。广德初，没于吐蕃。咸通四年，收复。旋又荒弃。后唐长兴四年，复来属，置归义军于此。周显德中，凉州复绝于中国。宋初，为西凉府西番所据也。寻没于西夏。元初，仍曰西凉府，寻改西凉州，属永昌路。明初，改置凉州卫，今因之。

卫山川险阨，土田沃饶。自汉开河西，姑臧常为都会。魏晋建置州镇。张轨以后，恒以一隅之地，争逐于群雄间。魏太武焘灭北凉，敕太子晃曰：“姑臧城东西二门外，涌泉合于城北。其大如河，自余沟渠流入漠中，其间乃无燥地。”《五代史》：“唐之盛时，河西、陇右三十三州，凉州最大。土沃物繁而人富乐。其地宜马。唐置八监，牧马三十万匹。汉班固所称凉州之畜为天下饶，是也。”西夏得凉州，故能以其物力侵扰关中，大为宋患。然则凉州不特河西之根本，实秦陇之襟要矣。

姑臧废县，今卫治。汉置县，为武威郡治。晋因之，又为凉州治。张轨、吕光并都于此。后魏武威郡治林中县。或曰即故姑臧也。西魏仍曰姑臧。隋、唐皆因之。宋没于西夏。元废。《西河旧事》，姑臧城，秦月氏戎所据。匈奴谓之盖臧城，语讹为姑臧也。王隐的《晋书》，凉州城有龙形，一名卧龙城，南北七里，东西二里，本匈奴所筑。张氏居之，又增筑四城箱，各千步，并旧城为五。《张骏传》，骏于姑臧城南筑五殿。四面各依方色，四时递居之。其中又起谦光殿。宫门南曰端门，东曰青角门，中城之门曰广夏门，北曰洪范门，南曰凉风门，东曰青阳门。又东城亦曰讲武城，北城亦曰玄武圃。太元初，苻秦灭凉，改谦光堂曰宣德。十年，吕光据有姑臧，复曰谦光。隆安初，郭麐作乱，以二苑之众，烧洪范门，不克，据东苑以叛。三年，吕纂作乱，帅壮士逾北城，攻广夏门。其弟弘率东苑之众，斧洪范门。吕绍将齐从守融明观拒之，不克。纂入自青角门，升谦光殿。绍登紫阁自杀。四年，弘复以东苑之兵作乱，败死。又是年纂袭北凉，围张掖。南凉秃发傉檀闻之，乘虚袭姑臧。纂弟伟凭北城自固。傉檀置酒朱明门，大飨将士，耀兵青阳门，掠八千余户而去。五年，后秦将姚硕德伐凉，取姑臧。义熙二年，后秦主兴以姑臧授秃发傉檀。征凉州刺史王尚还长

安。僂檀逼遣尚。尚出自青阳门。僂檀入自凉风门，大燕群臣于宣德堂。盖姚秦复改谦光曰宣德也。四年，姚兴遣子弼等袭姑臧，不克。弼退据西苑。兴复遣姚显等继进。显至，遣善射者孟钦等挑战于凉风门。僂檀遣将斩之，乃还。六年，姑臧入于沮渠蒙逊。八年，蒙逊自张掖徙姑臧。宋元嘉十六年，北凉为后魏所灭。《敦煌杂录》，姑臧城内有沮渠蒙逊所造七级木浮图，因名七级城。又檀道鸾筑土为城，若盘龙状，四隅有头尾两翅，一名鸟城也。《新唐书》，武威大城之中，小城有七。旧城匈奴所筑。张氏增筑四城。余二城，又后人所筑也。其东、西箱城，亦曰东、西苑城。至德二载，河西兵马使盖庭伦与武威九姓商胡安门物等作乱，杀节度使周泌。武威七城，胡据其五。度支判官崔称等以二城坚守，讨平之。广德初，为吐蕃所陷。咸通四年，沙州防御使张义潮收复凉州。寻为西番所据。后唐长兴四年，凉州内附。周显德二年，复没于西番。宋初，亦为羈属地。至道二年，丁惟清知西凉府，言凉州周回二千里，东界原州，南界雪山、吐谷浑、兰州，西界甘州，北界吐蕃，州城周四十五里。又有融明观，亦前凉所建，在广夏门内，是也。夏人仍为西凉府治。元为西凉州治。《志》云，今卫城周十一里有奇，门四。东北二里，又有姑臧旧城遗址。

武威城，在卫西北。汉县，属武威郡。后汉因之。晋省入姑臧。

休屠城，在卫东北。汉县，属武威郡。因故休屠王城以名。《汉志》注，县有熊水障，武威都尉治。又北部都尉治休屠城。太初三年，伐大宛，置居延、休屠，屯兵以卫酒泉，是也。后汉仍属武威郡。晋县废。隆安初，后凉张捷等招集戎夏三千人，反于休屠，以应郭麐，即此。《水经注》，姑臧城西有马城。东城，即汉休屠故县。

显美城，在卫西北。汉县，属张掖郡。后汉改属武威。三国魏黄初二年，凉州刺史张既击卢水叛胡于显美，破平之。晋仍属武威郡。隆安五年，南凉秃发僂檀攻后凉昌松太守孟祜于显美，即此。后周废入姑臧县。宜盛城，在卫西。魏收《志》，凉州武安郡领宜盛一县。《隋志》注，后魏置武安郡，治襄武县。并西魏废。

武兴城，在卫西北。晋永宁中张轨以秦、雍移人置武兴郡。魏收《志》，

武兴郡领晏然、马城、休屠三县。王莽时，改休屠为晏然。张轨盖析休屠置晏然、马城二县也。晋隆安三年，后秦姚硕德攻后凉吕隆于姑臧，以降将姜纪为武威太守，屯据晏然，即武兴矣。西魏时，郡县俱废。唐武德八年，凉州叛寇陆伽伦寇武兴，即故城也。

石头城，在卫东。晋大宁初，刘曜军河上，声言攻凉州。张茂屯石头以拒之。胡氏曰：“石头在姑臧城东。”《志》云，卫西南八十五里有石头山。清塞城，在卫东南。晋太元初，苻秦将梁熙、苟萇等伐凉。凉将马建退屯清塞。既而萇等败凉，常据兵于洪池，遂入清塞。清塞，盖与洪池岭相近。又金昌城，在卫南。晋太元初，秦将苟萇等入清塞，败凉兵于赤岸。张天锡自金昌城出战，败还姑臧。胡氏曰：“金昌城，在赤岸西北。”

白亭城，在卫西北五百里。唐白亭军也。武后长安初，以郭元振为凉州都督、陇右诸军大使。先是州境广轮不过四百余里。突厥、吐蕃频岁奄至城下。元振始于南境硤口置和戎城，北境磧中置白亭军，控其冲要，拓境千五百里。自是，寇不复至城下。开元中，亦曰白亭守捉城。和戎城，今甘州东南古浪所也。

大斗城，在卫西二百里。《新唐书》，本赤水守捉城也。亦曰赤水军，本名赤乌镇，有赤乌泉。西魏时，置戍于此。废帝钦二年，吐谷浑叛。魏通使于齐。凉州刺史史宁觐知其还，袭执其使者于赤泉。唐因置赤水军，幅员五千一百八十里，军之最大者。开元十六年，改为大斗军。因大斗拔谷为名，属河西节度使。天宝六载，河西陇右节度使王忠嗣以部将哥舒翰为大斗军副使，是也。《通典》，赤水军，在凉州城内。盖改赤水为大斗，因移军于城内，仍存旧名也。

交城，在卫西二百里。亦曰交城守捉。又卫南二百里有乌城守捉。俱唐开元中置，属河西节度使。或谓之张掖守捉城。《一统志》，卫东北三十里有永昌城，元永昌路本治于此。

天梯山，卫南八十里。山路崎岖，层折而上，因名。晋大兴二年，京兆人刘弘客居凉州天梯山，以妖术惑众处也。宋元嘉十六年，魏主焘议伐凉州。李顺等言：“姑臧城南天梯山上，冬有积雪，深至丈余。春夏消释，

下流成川。居民引以灌溉。后以虚妄获罪，是也。”臧南山，在卫西南百二十里。上多积雪，亦名雪山。《一统志》，姑臧界有第五山，清泉茂林，悬崖石室，自昔为隐士所居。又西山，在卫西二十里。中有莲花峰，甚高耸。

大斗拔谷山，卫西二百里，山甚高险。隋大业五年，伐吐谷浑，自张掖东还。经大斗拔谷山，路隘险，鱼贯而出，风雪晦冥，士多冻馁死者。唐武德初，西突厥颉度设为李轨所败，窜于达斗拔谷，寻为轨所灭。贞观八年，李靖讨吐谷浑还，上遣使劳军于大斗拔谷。又开元十四年，吐蕃自大斗谷攻甘州，焚掠而去，是也。亦作“达斗拔谷”云。

石驴山，在卫西南。《志》云，在姑臧西南长宁川之西北。张寔讨曹祛于晋昌，自姑臧西逾石驴。又秃发傉檀为沮渠蒙逊所败，其将折掘奇镇据石驴以叛，是也。长宁川，见西宁镇长宁谷。

洪池岭，在卫东南，凉州之大山也。晋太元初，苻秦梁熙等伐凉。张天锡遣将常据军于洪池，为秦所败。隆安二年，羌酋梁饥攻后凉西平。秃发乌孤欲救之。左司马赵振曰：“吕氏尚强，洪池以北，未可冀也。岭南五郡，庶几可取。”乌孤击饥，大破之，遂取岭南五郡。岭，即洪池岭。五郡：广武、西平、乐都、湟河、浇河，皆在洪池岭南也。《唐志》，凉州有洪池府。又姑臧有二岭：南曰洪池岭，西曰删丹岭。后凉杨颖谏吕纂曰：“今疆宇日蹙，崎岖二岭之间。”是也。自删丹岭以西，谓之岭西。张氏以后，西郡、张掖、酒泉、建康、晋昌，皆谓之岭西地云。

可落岨，在卫东南。隋开皇二年，突厥寇兰州。凉州总管贺娄子干败之于可落岨。《志》云，山无草木，曰岨。高越原，在卫西北塞外。隋开皇三年，秦州总管窦荣定等出凉州，与突厥相拒于高越原，却之。

白亭海，在卫东北。卫西南有五涧谷水流入。以水色洁白，故名。一名小阔端海子。《高居海使于阗记》，自灵州过黄河三十里，始涉沙入党项界，曰细腰沙、神树沙至三公沙，宿月支都督牙帐。自此沙行四百余里，至黑堡沙，沙尤广，遂登沙岭。沙岭，党项牙也。渡白亭海，乃至凉州。盖自灵州西，出凉州，白亭海为必经之道。

渚野泽，在卫东北三百里。一名都野泽，亦曰休屠泽，又名凉泽。《禹

贡》，原隰底绩，至于猪野。是也。《汉志》注，休屠泽，在武威县东北。古文以为猪野。其上承武始泽。晋元兴初，秃发傜檀攻后凉，至昌松，徙凉泽段豕民五百余户而还。段豕，其地与凉泽盖相近。武始泽，在卫西。亦曰武始大泽。晋永和十一年，凉张祚之乱，宋琨起兵武始大泽以攻姑臧，是也。

五涧，在卫东。《水经注》，五涧水，出姑臧城东，西北流，注于马城河。”晋义熙二年，姚兴以姑臧授秃发傜檀。傜檀军于五涧，遂入姑臧，是也。又有五涧，在洪池岭南。宋永初二年，沮渠蒙逊遣沮渠鄯善伐西秦，败于五涧。既又遣沮渠成都耀兵岭南，遂屯五涧，为西秦将出连虔所败。赤弥干川，在卫西五十里，与卫东南百五十里之黄羊川，俱分流灌田，民资其利。

三岔沟，在卫东南。成化中，土达满四作乱。明初，徙降部于边地。满四居凉州三岔沟，谓之满家营。至是据石城作乱，官军讨平之。灵泉池，在卫治南。后凉吕光尝宴群臣于此。又有红泉，《一统志》，在卫东五十里，水色微红。

甘泉关，在卫西。《唐志》，凉州有甘泉关。杂木口关，在卫东三十里。又卫西南有俺公山，卫南有倘哥儿山、东山、乾沟山，卫东南有黄羊川、下古城等口。向俱设卫卒戍守。

白雅孤口，在卫北。明朝正统中，王骥讨叛寇，使赵安由凉州逾白雅孤口，北抵赤林、铁门诸关为犄角。盖其地皆近塞外。

赤岸戍，在卫南。晋太元初，秦苟苌等败凉兵于洪池，入清塞。张天锡使其将赵充哲拒战于赤岸，败死。天锡出金昌城自战。城内又叛，天锡奔还姑臧。胡氏曰：“赤岸在枹罕。”按：自清塞至姑臧，皆在百里内外，枹罕去姑臧远矣。

胡阮戍，在卫西。晋隆安五年，秃发傜檀攻后凉，耀兵姑臧，壁于胡阮，即此。义熙六年，沮渠蒙逊围姑臧。傜檀遣司隶校尉敬归及子佗为质于蒙逊以请和，归至胡阮，逃还。

姚家寨，在卫东北。正德中，边将苏泰等败寇于此。又暖泉寨，在卫

东。卫东北又有红水寨。扒里寨，在卫东北。与卫东之暖泉寨及庄浪卫之扒沙城，俱为甘肃寇门。又有苦水墩，在卫西。嘉靖初，官军大破西海寇于此。

怀安堡，在卫西五十里，有怀安驿。又西四十里有柔远堡，有柔远驿，皆戍守要地也。又武威堡，亦在卫西。卫西四十里又有怀远堡。又西五十里为沙河堡，接永昌卫界。

大河堡，在卫东三十里。正德中，边将苏泰等败寇于大河滩，即此堡也。今大河驿置于此。又静边堡，在卫东八十里，有静边驿。又东三十里为双塔儿堡。又东三十里即古浪千户所也。《志》云，卫东有杂木口堡，卫北又有永昌旧堡，俱官军戍守处。

杨坞，在卫西五十余里。晋太元十一年，前凉张大豫攻吕光，进逼姑臧，保据杨坞，是也。刘林台，在卫治西北五里。相传汉窦融所筑，本名窦融台。明初，百户刘林与寇战，死其下，因易今名。又有灵钧台，在卫治北，晋明帝太宁初，张茂所筑，遗址尚存。

镇番卫，在镇东五百五十里。南至凉州卫一百九十里，东南至庄浪卫四百二十里。

汉武威郡地。后汉因之。晋仍属武威郡。隋、唐时，为凉州地。宋没于西夏。元置小河滩城。明初，改置镇番卫。卫城周六里有奇，东西南三门。今亦设镇番卫。

卫南蔽姑臧，西援张掖，翼带河、陇，控临绝塞，地形陡绝，戎马之场也。

来伏山，卫西北八十里。其山脊高首府，如拜伏然，因名。又苏武山，在卫东南三十里。俗传苏武尝牧羝于此。盖传说也。

小河，卫南十五里，自凉州五涧谷来。又有黑河在卫西四里。《志》云，即张掖河也。自甘州卫东北流经卫境云。

新中沙白盐池，在卫东五十里。《志》云，卫东四十里有小池，卫南三十里有三坝白盐池，卫西二百二十里有鸳鸯白盐池。又有小盐池，俱产盐。

黑山关，卫西南六十里。黑山驿置于此。《志》云，黑山关西南十里有红崖子，土色皆赤，亦戍守处也。重兴铺关，卫西南九十里。沙嘴儿[关]，

卫北九十里。屯于卫境芦沟、鞍子山、鱼海迤北诸处，皆北寇必由之道。

蔡旗堡，卫东六十里。又南六十里为三岔堡。有三岔驿，南达凉州之道也。《舆程记》，凉州卫西北四十里，即三岔堡。东安堡，在卫东。又卫东南有土门堡。万历中，设守备驻于此。

西乐堡，在卫西。又有护卫堡二，俱在卫城西南，旧属甘州中护卫。又永宁堡，亦在卫西南。万历中，设守备驻守于此。

庄浪卫，镇东南九百四十里。东南至临洮府兰州二百七十里，西至凉州卫三百七十里，西南至西宁镇四百十里。汉武威郡地。后汉因之。晋仍为武威郡地。隋属凉州。唐亦为凉州地。宋没于西夏或曰：“夏人置洪州于此，以其地有洪源谷云。”元置庄浪卫，属永昌路。明初，改今属卫城周八里有奇。今设庄浪所。

卫黄河南绕，松山东峙，河西之肘腋也。《五边考》，卫东百二十里有大小二松山，东扼黄河，南缀兰、靖，北阻贺兰，延袤千余里，号为沃壤。隆、万间番酋寘兔盘踞其中，时肆侵掠，内地削弃，仅存一线。万历二十六年，抚臣田乐克复其地，建堡筑城，屯戍相望。乃割芦塘等处，属固原芦塘，见靖远卫；红水河、三眼井等处，属临洮；阿坝岭、大靖城、土门儿等处，属甘肃。自靖远卫界黄河索桥起，至土门山，共长四百里，而兰、靖、庄浪千四百里之冲边始安。第芦塘、三眼井等处，土疏易圯，时费修葺。若按明初旧址，自镇番直接宁夏中卫，通树长边，则外钥尤壮矣。盖弃地犹六七百里云。

苍松废县，在卫西。汉县，属武威郡。后汉作“仓松”。晋因之。太和二年，凉张天锡击李俨于陇西，分遣前军向金城、左南、白土诸郡，自将屯仓松是也。《志》云，张氏置昌松郡。后凉吕光因郭磨之讖，改为东张掖郡。后魏复置昌松郡。后周郡废，为昌松县。隋开皇初，改县曰永世。后复曰昌松，属凉州。大业三年，李轨据河西。薛举遣将常仲兴击之，战于昌松，仲兴败没。唐亦曰昌松县，仍属凉州。乾元以后，陷于吐蕃。宋时，夏人置洪州于此。元废。左南白土，见西宁镇。

漠口城，在卫西南。晋义熙四年，后秦姚兴遣其子弼等，袭秃发傉檀

于姑臧，自金城济河进至漠口。《地形志》，漠口县属昌松郡，谓之昌松漠口，并为险要。

允街城，在卫东南。汉神爵二年，置允街县，属金城郡。后汉因之。明帝初，滇吾羌寇陇西，败太守刘吁于允街。又延熹四年，勒姐零五羌围允街，护羌校尉段熲击破之。晋仍属金城郡。前后凉因之。后魏废。《周地图》，允街城，地势极险阻。沮渠蒙逊增筑，以为防守之所。杜佑曰：“允街城临丽水，亦名丽水城。”街亭城，在卫南。后凉所置城也。晋隆安初，秃发乌孤自广武取后凉金城。吕光遣窦苟伐之，战于街亭，大败。《水经注》，逆水出允吾县参街谷，东南流，经街亭城南。《通典》，街亭城，沮渠蒙逊所筑，地势险隘。胡三省曰：“金城北有街亭城。”

搆次城，在卫西北。汉县，属武威郡。后汉因之。三国魏黄初二年，凉州卢水胡反，遣张既讨之。胡逆拒既于鹑阴口。既扬声军从鹑阴，乃潜由且次出武威。胡以为神，引还显美，既击平之。且次，即搆次也。《晋志》谓之揖次，仍属武威郡。太元十一年，魏安人焦松等迎故凉张天锡之子大豫于揖次，攻拔后凉昌松郡。又元兴初，后凉焦朗据魏安。秃发利鹿孤遣其弟儁檀击灭之。《晋书》以揖次为魏安，盖据后魏所置郡也。魏收《志》，搆次县属昌松郡，后又析置魏安郡。胡氏曰：“后魏置魏安郡，盖治于搆次。后周郡废，寻并搆次县入昌松。”又白山县，后周改魏安郡置，寻废。

长最城，在卫东南金城河北。晋永和三年，石虎将麻秋等济河，击张重华，遂城长最。凉将谢艾军神乌，败后赵兵，进击麻秋。秋遁归金城。隆安初，后凉吕光击乞伏乾归，军于长最。遣其子纂攻金城，拔之。神乌，盖亦在卫东南。或以为今永昌卫废鸾鸟县地。误矣。缠缩城，亦在卫东南。晋太元初，苻秦将苟萇、梁熙伐凉，会攻缠缩城，拔之。或云，与兰州故广武城相近。

振武城，在卫东南。晋咸和二年，赵刘曜遣子胤败张骏将韩璞之兵于沃干岭。追奔济河至令居，进据振武，河西大骇。永和二年，石赵将麻秋等攻凉金城，金城降赵。凉将谢艾引兵出振武击麻秋，破之，是也。胡氏曰：“振武在姑臧城南广武西北。”

扒沙城，在卫西北二百里，又西北去凉州二百五十里。正统中，以其地为控御之要，议建城，调靖边中所于此。又有速罕秃地，在卫东南黄河北岸，亦为要害，议筑城于此，以遏寇冲。

大松山，卫东百二十里，山多大松。又有小松山，在卫东北百二十里。近代议边事者，谓二山控御边陲，为卫境之要地。蒲萄山，《志》云，在卫西北百三十里，与雪山相拒，大通河所经也。又东山，在卫东一里。又东北三十里有石沸山。

南山，在卫南。《汉志》，武威郡苍松县有南山松峡。起自羌中，连延西平、金城之界。东出秦雍，至于终南，皆曰南山。

分水岭，卫西百五十里。岭峽有泉分流，南为庄浪河，北为古浪河。其北又有平岭。嘉靖中，总兵姜奭御敌于分水岭，败之，遂北至平岭。敌大集，奭乃伏兵于岭南岔口，佯退以诱之，敌大败。

洪源谷，在卫西北。唐武后圣历二年，吐蕃将论赞婆来降，使其众守洪源谷。又久视元年，吐蕃将麴莽布反，寇凉州昌松县，入洪源谷。陇右诸军大使唐休璟击败之。又洪池谷，亦在昌松界。唐贞观十七年，有瑞石产于此。

大通河，在卫南百二十里。北流过卫城西，有大通桥跨其上，又北入于沙漠。又庄浪河，亦在卫南，下流合于大通河。

瓦窑渠，在卫西二里。又卫南五十里有青寺河渠。又南四十里有野狐渠。俱引大通河之水，资以灌溉。

裴家川，在卫东。东北流，绵亘于靖远卫及宁夏中卫之境，为戍守要地。万历间，设官兵驻守于此。嘉泉，在废搆次县界。晋太宁三年，黄龙见凉州之嘉泉。凉臣汜祗等劝张骏改年，以章休祥，骏不许。即此泉也。

南大通山口堡，卫东四十里。又东南四十里为红城子堡。又东南六十里为苦水堡。苦水堡，一作苦水湾堡。又南三十里为安宁堡。又东三十里即兰州之金城关也。西大通河口堡，在卫西南百六十里。又西八十里为西宁镇之老鸦城堡。

武胜堡，卫西北三十里。又西北四十里为岔口堡。又西北五十里为镇

羌堡。皆卫境之冲要也。又西四十里为古浪所之打班堡。

野狐堡，在卫东南。其西北有青寺、通远二堡，俱戍守要地。《一统志》，卫东有应理州堡。又东有泗水堡云。沙井儿驿，在卫南百九十里。驿，亦作堡。《志》云，卫境诸堡，多置馆驿于此，以地当往来冲要云。

杨非亭，在卫东南。《水经注》，逆水东南流，经街亭城南，又东经杨非亭北，又东南经广武城西。今逆水源流，不可复辩也。《载记》，杨非，在支阳西北三百余里。晋太元初，苻秦伐凉，张天锡使马建等拒秦军于杨非。秦兵济河攻缠缩城。建惧，自杨非退屯青塞。或讹为阳妃谷。五代时，有阳妃谷首领，即此地矣。清塞，见凉州卫。

镇夷所，镇西北三百里，故张掖县地。明洪武二十九年置镇夷守御千户所于黑河之北。后为河水冲决。天顺间，始移今治。《志》云，所东抵高台，西接酒泉，南距番夷，北邻胡境，广袤二三百里，为戍守之要。城周四里有奇，有南面二门。今改设镇夷卫。

狼心山，在所北。明正统中，王骥出镇夷讨叛胡，与总兵蒋贵等约：至狼心山，举火为应。贵败敌于石城儿泉，又败之于九鲁乃地。其地去镇夷三百余里。又追败之于梧桐林，至肃州亦集乃地。又追至野狐山、青华山，至黑泉而还。转战二千余里，敌众大衄。

黑河，在城南四里。有黑水渡，即古张掖河也。流经硤口，入居延海。《志》云，所境有永丰等渠二十，分流溉田。又有盐池，在所西四十里，产白盐。

马营堡，在所东。向为官军戍守处。

古浪所，在镇东南六百四十里。汉武威郡地。唐亦为凉州地，于此筑和戎城。元为古浪城，立巡简司，属永昌路。明正统间，置古浪守御千户所。《志》云，所境东至扒沙，西连武威，南界湟河，北抵煖泉，广袤五百里。所城周二里有奇，有东南二门。今亦设古浪所。

古浪水，在所南。流绕关城，所以此名。《志》云，所境有暖泉等渠，分引溉田。

黑松堡，所东南三十里，亦曰黑松驿。又东南三十里为打班堡，即安

远驿也，亦作安远站堡。又东四十里为庄浪卫之镇羌堡，皆往来冲要处。

高台所，镇西北百六十里。汉张掖郡地。唐为建康军地。明正统中始置高台守御千户所。曰高台者，以其地稍高，控扼戎番之要冲也。所城周四里，惟南面一门。今亦设高台所。

白城山，所西北百余里，为甘、肃二境接界处。成化以后，哈密遗种多迁于此。

红城渠，所西北三十五里。又所东南三十五里有丰稔渠。《志》云，所境之渠十有二，分溉境内之田。

黑泉堡，所西五十里。又西五十里为深沟堡。又西五十里，即镇夷所也。红崖堡，在所西南百余里。又所北有八坝、九坝等堡。

卷六三

西宁镇，甘州卫东南一千三百五十里，东北至临洮府兰州六百三十里，东南至临洮府河州二百五十里，北至庄浪卫四百十里，西至生蕃界百五十里。自卫治至布政司二千一百里，至京师四千九百里。

古西羌所居，谓之湟中。汉属金城郡。后汉因之。建安中，分置西平郡。晋因之。东晋末，为秃发乌孤所据，称西平王，其弟利鹿孤复都西平，是为南凉也。后魏置鄯州。后周又置乐都郡。隋初郡废，仍曰鄯州。炀帝改州为西平郡。唐初复曰鄯州，开元二年，置陇右节度治此。寻又置临洮军于城内。天宝初，亦曰西平郡。乾元初复为鄯州。上元二年，没于吐蕃。大中间收复。寻又为番人所据，号青唐城。宋元符二年收复，仍置鄯州，亦置陇右节度使。明年，复没于吐蕃。崇宁三年，复收其地，改为西宁州，仍建陇右节度，亦曰西平郡，又改军号曰宾德。南渡后荒弃。元得其地，仍置西宁州。明初，改为西宁卫，属陕西行都指挥使司。今为西宁镇，亦设西宁卫。

镇河、湟环带，山峡纡回，《志》云，西宁，万山环抱，三峡重围，红崖峙左，青海瀦右。扼束羌、番，屹为襟要。汉武使霍去病破匈奴，因斥逐诸

羌，不使居湟中。宣帝时，赵充国留屯金城，尽平诸羌，关、陇宁谧。后汉建武十一年，马援等击破先零诸种羌。时议者以金城破羌之西，途远多寇，欲弃之。马援因上言：“破羌以西，城多坚牢，易可依固。其田土肥壤，灌溉流通。如令羌在湟中，则为害不休，不可弃也。”从之。其后马贤、庞参，往往树绩于此。晋室多故，张氏据有河西，亦能绥辑群羌，保其险阻。吕光继之，河、湟渐尔多事。晋隆安二年时，秃发乌孤屯据廉川，羌酋梁饥攻后凉西平，乌孤欲救之。议者多以饥兵强为疑。赵振曰：“使羌得西平，中外震动，非吾利也。”乌孤亦曰：“饥若得西平，保据河山，不可复制矣。”遂进击饥，破之。于是据有岭南之地岭，谓洪池岭。又杨统言于乌孤曰：“吕光衰耄，诸子乖离。若使浩亶、廉川乘虚叠出，不过二年，姑臧可图也。”乌孤从之。后凉益困。其后，北凉、西秦互相争逐于河刘、湟间。西秦之亡，其地没于吐谷浑。后周皆规取之，以藩蔽秦、陇。隋大业中，勤兵远略，地亦益斥。唐贞观中平吐谷浑。开元中又建雄镇于鄯州。其时兵威震叠，薄于西海。天宝以后，吐蕃乘中国之乱，蚕食河、湟，东及秦、陇。于是，唐之边备，近在邠、岐、泾、原之境。西平诚西面之保障矣。宋关中戍守，不越秦凤。熙宁以后，始务远略，图复河、湟以制西夏。议者谓河、湟复而宋祚倾，夫岂探本之论乎？元人控驭西番，恒以西平为要地。明初，置卫屯兵，兼设茶马司于此，用以驯制番部云。《考略》，卫居万山之中，汉、土番、彝杂处耕牧。附近有巴海、临番、巴哇等一十三番族，各授官领印，中纳金牌茶马。正德以后，逋寇盘据青海，番族多为所戕灭。亦有叛附之者，洮岷间势且益急。然则西宁为内外之防，不可不慎也。

湟水废县，今镇治。汉为破羌县地，属金城郡。后汉建安中，置西都县，为西平郡治。晋因之。晋乱，张轨、吕光等相继有其地。隆安二年，秃发乌孤败羌酋梁饥于西平。明年，使其弟儁檀镇焉。后又为西秦所据。宋元嘉三年，夏主昌遣将呼卢古等伐西秦，进攻西平，大掠而还。寻没于吐谷浑。大明四年，魏人侵吐谷浑，军至西平，济河而返。寻置鄯州，仍治西都县。后周又为乐都郡治。隋初，郡废。开皇十八年，改县曰湟水，仍为鄯州治。唐因之。刘昫曰：“武德二年，平薛举，置鄯州，治故乐都城。”盖以

后周乐都郡治而名也。后没于吐蕃，谓之青唐城。宋元符二年，洮西安抚使王瞻收复其地，仍置湟水县，为鄯州治。靖康以后荒弃。元仍置西宁州治焉。《一统志》，卫城西南有西宁废州。宋置州于此。元移今治。今卫城周八里有奇。

令居城，在镇东北。《西羌传》：“武帝北却匈奴，西逐诸羌，乃渡河、湟，筑令居塞。元鼎五年，先零羌攻零居。六年，李息讨平之，是也。昭帝时，置县，属金城郡。”赵充国谓西羌反时，尝攻令居是也。宣帝置护羌校尉治此。后汉元初二年，时诸羌相率叛乱。护羌校尉庞参以次招降之，还治令居，通河西道。盖先是徙治张掖也。又延光初，校尉马贤击叛羌麻奴于牧苑，不利。麻奴等又败武威、张掖郡兵于令居。牧苑，即令居之闲牧地矣。晋省入西都县。胡氏曰：“汉创筑三城，光禄、居延、令居是也。”

浩亶城在镇东。旧《志》云，在兰州广武县西南百余里。汉县，属金城郡。孟康曰：“浩亶，音合门。”颜师古曰：“浩，音诰，水名也。亶者，水流峡中，岸深若门也。”杜佑曰：“浩，读若阁。”汉神爵初，先零诸羌犯塞。遣义渠安国备羌，至浩亶，为羌所败，还令居。后汉亦为浩亶县。或谓之浩亶隘。建武十一年，先零羌与诸种羌寇金城、陇西，据浩亶隘。陇西太守马援深入讨击，大败之。又中元二年，西羌寇陇右，马武将兵讨之，战金城浩亶，复追击到东西邯，大败之。刘昫曰：“浩亶有雒都谷，马武破羌处也。”晋仍属金城郡。永宁中，张轨置晋兴郡，盖治浩亶。张骏时，郡属凉州，即此。隆和三年，秃发乌孤使从叔吐若留镇浩亶。义熙十年，西秦乞伏炽磐灭南凉，以王基为晋兴太守，镇浩亶是也。《隋志》，浩亶县，后周并入湟水县。

临羌城在卫西二百八十里。汉县，属金城郡，在浩亶河西。神爵中，赵充国击西羌，西至西部都尉府。或曰，即临羌也。又充国奏：“临羌东至浩亶，羌人故田及公田，民所未垦，可二千顷以上。”又云：“循河、湟漕谷至临羌，以示羌人。”是也。后汉亦为临羌县。《地记》，汉地自临羌以西，即为塞外。”胡氏曰：“汉宣帝置护羌校尉，治金城令居。东汉初，治安夷。章帝建初二年，徙临羌。安帝永初二年，徙狄道。四年，又徙治张掖。元初

二年，徙令居。”晋仍为临羌县，属西平郡。后魏废。隋大业四年，吐谷浑为铁勒所破，走入西平境内，遣使求救。诏安德王雄出浇河，宇文述出西平迎之。述至临羌，吐谷浑畏述兵盛，帅众西遁，即汉临羌故城矣。《水经注》，羌水出湟中西南山下，经护羌城东，故护羌校尉治也。又东径临羌城西。是护羌校尉常治临羌西界也。沈括曰：“吐蕃有临江寨，至安乡城，东西千余里。”临江，即临羌之讹矣。

安夷城，在镇东北。汉金城郡属县。后汉因之。建初二年，以西羌叛，诏护羌校尉自安夷徙屯临羌。晋仍为安夷县，属西平郡。隆和三年，南凉秃发乌孤以其弟利鹿孤镇安夷是也。后废。《水经注》，湟水东合安夷川水，又东径安夷县故城，在汉西平亭东七十里。

破羌城，在镇西北。汉宣帝神爵二年置县，属金城郡。后汉因之。永和三年，叛羌攻没破羌县，是也。晋省。

乐都城，在镇西北二百三十里。《水经注》，湟水径乐都城南，又东径破羌故城南。是乐都在破羌西也。前凉置城于此。后凉吕光因置乐都郡。晋隆安三年，秃发乌孤自西平徙治乐都。又义熙六年，秃发傉檀自姑臧还乐都。十年，西秦乞伏炽磐袭乐都，傉檀世子虎台拒守。其臣梁肃以外城广大难守，请聚国人守内城。虎台不听。城溃，炽磐入乐都，置凉州刺史镇焉。宋元嘉五年，河西王蒙逊攻乐都，克其外城，绝城中水道。乞伏元基击却之。其后没于吐谷浑，城废。

龙支城，镇东南八十里。城西有龙支堆，因名。汉为金城郡允吾县地。后汉时，置城于此。和帝使曹凤为金城西部都尉，屯龙耆，即此城也。晋隆安二年，南凉秃发乌孤击羌苻梁饥于西平。饥退屯龙支保，乌孤攻拔之。后魏时，置北金城县。西魏又改为龙支县。后周属凉州。隋因之。唐改属鄯州。仪凤三年，鄯州都督李敬玄奏败吐蕃于龙支是也。后没于吐蕃，号为宗哥城。宋大中祥符中，吐蕃唃廝罗徙居邈川。其相李立遵居宗哥，请命于宋。宋命为堡顺军节度使。元符二年，王瞻取其地，旋复陷于吐蕃。崇宁三年，王厚收复。后废。又卫南有龙居废县。《隋志》，西魏时置龙居、路仓二县。后周废入西都县。

归义城，在镇西南。汉筑城以招徕诸羌，因名归义。后汉元和三年，烧当迷吾顺命，因退居河北归义城，是也。章怀太子贤曰：“河北者，逢留大河之北。黄河至大、小榆谷北则有逢留之名。”后汉永元中，金城长史上官鸿开置归义、建威屯田二十七部。侯霸复置东、西邯屯田五部，又增置逢留二部，列屯夹河，合三十四部。永初中羌叛而废。归义城，盖屯戍处。

白土城，在镇南。晋置白土县，属金城郡。或曰，县本曹魏所置。《十三州志》，左南津西六十里有白土城。城在大河之北，为缘河津济处。其西北有白土川，因名。晋太和二年，凉张天锡讨叛将李俨于陇西，使常据自左南，张统向白土，即此。后凉吕光置三河郡，治白土县。三河，谓金城河、赐支河、湟河也。时光自称三河王，因置三河郡。义熙八年，西秦乞伏炽磐攻南凉三河太守吴阴于白土，克之。后魏郡县俱废。《水经注》，河水经邯川城南，又东经临津城北、白土城南。是也。

左南城，在镇东南。旧《志》云，在白土城东六十里。前凉置晋兴郡，左南县属焉。县亦张氏所置也。《十三州志》，石城西百四十里有左南城。河水经其南，曰左南津。又东接枹罕界。晋太和二年，凉张天锡讨李俨，使常据自左南进，败俨兵于葵谷。天锡自仓松进屯左南。又义熙十年，南凉王儁檀西讨乙弗部。西秦王炽磐入其乐都。儁檀诣炽磐降，至左南，炽磐因赐儁檀爵左南公，即此。后魏县废。

长宁城，在镇西。汉临羌县地。晋析置长宁县，属西平郡。后魏废。《水经注》，西平城西北四十里有长宁亭。晋置长宁县。”又鄯城废县，在镇西南。唐仪凤三年，析湟水县置，属鄯州。上元中，没于吐蕃。刘昫曰：“汉西平故城，在县西。”

废兴城，在故龙支城东，前凉所置城也。晋太元十年，后凉吕光将尉佑以允吾叛，败奔兴城。隆安二年，后凉将李鸾以兴城降于秃发乌孤。胡氏曰：“兴城在允吾之西南、白土之东。允吾，今见兰州。”

廉川城，在镇西南百二十里，汉破羌县地。晋太元二十年，秃发乌孤击降乙弗折掘等部，筑廉川堡而都之。隆安二年，后凉杨轨等举兵攻姑臧，不克。寻败屯廉川，收集夷夏，众至万余，既而降于乌孤。三年，乌孤

使从弟洛回镇廉川，其后为北凉所取。宋元嘉三年，西秦王炽磐伐河西王蒙逊，至廉川，即此。后魏废。胡氏曰：“廉川在湟中是也。”

湟中城，在镇西北。胡氏曰：“湟水两岸之地。通谓之湟中。湟中城，置于西平、张掖间，本小月支之地，因谓之小湟中。”东汉永元初，邓训击迷唐羌，发湟中卒，缝革为船，置于箬上以渡河，掩击迷唐，大破之是也。永初末，羌豪麻奴等复叛据湟中，屡侵金城、武威诸边郡。延光初，校尉马贤讨破之。建安十九年，夏侯渊自兴国讨宋建于枹罕，别遣张郃等渡河入小湟中，河西诸羌皆降，是也。《水经注》，湟水经湟中城，又东经临羌、破羌、允街、枝阳、金城，而合于大河。

广武城，在镇东北。前凉张氏置广武郡，属凉州，盖分西平置郡也。后废。或讹作“须武”，云在卫西南。恐误。又临咎城，在镇西百里。《宋史》，仁宗宝元初，吐蕃唃廝囉居鄯州，西有临咎城，通青海，服属于宋云。

廓州城，镇南百八十里，古西羌所居浇河地。后汉延熹中，诸羌烧当与浇河大豪寇张掖，段熲斩浇河大帅于其地，遂定西羌是也。汉末属西平郡。前凉以其地置湟河郡。晋隆安二年，秃发乌孤败梁飢于西平，湟河太守张稠以郡降。明年，乌孤使其叔素渥镇湟河，即此。义熙十一年，西秦乞伏傉檀袭北凉湟河郡，克之。宋元嘉三年，夏主昌遣将伐西秦，攻其沙州刺史出连虔于湟河，不克。后魏亦为湟河郡，属鄯州，寻没于吐谷浑。后周逐吐谷浑，得其地，改置浇河郡，兼置廓州。隋初，郡废，而州如故。开皇三年，突厥寇廓州，州兵击走之。炀帝又改州为浇河郡。唐复为廓州。开元二十六年，置宁塞军于城内。天宝初，曰宁塞郡。乾元初，复故。上元初，没于吐蕃。宋元符中收复，置宁塞城，寻复为廓州。明年，复弃不守。崇宁三年，王厚复取之。后废。《志》云，州城旧治河北，后尝移河南。今废州城南去黄河，不及一里。

广威废县，唐廓州治也。本后魏之石城县，西魏废帝以县有化隆谷，因改为化隆县。后周曰广威县。《隋志》：“西魏置浇河郡于此。后周废。仁寿初，复改为化隆县，属鄯州。”唐改为廓州治。先天元年，改为化成县。天宝初，复曰广威。后没于吐蕃。宋亦为廓州治。崇宁五年，县废。《九域

志》，廓州东南至河州凤林县二百八十里。

河津城，在废廓州西。《隋志》，后周浇河郡，领浇河、广威、安戎三县。隋初，改置河津县，为廓州治。唐廓州改治广威县，河津城遂废。又达化城，在废廓州西南。后周置达化郡及县。隋开皇初，郡废，以县属廓州。唐因之。开元二十九年，吐蕃屠达化县，即此。上元以后，没于吐蕃。又绥远城，在废廓州境，后周所置县也。隋初，并入达化县。

浇河城，在达化废县西百二十里。《通典》曰，晋时吐谷浑阿豺所筑。城盖置于浇河回曲处。或曰，后凉所置浇河郡也。晋隆安二年，秃发乌孤拔龙支堡，梁饥单骑奔浇河。既而浇河太守王稚，以郡降于乌孤。明年，乌孤使其叔若留镇浇河。宋元嘉三年，西秦乞伏炽磐为夏所侵，徙其境内老弱畜产于浇河。后魏亦为浇河郡。魏主宏延兴三年，吐谷浑王拾寅寇魏浇河。魏遣长孙观击降之，寻废。又唐天宝十三载，陇右节度使哥舒翰奏于所开九曲地置浇河、洮阳二郡。杜佑曰：“浇河城，在廓州达化县贺兰山下。”宋祁曰：“浇河郡，置于积石军西，当即故浇河城也。”洮阳郡，见洮州卫。”

邯川城，在废廓州东南，秃发傉檀时所置邯川护军也。《水经注》，河水自西平郡东流，径浇河郡故城北，又东径石城南，又东径邯川城南。杜佑曰：“后汉和帝时，侯霸置东西邯屯田五部。邯，水名也。分流左右，在宁塞郡东。”刘昫曰：“廓州化隆县东，即古邯川地。”

米川城，在废廓州东南。本汉枹罕县地。唐贞观五年，置米州及米川县。十年，州废，以县属廓州。后没于吐蕃。宋崇宁三年，收复，置米川城。王厚云：“米川城沿河西至廓州，约六十里。过河取正路至结罗城，约九十里。”又肤公城，在废廓州北二十里，吐蕃结罗城也。宋崇宁中收复，赐今名。《志》云，城北三十里有绥平堡，本名保敦谷，宋崇宁三年兴筑，赐名绥平。寻废。

积石城，在廓州西百八十里。本吐谷浑地。唐贞观八年，平吐谷浑。十三年，置靖边镇于此。仪凤二年，改为积石军。开元十四年，吐蕃寇甘州还，自积石而西。王君毳引军蹶其后是也。天宝中，哥舒翰败吐蕃于积石

城,寻为吐蕃所陷。宋时,番名溪哥城。元符二年,吐蕃瞎征之族杓楞据溪哥城,瞎征攻杀之。大观二年,收复,仍置积石军。《宋志》,军西至青海百里,南至盖龙八十里。其城西临大涧,北枕黄河。或曰,即隋之河津县治也。金人亦置积石州于此。元因之。明初废。废贵德州,在积石西南。元置州于此,隶土番等处宣慰司。至元十七年,都实穷河源,自昆仑还至贵德州,约半月程,地名必赤里,始有州治官府。又四五日至积石城,是也。

河源城,在镇西南。隋大业四年,伐吐谷浑,置河源郡,治于赤水城。唐仪凤二年,复置河源军,盖与积石山相近。永隆初,军使黑齿常之败吐蕃赞婆于良非川。常之以河源冲要,欲加兵戍之,而转输险远。乃广置烽戍七十余所,屯田五千余顷,由是战守有备。乾元初,没于吐蕃。大中三年,吐蕃叛将论恐热谋并鄯州,引兵军于河州。鄯州将尚婢婢军河源以拒之。诸将欲进战,婢婢不可。诸将不从,乃据河桥以待之。诸将果败。婢婢收余众,焚桥,奔归鄯州。城盖与河州接界。《通典》,河源军,在鄯州西百二十里。

赤水城,在镇西南,吐谷浑所筑。隋大业四年,宇文述出西平,至临羌城,进拔吐谷浑曼头、赤水二城,因于赤水城置河源郡,兼领远化、赤水二县,寻废。唐贞观八年,讨吐谷浑,分军出赤水道。天宝六载,河西陇右节度使以李光弼充赤水军使,是也。《隋志》赤水管下有曼头城,以曼头山而名。

临番城,在镇南。《唐志》,河源军西六十里有临番军,盖开元中所置,后没于吐蕃。大中四年,吐蕃鄯州刺史尚婢婢遣兵据临番城,拒叛将论恐热于白土岭,不利。复遣将据鼈牛峡以拒之,为恐热所败。牦牛峡,在临番西北。白水城,在临番西六十里。唐开元五年置。二十七年,吐蕃寇白水军。《通典》,军在鄯州西北二百五十里。

洪济城,在镇西南。旧《志》,在达化县西二百七十里。后周武帝逐吐谷浑,置洪济镇。其后吐蕃亦置洪济城于此。唐天宝二载,皇甫维明攻洪济城,克之。《唐志》云,廓州西南百四十里为洪济桥。其相近有金天军,天宝十三载所置。又有渔海、游奕等军,在洪济桥东,亦吐蕃所置。天宝初,

河西节度使王倕攻破吐蕃渔海及游奕等军，是也。至德后，俱没于吐蕃。

大漠门城，在镇西二百余里，近故榆谷中。唐景龙初，吐蕃得河西九曲地，因置洪济大漠门等城以守之。开元十五年，河西节度使萧嵩等破吐蕃于渴波谷。又追拔其大漠门城，焚其骆驼桥，是也。骆驼桥，在大漠门西，滨河。

宛秀城，在镇西南。《唐志》，宁塞郡西有宁边军。又西八十里为宛秀城，有威胜军。其地即所谓河西九曲也。景龙元年，吐蕃赞普请其地，诏与之。九曲者，水甘草凉，宜畜牧。自是蕃益雄张。开元六年，郭知运败吐蕃兵于九曲。天宝十三载，哥舒翰破吐蕃洪济、大漠门等城，收黄河九曲，置洮阳郡，筑神策、宛秀二军。寻又没于吐蕃。

绥和城，在镇西南二百五十里。唐开元二年，置绥和守捉于此。又合川城，在卫南百八十里，唐贞观中所置合川守捉城也。俱至德后废。

百谷城，《唐志》云，在廓州东南八十里，有武宁军。又有耀武军，在廓州南二百里黑峡川。俱天宝十三载置。至德后，陷于吐蕃。

定戎城，在镇西南。《唐志》，定戎军，天宝十三载置。自鄯州至河源军，西行百二十里，至白水军。又西南六十里，至定戎城。又南隔涧七里，即石堡城矣。

石堡城，在镇西南三百里。本吐蕃铁仞城。亦曰石堡城。唐咸亨中，取其地。后复没于吐蕃。开元十七年，朔方节度使信安王祗出陇西，拔石堡城。初，吐蕃陷石堡，因侵扰河、陇。至是拔之，据守要害，河陇诸军游奕，拓境千余里，因更名石堡城，曰振武军。二十九年，吐蕃攻承风堡，又袭攻振武军，盖嘉运不能守。天宝四载，陇右节度皇甫惟明攻石堡，不克。六载，诏河西、陇右节度使王忠嗣攻之。忠嗣言：“石堡险固，吐蕃举国守之，今顿兵其下，非杀数万人不能克。请俟其有衅，然后取之。”不听。遣将军董延光将兵攻取，命忠嗣分兵助之，果不克。八载，陇右节度哥舒翰复攻石堡，其城三面险绝，惟一径可上，吐蕃以数百人守之，唐兵死者数万，反而克之。翰遂以赤岭为西塞，开屯田，备军实，诏以石堡城为神武军。又谓之天威军。至德初，复没于吐蕃。长庆二年，吐蕃请定疆

侯，遣大理卿刘元鼎往就盟。元鼎逾成纪、武川，至龙支城，过石堡城，崖壁峭立，道回屈，译曰：“此铁刃城也。”《续通典》，石堡城，在龙支县西。四面悬崖数十仞，石路盘曲长三四里，西至赤岭三十里。

神威城，在青海上。唐天宝七载，哥舒翰筑神威军于青海上，又筑城于青海中龙驹岛。时有白龙见，因名应龙城。及明年冰合，吐蕃大至，戍龙驹岛者悉没。至德初，城陷于吐蕃。

威戎城，在卫西北三百十里。唐开元二十六年，鄯州将杜希望拔吐蕃新城，以其地为威戎军是也。《志》云，城在鄯州星宿川西北三百五十里。又有制胜城，在卫西。天宝十三载置。至德初，与威戎城俱没于吐蕃。

大岭城，在镇西境。旁有大岭谷，吐蕃置城于此。武后长寿末，武威道总管王孝杰破吐蕃于大岭谷。又天宝初，陇右节度使皇甫惟明奏破吐蕃大岭谷，及破其青海营屯是也。安人城，亦在卫西。《通典》云，在星宿川西。开元七年，置安人军，属陇右节度使。二十七年，吐蕃寇安人军。二十九年，吐蕃复寇安人军浑崖峰，骑将臧希液破却之。至德后，俱陷于吐蕃。

乐州城，镇东南二百余里。本汉金城郡地。唐属鄯州。后没于吐蕃，为邈川城。宋大中祥符中，吐蕃唃廝囉自宗哥城徙居邈川，是也。元符二年，洮西安抚使王瞻自河州引兵趣邈川，降之，因置湟州。建中靖国初，荒弃。崇宁二年，收复，仍置湟州及邈川县为倚郭。五年，县废。大观三年，又升为向德军。宣和初，改为乐州。后没于金，州废。

来宾城，在废乐州西南百四十里，南去黄河不过十里。崇宁三年置。《志》云，城西三十里有青丹谷。宣威城，镇北五十里。唐天宝十三载，置宣威军。后没于吐蕃，谓之牦牛城，又误为猫牛城。宋元祐二年，赵元昊攻吐蕃唃廝囉猫牛城，又攻青唐、宗哥等城是也。元符二年收复。崇宁三年，复置宣威城。四年，夏人合羌酋逼宣威城。知鄯州高永年出御之，行三十里，为羌人所执。既而羌众复焚大通河桥以叛，寻讨平之。后废。又仁多泉城，在镇北百七十里。宋政和五年，童贯使刘法、刘仲武合熙秦之师，攻夏仁多泉城，屠之，即此。

震武城，在镇东北。本名古骨龙城。政和五年，童贯遣将刘法出湟

州。法败夏人于古骨龙城，因建为震武军。其北即统安城也。宣和元年，夏主弟察哥败刘法于统安城，乘胜攻震武。其城在山峡中，熙河两路不能饷，屡为夏人所困。至是又将陷，察哥曰：“勿破此城，留作南朝病块。”遂引去。靖康末，复为夏境。又统安城，在震武北，宋与西夏接境处。宣和初，童贯使刘法攻夏统安城，兵败，走至盖朱峯，为夏守塞兵所杀。《志》云，其地在湟鄯间。又德通城，亦在震武城北，吐蕃所置，曰瞎令古城。宋政和七年，收复，改为德通城。

大通城，在镇东南，本吐蕃所置达南城也。形势险要，控扼夏境。宋崇宁间，收复湟、鄯，于此筑寨把守。《志》云，大通城属乐州。其西六十里有菊花河，东四十里接河州境之通津堡。绥边城，在镇东北三十里。宋置，番名宗谷城。崇宁三年，进筑，赐名绥边，亦曰绥边寨。其北有乳洛河。又宁西城，在镇西四十里，亦宋置。

伏俟城，在青海西十五里，本吐谷浑国都也。梁大同六年，吐谷浑王夸吕始称可汗，居伏俟城。后周主邕建德五年，遣太子赞伐吐谷浑，至伏俟城而还。隋大业五年，伐吐谷浑。别将刘权出伊吾道至青海，乘胜追奔至伏俟城。因置西海郡，统县二：曰宣德、曰威定，皆在青海之西。隋乱废。唐贞观八年，李靖帅诸军讨吐谷浑，次伏俟城。吐谷浑退保大非川，靖击平之。亦谓之伏延城。后为吐蕃所据。

西海城，在青海上。王莽讽卑禾羌献西海地，置西海郡。东汉初，废。永元中，护羌校尉侯霸击灭叛羌，西海及大、小榆谷无复羌寇。从隃糜相曹凤言，缮修故西海郡，徙金城西部都尉治之。后复废。晋时为吐谷浑所据。唐永徽以后，吐蕃击吐谷浑而有其地，置青海节度于此。后废。腊城，在青海西南。唐至德后，吐蕃所置，有腊城节度使，屯戍于此。贞元中，韦皋帅蜀，遣将王有道帅精卒，与东蛮自故嶲州台登北谷，进击吐蕃，破其青海、腊城二节度而还。盖深入掩击也。

树敦城，在卫西曼头山北，吐谷浑旧都也。《志》云，周穆王时，犬戎树惇居此，因名。西魏末，突厥假道于凉州，以袭吐谷浑。宇文泰使凉州刺史史宁随之，至番禾。吐谷浑觉之，奔南山。史宁曰：“树敦、贺真二城，

吐谷浑之巢穴也。拔其本根，余众自散。”遂与突厥分道趣之。突厥从北道，宁从南道，大破之，与突厥会于青海。唐天宝九载，关西将王难得击吐蕃，克五桥，拔树敦城，即此。番禾，见永昌卫。贺真城、五桥，俱与树敦城相近。

宁头城，在镇西塞外白兰东北。宋元嘉二十二年，后魏主焘遣拓跋那击吐谷浑于白兰。至宁头城，吐谷浑王慕利延拥其部众西渡流沙，是也。

积石山，在卫西南百七十里。旧《志》，在龙支县西南九十里。即《禹贡》所云导“河自积石”者也。

峡口山，在卫东南。地极险阻，为湟、鄯往来咽喉地。汉时谓之湟峡。赵充国屯田奏：“治湟峡以西道桥七十所，令可至鲜水左右是也。”唐人尝修阁道。宋筑省章城，控制要害。亦名绥远关。

四望山，在卫东百里。湟水经其阳，亦曰四望峡。颜师古曰：“山峭夹水曰峡也。”汉神爵元年，赵充国击西羌，至金城度河，遣骑侯四望峡中，无人，夜引兵上至洛都。喜曰：“吾知羌不能为军矣，使发数千人守杜四望峡中，兵岂得入哉？”《隋志》湟水县有土楼山，即四望山也。洛都，即破羌故城之雒都谷。

拔延山，在卫南二百余里。隋大业五年，大猎于拔延山，长围亘二十余里。《隋志》西平郡化隆县有拔延山。《通典》：“在廓州广威县，炀帝征吐谷浑时经此。”广威，即隋化隆也。又连云山，亦在州西南二百余里。《隋志》达化县有连云山。

浊浑山，在卫西北。旧《志》云，在赤海之西。唐贞观九年，李大亮破吐谷浑于浊浑山，即此。又热水山，在卫西南五百里。《志》云，山南出暖水，流入青海。山北有冷泉，即西宁河源。

丰利山，在卫西青海东。隋开皇初，吐谷浑寇凉州，遣将元谐击破之于丰利山，又败之于青海。又尔汗山，在卫西。隋开皇三年，行军总管梁远破吐谷浑于此。库山，亦在卫西。唐贞观八年，李靖等讨吐谷浑。任城王道宗败之于库山。靖因与道宗等分道穷追。是也。

曼头山，在卫西北。宋泰始六年，北魏主宏遣其将长孙观西击吐谷

浑王拾寅，败之于曼头山。唐贞观八年，李靖等伐吐谷浑，自库山分两道，靖趣北道，其部将薛孤儿败吐谷浑于曼头山。《志》云，隋置河源郡，有曼头城，城盖因山得名也。

车我真山，在卫西六百余里。隋大业五年，炀帝追吐谷浑可汗伏允于覆袁川。分命元寿南屯金山，段文振北屯雪山，杨义臣东屯琵琶峡，张寿西屯泥岭，四面围之。伏允潜遁，遣其名王诈称伏允，保车我真山，是也。金山，亦在卫西界。赤岭，卫西三百二十里。《续通典》，石堡城西三十里有山，土石皆赤，北接大山，南连小雪山，号曰赤岭。去长安三千五百里，自鄯州鄯城县西行二百里，即赤岭也。北魏主诘时，宋云等奉使西域，自洛阳行四千里，至赤岭，乃出魏境。又西行再期，至乾罗国，得佛经一百七十部而还。唐仪凤三年，娄师德使吐蕃。吐蕃迎之于赤岭。开元十九年，吐蕃请交马于赤岭，互市于甘松岭。宰相裴光庭曰：“甘松，中国之阻，不如许赤岭。”乃听以赤岭为界，表石刻约。二十二年又立碑于赤岭，分唐与吐蕃之境。二十六年，命河西节度萧景、陇右节度杜希望，分道经略吐蕃，碎赤岭碑。天宝八载，哥舒翰克吐蕃石堡城，复以赤岭为西塞。长庆二年，吐蕃复请定疆候。大理卿刘元鼎过石堡城，西行数十里，土石皆赤，名曰赤岭，盖陇右故地。距长安三千里，即开元中与吐蕃分界处也。甘松岭，见四川松潘卫。

承风岭，卫西二百九十五里。唐仪凤三年，李敬玄与吐蕃战于青海。兵败还，顿承风岭，阻泥沟自固。贼屯兵高冈以压之。别将黑齿常之引军袭击其营。贼败，遁去。杜佑曰：“岭在广威县西南，东北去鄯州三百十三里。”

白草岭，在卫西北，近甘州界。《水经注》，西平鲜谷塞东南有白草岭。刘宋元嘉初，西秦乞伏炽磐遣太子暮末等出貂渠谷，攻北凉，白草岭、临松郡，皆破之。

勒姐岭，在卫东。阚骞曰：“金城安夷县东有勒姐河，与金城河合。”勒姐岭，勒姐河所出也。汉时，勒姐羌居之。晋义熙十一年，沮渠蒙逊攻拔西秦广武郡，又败西秦兵于浩亶。西秦王炽磐遣将折斐等据勒姐岭，邀其还路，蒙逊击擒之，即此。又白土岭，在卫东南，岭盖与白土故城相

近。唐大中四年，吐蕃叛将论恐热遣兵击鄯州帅尚婢婢于白土岭。胡氏曰：“岭在河州凤林县西。”星岭，在故龙支城西北。隋大业四年，征吐谷浑，度星岭而北，是也。吐蕃置城于此，曰带星岭城。宋元祐二年，赵元昊攻吐蕃唃廝罗宗哥城及带星岭城，即此。

榆谷，在卫西。《水经注》，河水经西海郡南，又东径允川，西历大、小榆谷北。二榆土地肥美，本先零羌所依阻。后汉建武中，烧当羌滇良集诸种，击破先零，夺居大、小榆谷地，由是始强。章和末，烧当豪迷唐据大小榆谷，侵扰河、湟间。护羌校尉邓训，发兵掩击迷唐于写谷。羌乃去大、小榆，居颇岩谷，众悉离散。永元四年，聂尚代邓训为校尉，招迷唐等复居大、小榆谷。迷唐遂叛，寇金城塞。五年，校尉贯友攻迷唐于大、小榆谷，破走之，因作河桥于逢留大河以度兵。十一年，迷唐降，入居金城。诏将其种人还大、小榆谷。迷唐以汉作河桥，兵来无常，故地不可复居，辞不肯徙。校尉吴祉等促使出塞，遂复叛还赐支河曲。十四年，时迷唐衰息，西海及大、小榆谷左右无复羌寇。隃麋相曹凤上言：“西羌为寇，常居大、小榆谷。土地肥美，有西海鱼盐之利，阻大河以为固，缘山滨水，可广田畜，故强大常雄诸种。请及时规固二榆，屯田积谷，隔塞羌，胡交关之路。”从之。永初中，以羌乱，复罢。自晋以后，皆为羌胡所据。后周击逐吐谷浑，复收其地。隋大业四年，筑长城，自榆谷而东，以御吐谷浑也。胡氏曰：“大、小榆谷，即唐之九曲也。去积石军三百里，水甘草良，宜畜牧。”景云初，吐蕃请河西九曲池。鄯州都督杨矩奏与之。吐蕃置洪济、大漠门等城，又置独山、九曲两军以守其地。地肥饶，吐蕃就之畜牧，因以入寇。矩悔惧自杀。开元二年，吐蕃寇临洮，至渭源。宰相姚崇等奏吐蕃旧以河为境。神龙中，尚公主遂逾河筑城，置独山、积石两军，去积石三百里，又于河上造桥。今吐蕃既叛，宜毁桥拔城。从之。五年，陇右节度郭知运大破吐蕃于九曲。天宝十二载，陇右节度哥舒翰击吐蕃，拔洪济、大漠等城，悉收九曲部落。盖即汉大小榆谷地矣。杜佑曰：“榆谷，在兰州五泉县。误也。颇岩谷，又在榆谷西。”

洛都谷，在卫东北。刘昭曰：“浩亶县有雒都谷，”即洛都也。赵充国

夜引兵自四望峡上至落都，即此谷矣。后汉永平初，马武击烧当羌，败于落都谷。羌引出塞，武追破之于东西邨，羌皆降散。东西邨，见上归义城及邯川城注。

写谷，在卫西。后汉章和二年，护羌校尉邓训发湟中秦胡羌兵四千人出塞，掩击叛羌迷唐于写谷。迷唐远徙。是也。《东观记》写谷作“雁谷”。长宁谷，在卫西。《水经注》，湟水径临羌故城南。又东，长宁川水注之。长宁水东南流，径晋昌川。又有长宁亭。亭北有养女岭，即浩亶西平之北山。隋炀帝自拔延山人长宁谷，度星岭，然后至浩亶川，是也。

大允谷，在卫西青海旁。汉时，湟中羌烧当种世居河北大允谷。后汉建武中，烧当玄孙滇良击夺先零卑湍羌地，居大榆中，始强盛。所云允谷、盐池，即此谷也。渴波谷，在卫境青海西。唐开元十五年，河西节度使萧嵩、陇右节度使张忠亮，大破吐蕃于此。

三兜谷，在卫西南。东汉章和末，护羌校尉傅育击烧当羌迷吾，穷追不设备。至三兜谷，迷吾袭杀之。胡氏曰：“三兜在建威县。”或曰在临羌西南。

木乘谷，在卫西。后汉章和初，张纡为护羌校尉，屯临羌。迷吾犯金城塞，纡遣从事司马防与战于木乘谷，败之。谷盖在临羌西境。又龙泉谷，亦在卫西。唐长庆二年，刘元鼎使吐蕃，逾湟水，至龙泉谷，西北望杀胡川，哥舒翰故壁多在焉。杀胡川，盖近青海。

破逻真谷，在卫西南。唐贞观八年，侯君集与任城王道宗自库山分兵出南道，引兵行无人之境二千余里，经破逻真谷，追及吐谷浑王伏允于乌海，大败之。既而还军至破逻真谷。伏允之子顺出降。诏以顺为西平郡王。

黄谷。在故浩亶县东。刘宋永初元年，沮渠蒙逊欲伐西凉，引兵攻西秦浩亶，潜还，乃露布西境云。已克浩亶，将进攻黄谷。谓此。或云，西秦置城戍守于此。

牛心堆，在卫西北。唐贞观九年，李靖败吐谷浑曼头山，进败之于牛心堆。《水经注》，湟水自临羌县东流，合龙驹川，又东合晋昌川，又东合

长宁川，又东合牛心川。川水出西南远山，东北流，径牛心堆，又东径西平亭西，东北入于湟水。三堆，在故浩亶县南。晋隆安四年，后凉吕纂击秃发利鹿孤。利鹿孤使其弟傜檀拒之，败后凉兵于三堆。胡氏曰：“三堆，在浩亶河南。”

西海，在卫西三百余里。一名青海，亦曰鲜水。又为允谷盐池，周围数百里，中有龙驹岛。曲海，在卫西。《北史》云，在吐谷浑北乙弗勿敌国境内。海周围千余里，其种万落，风俗与吐谷浑同。或云，曲海即西海也。

赤海，在卫西北，即赤水也。西汉末，赤水羌与去胡来王相攻。即此。唐贞观九年，李靖败吐谷浑于牛心堆，又败之于赤水源。别将薛万均等又败之于赤海。麟德二年，吐蕃攻夺吐谷浑地，遣使人见，求赤水地畜牧。胡氏曰：“赤海，赤水深广处。唐时有黑党项居赤水西，是也。”去胡来王，媯羌国王名也，见后安定卫。乌海，在卫西塞外。《隋志》云，乌海，在河源郡汉哭山西。李靖等伐吐谷浑，自库山分两道。任城王出南道，历破逻真谷，追及其王伏允于乌海，大破之。咸亨元年，薛仁贵击吐蕃，自大非川进屯乌海。杜佑曰：“吐蕃国出鄯城五百里，过乌海，暮春之月，山有积雪，地有冷瘴，令人气急，不甚为害。”《新唐书》，破逻真谷，去乌海二千余里。误。

黄河，在卫南。自西域流入中国，经积石山，又东北入河州界。《后汉书》注，大河经大小二榆谷北，有逢留之名。和帝永元中，护羌校尉贯友攻破迷唐于大、小榆谷。遂夹逢留大河筑城坞，作大航，造河桥，欲度兵击迷唐。既而迷唐衰灭。曹凤为金城西部都尉，屯龙耆，增广屯田，列屯夹河，合三十四部。会永初羌乱，功垂成而罢。

湟水，在卫北。《汉志》，临羌西北塞外，有西王母石室、仙海盐池，则湟水所出。《括地志》，湟水，一名乐都水，来自牛心堆，经四望山阳，东至允吾入河。湟水左右，地皆肥美。汉武开河西四郡，隔绝羌与匈奴相通之路，斥逐诸羌，不使居湟中地，是也。其后元康四年，先零豪言：“愿时渡湟水北，逐民所不田处畜牧。”是后遂抵冒渡湟水，欲结匈奴绝汉道。赵充国击平之。《元图经》，湟水出祁连山下，东流千余里，合浩亶河。又东

入兰州西境，合洮水，入黄河。”《一统志》，湟水今不经见，卫城北北山之阴有苏木连河，疑即湟水云。

赐支河，在卫西南塞外。应劭曰：“在河关之西，东去河关千余里，即《禹贡》所云析支也。”亦曰析支河。羌人居此，谓之河曲羌。后汉永元五年，护羌校尉贯友造河桥于逢留大河，欲渡河击迷唐。迷唐率部落远徙，依赐支河曲。既而迷唐内附。十三年，复叛还赐支河曲，犯金城塞，败于允川，遂远逾赐支河首。永建五年，护羌校尉韩皓展湟中屯田，置两河间以逼群羌。羌惧而图变，乃移还湟中。两河间，胡氏曰：“逢留大河及赐支河间也。”

西宁河，在卫城北百步。源出热水山，北流五里，经伯颜川，又合那孩川，流五百里，入黄河。又邈水，在卫南。源出西境宿军谷，东流五百里，入于黄河。

浩亶川在卫西北。一名阁门水。浩亶，读曰阁门也。《水经注》：“浩亶河出西塞外，经西平之鲜谷塞。又东径养女北山，东南流，经浩亶故城南，又东注于湟水。《汉志》注，浩亶水出塞外，东至允吾入湟水。”是也。隋大业五年，伐吐谷浑，至浩亶川，以桥未成，斩都水使者黄亘等。数日桥成，乃行。唐咸亨二年，吐谷浑为吐蕃所败。诏徙之于浩亶水南。寻复徙灵州，其故地悉入于吐蕃。朱思本云：“浩亶水出删丹州南删丹山下，东南流七百余里，合湟水而注于黄河。”

宗哥川，在卫西南九十里。源出塞外，经故龙支城东，又东北入于湟河。宋景祐二年，赵元昊攻吐蕃唃廝囉宗哥城及带星岭诸城，渡宗哥河，部兵溺死者甚众。崇宁三年，王厚复湟鄙，进军宗哥川。羌置阵临宗水，倚北山。厚麾游骑登山，攻其北，而亲帅强弩迎射。羌走，分军逾水击之，遂降其城，进下青唐，入廓州，是也。《宋志》，宗水来自青海，下流入湟水。水南有宗谷口，讹曰宗哥，吐蕃因以名其城。

大非川，在卫西。《唐十道图》，大非川在青海南，乌海、星宿海、柏海并在其西，互相灌注。唐贞观八年，李靖败吐谷浑于大非川。后为吐蕃所据。咸亨初，薛仁贵讨之，至大非川，将趣乌海。以乌海险远，议留辎重于

大非岭上,为两栅以守之。别将郭待封不从。仁贵前行,破吐蕃于河口,进屯乌海,以俟待封。待封将辎重徐进,为吐蕃所败。仁贵还屯大非川,吐蕃就击之,死伤略尽。又开元十四年,王君毳追击吐蕃于大非川,因进至青海西,乘冰而渡,破之。《唐志》,川在积石军西。胡氏曰:“河口,积石河口也。自唐鄯州鄯城县西行三百余里,即大非川矣。”

允川,在卫西。《后汉志》注:“允川去赐支河曲数十里,在大小榆谷之西。金城塞外地也。为羌豪依阻处。”永元十三年,烧当羌迷唐叛还赐支河曲,将兵向塞。校尉周鲋等击破之于允川,即此。良非川,在卫西南,近河源军城。唐仪凤中,吐蕃寇河源军,屯兵于良非川。河源道经略大使黑齿常之击破之。永隆二年,常之复破吐蕃论赞婆于良非川,收其粮畜而还。安夷川,在卫东北。安夷故城以此名。《水经注》:“湟水东合安夷川,又东合勒姐溪水。”又有晋昌川,《水经注》:“在湟中浩亶县西南,合长宁川而注于湟水。”长宁川,见长宁谷。勒姐溪,在卫东北,源出勒姐岭。后汉章帝时,勒姐羌作乱,马防讨平之。《水经注》:“湟水东径安夷县,又东合勒姐溪。”

昴川,在卫西南。宋元嘉三年,吐谷浑别部握逵等帅部落叛西秦,奔昴川,附于吐谷浑王慕璜,是也。又居茹川,亦在卫西南。唐贞观九年,李靖等伐吐谷浑别将执失思力,破之于居茹川。

覆袁川,在卫西塞外。隋大业四年,伐吐谷浑,渡浩亶川。吐谷浑可汗伏允走保覆袁川,因分军四面围之,即此。又突伦川,亦在卫西塞外。唐贞观八年,李靖讨吐谷浑,督诸军经积石山、河源,至且末,穷其西境。闻伏允在突伦川,将奔于阗,别将契苾何力追之。碛中乏水,刺马血饮之,袭破其牙帐。侯君集进逾星宿川至柏海,还与靖军合。星宿川,亦曰星宿海。柏海,又在其西。突伦川,《唐书·薛万均传》作“图伦碛,”盖语转也。

伏罗川,在卫西南。宋元嘉二十二年,北魏主焘遣拓跋那击吐谷浑于白兰,破之。二十九年,吐谷浑王拾寅始居伏罗川。川盖与白兰山相近。白兰,见后朵甘思。逻娑川,在西塞外。《唐志》,吐蕃赞普牙在此,有罗些城。咸亨初,以薛仁贵为逻娑道行军总管,进讨吐蕃,是也。

阔水，在卫西南境。《唐十道图》，在党项羁縻州界。贞观八年，李靖伐吐谷浑，赤水道行军总管李道彦出党项中，行至阔水，乘其无备，袭之。群羌怒，邀击道彦，败之。白水涧，在卫西北二百三十里。唐永淳初，吐蕃寇河源，军使娄师德败吐蕃于白水涧，是也。开元中，置白水军。盖因涧以名。

那孩川渠，卫南五十里。又卫北八十里有广牧川渠。《志》云，卫境之渠约二十有余，分流灌田，民资其利。盐池，在卫西三百里。《汉志》，金城临羌县有盐池。《十三州志》，卑禾羌海北有盐池。唐贞观八年，分道讨吐谷浑，使高甑生出盐泽道，谓盐池也。

绥远关，在卫东南。《宋志》，绥远关，本名洒金平。东至湟州二十里，西至胜宗谷口三十里，南至麻宗山五十五里，北至丁星原四十里。崇宁二年置关于此，属湟州，寻废。

石峡口，卫东七十里。其在卫西者，又有乱铁沟山口、伯颜川山口、西番沟山口。在卫南者，有那海川山口、可可打班山口。在卫北者，又有军卜鲁川山口、黑松林山口、彻儿山口。皆有卫卒戍守。又置石峡堡、伯颜川堡、军卜鲁川等堡，共为防御云。平戎堡，在卫东七十里。卫东南二百三十里有巴川堡，巴川马驿置于此。又东五十里有古鄯堡，亦为古鄯马驿。俱戍守要地也。

悬水镇，在青海南。唐贞观八年，遣李靖等击吐谷浑。李君别将精骑击贼于青海南悬水镇，大胜而还。

承风堡，在卫西南。开元二十九年，吐蕃攻承风堡，又袭破振武城。胡氏曰：“堡在振武西。或云，在承风岭上。”安川堡，在废乐州西南百余里巴金岭上。宋元符二年，收复。明年，置堡于此。《宋志》云：“堡南至河州安乡关三十里。”又宁川堡，在安川堡北四十里，亦宋元符三年置。

顺通堡，在故积石城东十八里。宋大观中置，属积石军。其东南二十五里为临松堡，北二十里曰怀和寨，俱宋置。

石门堡，在故振武军北，宋政和七年筑。又震武城旁有浮桥，宋政和六年赐名通济，兼置堡，曰善治。其相近者，又有大同堡。

清平寨，在卫西南百里，宋崇宁三年置。又保寨寨，在河东南六十余里，旧名安化城。又怀和寨，在卫西百七十里，旧名丁令谷。俱宋崇宁中改置，属西宁州。宁寨寨，在废廓州东十七里，宋崇宁中置。又有同波堡，在废廓州西十七里，南至大河，不及一里，亦宋置。

通湟寨，在废乐州东三十五里。《宋志》，旧名罗吼抹通城。元符二年收复。三年，改置通湟寨。其东四十里接兰州境之通川寨。又有宁洮寨，在通湟寨西四十五里，亦元符中置。安陇寨，在废乐州南四十五里，本名陇朱黑城，宋元符中置寨。《宋志》，寨东三十里为赤沙岭，南三十五里为巩藏岭，西二十五里为麻宗山。又有德固寨，在废乐州西北九十里，番名胜铎谷。宋崇宁中修筑，赐名德固寨。寨南一里为渴驴岭，北二十里为清江山。又西三十余里即龙支城矣。又临宗寨，在废乐州北七十里，亦宋崇宁中置。《宋志》：“寨南十五里即乳洛河寨，东十五里为三诺巩哥岭。”又有南宗堡，在通湟寨北。又东有峡口堡，《宋志》，崇宁二年，王厚收复，置堡于此。

若厚坞，在卫北。晋义熙九年，沮渠蒙逊败南凉王秃发傉檀于若厚坞。又败之于若凉，遂进围乐都。若凉，盖亦坞名也。罗亭，在卫西南。后汉延熹二年，西羌烧当、烧何、当煎等八种羌叛，寇陇西金城寨。护羌校尉段熲出湟谷击破之，追至罗亭。《东观记》，至积石山，即与罗亭相近。

盘夷戍，在卫西南。宋元嘉五年，河西王蒙逊伐秦，至盘夷。秦乞伏元基将兵拒之。蒙逊还攻西平，克之，是也。大毋桥，亦在卫西南。宋元嘉二十一年，魏王焘遣拓跋伏罗击吐谷浑，至乐都，引兵从间道袭之，至大毋桥。吐谷浑王慕利延大惊，逃奔白兰，即此。

碾伯所，在西宁镇北百二十里，旧湟水县地，明置碾伯守御千户所。《志》云，西宁卫，在湟水南，碾伯所在湟水北，互为形援。议者谓庄浪兵宜防碾伯，而西宁游兵宜驻古浪，以防岔口镇羌。盖西宁与庄浪相唇齿也。所城周三里有奇。今亦设碾伯营城守。

迭烈孙堡，所南六十里，又南至西宁镇六十里。老鸦城堡，在所东五十里。又东四十里为水沟堡。《里道记》云，西宁东百七十里为老鸦城驿。又

有嘉顺驿，在卫东百三十里。又东九十里为水沟驿。盖皆在所境也。

附考：

沙州卫，在肃州卫西八百有六里。至布政司三千七百五十里。古三危地，舜流共工于此。其后子孙为羌、戎，代有其地。春秋时，谓之瓜州。《左传》襄十四年：“晋范宣子数戎子驹支曰：‘秦人迫逐乃祖吾离于瓜州。’”又昭九年：“周詹桓伯曰：‘允姓之奸，居于瓜州。’”是也。秦及汉初为月支、匈奴地。武帝逐匈奴，属酒泉郡。后元年，分置敦煌郡。后汉西域副校尉居敦煌。魏晋时，仍为敦煌郡。《十六国春秋》，晋咸康元年，张骏分敦煌等郡为沙州。永和十年，张祚置商州，仍治敦煌郡。西凉李暠都于此。北凉得其地，亦置沙州。后魏改为瓜州，并治敦煌郡。后周因之。隋初，废郡，仍曰瓜州。炀帝复改州为敦煌郡。唐武德二年，改曰沙州。五年，又改为西沙州。贞观七年，复曰沙州。天宝初，曰敦煌郡。乾元初，复故。后没于吐蕃。大中三年，张义潮以州归朝，置归义军授之。其后曹义金、曹元德等相继有其地。终五代之季，瓜、沙二州，皆附于中国。宋初亦羁属焉。祥符六年，沙州曹贤顺入贡，授归义节度使，寻亦附于契丹。天禧三年，契丹册贤顺为敦煌郡王。景祐初，没于西夏。元初，置沙州，寻为沙州路。明洪武二十四年，元裔阿鲁哥失里遣使朝贡。永乐三年，置卫以授其首领困即来。宣德七年，上言诸夷侵掠，愿徙居察罕旧城。不许。正统十一年，其首领喃哥以困于瓦剌，率部属来归。因徙置内地，卫废。

敦煌废县，今卫治。汉县，为敦煌郡治。赵充国谓自敦煌至辽东，万一千五百余里，是也。杜林曰：“敦煌，古瓜州地，生美瓜。”杜佑曰：“至今犹出大瓜。长者，狐入其中，首尾不出。”又汉有步广侯官，为中部都尉治。魏、晋仍为敦煌县。后为前后凉及西凉所据。宋永初元年，沮渠蒙逊围李歆于敦煌，筑堤壅水以灌其城，遂克之。后魏亦为瓜州治。宋元徽二年，柔然寇魏敦煌。尚书奏：“敦煌僻远，介居南北强寇之间，恐不能自固，请内徙就凉州。”韩秀以为：“敦煌隔阂西北二番，使不得相通。今徙就凉州，不惟有蹙国之名，且姑臧去敦煌千有余里，防逻甚难，二番必有交通窥窬之志。若骚动凉州，则关中不得安枕矣。”乃止。后周改县为鸣

沙县。隋大业中，复曰敦煌。《隋书》，大业三年，裴矩造西域地图，从西倾以去纵横所亘，将二万里。发自敦煌，至于西海，凡为三道。北道从伊吾，中道从高昌，南道从鄯善，总凑敦煌是也。唐亦为沙州治，兼置豆卢军于城内。其后没于吐蕃。大中以后，迄于宋世，羁属而已。西夏仍为沙州治。元初，置沙州，以敦煌县并入。

寿昌城，在卫西百五十里。汉龙勒县地。后魏置寿昌县，属敦煌郡。西魏时，亦曰寿昌县。后周省。平康废县，在卫西南。又有东乡等县。《五代志》，俱后魏置，后周并入敦煌。

效谷城，在卫东北。汉县，属敦煌郡。桑钦曰：“本鱼泽障也。汉武帝元丰六年，济南崔不意为渔泽尉，教民力田以勤效得谷，因立为县。魏晋因之。隆安中，北凉李暠为效谷令，为众所推，据有敦煌，是也。西魏时，尝置效谷郡。后周并入敦煌县。渊泉城，在卫东北。汉县，属敦煌郡。阚骃曰：“地多泉水，故以为名。”后汉及晋因之。后周废。

龙勒城，在沙州西。汉县，属敦煌郡。后汉因之。《汉志》注，县有玉门关及阳关，郡都尉治焉。晋仍属敦煌郡。前、后凉皆因之。后魏亦曰龙勒县。后周并入敦煌县。阳关城，在故龙勒县西。晋所置阳关县，因故阳关为名，属敦煌郡。后魏废。又昌蒲城，亦在卫西。晋置昌蒲县，属敦煌郡。后废。

瓜州城，卫东二百八十里。东至肃州卫五百二十六里。汉敦煌郡地。魏晋因之。晋惠帝元康五年，分置晋昌郡。西凉时，又为会稽、常乐二郡地。西魏亦置晋昌郡。隋初，郡废，属瓜州。大业初，属敦煌郡。唐武德五年，置瓜州，治晋昌县。天宝初，曰晋昌郡。乾元初，复故。后没于吐蕃。大中间，复内附。宋没于西夏。元徙瓜州民于肃州，其城遂废。晋昌废县，唐瓜州治也。本汉敦煌郡冥安县地。隋为常乐县地。唐武德四年，改置晋昌县于此，寻为州治。至德以后，没于吐蕃。宋时，西夏亦置晋昌县。元废。

常乐城，在废瓜州西百里。汉冥安县地。应劭曰：“冥，水名也，出县北。”又有南藉端水，出南羌中，西北入冥安泽，溉民田。后汉亦为冥安县。晋因之，仍属敦煌郡。《志》俱作“宜安”，误也。西凉于此置常乐郡。后

魏因之。后周并凉兴、广至、冥安、渊泉四县为凉兴县，仍为常乐郡治。隋开皇初，郡废，因改县为常乐。唐武德四年，改置晋昌县。五年，又于汉广至县地改置常乐县，属瓜州。开元十五年，吐蕃陷瓜州，悉兵攻常乐。县令贾师顺拒却之。后没于吐蕃。

广至城，在废瓜州西北。汉县，属敦煌郡。后汉及魏晋因之。西凉置广夏郡于此。后魏郡废，县仍属敦煌郡。后周省县入凉兴。《通典》，唐改置常乐县，在故广至县西。

凉兴城，在废瓜州西七十里。汉冥安县地。前凉析置凉兴县，属敦煌郡。晋太元十二年，吕光攻索暾于敦煌，自酒泉进攻凉兴。隆安二年，北凉段业分敦煌之凉兴、乌泽及晋昌之宜禾为凉兴郡。宋永初元年，沮渠蒙逊灭西凉，以索元绪为敦煌太守。都人共招其故太守李恂复入敦煌。元绪奔凉兴。后魏亦曰凉兴郡。西魏郡废，仍为凉兴县。后周又改置凉兴县，为常乐郡治。

宜禾城，在废瓜州东北百二十里。汉广至县有昆仑障，为宜禾都尉治。后汉因之。三国魏析置宜禾县，属敦煌郡。晋因之，惠帝元康五年改置晋昌郡。《通典》，后魏正光中，尝于宜禾城置会稽郡。后周废入会稽县。

伊吾城，在废瓜州北。晋置县，属敦煌郡。元康中，改属晋昌郡。后废。《通典》，晋昌县北有伊吾城。是也。又新乡城，在废瓜州南百八十里。晋置新乡县，属敦煌郡。西凉尝置新城郡于此。后魏郡废，县仍属敦煌郡。西魏废县。唐为新乡镇。

大同城，在沙州西南。唐景云中，吐蕃所置。开元十七年，瓜州刺史张守珪等击吐蕃大同军，大破之，是也。又墨离军，杜氏曰：“在瓜州西北千里。”本月氏地，唐置墨离军，属河西节度。天宝五载，王忠嗣讨吐蕃于墨离军，获其全部而还。又豹门城，在废瓜州北四百五十里。唐置豹门守捉于此。后俱没于吐蕃。

苦峪城，在废瓜州东。东至肃州四百里。明正统七年，沙州卫酋困即来言诸夷屡见侵掠，请边将发戍卒助修苦峪旧城。从之。成化九年，哈密为土鲁番所残破，其酋罕慎窜居苦峪城。马文升曰：“土鲁番至哈密十数

程,中经黑风川。哈密至苦峪又数程,皆绝水草。贡使往返,必驮水然后行也。”正德以后,土鲁番益张,苦峪诸城,皆为所残破。

鸣沙山,在沙州城南七里。一名沙角山,又名神沙山。峰峦险峻,天气晴明,沙鸣闻于城内。其沙或随人足而堕,经宿辄还山上。高居诲云:“瓜州南十里有鸣沙山,冬夏殷殷有声如雷,即《禹贡》之流沙。又东南十里,即三危山云。”羊膊山,《志》云,在沙州南。多岩石,无草木。山北有一岩似羊膊,因名。

三危山,沙州东南二十里。其山三峰峭绝。舜窜苗于三危。《禹贡》,导黑水至于三危。宋元嘉二十二年,魏主焘遣军击吐谷浑。别将杜丰引军追击,度三危至雪山,擒慕利延兄子被囊等,即此。孔氏曰:“三危山,俗亦名卑羽山。”宋白曰:“西凉武昭王于三危山东置长乐镇。”

龙勒山,《括地志》,山在汉龙勒县南百六十五里,县以此名。《一统志》,在废沙州东百二十里。山有玄泉。汉李广利伐大宛,还至此山。众渴甚,广利引刀刺山,有泉涌出,即此。此塞山,《志》云,在沙州西。汉武帝时,天马朝发京师,夕至此塞山下,谓此。又观音山,在沙州西。弘治中,土鲁番尝聚掠于此。白龙堆在寿昌废县西。《汉志》注,敦煌正西关外有白龙堆沙。《西域传》,元始中,车师后王国有新道,出五船北,通玉门关,往来差近。戊己校尉徐普欲开以省道里,半避白龙堆之险,不果。班固曰:“近有龙堆,远则葱岭,殆天地所以界别区域、绝外内也。”

流沙,在卫西。旧《志》,自玉门出度流沙,西行至鄯善,北行至车师。一云,且末国,在鄯善西。其国之西北有流沙数百里,夏日有热风,为行旅之患。风所至,唯老驼预知之,即喷而聚立,埋口鼻于沙中。人以为候,亦即将毡拥蔽鼻口。其风迅驶,斯须过尽,若不防者,必至危毙。桑钦云:“流沙在张掖居延西北。”杜佑曰:“在敦煌郡西八十里。”《志》云,玉关外有二断石,极大,世谓之三陇山,乃流沙碛也。晋太元八年,苻秦遣吕光伐西域,行越流沙三百余里。焉耆诸国皆降。宋元嘉十三年,魏主焘遣使者王恩生使西域,渡流沙,为柔然所获,遂不能达。其后遣使者诣西域,常诏河西王牧犍发导护送出流沙。十八年,沮渠无讳据敦煌,畏魏兵

之逼，谋西度流沙，遣其弟安周击鄯善。既而无讳西就安周，士卒经流沙，渴死者大半。二十二年，魏主焘遣将万度归伐鄯善，至敦煌，以轻骑度流沙，袭鄯善，下之。盖道出西域，流沙为险道也。

蒲昌海，在玉门、阳关以西三百里。一名盐泽。广袤三四百里，则葱岭、于阗两河之所注。汉大初中，自敦煌西至盐泽，往往起亭鄣。汉张骞言：“于阗之西水皆西流注西海。其东水东流，注盐泽。”《西域传》，盐泽一名蒲昌海，其水停居，冬夏不增减。《括地志》，盐泽，亦名渤泽，亦名辅日海，亦名穿兰，亦名临海，在沙州西南。《唐志》，蒲昌海，在蒲类海东。是也。亦谓之蒲类海。后汉初平初，北匈奴呼衍王寇伊吾。敦煌太守马达赴救，至蒲类海，寇引去。谓此。

龙勒水，在废龙勒县。出南羌中，东北流，汇为大泽，溉民田。其下流出塞外，经浚稽山南。《志》云，沙州境有渥洼水，汉元鼎四年，天马生渥洼水中，即此水也。蒲奴水，在塞北龙勒水南。汉武遣商丘成出西河，击匈奴。匈奴追至蒲奴水，战不利，引去，是也。玉门关在故寿昌县西北。《汉志》注，龙勒县有玉门关，故都尉治。《舆地广记》，关在寿昌县西北百十八里。”汉武使霍去病破走月支，开玉门关，通西域。太初初李广利伐宛不克。使使遮玉门曰：“军有敢入者辄斩之。”又遣军正任文屯玉门关是也。后汉建武中，闭玉门关，谢西域之质。《后汉书·西域传》，自敦煌西出玉门、阳关，涉鄯善，北通伊吾千余里。班超在西域，上书：“愿生入玉门关。”隋大业四年，遣将薛世雄等出玉门，击伊吾，七年，遣裴矩驰至玉门关，晓谕西突厥处罗入朝，即汉玉门故关矣。

阳关，在故寿昌县西。《汉志》注，都尉治也。杜佑曰：“阳关在玉门之南。”《高居诲使于阗记》，从沙州西渡都乡河，曰阳关。欧阳忞曰：“关在寿昌县西六里，为西域之要隘。”

昆仑塞，即汉广至县之昆仑障，为宜禾都尉治。后汉永平十七年，窦固等出敦煌昆仑塞击西域，破白山寇于蒲类海上。又延光二年，张瑁议以酒泉属国吏士二千余人集昆仑塞，先击北匈奴呼衍王。《后汉志》注：“昆仑，即昆仑障也。”白山，见赤斤蒙古卫。蒲类，见西域火州。王子庄，

在沙州东。正德十年，土鲁番繇此内犯。《志》云，瓜州北有白城子，亦昔时戍守处。

赤斤蒙古卫，东至肃州界四百三十里，西至沙州界百八十里。古西戎地。战国时，月氏居之，后为匈奴所据。汉武逐匈奴，此为酒泉、敦煌二郡地。晋属晋昌郡。隋初，属瓜州。大业中，属敦煌郡。唐初，亦属瓜州。广德后，没于吐蕃。宋为西夏所据。元为瓜州地，属沙州路。明永乐二年，故鞑靼丞相苦术子塔力尼等率所部来归。诏建赤斤蒙古十户所，以塔力尼为千户。寻升为卫，自是朝贡不绝。

白山，在卫北二十里。多草木禽兽。土人呼为析罗漫山。

罕东卫，在故沙州东南，亦西戎部落。明洪武二十五年侵塞，凉国公蓝玉讨之，土酋哈答等遁去。三十年，酋长锁南吉刺思遣使人贡，立罕东卫授之。成化中，罕东酋奄章与诸族仇杀，逃居沙州。朝廷许其耕牧输贡。子曰班麻思结，孙曰只克。时诸部皆为土鲁番所困。正统四年，只克以沙州卫既废，请立罕东左卫治其地。从之。遂以只克领卫事。弘治八年，土鲁番复掠沙州。自是土鲁番入寇，每假道罕东令给食，而亦不刺、安定，又数掠其资，罕东益微。嘉靖初，其酋日羔刺率部属来归。边臣分处其众于肃州塞内，罕东遂墟。

阿真川，在卫西南。明初，蓝玉讨叛部哈答等，深入至阿真川，是也。

毕力术江，在卫西。宣德九年，罕东别部劄儿加邀劫使者，命刘广等讨之。广使指挥祁贤先以百骑往覘敌，行月余，渡毕力术江。劄儿加惧，诣贤自归，诏宥之。《志》云，江与安定、曲先等卫接界。或讹为必出江。

安定卫，在罕东卫西，沙州卫南。本蒙古别部。其地广袤千里，无城郭庐舍。明洪武七年，撒里畏兀儿及安定王卜烟帖木儿遣使人贡，命其酋长立为四部：曰阿端，曰阿真，曰若先，曰帖里。明年，改立安定、阿端二卫。永乐二年，安定王为曲先所杀，部落溃散。十一年，其孙亦攀丹来朝，复故封，归安定。成化中，为土鲁番所破，苗裔散失。弘治初，其长干奔请嗣。许之。正德七年，亦卜刺破安定，据其地，余众内徙。嘉靖间，复命酋领其众。然安定王后无传，而阿端久没，莫知其处。

媯羌城，在卫西北。《汉书·西域传》：“媯羌国王号去胡来王。去阳关千八百里，去长安六千三百里，僻在西南，不当孔道。西北至鄯善，乃当道云。”元始二年，去胡来王唐兜与赤水羌相寇，不胜，亡降匈奴，遂为匈奴所并。

必出江，在安定卫东。明永乐二十一年中，使乔来喜使西域，行至必出江，死于贼。甘肃都指挥朱英率兵击安定，斩获甚众。安定王诣阙谢，宥归。即此。

曲先卫，在安定卫西。古西戎部落。宋淳祐三年，蒙古主使忽必烈将兵击大理，自曲先脑儿而南，即此。寻置曲先答林元帅府。明洪武四年，置曲先卫，授其酋散西思。后为朵儿只把所攻，并入安定，居阿真地。永乐四年，指挥哈三散即思三即等表言：“西番侵暴，乞仍立卫，徙治药王滩。”报可，以三即领卫事，并徙安定卫所于昔儿汀。宣德以后，屡入朝贡。成化中，为土鲁番所扰，请率部属内徙，从之，遂失故地。

且末国，在卫西南。《汉书·西域传》，鄯善西通且末七百二十里，北接尉犁，南至小宛，可三日行。宋元嘉十九年，沮渠无讳夺鄯善，鄯善王比龙奔且末。《北史》：“且末在鄯善西，去代八千三百二十里。”隋大业五年初，平吐谷浑，于古且末城置且末郡，统肃宁、伏戎二县。《新唐书》，自于阗东关东行，入大流沙，行千里，至故折摩驮那，古且末也。又千里至故纳缚波，古楼兰也。小宛国，在且末国南。《西域传》：“治扞零城，东与媯羌接，僻南不当道。”

昆仑山，在卫东北。或云肃州卫境有昆仑山，绵延至此。《一统志》，卫北拒肃州。是也。明永乐二十二年，部长三即思及安定部劫杀中使。洪熙元年，命朱英讨破安定，追逾昆仑西数百里，至雅令阔地。曲先远遁。即此。

西番江，在卫西。明宣德四年，指挥那那汉表言：“为安定所侵掠，率余众溃居西番江，不敢归。”诏安定酋遣还所掠，仍谕居西番江者，使复业，是也。


且末河，在卫西。《隋志》，且末郡有且末水、萨毗泽。《唐志》，度且末河五百里，至播仙镇，古且末城也。

责任编辑 门 辉

装帧设计 王小英



ISBN 978-7-5528-0610-6



9 787552 806106 >

定价：162.00元 / 套